

沈雲龍主編

近代中國史料叢刊

第五輯

文海出版社印行

近代中國史料叢刊

沈雲龍教授主編

近代中國史料種類之繁，卷帙之多，遠過其他時代。就內容而論，可別爲原始資料（Primary sources of materials）與次要資料（Secondary sources of materials）兩類。前者如歷朝實錄、東華錄、政治官報、大臣奏疏、外交檔案、名臣專集、函牘手扎、日記、自訂年譜、回憶錄等；後者如官書傳記、行狀、碑誌、新聞記載、雜誌論文、私人筆記、以及參用史料，專題研究所得而成之史籍，與夫總合敘述史蹟之真相，而使讀者明瞭一事，或一時代之政治外交社會經濟情況及人民生活之專著等，均其明例。

本社向以搜集史料影印流傳爲職志。其卷帙較多之大清實錄、東華錄、十朝聖訓、清季外交史料，政治官報等鉅製，均已先後出版，甚獲好評。茲再商得近代史學家沈雲龍教授之同意，就上述範圍，代爲搜羅選輯卷帙較少而有價值之史料，陸續影印，並承惠允將其所藏罕見之孤本若干種先行借出攝印，以供海內外學人治近代中國史者之參考。

文海出版社謹識

中華民國五十五年十月

近代中國史料叢刊

第五輯

目 錄

- | | |
|------------|-------|
| 平定粵匪紀略 | 杜文瀾撰 |
| 淮軍平捻記 | 周世澄撰 |
| 請纓日記 | 唐景崧著 |
| 東方兵事紀略 | 姚錫光著 |
| 拳匪紀略 | 僑析生撰 |
| 庚子海外紀事 | 呂海寰著 |
| 張文襄公（之洞）年譜 | 胡鈞撰 |
| 民國之精華 | 佐藤三郎輯 |
| 萬竹樓隨筆 | 左舜生著 |
| 近三十年見聞雜記 | 左舜生著 |

近代中國史料叢刊第五輯

沈雲龍主編

平定粵匪紀略

杜文瀾撰

文海出版社印行

同治十年印

平定粵匪紀略

京都聚珍齋檢子板

欽惟我

朝重熙累洽二百餘年文治武功卓犖今古乃粵逆初起
羣盜如毛林文忠未至軍而薨李文恭方出師而歿繼
以周賽烏向諸公而一挫於平南再挫於永安功隳垂
成餘燼復煽而湘而衡而鄂而皖以至金陵不守逆燄
肆張其故何歟承平日久民物滋豐數窮理極天道也
兵不習戰將不知兵或視爲邊徼小寇而輕心掉之及
猝臨變故則又相顧愕然罔知所措人事也天運循環
平陂往復我

文宗顯皇帝聖武天錫咸豐壬子

特畀曾公國藩以簡練湘卒之權余以非材亦拜督師之

命當是時江漢三陷矣余與中丞胡文忠檄求湘援竭智畢

能者兩載乃拔漢陽趨武昌刷黃蘄斬曾公復率羣師

水陸東下是時我軍聲威雖振逆勢仍極鴟張凡陣亡

者若而人挫衄者若而人東南繼陷者若而郡邑行省

曾公督師自楚攻江皖胡文忠駐楚皖界余亦控上游

與爲首尾之應潯陽再駕而始平金陵九困而不拔恭

逢我

皇上稟

兩宮皇太后慈訓

廟略十全俾曾公得以運籌於安慶沉圖中丞躬冒矢石於城下破巨穴而殲醜類吳越肅清大功乃告厥成蓋其難也竊維自古朝廷之聖莫聖於我

朝今日人才之盛莫盛於衡霍余尤幸者當前將帥奇才如林無不意相合力相齊患相恤功相讓信乎同寅協恭如此其和衷也夫鬼方之克非傳說力高宗力也車攻馬同非方召申甫力宣王力也有唐淮西小役耳昌

黎作頌亦推本於惟斷乃成而况我

朝聖德神功撥亂反之正者度超前古曾公與余輩所上
兵事一經

聖裁萬里外如親堂陛可不敬謹編次傳信萬世乎因商
之唐蔭雲廉訪丁心齋盛旭人鄭譜香觀察擬緝平定
粵匪一書杜小舫觀察久贊江南戎旃比督淮筴在楚
屬任纂輯之役蔭雲諸君參酌討論之越半年成紀略
十八卷附記四卷以恭紀

聖功而昭來許其事覈其言切粵匪所擾之處陷而失克

而復罪而罰功而賞皆以各處奏報所奉

諭旨爲經足與

國史相表裏夫天祿石渠匪特草野不能見卽仕宦亦不能徧窺此書出而荒陬遐滢白叟黃童皆可按籍而仰

文宗顯皇帝之經營彪炳星日

皇上所以紹開泰運人才所以効命

朝廷者一展卷而恍然置身揖讓於兩階干羽間也爰弁簡端用上萬年有道之頌焉同治四年閏五月總督兩湖使者官文序

								2
								3
								4
								5
								6
								7
								8
								9
								10
								11
								12
								13
								14
								15
								16
								17
								18
								19
								20
								21
								22
								23
								24
								25
								26
								27
								28
								29
								30
								31
								32
								33
								34
								35
								36
								37
								38
								39
								40
								41
								42
								43
								44
								45
								46
								47
								48
								49
								50
								51
								52
								53
								54
								55
								56
								57
								58
								59
								60
								61
								62
								63
								64
								65
								66
								67
								68
								69
								70
								71
								72
								73
								74
								75
								76
								77
								78
								79
								80
								81
								82
								83
								84
								85
								86
								87
								88
								89
								90
								91
								92
								93
								94
								95
								96
								97
								98
								99
								100

平定粵匪紀略總目

第一卷

道光三十年六月起至咸豐二年十二月止

第二卷

咸豐三年

第三卷

咸豐四年

第四卷

咸豐五年

第五卷

咸豐六年

第六卷

咸豐七年

第七卷

咸豐八年

第八卷

咸豐九年

第九卷

咸豐十年正月起到至六月止

第十卷

咸豐十年七月起到至十二月止

十一卷

咸豐十一年正月起到至六月止

十二卷

咸豐十一年七月起到至十二月止

十三卷

同治元年正月起到至六月止

二十四卷

同治元年七月起至十二月止

十五卷

同治二年正月起到至六月止

十六卷

同治二年七月起至十二月止

十七卷

同治三年正月起到至四月止

十八卷

同治三年五月起至九月止

附記四卷

賊名記

邪說記

逆蹟記

瑣聞記

This image shows a large rectangular frame containing a grid of 10 vertical columns. The grid is mostly empty, but there are some faint markings and small dark spots, particularly in the upper right section of the grid. The overall appearance is that of a scanning artifact or a very faint document page.

平定粵匪紀略條目

一是紀仿

皇朝武功紀盛及

聖武記編輯自道光三十年六月廣西倡亂起至同治三年九月生擒洪福瑱止都爲十有八卷據事直書節去繁尤不敢臆增一字

一史書備列盜賊姓名事蹟以懲奸慝粵逆潢池盜弄實繁有徒正記難詳故另列賊名記邪說記逆蹟記瑣聞記凡四卷

逆匪蹤迹或傳諸在事之人或見諸時人筆託及諸臣行述傳鈔供詞必考證確符始列於篇戰功悉遵邸報不敢有所增益因是編成於湖北疏稿文集均資采取故述楚事較詳

一在事文武同官同姓者居多紀中不得不直書其名欽差大臣及各直省督撫則書銜書姓而不名有述

旨處仍書名

一文武員弁升降不時皆就其時之官書之有奏疏叙名而未詳爲何官者仍照書名

是編專叙粵逆事如僧王及吳漕督之勦除擒匪多將軍之蕩洗回匪各直省之懲捕騎馬賊土匪教匪非無豐功偉績因與粵逆隔絕故未備書

逆匪竄陷城邑有未見邸鈔者闕之尋常戰功數數見者皆不書

殉難文武官紳貞烈婦女但經各省采訪無不上邀恩卹已沐

闡揚之典無俟尤書惟擇其最著者酌書之

一我

朝積德累仁

神天默護兵興後各省所報

關帝及諸神顯聖護佑者數十疏均已疊奉

綸音分別崇封書額酬答

靈貺不及縷書其有

神異尤著者述瑣聞附記中

一是編專叙實事不尙文辭凡忠臣碩士所作絕命詞
及哀江南諸詩賦概未鈔錄

一兵興之前童謠里讖無處無之非不隨時徵應究屬

虛渺概不敢書

一擾亂之地甚廣戡亂之功甚宏是編僅錄所見所聞
竊恐挂漏不少伏望閱者搜羅考訂不憚見貽俾資
改補以備

方略之采取幸甚

古今圖書集成

三

平定粵匪紀略卷一

道光三十年庚戌六月廣西逆民洪秀全倡亂於桂平縣之金田邨

廣西去京師四千六百餘里五嶺西偏蠻夷雜育醜類素易嘯聚唐時黃巢事亂編筏浮湘水逾江而東渡淮而北禍徧天下發軔實維桂州桂卽今之廣西省會也我

朝聲教所訖反舌裸身之國雕題黑齒之鄉罔不航寶梯琛稽顙交臂卽間有邊釁一經撻伐剋日盪平何期

桂林貢賦內地而逆匪洪秀全等竟踵黃巢之迹弄
兵潢池荼毒泯焚爲禍至此初道光二十七年間粵
西歲饑多盜巡撫鄭祖琛嚴檄緝治不能戢適有湖
南逆民雷再浩擾至粵境盜益肆柳慶思潯及南甯
梧州各郡爲尤甚按察使勞崇光馳往捕治南路稍
平二十九年新甯逆民李沅發復竄及柳州桂林二
十年四月逐沅發回新甯甫就擒而粵匪復蠶起有
陳亞癸歐祖潤山猪箭顏品瑤等各率黨羽數千四
路劫掠此外未著名者不下數十股斯時洪秀全等

伏而未動也六月鄭巡撫出師督勦駐平樂府洪秀全等始倡亂於桂平縣之金田邨秀全者原籍廣東花縣生於嘉慶十七年壬申身癡肥略識字父名國游與母均早死素飲博無賴以演游江湘間先是廣東有奸民朱九濤倡上帝會邪教亦名三點會秀全及同邑之馮雲山師之旋以秀全爲教主道光十六年秀全及雲山至廣西在桂平武宣二縣接壤之鵬化山中傳其教桂平人曾玉珩家素豐延秀全訓蒙時秀全妹婿蕭朝貴武宣人亦家於桂平與楊秀

清比鄰遂與秀清相結納桂平人韋昌輝貴縣人石
達開先後入教秀全病極危旋愈詭云病死七日而
蘇能知未來事謂舉世將有大災惟人會拜上帝可
免拜上帝者各納銀五兩爲香鑿資凡入會不稱師
徒而曰兄弟遇婦女則曰姊妹意不欲人自貶則易
廣其傳故楊秀清等皆兄事之秀全自知無術不足
惑衆乃託名西洋教彼教所崇爲耶蘇秀全欲駕而
上之撰天父名目謂天父名耶火華以耶蘇爲長子
秀全爲次子故稱耶蘇爲天兄復與馮雲山盧賢拔

等造真言寶誥諸偽書密爲傳布潛蓄髮藏山箐間
喉人分途簧誘連界之武宣象州藤縣陸川傳白各
邑人心浮動附從者日多歛資亦漸鉅遂萌逆志當
是時秀全所惑僅下愚之衆即使嘯聚亦只如川蜀
之米賊宋之王則等耳苟有良有司安撫而驅除之
無難立定者何致勞師殫武擾亂十有五年蹂躪十
有六省淪陷至六百餘城之衆哉乃長吏務爲姑息
不事勦撫僅令鄉團守望相助復無董率一任鄉練
與會匪各樹旂鼓爭爲長雄致令蠢醜屯聚日繁遂

於金田邨倡亂

八月楊秀清等迎洪秀全移屯武宣縣東鄉招集亡命
復返金田

楊秀清原籍廣東嘉應州遷居廣西桂平縣大黃江
世以種山燒炭爲業秀清獨無賴游蕩蕭朝貴武宣
縣盧陸崗農民妻洪秀全之妹馮雲山廣東花縣人
先與洪秀全立上帝會邪教爲桂平縣訪獲囚於獄
同教匪徒黃玉崑等隙錢營救得釋韋昌輝原名正
亦桂平人住金田石達開原籍廣東和平縣住廣西

貴縣家小康讀書未成遂業農五人者年皆三十餘以次與洪秀全結納秀清尤狡獪因秀全捏造天父遂證其說自作巫謂天父下凡附其身訶人陰私擿發之羣驚爲神嘗託天父言挾制洪秀全令前跪受杖已有不韙亦伏地令人杖之不少貸以是蕭朝貴等篤信之又貴縣已革壯勇秦日綱亦入其教六人分布各邑輾轉誘聚人會者漸衆三十年六月起事時洪秀全密藏於平南縣花州胡以眈家秀清率衆迎之至金田旋移屯於武宣縣東鄉招集拜上帝之

亡命者適有貴縣游民林鳳祥廣東揭陽縣海盜羅
大綱等率衆從之又湖南衡山縣人洪大全幼穎慧
甫八齡能默誦十三經陰自負知秀全倡亂卽往依
附遂爲部署隊伍馬匹旂幟器械漸備返屯金田

十月前兩江總督李星沅爲

欽差大臣赴廣西勦賊

鄭巡撫抵平樂縣疏入奉

旨調固原提督向榮爲廣西提督赴粵會勦九月至桂林
時慶遠思恩南甯等府土匪正熾向提督馳往勦辦

洪秀全等益猖獗巡撫馳奏

上命前雲貴總督林則徐爲

欽差大臣馳赴廣西與鄭巡撫向提督前雲南提督張必
祿會勦旋據給事中袁甲三奏參鄭巡撫欺飾彌縫
各罪飭據兩廣總督徐廣縉覆奏撫臣年老多病文
武皆不畏服得

旨革職林總督以

欽差大臣暫署廣西巡撫嗣林大臣薨於途張提督甫至
潯州亦薨奉

旨令前兩江總督李星沅爲

欽差大臣赴廣西督辦李大臣於十月抵桂林

十一月我軍至金田勦賊失利

賊由金田竄平南之恩旺墟副將李殿元等然礮擊之勢少卻復分股回撲致巡檢張鏞罵賊遇害賊仍返金田老巢金田距潯州府城僅四十餘里張提督薨後所統貴州安徽等綠營兵均屯潯城李大臣飭貴州鎮遠鎮總兵周鳳歧接統之十一月二十六日派貴州清江協副將伊克坦布等往勦延至二十九

日始接仗初桂平毗連之貴縣有廣東嘉應州民數千人聚居縣民目爲來人常欺凌之來人積怒適於二十八日投金田助逆賊得生力軍膽勢正壯遂圍我軍伊副將及千總田繼壽把總潘繼邦外委彭昌鏞陣亡周總兵馳往援堵禦一晝夜斃賊數百人始解圍

十二月前漕運總督周天爵署廣西巡撫會同勦賊上以廣西賊勢漸衆復

派前漕運總督周天爵赴粵會辦旋令署廣西巡撫時金

田賊衆裹脅日多附近各邨紳富搜括靡遺周總督
察此股爲勁匪咨商向提督自橫州旋師專勦金田
之賊

咸豐元年辛亥正月洪秀全等僭僞王號於大黃江竄
擾桂平貴縣武宣平南等縣入象州境

逆衆由金田出關經八崗水而至大黃江向提督於
正月十八日督隊進攻斃賊二百餘名竝拋擲火具
燬其房屋以賊衆兵單致投効候選衛守備王崇山
等十二員亡於陣洪逆遂益驕橫僭僞號爲太平王

復將大黃墟縱火燬盡悉裹其衆分擾桂平貴縣武
宣平南等縣入象州境

二月廣州副都統烏蘭太馳驛往廣西幫辦軍務
烏都統奉

旨馳驛由廣東起程三月卽至粵與向提督會商勦辦疊
有斬擒賊勢少戢

三月大學士賽尙阿爲

欽差大臣率都統巴清德副都統達洪阿管帶京兵馳往
楚粵之交防堵

粵西羣盜日久稽誅

上眷念邊疆不安宵旰

特命大學士賽尙阿等馳往楚粵之交駐紮調度竝

諭李星沅等不得以

特派有人稍存觀望又

命周天爵專辦軍務廣西巡撫著藩司勞崇光暫行署理

四月賽大臣等出都

四月初九日賽大臣

陸辭出都

特賞遏必隆刀以壯其行奏帶侍衛開隆阿天津鎮總兵
長瑞甘肅涼州鎮總兵長壽軍機章京戶部司員丁
守存聯芳等十餘員火器營烏蘭都等京兵二百名
部撥餼銀一百萬兩又由內務府廣儲司撥發內庫
銀一百萬兩

李大臣由柳州進駐武宣舊病增劇旋薨

李大臣先曾奏請專派總統期於事權歸一賽大臣
起程之前已

密交諭旨令赴廣西軍營竝傳知李星沅回湖南會辦防

堵至是復

諭賽大臣馳赴廣西接辦

欽差大臣事務並

授鄒鳴鶴爲廣西巡撫兼程赴任令李星沅回籍養病李
大臣旋以疾薨

五月烏都統等敗賊於象州

逆衆由武宣竄至象州之中坪等處五月初八日烏
都統統帶貴州三營官兵自羅秀拔營駐梁山邨向
提督由桐木拔營駐中坪之東雲南昭通鎮總兵經

文岱等駐寺邨皆距賊巢十里初十日賊匪十數股約四五百人渡河撲營我兵奮勇攻擊斃賊千餘人賊隊盡散十三等日三戰皆捷

六月賽大臣抵廣西破賊於新墟

洪秀全等由象州竄回桂平之新墟六月初五日賽大臣抵桂林省添募廣勇潮勇合先後所調滇黔川楚兵勇約共三萬餘人分派將弁嚴堵各要隘飭烏都統剋期會勦二十七日由官甲潛行渡江偵知竹圍邨竹木叢雜令總兵秦定三伏兵其處引賊入伏

一日七勝殲擒二三千人破其英邨巢穴賊仍遁入
新墟

七月奪獲雙髻山等要隘

逆匪竄踞紫荆山前以新墟爲門戶後以雙髻山猪
仔峽爲要隘七月初十日分路進兵達洪阿攻西南
烏蘭太秦定三攻西北總兵李能臣經支岱分攻東
南正東巴清德向藥山紫荆山後路進十五日直登
猪仔峽據其要口雙髻山之賊見我兵已奪要隘槍
礮木石如雨齊發巴清德傳令奮力抵禦時川楚各

兵已繞出賊後上下夾攻賊衆大潰遂奪雙髻山要隘

八月破賊於風門劫賊竄永安

破雙髻山後向提督欲乘勝直擣花雷茶地等賊巢巴都統以五不可議阻之遲五日始進兵賊於風門劫口築壘安礮竝鑿斷山梁爲負隅死守計八月初二日我兵分三路奮攻賊始棄隘敗走乘勢追勦據其風門劫要害陣斃韋昌輝之弟韋亞孫韋十一等賊始退竄向提督由桂平追之烏都統及提督秦定

三總兵經文岱由鵬化山追之烏軍阻於山內向軍
遇賊因兩致挫軍仗盡失賽大臣奏參革職畱營効
力達都統與烏都統不相合接戰復挫衄亦請撤回
巴都統病甚入平樂府旋薨向提督於平南整理軍
械畱十餘日始行賊分二路竄永安

閏八月洪秀全等陷永安州建僞號爲太平天國封各
僞王

賊由大黃墟分水陸兩路經大黎向永安州閏八月
初一日陷之遂僭僞國號爲太平天國洪秀全爲僞

天王楊秀清爲僞東王蕭朝貴爲僞西王馮雲山爲
僞南王韋昌輝爲僞北王石達開爲僞翼王洪大全
爲僞天德王秦日綱羅亞旺范連德胡以晄等各稱
丞相軍帥等僞職

九月竇大臣移營陽朔

時廣西股匪分兵勦襲漸就肅清陳亞貴一股爲署
桂平縣知縣李孟羣擒獲顏品瑤一股爲藩司勞崇
光設策梟誅擊散其衆餘匪二十餘股殲滅無遺九
月十一日竇大臣移營陽朔專勦洪逆

十月烏都統攻莫家邨大捷

賊分大股屯莫家邨以阻攻永安之路距邨十餘里有三嶺中曰秀才左曰龍虎右曰石燕烏都統相度形勢紮火器營小隊於秀才嶺暗埋地雷等火具派隊誘賊誠以俟賊出卽沿左右二嶺緩撤過嶺列陣以待自建中軍旂鼓於秀才嶺最高處帳前植一紅蓋賊果大至爭撲中軍都統率小隊自嶺後徐退賊拔其紅蓋火機觸發全嶺奔裂燔賊以數千計大隊乘之旋克莫家邨此後賊見烏都統所植旂幟輒不

敢近

十一月合兵攻永安

粵西諸將惟向提督老於軍事賽大臣攻永安賊分守城南之水竇邨爲犄角勢賽大臣以烏都統督辦南路劉長清督辦北路其東西山亦各派鎮將守之長清不能馭衆以向提督爲北路督辦時已奉

旨賞給三品頂戴接任後激勵將士疊獲勝仗十餘次連營進逼賊不敢出賽大臣請開復廣西提督原官

十二月賽大臣親駐永安督勦

賽大臣於十二月十八日由陽朔移營荔蒲二十六
日至永安州向提督統軍北路聲威漸震二十八及
三十日賊匪出巢窺伺均擊退

咸豐二年壬子正月大兵圍永安

正月初一二三等日四路進攻竝擊其東西礮臺城
已將克適儘先參將李廷楷等陣亡諸將少卻賊退
入城初八初十及十二日賊出撲營均卽擊退賊之
礮臺望樓兩處爲風雷擊燬

二月賊潰圍東竄官兵收復永安州陣擒僞天德王洪

大全檻送京師

我兵圍永安於城外等礮臺日夜轟擊二月十七日
四鼓賊撲壽春營我兵少却賊由古東冲小路出關
僞丞相秦曰綱先屯水竇移屯仙回嶺十八日烏都
統捨山岡夾擊殺賊二千餘人生擒洪大全時大雨
不止軍無宿處餒甚與向提督商定整軍再入五更
後烏都統忽自率親兵入山向提督疾飭各鎮接應
賊合隊復戰山逕犖确又天雨路滑未及列陣賊衆
冒死衝突總兵長瑞長壽董先甲邵鶴齡陣亡賊繞

山路直竄至距省六十里之六塘墟烏都統追至將軍橋骸受礮子傷都統有謀勇能卹士卒每以輕敵涉險人皆危之至是果中流礮旋逝方賊竄出時我兵乘勢收復州城丁守存聯芳等檻送洪大全至京師磔於市

一月賊犯廣西省城

楊秀清知我兵力尙厚不敢道昭平平樂由小路經牛角窰山出馬嶺六塘高出巡撲桂林省韋昌輝率千餘賊追奪洪大全不及亦趨桂林向提督策賊必

犯省城率親兵繞道介馬疾馳先一時晉省賊踵至
會同巡撫鄒鳴鶴藩司吳鼎昌副將馬龍開等晝夜
守禦賊夾漈江而營在東南文昌門外之象鼻山架
礮轟擊鉛丸入城如雨落城中官民靜守不爲動賊
近城布雲梯輒焚油燔之鎔賊極衆賊又以大竹製
呂公車高與城齊數十人登車平攻我以槍礮對擊
復紮長竿縛火炬燒之賊多墜死相持三十一日賊
知不可犯乘夜解圍北去

四月陷全州

桂林解圍後賊由興安攻全州湖南寶慶營都司武昌顯率所部五百人會知縣守城賊肉薄城根武昌顯令煎松膠瀝糠爲餅火之投下賊多死賊乃穴地燒溼薪煙障眯目咫尺不能辨諸軍之援全者皆壁十數里外數日地雷發城陷被禍極慘時將順流而下趨長沙浙江知縣江忠源督湘勇堵於篔衣渡忠源湖南新甯縣舉人由軍功議叙知縣補浙江秀水縣時丁憂回籍奉養大臣調在籍募勇赴粵烏都統一見器之遂贊其軍略旋率所部援全不得進乃駐

兵下游篋衣渡伐木爲堰伏西岸賊舟過力擊之鏖
戰兩晝夜斃賊千餘僞南王馮雲山中斃死賊棄船
由東岸赴道州自有此捷長沙得爲備衡永防兵始
安

五月陷道州

賊陷全州後裴脅已衆及至道州湖南提督余萬清
棄城走道州俗悍多會匪賊踞城月餘從者更衆另
立道州大旂所至爭爲効死賊勢復張

六月疊犯江華甯遠嘉禾等縣陷桂陽州

自道州竄出取道江華甯遠至嘉禾縣總兵和春常祿等躡賊蹤至嘉禾接仗獲勝奪門而入賊卽竄走於二十九日陷桂陽州

七月陷郴州趨長沙

賊陷桂陽州後江忠源率隊趨至前隊把總邢虎臣戰歿江忠源揮勇繼進大破之直抵城下賊棄城走趨郴州郴州常湘粵之衝商賈輻輳駟馬以千計賊至據之忠源會諸軍壁其三門相持月餘逆首蕭胡貴調長沙城外民房未拆守兵亦單意可襲而

取也乃率死黨由永興茶陵醴陵趨長沙

八月犯湖南省

賊黨疾馳赴長沙七月二十八日至省總兵和春常
祿李瑞德亮與江忠源各率兵勇倍道追之亦抵長
沙賊踞城南及小西門民房爲窟竝占妙高峯鰲山
廟等高阜爲壘駱巡撫秉章提督鮑起豹在籍羅巡
撫繞典會督邑紳黃冕唐際盛等獎帥兵民登陴固
守八月初四日鮑提督派四川兵勇下城攻擊斃賊
多名善化縣知縣王葆生所募壯勇亦隨同官兵出

城殺賊無數新授湖南張巡撫亮基自雲南來緇城
而入會籌堵禦益力僞西王蕭朝貴攻南門官兵擊
之殪尸埋老龍潭後起獲梟判洪秀全楊秀清先在
郴州朝貴死賊黨李開芳馳告遂悉醜類馳至廣築
土壘分屯西岸土牆頭及湘江之水陸洲併力攻城
兵民百計守禦向提督率將官張國樑等踵至營於
西岸嶽麓山一帶游擊蕭逢春都司姬聖脈戰歿提
督秦定三總兵和春等營於東自天心閣直至新開
舖皆官軍堅壘朝夕夾擊槍礮聲震天地軍威漸壯

九月官兵圍勦獲勝

各路大兵齊集賊不得逞自陷郴桂得採煤山夫千餘人仿鰲翻法立土營偽師帥穴地攻城九月二十九鰲南月城西魁星樓側發地雷城蟄四丈餘二三千人蠶擁而上四川越嶲營參將張協中搶護中搶殞命副將鄧紹良大呼躍出城闕手刃數賊右膊被礮子穿透屹立不動弁兵齊下斬大黃旂賊目斃長髮賊一百數十名短髮賊三百餘名賊始敗退迅將城闕堵合十月初二日城外金雞橋地雷再發總兵

和春堵之十八日魁星樓地雷又發副將瞿騰龍力
扼殺悍賊數百賊之地道已盡復缺油鹽勢漸窮蹙
羣心漸離洪秀全營於南門外取玉造僞璽稱爲天
賜以籠絡羣心脅衆呼爲萬歲遂於十九日夜從浮
橋渡湘水由回龍塘竄去故分小股向南行我兵謂
賊必犯湘潭傳東岸軍南向賊之大股已竄甯鄉矣

十月陷岳州

賊由甯鄉至益陽追賊之參將紀冠軍陣亡賊擄民
船數千出臨資口渡洞庭抵岳州湖北提督博勒恭

武駐岳督防先三日棄城走賊留岳州四日郡城舊存逆藩吳三桂軍械礮位盡爲賊得復奪民舟五千餘遂東下

十一月賊下湖北陷漢陽府

十一月初九日賊驟至逕撲漢陽十二日郡城失守調防之陝西副將朱瀚陣亡知府董振鐸巷戰死漢鎮爲數省通衢百貨山積遷避不及被焚掠五晝夜殆盡

十二月武昌省城失守巡撫常大滄等皆死之

武漢一江隔冬令水涸江中漲巨沙洲賊以所擄船作浮橋鐵索環之自漢陽直達省城四圍立壘分門攻撲時程總督喬采駐軍衡州惟常巡撫大清督兵防守向提督自湖南帶兵追襲營於東門外之洪山連戰皆捷隔賊壘與省兵不能合十二月初三日黎明自洪山出隊連燬賊壘數十座槍礮斃數千驅溺於武勝門外之沙河亦數千尸骸枕藉河水爲之不流斯時官兵距城不及三里盼城中兵出接應屢遣差弁相約常巡撫恐民志未孚啓門或致逃避欲待

客兵抵城下始出不期寒雨大沛火藥不燃兵力亦極疲困向提督因令收隊而城不保矣賊未至時常巡撫縱火盡燬城外民房以防穴地文昌門濱江未及防賊已穴深丈餘初四日黎明地雷忽發城遂陷巡撫常大滄學政光祿寺卿馮培元布政使梁星源按察使瑞元漢黃德道王壽同丁憂鹽道王東槐署鹽道林恩熙武昌府知府明善武黃同知周祖銜等皆殉難江夏縣知縣繡麟持矛巷戰死尤烈

漚兩湖總督程喬采職以張亮基代之

程總督辦理防堵駐兵衡州省城陷後奉

旨革職畱辦糧臺後議遣戍張總督先任湖南巡撫全是

由湘赴鄂

平定粵匪紀略卷二

咸豐三年癸丑正月賊全股下竄向提督收復武昌

前因逆匪竄擾湖南賽大臣師久無功奉

旨逮問

命兩廣總督徐廣縉為

欽差大臣督辦軍務長沙解圍後始抵湖南省城逆匪已

直竄武昌徐大臣尙駐岳州亦奉

旨逮問

授向提督榮為

欽差大臣復

命前大學士琦善爲

欽差大臣選直隸陝西黑龍江馬步各兵由河南進勦以

防北竄賊陷武昌後向大臣帶兵勇日夜擊之賊不

能久踞欲由襄麥北趨偵知河南重兵扼守遂於三

年正月初二日下竄是時所俘勇婦約五十萬人船

約萬餘隻資糧軍火財帛與婦稚盡置舟中蔽江而

下帆檣如雲新舊賊分兩岸夾江以行所過黃州武

昌蘄水蘄州均爲殘掠直抵廣濟縣之武穴鎮向大

臣於賊竄後收復省城招集地方官辦理善後事宜
卽追賊東下

賊至廣濟縣之武穴鎮兩江總督陸建瀛兵潰退保金
陵致九江安慶失守

先是二年十月

上命兩江總督陸建瀛爲

欽差大臣督兵進防江皖時兩江先奉調撥官兵三千名
駐紮楚境武穴下之老鼠峽陸總督募勇未集卽帶
松江提標兵二千餘名親兵數百名由水路上駛三

年正月十一日抵湖北廣濟縣之龍坪派壽春鎮總
兵恩長爲翼長督隊至老鼠峽會合前兵共籌堵禦
舟師未及登岸紮營賊已驟至恩總兵督戰陣亡舟
師潰散陸總督退保金陵江西張巡撫芾駐防瑞昌
縣爲入境陸路九江府城未設防賊遂薄九江而下
十七日陷安慶省安徽蔣巡撫文慶死之藩司李本
仁退守舒城縣臬司張熙宇奉派帶礮船防守小孤
山亦退回均奉

旨逮問

二月賊陷金陵

陸總督退回金陵卽帶新調廣艇及兩江原設舢板
船進防蕪湖下游之東西梁山師船復不戰而退遂
回城固守正月二十五日夜賊船由太平府四合山
順流而下二十六日辰刻福山鎮總兵陳勝元等迎
勦擊沈逆船二隻餘匪暫退官兵追至蕪湖又擊沈
二十餘船是日戌刻逆衆水陸竝至陳勝元中礮落
水死賊至金陵二十九日城外紮賊壘二十四座其
賊船自新洲大勝關起泊至七里洲止晝夜環攻兵

民協守甚固聚寶門外米商自團練勇齊心殺賊賊
幾敗城頭開礮助威適傷練勇數人遂駭散布政使
祁宿藻目擊忿甚嘔血死二月初十日儀鳳門地雷
舉發賊驟登第二雷又發賊自斃千餘官兵乘勢擊
之競割耳記赴局報功守陣兵力轉薄賊大隊擁至
急調各城防兵北嚮堵禦另股賊已由三山門越城
而入將軍祥厚副都統霍隆武率滿兵防守內城城
中婦女亦登陣持槍殺賊相持兩日夜力竭殉難各
賊分門劫殺陸總督及提督福珠隆阿均被戕前廣

西巡撫鄒鳴鶴獲咎後奉調隨辦防務亦在城遇害
上元縣知縣劉同纓公服坐大堂罵賊被攢射而死
前浙江總兵湯貽汾僑寓秣陵賦絕命詩從容就義
官紳殉難者極多

向大臣追賊至金陵結營城東孝陵衛
賊衆下竄後奉

旨飭向大臣追援金陵師行極速張國樑領頭隊正月十
二日卽至九江無舟不得濟咨江撫由省撥回空漕
船載之東渡二月二十一日始達金陵結營朝陽門

外孝陵衛卸任廣東學政內閣學士許乃釗奉

命幫辦江南軍務亦由江西馳至

逆黨林鳳祥等率水陸諸賊陷鎮江揚州

洪逆與楊秀清計欲分賊守江南而自統全衆由淮安北趨有一老舟子言北路無水乏糧遇困莫解今

據長江之險舟師萬千宜踞南京爲都楊秀清聽其說遣僞丞相林鳳祥羅大綱李開芳曾立昌等率賊東下二月二十一日陷鎮江府二十三日陷揚州府先是揚州有民人江壽民素任修橋卹瘞諸事一郡

稱善人聞賊且至釀富戶金賄賊與賊約不相犯賊
僞許之富戶恃以無恐遷避甚少賊乘無備突入搜
劫資財千百萬拘江壽民於立貞善堂旋自縊賊得
鎮揚乃分據浦口瓜州各要隘徧立土壘以阻我南
北路之師

同大臣擊賊獲勝

二十五日五鼓分路開仗直攻附郭各土城克之二
十七日我兵營土城賊以四五百人出撲迎擊之斃
多名斬首數十級二十九日向大臣親自督戰逆勢

不支相率逃潰我兵始逼城紮營

三月向大臣擊賊於通濟等門大捷

官兵初與接仗賊尙易視附城各賊壘堅守抗拒三月初六日向大臣與許幫辦及按察司銜綜理江西糧臺彭玉雯籌定攻勦之策是夜分路進兵別選精銳直襲通濟門賊壘前後夾擊立破賊壘三座斃賊千餘名奪獲三千劔及數百劔大礮十二尊擡鳥槍二百四十餘桿旂械無數十一日官兵襲占七橋壘將鍾山及報恩寺賊壘隔斷十三日乘霧設伏痛加

勦殺奪獲鍾山圍洗殆無漏網竝生擒僞總制陳轉
各兵勇鬻割之十七日夜復戰噴筒火箭直射城中
繼以槍礮逆首楊秀清率衆登城見朝陽門一帶之
牌刀賊匪誤爲官兵開礮轟擊數百城中槍礮競發
人聲沸騰達旦始息自是以後我兵大營十八座一
律移近城垣賊始懼不敢出時副將李德麟與鄧紹
良先後攻鎮江亦疊有斬擒焚燒賊舟救出難民船
多隻又江南觀音門賊船一千數百隻向大臣用計
焚燒船尸水手約萬餘人設法遣散竝燒燬押船長

髮賊無數賊之水隊亦漸斂戢

四月漕運總督楊殿邦督兵攻揚州破土壘木城

楊漕督由淮安馳防揚州結營於距城四十里之邵

伯鎮前鹽運使但明倫運使劉良駒會理防務賊衆

我寡退守北路招募民勇收聚潰兵四月初一日會

琦大臣等兵勇四路進攻城外土壘木城全行蹋燬

東路之賊悉避入城

琦大臣直隸提督陳金綬內閣學士勝保先後攻揚州

壘獲勝仗

初琦大臣等由河南之信揚州偵明賊蹤進勦陳提督勝學士前行二月二十七日由浦口東山外越赴江邊盡焚賊船進浦口擊賊獲勝三月初九日至帽兒墩琦大臣亦於是日自浦口馳至營於雷塘集距賊均止數里初十日琦大臣督肅州鎮總兵雙來等攻城北之賊陳提督攻督路各燒賊壘救座殺賊千數百名十二日五戰五勝琦大臣進紮寶城陳提督等紮司徒廟各距揚城三里二十二日乘大霧攻賊不備得勝於廿四橋及法海寺迨東路土壘破後西

北二路亦已一律掃蕩城外全無賊蹤其南路濱運河賊船林立亦經地方官紳焚勦略盡

賊衆由揚州分擾滁州踞臨淮關陷鳳陽府

林鳳祥等畱僞指揮曾立昌踞揚城驅婦女及所劫資財運回金陵率賊二十一軍北竄每軍數千人擾滁州占踞臨淮關四月二十一日陷鳳陽府勝學上由揚州分兵進勦

賊分竄六合署知縣溫紹原殲之

揚州分賊北竄時令逆酋朱錫琨黃益芸率六軍犯

浦口攻六合方琦大臣赴揚時留黑龍江馬隊二千
駐浦口又分吉林馬隊四千人爲八起分駐六合等
處以防後路逆酋等於四月初六日襲浦口初八日
抵六合署知縣溫紹原豫團民勇拒之於龍池千總
徐琳外委達成榮戰死紹原督團再進並約馬隊帶
兵官副都統德崇額督攻二更後賊營火起煙燄障
天燔灼而死及槍礮轟斃者數千所存無幾遁回金

陵城

五月間浙總督慧成署漕運總督查文經漕運總督福

濟先後會兵圍揚州

閩浙總督慧成帶宣化等營由東河赴揚州署漕督
查文經帶漕標徐州鎮各兵參將馮景尼帶壽春勇
參將師長鑣帶淮勇繼至方揚州失守時北路幾無
堅城江蘇臬使查文經因治豐北黃河隄工駐清江
浦聞警徧行檄示言有京兵數十萬北來飭下游各
邑備馬料諭軍民毋恐賊因警怯不敢長驅及揚漕
督禡職遣戍查臬使接署漕督帶兵與慧總督先後
至紮水陸各營於東路之茱萸灣嗣正任漕督福濟

接篆查臬使移營南路陳家巷城圍始合

左副都御史雷以誠募勇駐萬福橋防揚州東路

雷副都御史與翰林院侍講學士晉康奉

命巡視黃河隘口請

旨勦賊晉學士爲慧總督長子隨其營旋與查臬使紮陳
家巷雷副都御史廣延豪俊捐資募勇自成一軍紮
營揚城東南之萬福橋距城最近與各營相犄角以
保東路裏下河各州縣門戶賊垂涎裏下河久屢撲
屢卻之自合圍後賊間日出爭各路均嚴陣設伏以

待每戰必捷殺賊以萬計賊始窮蹙勝學士赴河南
後雷副都御史升授刑部侍郎幫辦琦大臣軍務

湖廣總督張亮基檄諸郡邑練團勦餘匪

逆自粵入楚沿途煽誘惡少年聞風響應未來則歛
錢饋賊日進貢既去則假其旗幟裹黃布聚衆爲淫
掠廣東之凌十八溫大賀五輩皆依倚聲勢湖南岳
州有晏仲武尤凶暴先後盪殄略盡湖北蟻賊如蝟
毛長江而下則監利石首沔陽通城崇陽蒲圻爲之
壑襄河以上則安襄荊德受其災至是行團練之法

遴選紳耆糾訓良家丁壯捕不道羣賊稍歛迹

湖南團練鄉兵爲諸路倡

禮部侍郎今

封一等侯

欽差大臣協辦大學士兩江總督曾國藩以親喪在湖南

湘鄉籍有

詔使治鄉兵乃詳設方略練勇爲諸路倡仿明戚繼光編
東隊伍法創爲湘勇營其制每營五百人擇官紳誠
樸者率之厚其資糧嚴以軍法日事訓練先討衡山

土匪曹賊等繼捕瀏陽徵義堂土匪周國愚等皆平
之湘勇遂以勁旅稱俊傑之士相繼而起後皆以忠
節名於時

湖北按察使江忠源赴江南大營

忠源以解桂林圍有蓑衣渡之捷擢知府以援長沙
功擢道員湖廣張總督奏署湖北按察使旋實授奉
旨飭赴江南營

逆黨由安徽鳳陽竄擾河南

勝學士自揚州帶兵躡賊後由滁州攻鳳陽賊不能

久踞遂竄河南

河南歸德府城陷賊犯開封省官兵擊走之

楊秀清遣劇賊僞丞相吉文元等由浦口竄擾亳州一帶與陷鳳陽之林鳳祥合股乘間入河南境陷永城五月初七日闖入歸德府城巡撫陸應穀親督各將弁分道進勦聞逆黨將窺開封急檄藩臬司沈兆棟林揚祖登陴固守賊已由睢州甯陵杞縣陳留逕撲開封十三日抵城時將軍托明阿提督善祿已革都統西凌阿督三鎮兵過睢州聞警倍道而馳十八

日抵汴梁省奮力攻擊署祥符縣知縣何懷珍亦募
勇出城助勦賊知不可犯由朱仙鎮退竄中牟縣我
兵會追二十五日又敗之於汜水縣逆衆奔黃河渡
口適西北風大不能開船燒燬逆船十三隻斬擒二
百餘名溺死無數

上深念逆氛未靖而河南爲濱河要塞

命直隸山東西督撫合力防河總兵董占元自大名鎮往
總兵花里雅遜布自兗州鎮往會於河北事權一統
之於

欽差大臣直隸總督訥爾經額蒙古盟長察哈勁旅亦遐
邇雲集爲河南應援遊情始懾

揚州營攻城已登不果克

賊於東路天甯等門偷搭浮橋由地道奔突而出經
慧總督先期獲奸細訊出實情派臬司查文經學士
晉康等帶隊堵截知會北路琦大臣等督兵備之賊
甫出卽回爭橋墮水死者極衆東關城上諸賊復蠶
擁而出亦經擊退竝用火器燒其望樓多座五月二
十七日琦大臣飭肅州鎮總兵雙來用一萬六千劬

大礮轟城礮爲查臬司辦江南善後時所鑄設圖山
關運赴大營是日開用擊坍城垣數處雙來見有機
可乘用木棍作浮橋過河支雲梯奮勇直上適東路
雷侍郎亦派鹽知事銜張翊國帶勇抵城分梯而上
兩頭殺賊勢已垂克先是逆酋因原城窄狹於馬路
旁支木鋪板爲樓寬約二三尺高與城齊賊中名爲
跑馬樓賊見官兵登城自將跑馬樓放火焚燒烈焰
薰騰我兵不能驟下雙來被槍子折二齒張翊國亦
身受多傷且兩路均無接應跳城撤隊經此懲創賊

守益密

瓜州紳士擊賊陣亡

賊分踞鎮江揚州以瓜州下虹橋爲往來要衝本處紳士侍讀銜中書鍾淮團勇於虹橋殺賊頗衆五月二十九日約會江口水師艇船會攻直抵瓜州正接戰間忽轉西風艇船驟退致鍾淮與已革揚州營守備方綱陣亡率團勇扼守虹橋賊不敢進

逆黨犯江西南昌府官兵勝卻之

楊逆遣僞豫王胡以晄等犯安徽桐城破集賢關遂

再陷安慶又遣僞丞相賴漢英石祥貞攻九江湖口
進圍南昌張巡撫芾借在籍辦理團防陳尙書孚恩
距守時湖北臬司江忠源銜

命赴金陵大營抵九江聞南昌圍星夜往援適張巡撫等
亦飛檄召之馳四日至賊望見楚軍旂幟驚曰江妖
來何速也賊以官爲妖故云忠源入城卽會同布置
有營兵謀縋城走者立斬以徇五月二十日分三路
出城直撲賊隊往復四次糧道鄧仁堃知府耆齡林
福祥督兵勇下城助戰擒賊甚多二十一日二十八

日再戰均捷人心以安

六月南昌逆匪用地雷轟城堵截獲勝

六月初二日江臬司統楚川江三省兵勇竝六品頂戴前臬司徐恩莊等練丁分三路進兵斃賊數百名遣浙江守備封九貴同時由章江門下城焚燒賊船浙江游擊常海督兵在城上開礮助之燒賊船多隻賊復用地雷於得勝門新築月城外轟塌城墻六丈餘蠡擁而上江臬司同弟忠濟率楚勇首先抵禦殲戮多名賊退卽將關口修繕完固

河南逆黨犯懷慶

逆黨自汜水敗退由鞏縣潛收煤艇渡黃河分擾鄭
州滎陽六月初二日圍懷慶府訥大臣遣將軍托明
阿提督善祿都統西凌阿渡沁河由武陟一帶沿岸
捕勦轟斃其坐龍錦褥服黃袍賊目二名賊勢少卻
遂趨懷慶勝學士保先繞道馳護府城逕撲賊壘先
東後西連戰皆捷

諸路大兵會勦懷慶賊

初渡河賊尙少官兵屢挫其鋒至是逆援陸續偷渡

黃河築木柵以■我兵山東李巡撫德越境勦賊訥
大臣勝學士托將軍善提督西都統副都統雙成各
帶兵勇及黑龍江西安馬隊先後馳至前理藩院尙
書恩華亦統兵前進分營東北路清化鎮等處奮力
會勦節次斬獲不下數千名賊之初至也諸路兵未
集城幾陷知府余炳燾知縣裘寶鏞會同都司穆特
布百計堵禦破其地道數處堅守待援及大兵雲集
賊嬰壘抗拒僅能自保不復敢攻城

鎮江兵失利琦大臣敗賊於揚州三汊河

六月十三日賊自鎮江城出撲官軍營盤我兵接仗
北固山下伏賊齊起並於城垣開暗門出賊縱火天
熱風猛七營同時被焚鄧紹良退守丹陽經管帶廣
甌都司劉廷鏌同參將站住督帶潮勇馳援賊退入
城十五十七等日賊擾丹徒鎮復爲劉廷鏌擊退向
大臣派總兵和春督湖南廣東兵由馬陵進紮徒陽
運河內之辛豐鎮劉廷鏌亦至賊始不敢南竄常州
得安瓜州賊會浦口賊亦於十九日進攻三汊河大
營我兵擊走之侍衛德興阿游擊黃志配都司毛三

元追至分水龍王廟焚賊艇而還

揚州造樓船攻城總兵雙來陣亡

揚州東路大營分紮茱萸灣等處距城十數里中隔
運河不能近城東路總營務處直隸州許道身兩淮
鹽運判杜文瀾與參將師長鑣密商用樓船以代雲
梯派人探量揚城外運河水勢測其寬窄深淺於上
游邵伯湖內取回空漕艘二隻鳩工改造在船尾豎
板二丈餘層級而上擬乘潮駛至城下以船尾倚城
牆如雲梯以船首抵東岸設橈板渡兵勇登城船成

稟知慧總督等知照琦大臣派兵攻西北面以分賊
勢約定十八日寅刻進兵令參將馮景尼豫伏壽州
勇於東岸奶奶廟船至卽令長驅師長鏹等如期駕
樓船驟進卯刻抵城船尾卻倚便意門女牆守賊駭
散船首已設籠詎馮景尼之勇不至無一人登者賊
見無後應放火焚船時琦大臣派總兵雙來攻北城
右體中礮兵勇負之以退雙總兵昏迷中猶大呼登
城殺賊次日因傷殞命慧總督等奏參馮景尼革職
畱營効力

各直省行堅壁清野法

各路統兵大臣頻以戰功入報而逆黨尙縱橫出沒
分陷江南北郡邑未克剪除重城亦未有攻復者

上洞知其弊疊降

綸音仿嘉慶間堅壁清野之法或築壘浚濠或練丁團勇
守望相助協力同心一隅有驚附鄰畢至使賊進無
所掠退所無歸不能乘便空軼自兵興訖盪平終以
此爲策首

雷侍郎劄議捐收釐金以濟軍餉

揚州大營四集軍饑不支雷侍郎自成一軍尤無取
資處因江都之仙女鎮各會館舊有抽收釐金章程
遂於是月仿行以濟軍需坐賈則按月收捐爲板釐
行商則設卡抽捐爲活釐按獲利之厚薄約取百中
之二三商賈不致病累而軍饑以充後各省皆循行
之軍興十餘年士馬得資飽騰釐捐之裨不淺

七月河北軍大破賊木柵懷慶解圍

賊立木柵爲城深溝堅壘抗拒幾及六旬我兵四面
環攻血戰十餘次殲其精銳賊黨震懼有渙志我兵

縱反間離其心腹明示以逆順禍福於是拔身投誠者數百人誦大臣親督諸將會城下七月二十八日分五路攻賊壘毀其木柵電擊雷轟柵中棚房悉灰燼賊棄柵遁合力追勦擒斬三千餘人偽帥投首河北肅清

湖南軍馳援江西解吉安之圍分勦太和安福之賊悉平之

逆圍南昌竝分賊竄入腹地江臬司飛書湖南請援曾侍郎駱巡撫派湘勇二千楚勇一千配以鎮筸兵

八百馳援其監護行軍者則有候補道夏廷樾翰林院編修今廣東巡撫郭嵩燾湘鄉縣知縣朱孫詒湘鄉縣諸生羅澤南管帶之員則謝邦翰易良幹楊虎臣羅信南康景輝等而羅澤南復率其弟子鄉人自成一軍七月二十日抵南昌因進兵太銳易良幹楊虎臣等歿於軍適吉安土匪滋擾圍城甚急獲諜知與粵逆通江臬司急檄湘軍赴援竝調今直隸總督劉名長佑與江臬司季弟忠淑所募湘勇竝隸夏廷樾麾下至吉安一戰卽解圍復分勦太和安福之賊

悉平之是爲湘勇出境勦賊之始

八月河南懷慶逆竄山西陷平陽府

賊敗於懷慶時南阻黃河北隔太行山東避重兵惟西首黃河太行山之間有小道蛇行鼠伏直竄山西之垣曲縣河東道張錫蕃知縣晏宗望均被賊旋擾曲沃縣踞平陽府直抵洪洞縣事聞奉

旨逮問巡撫哈芬及失守城池各官勝學士保蹤賊先至諸帶兵官亦督師竝進收復平陽訥大臣請馳回正定爲備禦計得

旨令上

欽差大臣關防卽

授勝保爲

欽差大臣

賜神雀刀自副將下有不遵約束犯軍法者先斬以聞

逮前署兩江總督楊文定等治罪

逆初陷金陵時文定爲江蘇巡撫自請守瓜州一帶

蔽入蘇道路旋奉

旨兼署兩江總督及鎮揚二城繼陷京口副都統文藝出

鎮城調兵而文定奏言督率水師乘風進勦斬獲纍
纍又奏劾失城各將弁時逆鋒銳甚防務正殷督篆
尙未之摘也至是文定文藝皆逮問治以遣戍

革直隸總督訥爾經額職旋逮問

勝大臣旣追擊晉省賊賊由洪洞東竄恩尙書華督
兵東路未遏賊鋒賊遂由屯留潞城黎城等縣竄入
直隸境踞邯鄲縣北之臨洺關擾至深州

上責訥總督退駐廣平革職逮問

屢念畿輔重地尤宜速彰

天討

命惠親王爲奉命大將軍科爾沁郡王僧格林沁爲參贊大臣總統四將軍督旂營察哈爾精兵會勝大臣進勦竝於都城設巡防所

江西省城解圍

逆匪攻撲南昌九十餘日張巡撫陳尙書江臬司等獎勵兵民同心固守八月二十一二等日疊次出城勦殺逆匪紛紛登舟揚帆下竄省城圍解派都司戴文蘭繞出賊前沿途截擊江臬司與鶴麗鎮總兵音

德布追蹤前進

九月賊入湖北境官兵失利於田家鎮旋陷黃州漢陽
二府

江臬司忠源自南昌赴九江至則城已陷適署湖廣
總督張亮基聞九江賊上犯遣前武昌府同知勞光
泰率礮船駛至田家鎮飭糧道徐豐玉漢黃德道張
汝瀛會辦防堵編巨筏橫江載礮數十其上截賊舟
賊已踞田家鎮之半壁山江臬司由瑞昌興國趨至
按行營壘嘆曰此天險也而軍情地勢兩失之謀以

次日移營羊角山日晡會食忽報賊船上駛急馳赴
水營賊居山開礮下擊防兵多逃卽令礮船迎敵勞
光泰所募皆廣東潮勇不戰而潰且有從賊者江泉
司率鶴麗鎮之兵搏戰賊來益衆突圍出徐豐玉張
汝瀛荆門直隸州知州李棟候補知縣杜文浩等皆
陣亡時九月十三日也賊盤踞入楚要隘水陸並進
先陷黃州知府金雲門罵賊被害繼陷漢陽知府俞
舜卿抱印投水死知縣劉鴻庚亦殉難賊分踞之

河北軍克復深州

賊竄踞深州旁擾樂城一帶烽火不絕於道及聞大將軍出征逆情震懼九月十九日勝大臣遣將軍綿洵桂齡蘊秀等帶兵攻城之西北西南西凌阿善祿攻城之東南親統馬隊直搗東北逆衆出城抗拒殲斃七八百名餘匪遁回城中二十日全股由東南而竄收復州城

十月逆黨擾天津踞靜海縣

賊自懷慶潰圍出尙有二萬餘衆楊秀清又由金陵遣僞官朱錫珉許宗揚往援在道裹脅亦不下二萬

合黨由山西入直隸界當賊之困懷慶也諸邊勁旅未集賊黨有獻議撲天津者逆酋欲甘心懷慶以必破爲斯未赴津嗣大軍環攻賊巢乃迂道垣曲曲沃聲東擊西以牽制大軍及深州敗逃遂乘間直走天津沽防已備長蘆鹽政文謙等督兵勦賊殲斃多名賊卽敗退勝大臣於九月二十七日追至靜海縣沿途斬殺賊遁入縣城堅築土壘木柵分屯獨流楊柳青等處前後攻擊數十戰皆捷

賊由湖北漢陽竄德安兵勇擊卻之

漢陽陷後賊分股北竄一陷孝感一由應城犯德安
府至長江埠時湖北學政禮部侍郎青麟按試德安
聞警奏留卸署襄陽縣知縣張開霽辦防勦開霽曾
在安陸縣得民心號召紳民一日間得練丁二千餘
人扼守要隘張總督調鄖陽鎮兵五百人亦由天門
抵應城聲勢漸壯先是二品頂戴臬司唐樹義帶兵
駐黃州總兵楊昌泗駐田家鎮賊至先後退黃陂至
是合兵進紮楊店以遏孝感之賊賊因三面防兵並
至合股退至漢陽經署漢陽府同知伍惺督勇截擊

賊全股退黃州

賊陷安徽桐城舒城犯廬州

初石逆達開在安慶分兵四掠擇本地助虐者爲鄉官授以僞職令按畝收銀糧詭託安民實掊克自富及是秦逆曰綱至代達開達開向外假寬恕而曰綱則惟事凶狡遂於十月十四日乘雨直撲集賢關進攻桐城文生張勳求援於前臬司張熙宇答以未接警信旋退守大關致各壯勇腹背受敵同時潰散桐城失守二十九日復陷舒城總兵恒興退回廬州在

籍督辦團練呂侍郎賢基與隨營委員通判徐啓山
在舒城行館內殉節奏帶司官刑部主事朱麟祺接
仗陣亡旋經撫臣先後查報奉

旨張熙宇恒興正法呂侍郎等分別

賜卹後張熙宇畏罪自盡自舒城失後逆氛逕指廬州廬
州者安徽文武大吏所僑寓以爲省治也

十一月金陵逆遣江西敗退之賊援揚州又令安徽灣
沚之衆由蕪湖泊高淳湖圍窺東壩兵勇擊勝之

是時向大臣駐金陵派兵圍鎮江琦大臣營揚州督

攻均急鎮揚二城之賊久困金陵首逆遣僞丞相賴漢英等領江西敗回之衆奔奪江北三汊河糾合儀徵賊黨同援揚城副都統薩炳阿率馬隊總兵瞿騰龍都司毛三元率步隊衝其前副將松齡等由中路水道截其後賊退踞儀徵困揚城如故而安徽甯國所屬灣沚之賊退出大江由蕪湖進泊高淳湖意圖窺伺東壩以解鎮江之圍向大臣遣鄧提督紹良德總兵安謹守東壩迎擊斬獲極多

天津大營失利蒙古副都統佟鑑知縣謝子澄陣亡

勝大臣屢戰克捷進逼津衛口十一月二十三日賊
匪傾巢來撲廂黃旂蒙古副都統佟鑑用礮橫擊見
賊大潰乘勝驟進拽取濠板足滑踣地被賊圍刺知
府用天津縣知縣謝子澄銳身護救同時陣亡

賊竄赴瓜州揚州軍收復府城帶兵官均獲譚

先是奉

詔以揚城圍賊窮蹙必殲除罄盡無俾旁突滋擾是月賴
漢英率賊黨復由三汊河進撲步步爲營死戰不退
東路參將馮景尼之勇先潰參將師長鏢監知事張

翊國等之勇亦駭散揚城賊衆於十一月二十六日
夜全股突出與賴漢英等同由東南竄赴瓜州琦大
臣據實奏參奉

旨將馮景尼於軍前正法師長鏢張翊國遣戍琦大臣並
帶兵各大員均革職留營効力

曾侍郎水師發衡州

侍郎督軍衡州念賊擾長江非水師莫能制其死命
遂建三省會勘議治戰艦於衡湘時承平日久人不
知兵水師尤翔舉相顧聘貽侍郎銳意規畫咨商兩

粵購備礮位廣西勞巡撫崇光選派知府褚汝航知
縣夏鑾以梧州巡防兵勇護礮赴湘設衡州湘潭兩
局製造礮船侍郎精思詣微尺寸皆有架度所治有
拖罟快蟹長龍舳板諸船極水戰之妙咨留護礮之
陽江碣石等鎮標兵隨同褚汝航所帶廣勇分配各
船爲之董率共募水勇四千人分前後左右中正副
爲十營每營配快蟹長龍船各四舳板倍之以褚汝
航夏鑾領中營今陝甘總督楊岳斌原名載福今兵
部侍郎彭玉麟及褚殿元等分領左右各營派湖南

撫標參將塔齊布與訓導羅澤南守備周鳳山揚名
聲文生曾國葆等募領陸勇亦十營侍郎親自統率
發衡州水陸夾江而下

十二月揚州軍收復儀徵縣

鎮江揚州瓜州儀徵四處賊互相應援急切不得破
及揚州之賊退踞瓜州賊勢稍孤琦大臣責諸將戰
益力十二月初十日攻復儀徵賊沿江遁生擒八人
轟斃二百餘人焚賊艘十五毀賊壘十三座乘勝窮
追直抵瓜州

安徽廬州府城陷巡撫江忠源死之

田家鎮之失也江臬司突圍至廣濟縣旋拜巡撫安徽之

命令楚皖一體當相其緩急爲去留江巡撫以廬州事急上疏請行時逆燄已張田家鎮黨逆復陷英山等處遂由六安州急進所部鶴麗鎮兵留防六安至廬者僅開化鎮軍勇數百而已廬民間江巡撫至爭登陴捍衛者萬人楊逆遣僞豫王胡以晄率黨十餘萬圍廬巡撫巡城以水西門當賊衝自部親信勇駐之賊

穴東城威武門爲隧道募死士迎出有黃衣賊正據
隧口下窺外委馮貴引刀削其面賊驚謀官兵自城
上擲火彈擊之皆反奔賊復穴水西門城崩數丈巡
撫手大旂緣陴上連斃賊城卒完疏陳守禦狀乞援
師先是壽春鎮總兵玉山以滁州之東關戍卒援拱
辰門戰死陝甘總督舒輿阿率萬五千人駐岡子集
屢戰皆北鶴麗鎮總兵音德布自六安馳援亦敗於
棗林巡撫弟忠溶同知劉長佑自湖南募勇至營西
平門外之五里墩遣卒挾白鏹油燭夜半縋城入且

告援師已至都司戴文蘭亦自湖北以五十八人懷
鑿入城城外賊騎充斥援師中隔卒不得薄城城圍
月餘十二月十六日夜再穴水西門城崩賊緣城直
上江巡撫揮兵相搏天且明霧蔽蔽如雨左右血刃
擁巡撫行巡撫手劔自刎不殊有健兒負之走嚙其
項脫身投古塘死同死者布政使劉裕鈐池州府知
府陳源堯已革藩司李本仁同知鄒漢勳胡子離副
將松安雲南鶴麗鎮都司戴文蘭雲南儘先都司馬
良勳縣丞艾延輝與福等

平山月傳田雜形

卷二

三

平定與匪紀略卷三

咸豐四年甲寅正月北軍攻克獨流賊巢

三年十一月我兵小挫勝大臣與僧王合兵建以圍
爲攻之策屢獲成效所陷各城以次收復惟獨流窮
賊固壘抗拒泰

嚴旨飭催以期速清畿甸於是臨陣之將親冒矢石鼓勇
之卒不避死亡於四年正月初八日大破獨流賊巢
餘匪由靜海紛竄占踞東城陳官桃園社九等郵莊
僧王勝大臣督各軍追擊之

湖北軍覆於黃州總督吳文鎔死之

湖北賊聚於黃州張署總督亮基調撫山東吳總督
文鎔抵任奉

旨出省督師於三年十二月赴黃州駐堵城距邵二十里
是年正月初十日諜知逆黨大張鎗火飲酒觀劇不
設防吳總督以爲有懈可擊親督兵勇進勦三戰斃
賊數百名連日大雪諸軍凍餒有死者逆黨繞道出
大營後林麓岡巒設伏幾徧十五日全股悍賊自黃
城驟至連營火起兵勇大潰吳總督殉難二品頂戴

臬司唐樹義督率水勇礮船退赴金口收集潰卒圖
再舉而逆黨尾追陷漢陽直上沿江皆逆艇旂幟疊
次襲擊並沈賊船十餘隻因賊衆蟻集坐船爲其擊
沈唐臬司落水身死有家丁王貴懷其印璽伏鄰近
乞食設法出溺骸官爲殯殮貴因傷重旋死

二月揚州軍追勦瓜州賊總兵瞿騰龍陣亡

總兵瞿騰龍帶兵由瓜州西岸進勦屢報克捷賊傾
巢出關初五日官兵兩岸魚貫進左翼德興阿右翼
鞠殿華縱兵衝突賊紛潰殲斃三百餘名騰龍下馬

步行持刀殺賊數十名以深入遇害

逆匪分股陷安徽太平府前學政孫銘恩殉難

金陵逆遣僞將軍孫寅三等由太平後路竄祁門數
復繞而南是月陷太平府學政孫銘恩已因請終養
獲咎未受代自經以殉賊遂踞爲老巢結壘三十餘
座直達江干與金陵往來不絕

僧王克復三邨賊退入阜城縣

逆匪自東城等處竄踞阜城縣分占附近各邨莊二
月十五日僧王相度地勢派副都統郭什訥達洪爾

副將史榮椿侍衛達崇阿等分攻堆邨連邨林家場
三處用草束火藥燃燒房屋冒火撲入躍牆登屋愈
殺愈進統計斬殺僞指揮監軍總制師帥旅帥卒長
兩司馬等一百餘名逆衆三千餘名擒獲老賊三百
餘名斬首四百餘級燒斃及自盡者不計其數逆匪
潰敗入城

岳州復陷官兵擊賊湘陰

楊逆遣石祥貞會漢黃各賊舍武昌而溯江直上二
月初一日陷岳州分擾靖江橋口等處竄入湘陰城

駱巡撫派升用同知直隸州王鑫統帶練勇竝飛咨
會侍郎派文生曾國葆候選同知趙煥聯武陵縣訓
導儲致躬在彬東橋新康一帶殺賊數百名焚賊船
十餘隻儲致躬聞賊分擾甯鄉商同趙煥聯馳往衝
殺進城賊始下竄其靖江橋口賊船亦迎擊獲勝

三月皖逆竄擾山東臨清州

河北賊勢已窮蹙惟屯紮各邨莊亡命固拒計剋期
可擒乃金陵逆首密令安徽逆衆由豐工倫渡黃河
竄擾山東金鄉縣知縣楊鄭白全家殉難賊復進撲

臨清州城欲分我軍勢冀抒阜城諸賊之困僧王派將軍善祿等分兵迎勦三月十二日勝大臣亦奉

命督兵至臨清數戰皆捷殺賊千三百餘得首二百餘級生擒五十名三月十五日賊用地雷轟陷西南正西城牆數十丈張溢灼天賊鑪擁入城官兵因北門不啓不得入遂致失守升用知府臨清州知州張積功臨清協副將德慶署副將慶順參將吉興游擊阿克東阿王用安都司武殿魁希奎千總馬誥均陣亡賊之初入東境也巡撫張亮基分遣將弁堵禦因奏報

失實革職遣戍以崇恩爲山東巡撫至是與勝大臣
善提督祿均奉

旨革職戴罪自効

湖北德安諸郡縣陷於賊

自吳總督歿逆黨踞漢陽遣賊目溯江直上陷岳州
武漢上游援師以絕賊由襄河進陷德安府及隨州
棗陽縣署總督台將軍湧督師駐隨州武昌之門不
啓學使青侍郎麟自德安晉省與崇巡撫綸會籌防
堵崇巡撫聞訃丁憂青侍郎接巡撫任惟統標兵手

餘人固守而已湖北諸城殘破不可勝數施南鄖陽以山僻免害形勢之地惟荆襄存

河北軍克復臨清州城

逆匪陷臨清後堅伏不出我兵疊次轟擊三月二十五日三面猛攻盡掃城外賊壘二十六日丑刻踴躍登城立斃賊匪多名州城克復賊向南奔

四月勦臨清逸出餘逆殄除淨盡

逆衆自臨清竄冠縣鄆城均經痛勦復占踞曹縣起築木城以圖拒守四月初九日勝大臣督兵連破賊

巢勢窮出竄馬步豫伏邀擊追至漫口支河逼溺入
水僞丞相曾立昌許宗揚均淹斃僞副丞相陳世保
先於冠縣燒斃全股髮逆悉數殄除無漏網者東境
肅清

僧王攻克阜城縣賊竄連州

阜城逆衆自勝大臣分兵臨清後僧王屢次攻殺斃
賊已衆四月初九日夜全股南竄僧王督馬隊追勦
殄獲多名逆竄連州占踞連鎮我兵四路圍攻勝大
臣亦自曹縣移得勝之兵赴連鎮合勦

楚南水師大捷於湘潭焚賊舟殆盡

逆黨由長江上踞岳州溯流至銅官渚逼近長沙賊船屯泊靖港曾侍郎派勇至靖港接仗賊已由間道暗襲湘潭縣城徧擄商船將沂湘江通兩粵長沙危在旦夕曾侍郎飭水師楊載福彭玉麟等往援白四月初一日接仗起分隊開礮攻勦用火箭焚燒賊船彭玉麟等伏坐小船往來督戰三日之間燬賊船六七百隻斃賊千餘名賊退入城

塔參將克復湘潭縣

湖南撫標參將塔齊布性果毅耐勞苦曾侍郎特薦之使與守備周鳳山督陸軍攻湘潭三月二十八日於槍礮如雨之中逼入賊營縱火焚燒殺賊五百餘名生擒二十餘名燒斃無數二十九日賊兩次出撲塔齊布等縱橫血戰立斬偽帥先鋒九名殺賊千餘名追至嶺下水邊逼溺無數四月初一日破其城外木城斃老賊數白人適水師大捷初三日賊竄回城訓導江忠淑設伏城隅開城接應塔齊布揮軍直入將城賊盡數搜殺立復縣城綜計水陸斃賊不下萬

八解散之衆亦以萬計餘匪遁西湖自克湘潭逆鋒
大挫全楚軍氣始揚

荊州官軍擊敗逆黨於龍會橋

長江已爲逆往來道荊州當四路之衝至省道梗一

切軍務

特詔荊州將軍今

封一等伯爵

欽差大臣文華殿大學士湖廣總督官文統之隨州棗陽
之賊於三月二十八日陷安陸府四月初六日陷荆

門州窺荊州竝勾結監利石首二邑土匪是時滿緣
諸營兵大半分防要隘守城僅二千入而駐紮巴東
利川之四川松潘建昌二鎮漢屯官兵奉

勅調未至有雲南普洱營游擊王國才署龍陵營參將佟
攀梅爲湖廣吳總督檄調以道阻不得赴省行次荊
州官將軍一見偉其略奏留差遣適賊至遣王國才
等督帶官兵一千二百餘名配帶江陵練勇五百人
爲先驅分扼龍會橋了角驛等處四月十三日逆衆
直撲龍會橋承平日久練勇皆閒散游民見賊色動

國才拔劍奮身曰今賊如濤湧不進何處求生活遂督親兵數十人挺矛入賊隊斬其愍大呼後陣兵勇日退一步者斬佐領玉貴等奮勇直前斃賊甚多逆衆先於橋北民房內設伏王國才派千總畢金科拋擲火彈燒燬民房斃伏賊百餘名賊始敗退追至馬障山復經副都統貴陞率協領功額訥等從樂壤橋板橋二處堵截佐領貴鳳等帶兵接應三路合隊槍礮齊施殺賊千餘名追逐二十餘里十八日逆衆復竄至浩子口又經佟攀梅等擊斃百餘名生擒十數

名奪獲大礮擡槍無數餘匪四散逃竄重鎮遂安

湖廣台總督勦捕應山逆衆荆州軍克復監利縣

荆州台將軍湧接吳總督任勦辦北路之賊疊次翦
除收復德安府雲夢縣逆衆竄併隨州復至應山縣
台總督督兵於縣北一帶分三隊進勦飭知縣聶光
鑿帶鄉勇分兩翼以防旁抄賊以四五千入來撲擊
殺無數斬首八百餘級生擒二百餘名賊棄馬匹器
械四散奔逃復於楊家岡遇伏擒戮殆盡北路賊勢
少衰南路之賊竄踞監利縣官將軍派隊往攻斃賊

三千餘人於四月二十八日克復縣城

五月克復宜昌府

附近荊州各屬皆爲逆匪蹂躪官將軍派撥兵勇往
勦所至有功而荊州敗匪復聚竄上游四月二十二
日陷宜昌府官將軍派副都統貴陞協領依西布投
効廩生張于銘等帶兵勇一千餘人前往會官昌鎮
總兵訥欽署知府吳開陽等連戰獲捷於五月初一
日收復府城賊又下竄十三日距荊郡數十里復派
王國才督帶兵勇進紮筲箕垵相機勦賊不敢下

由太平口竄往洞庭湖合股犯常德府

連鎮逆竄陷高唐州

逆匪自獨流阜城被創後窮蹙四竄裹脅雖衆一遇官軍崩角投誠諸大臣許以不死且酌獎之賊翼從益衰而長髮老賊自知惡稔罪盈無生還望死拒於連鎮五月初二日分股南竄賊匪未知曹縣股匪已殄滅尙圖勾結故竄入山東高唐州知州魏文翰罵賊被殘勝大臣督兵追及逆匪不暇分踞邨莊全股入城困守

荆州軍克復石首縣竝湖南華容縣

監利旣克探報賊聚湖南華容縣攻撲石首縣城官
將軍以石首界連荆州恐致延蔓卽飭投效鹽經歷
吳振鏞軍功黃鵬程文生李光榮等帶監利得勝之
兵授以機宜竝督率礮船於五月初二日駛往石首
斃賊三百餘名溺斃無數克復石首縣追至華容攻
入縣城斃賊多名收復縣城餘匪乘划船向洞庭湖
遁去

楚軍勦賊獲勝

築土城欲占要隘青巡撫麟派都司楊昌泗往勦副將書紳副都統魁玉等接應蹋毀土城焚賊舟一百餘隻奪獲二十餘隻斃賊千餘人磯窩肅清同日賊由漢口分撲塘角又由鸚鵡洲分撲鮎魚套均駛船渡江而來亦經總兵侯胤岐抵禦楊昌泗回兵掩殺擊沈三十餘船賊始退竄

皖軍攻廬州獲捷並克復六安州

和提督春福漕督濟先後奉

命援廬州未至而城陷福漕督調撫安徽與和提督會兵
三年十二月駐店埠是年二月進駐三里岡明攻皖
襲屢有斬擒五月十二日冒雨揮兵殺賊一千餘名
十三日再戰梟其賊目城外賊壘以平其分踞六安
州者經署知州茅念劬於十六日督帶民勇攻克賊
尸徧野餘匪悉數殲除

湖南常德府失守知府景星死之

湘潭逆匪敗遁西湖五月十三日陷龍陽縣由滄港
白沙市而進直至常德府提標兵潰致府城於十六

日失守知府景星殉難士民被焚掠極慘逆匪復竄
至辰州府之辰龍關經兵勇勦退其靖港賊船聞湘
潭賊敗亦喪膽下竄至是水陸各賊均踞岳州

楚南軍追賊至湖北崇陽通城界

水陸逆匪全數下竄有由醴陵小道逸出者結聯湖
北通城之賊乘間南竄駱巡撫遣守備徐統緒知縣
陳鑑源訓導江忠淑馳赴平江縣分投進勦望風披
靡遂合諸帶勇員弁乘勝搜捕抵湖北崇通二邑界
六月武昌城陷布政使岳興阿按察使曹懋堅糧道李

鄉穀死之

自逆黨踞漢陽後武昌省垣危若累卵然賊志獨在
長沙欲據上游爲破竹勢故省垣尙保及屢敗衄及
渡江分擾五月有磯窩等處之捷賊未受大創旋復
全力圍城時青巡撫麟所統止千餘人涼州高州二
鎮兵屯城外名雖爲援實僅能自守居民亦遷徙殆
盡守陣卒不敷雉堞數青巡撫素得兵心饑絀數月
以家蓄金玉珍物充犒資不足又取所善衣裘以代
之援絕食盡親與士卒啗糠糲困守孤城衆不忍舍

去六月初二日城陷藩司岳興阿臬司曹懋堅糧道
李卿穀均殉難青巡撫將自縊衆擁之出欲赴荆襄
無路可通乃與魁玉楊昌泗南走長沙繞赴荆郡棄
城越境之罪無以自解奉

旨正法

荆州所調四川兵克復潛江縣竝勦除龍灣等處餘匪
四川松潘建昌二鎮漢屯官兵奉調赴荆六月初六
日出了角驛行至近潛江之廖家橋遇賊接仗松潘
總兵雙保督戰斃賊八百餘名生擒長髮賊偽軍帥

等七十四名潛江城賊出助截殺多名賊勢不支棄城逃竄克復潛江縣其龍灣等處餘匪亦經官將軍派撥員弁督同鄉練勦逐無遺

荊州軍克復沔陽州

武昌既陷上游震驚官將軍派撥兵勇自荊州下勦六月二十五日五品軍功卽選知縣林天直會同沔陽州知州蕭蔭恩殺賊多名克復州城又殺賊於段家場通海口林天直復會守備銜黃鵬程等勦捕洪湖仙桃鎮黑牛渡各賊巢亦疊獲勝仗

楚南軍克復岳州

賊自湘潭受大創全股退踞岳州設壘毀橋意圖久
抗六月二十八日湘勇水師營官道員褚汝航等率
各營進勦知縣彭玉麟都司楊載福伏舟於君山雷
公湖遣文生何南青以疑兵誘賊出戰伏兵盡起攔
腰併擊賊始宵遁我兵七月初一日入岳州府城

七月楚南水師先勝後挫陸軍復大捷陣斬偽丞相曾
天養

七月初一日復岳州水師仍分泊南津港君山一帶

初三日逆匪由城陵磯悉銳來犯我軍分五隊迎敵
彭玉麟由湖西抄尾擊斃偽丞相一名楊載福由湖
東進親執長矛刺死偽丞相汪得勝褚汝航督大隊
窮追將股匪全數殄滅獲船七十六隻斃賊千餘人
生擒一百三十四名燒斃溺斃不可數計其陸路之
賊亦經提督塔齊布擊盡初六十四等日再戰於道
林磯羅山彭玉麟裒創陷陣所至有功十五日曾侍
卽偕山東登州鎮總兵陳輝龍廣西升用道李孟羣
各駕師船抵岳十六日陳輝龍乘南風出隊迎擊於

螺磯乘勝進追船身膠淺陷人重圍欲歸風逆收隊
不及與游擊沙鎮邦均陣亡運使銜卽用道褚汝航
運同銜同知夏縻廣東千總何若澧等駛船往救亦
同時受傷遇害是役也陣亡官兵弁勇數百人水師
中前後三營失船三十餘隻賊思逞志上犯經左右
水師營楊載福彭玉麟竭力扼守時陸路塔提督亦
戰勝賊鋒稍挫乃重整舊旅以褚運使所餘戰船奏
派州同俞晟管帶改名清江營隨同攻勦十八日塔
提督揮隊猛進直抵賊壘突有獮髯深目賊酋槍傷

坐馬親兵黃明魁用矛刺翻桌其首賊衆潰走追殺
八百餘名後克復武昌闖僞文知賊酋爲僞丞相曾
天養賊中之最狡健者時湖南駱巡撫以水帥得力
新有損亡奏委同知銜知縣唐際盛等捐造戰船以
資協勦

楚軍克復京山縣安陸府

武昌失陷時台總督湧尙在德安奉

旨褫職以楊總督需代之時京山土匪勾結髮逆竄陷安
陸府官將軍派四川建昌鎮總兵福忻同知銜張于

銘督帶兵勇由荊門州馳往竝經安襄鄖荆道羅遵
殿派撥弁兵於五月二十日先將京山縣克復進攻
安陸府楊總督飭都司劉富成等會同代辦知府方
卓然夾擊竝令守備石清吉帶兵密往潛伏東門外
劉富成等督兵進勦城賊抗禦伏兵齊起逆衆驚惶
逃竄七月十六日克復府城

荊州軍克復天門縣及沔陽州所屬之仙桃鎮竝收復
下游各縣

官將軍派四川署松潘鎮雙保攻天門縣七月十八

日至漁新河沈擊焚燬賊船八十餘隻二十二日抵縣攻擊適安襄鄖荆道羅遵殿派縣丞袁政代辦安陸府前天門縣知縣方卓然管帶練勇踵至兩路夾攻雙保親督兵勇殺入克復縣城生擒逆首孔昭文等正法餘匪下竄其竄踞仙桃鎮者經沔陽州知州蕭蔭恩並官將軍派往之候選知縣林天直等合軍攻擊於是月十五日破其賊巢漢陽黃州二府所屬各縣亦經各守令會督兵勇鄉團齊心殺賊孝感之賊最悍知縣李殿華會同軍功李玉田擊勝二十六

工部局
次始復縣城黃陂縣於二十三日麻城縣於二十六日一律收復賊均竄黃州

江南軍擊破高淳縣賊

初江蘇巡撫許乃釗接印駐金陵大營嗣上海另股土匪滋擾由大營抽兵督往勦辦旋因久未攻克削職仍留向大臣營効力吉爾杭阿接江蘇巡撫任駐上海勦賊金陵復分兵助之金陵首逆偵大營兵力稍薄密糾蕪湖逆黨乘船下駛潛圖東壩向大臣遣副將傅振邦三品頂戴福興等迎拒之水陸均捷於

二十五日克復高淳縣金陵逆又分股撲七橋窰等處大營爲將軍蘇勒通阿參將張國樑蔡應龍等勦退數日間以少擊多三戰三捷

閏七月楚南軍水陸大捷逆衆潰回武昌

岳州再捷後陸賊駐高橋搭提督匹馬直赴賊營周視形勢閏七月初二日派知府羅澤南知縣李續賓等直撲高橋賊營賊奔城陵磯我兵追勦逆出隊二萬人拒敵塔提督匹馬衝入湘勇繼之適大雨如注東南風大作乘風猛撲隔竹簏數丈濠溝兩重大呼

躍入殺聲與風雨聲相應震動天地其前後蹋毀賊營十三座斃賊二千名陸軍旣勝水賊喪膽曾侍郎飭升翔道李孟羣率前左右三營水師奮力追勦羣逆驚竄時已昏黑暫泊捕鼓臺下黎明從荆河順流而下東岸之旋湖港芭蕉湖道林磯鴨欄磯西岸之觀音洲白螺磯陽林磯螺山浹洲一帶其蹋平賊壘九座礮臺三座遂駐螺山自此由荆入川由岳入湘之門戶始固

楚軍會湘軍收復嘉魚蒲圻縣

涼州副都統魁玉高州鎮總兵楊昌泗隨青巡撫退
至荊州奉

旨革職留荊差遣楊總督奏議三路進攻派魁玉等帶兵
由襄河直下官將軍以監利之螺山地方賊船甚多
北岸礮勇單弱飭令魁玉楊昌泗及揀發參將恒泰
扎勒罕管帶鎮算兵一百九十餘名挑選川楚勇四
千一百餘名由大江螺山進勦會同湖水陸各軍收
復嘉魚蒲圻二縣下攻花園

江南軍克復太平府

金陵逆分股嘯聚於太平府勢張甚鎮江逆亦久困
思竄議遙爲援應同犯太營向大臣訶知其約乃調
副將傅振邦參將張國樑爲一隊副將明安太游擊
穆大木爲一隊參將張騰蛟長桂爲一隊將軍蘇布
通阿福興提督余萬青劉開泰等爲一隊分四路抵
禦視督兵上方橋接應是月十四至十八日逆各路
分撲我營余萬青劉開泰敗鎮江賊於北固山甘露
寺斃賊四百餘名明安太穆大木張騰蛟等亦連破
出巢窺伺之賊其由雨花臺洪武門出撲七橋窰者

蘇布通阿擊卻之穆大本回騎斜刺入賊隊斬其黃
衣悍目張騰蛟長桂福興搜勦城廂匿賊斬首千餘
級三面皆捷第一隊傅振邦張國樑直攻太平之壘
張國樑首先衝入計殺賊四五百人會同太平府知
府李三捷當塗縣知縣王乃晉乘勝抵城下蹋平賊
壘焚賊艇八百賊衆填濠溺水者不計其數槍斃其
僞國宗韋得玲僞檢點陳贊元僞將軍李長有僞總
制吳春和遂於七月十四日克復府城

揚州軍擊瓜州逆獲捷

自克復揚州後鎮江瓜洲二逆勾連負壘爲犄角琦
大臣以疾薨於軍奉

旨以江甯將軍北明阿爲

欽差大臣督辦揚州軍務未至二十八日逆黨糾合數千
賊逕撲大營陳提督金綬遣副將鞠殿華侍衛穆克
登額德興阿分途迎拒親督馬步左右夾攻當者立
踏計斃賊一千餘名生擒五十餘名奪獲刀矛槍礮
各若干兼斬其黃衣賊目逆鋒大挫而我軍無一人

陣亡者

皖軍克復英山縣旋復失陷

和提督福巡撫會兵攻廬州月有斬馘而城大賊悍
兵力不敷環合壽春鎮總兵全玉貴最驍健單騎直
抵城下受礮傷逾數月亡兵心慚懈時安徽徧地皆
賊乃會議以重兵屯東北面撥勁旅會督團練分巡
各郡邑英山縣於上年冬間被賊竄擾經六安州知
州李元善督勇進勦閏七月二十二日伐樹梯城而
入克復縣城英山處皖楚之衝逆衆時所往來旋復
失陷

楚南軍收復湖北通城縣

管帶湘勇知縣陳鑑源等由平江趨楚境駐營通城
六七月內逆疊出樸均經擊退我兵連次攻城逆勢
不支於閏七月初七日夜潛開城門由事北逃竄遂
復通城縣

金陵賊因乏糧驅婦女出城

自廣西永安以迄金陵賊中婦女各立一館以僞女
官管束雖夫婦母子不相通至是各路攻勦賊糧漸
盡乃於閏七月二十七日詭言令婦女割稻將無力

無色者盡驅出城聽其自散後於十二月內盡括年十五以上五十以下之婦女指配給賊不從者殺之有志婦女紛紛自盡死者萬計

八月荊州軍會楚南軍克復崇陽縣旋復失陷

楚南軍自克復岳州後鏖戰月餘本可乘勝東下因陸路有崇陽大股之賊水路有倒口襄河之梗遂定議塔提督勦崇逆會侍郎率水師把總秦國祿州同俞晟徧搜支湖小河屢有金口羊樓峒之勝八月初一日破崇陽蒲圻交界之分水坳賊卡塔提督與羅

澤南等竝官將軍所派補用知縣吳振鏞守備黃鵬程等分路而入一由北路分水坳一由南路桂口初四日會師崇陽城下從西北二門肉薄以登生擒偽丞相金之亨等十一名立復縣城惟逆首廖二在逃塔提督令吳振鏞黃鵬程暫駐崇陽會同署崇陽縣知縣鈕芳津招撫流民搜捕餘匪詎廖二勾結餘黨回撲縣城十一日復陷吳振鏞黃鵬程鈕芳津均巷戰陣亡

楚軍收復黃州府屬各縣

湖北楊總督一軍勦滅安陸股匪後飭游擊趙鴻舉等分路赴下游截擊八月初三日收復蘄水廣濟二縣其羅田縣城亦經知縣彭中芳等收復

曾侍郎督水陸大戰同日克復武昌漢陽兩城並楚軍收復黃州府武昌縣

賊守城之法不守陴而守險其精悍者悉聚城外南岸金口入漢之路以花園爲險外瀕大江內枕青林湖逆立大營三座安礮百餘尊纍纍如置碁向江者阻我水師向南者阻我陸軍北岸沌口下游蝦碁磯

賊營亦如之沿江賊檣林立逆酋驍健者以五采飾其帆粲若雲錦八月二十一日大軍自螺山下勦先飭楊載福俞晟前察形勢賊卽率船上犯楊載福等捩柁擊之賊旋敗退曾侍郎慮此關不破則各路均難措手因將水師分爲前後兩班前班衝過鹽關至鸚鵡洲抄繞而上後班復排轟而下竝懸重賞能得五采帆者錢十萬各軍奮力駛入頃刻獻采帆六賊勢不支官軍縱火燒之賊船二百餘隻焚燬立盡其攻花園之陸路分三路同進李續賓攻江邊之營羅

澤南攻湖邊之營教諭唐訓方及荊州帶勇官李光榮所領川勇千人攻中路之營諸勇或越高牆或穿礮眼而入官將軍所派之魁王楊昌泗攻蝦蟆磯者亦恰衝進土城同時縱火與江中焚船之火煙燄相合天光殷赤凡沿江木柵悉用大礮轟除又攻破漢關及白沙洲各賊營李孟羣親率各營進攻武昌望山門外之鮎魚套口延燒火藥大船霹靂一震衆船皆飛賊尸有自半空落者是夜收隊稍息二十二日進攻一如上日之猛諸士卒無不以一當百血肉兩

飛凡大戰兩日焚盡上下賊船武漢城外無一戰壘
賊於四更後開門逃竄塔提督遇於油坊嶺勦殺無
算李孟羣蕭捷三彭玉麟俞晟各分途由文昌漢陽
望山等門而入漢陽一城亦經楊昌泗攻入兩城克
復午未之間耳餘賊四散潰竄楊總督飭黃州府知
府許廣藻等帶團追勦收復黃州府城對江之武昌
縣亦經知縣白潤糾約紳團收復

四川按察使胡林翼調湖北按察使至楚辦賊

胡臬司林翼湖南益陽縣人起家翰林改官貴州知

府補黎平擢貴東道咸豐四年率黔勇勦賊四月自
湖北通城援武昌六月升四川按察使仍留湖北軍
營七月爲湖南駱巡撫秉章奏調赴岳州防守是月
調湖北按察使至楚辦賊

九月皖軍收復廬江縣

皖軍克英山後逆踞廬州如故竝分黨四出抄掠廬
江近邑被擾尤煩民皆憤激有圖賊志相結爲團應
官兵和提督福巡撫計先取廬江挫賊鋒適練首賞
生吳廷香間道至遂議定進勦兵民爭先殺賊文生

姚克厚等內應一鼓而擒其僞監軍任大綱竝賊首
十七名遂收復縣城

楚南陸軍克復興國州大冶縣水師大勝於蘄州

下游逆賊知官軍分路進剿從田家鎮糾黨六千餘
人半由興國分抄大冶以拒武昌官軍半踞興國以
拒金牛官軍羅澤南等馳抵興國境遇賊追殺十餘
里遂克州城塔提督赴大冶怒馬衝陣立斬逆首於
馬下由縣城北關追至南關斃賊千餘蘄州賊黨窺
我水師距陸軍稍遠將圖撲犯楊載福彭玉麟會商

乘其未至而擊之直抵蘄州酣戰逾時燒燬賊船九十餘隻以陸軍未至而還

十月揚州軍破賊於浦口賊壘悉平

賊於金陵對江九洲洲下之浦口排木爲柵砌石築壘火藥器械戰守繕備冀以老我師而延殘喘將軍托明阿誓必先平浦口賊庶江南北呼吸可通遂密約向大臣派員接應兩路夾擊初八日督飭總兵武慶李德麟等各帶兵勇由金湯門外五路齊進經過新塔浮橋直搗賊巢所向披靡金陵賊飛檄來援方

分兵迎堵而艇船忽排列江上則向大臣之水師已
飛戟破浪至矣合圍分勦殲斃無數賊捲土遁削平
其壘

楚南軍躡半壁山賊壘破之進拔田家鎮收復蘄州

田家鎮之東有半壁山孤峯峻峙俯瞰大江一大守
之百人聘咋楚軍由蕲黃東下寶慶勇先進少挫羅
澤南奮率湘勇猱升拔其木椿竹籤踰溝而人塔提
督李續賓繼進斬擒幾及五千尸橫徧野時水師因
蘄州未下日事攻勦互有傷亡曾侍郎慮陸軍勢孤

派楊載福彭王麟秦國祿孫昌凱俞晟等水師衝蕪
州賊壘而下至田家鎮會陸師賊於半壁山置橫江
鐵鎖四道攔以木簰徧列槍礮楊載福等定議分水
師爲四隊第一隊以洪爐大斧鎔鑿鐵鎖第二隊專
以礮攻護頭隊第三隊俟鐵鎖開後駛至下游乘風
縱火第四隊守營各勇依令竝舉楊載福孫昌凱等
鎔斬鐵鎖駛舟驟下縱火反燒煙焰蔽天礮無虛發
軍無停刃燔賊舟一萬有奇沈尸塞流遂拔田家鎮
賊遁九江追至武穴而還蕪州賊首陳玉成棄城竄

五
往廣濟陸路塔提督等由田家鎮渡江追之

十一月塔提督克復廣濟黃梅二縣

賊首陳玉成竄至廣濟聯合偽燕王秦日綱偽丞相羅大綱等分守各要隘塔提督渡江後由菩提壩蓮花橋節節進剿克復廣濟賊衆退踞黃梅黃梅爲湖北江西安徽三省總匯之區三賊首併力死拒以萬餘賊守小池口抗水師以數萬賊踞城西之大河埔以萬餘賊紮北城外又以數千賊游弋聯絡之塔提督與羅澤南周鳳山等於十一月初一日自廣濟進

至雙城驛距大河埔十里賊略立營未定率衆來撲我軍奮登山岡衝殺而下追至大河埔立將賊壘踢毀初四日破新橋之險直逼城根四面勦殺鮮得脫者塔提督頭受石傷裹創猛攻賊從小南門化龍門縋城而遁遂克黃梅

楚北賊略平

初武昌之陷江以北竄以南城邑皆賊巢荆州當七省阨塞內襄而外江人心皇惑旦夕莫保官將軍持勦撫策將弁所到誅其豪酋寬其黨翼父老攜壺漿

以迎

王師賊亦受懲劄遁又遣副都統以下分城謹門關詰察
姦宄令肅風清大將用前涼州副都統魁玉前高州
鎮總兵楊昌泗佐會侍郎克復武昌以功著客將重
任王國才佟攀梅部將首擢烏貞額塔那布發什尙
額至於埽蕩沙湖通藪收潛江沔陽監利石首諸州
邑則委任帶勇官林天直吳振鏞黃鵬程李光榮皆
一時之良也故居中坐鎮四邊不震驚於逆烽至是
外侮盡驅內訌亦息遺民慶再生焉

臨淮軍勦擒匪麤定督攻粵逆奪復桐城二關

擒者捏也不逞之徒聚捏成隊肆劫掠俗謂之捻子
名聚其處江南則淮徐海安徽則潁亳壽河南則南
汝光山東則兗沂曹濟湖北則襄棗鍾隨以各省論
皆屬邊界以大勢論則居天下之中譬之雞卵中黃
獨堅故此數十府州縣之民類多慄悍承平之際僅
與搶竊盜等耳兵興後粵逆聯爲一氣或令分擾以
掣我兵或令前驅以助其勢何慮千百股與粵逆相
始終初稱亂於淮河袁京堂甲三駐兵臨淮關勦之

自成一軍殄戮極衆時各擒麤定粵匪由廬州分路
舒城竝於桐城大小二關扼險爲守以阻我南路之
師二關爲安慶通衢官兵收而復陷者屢是月袁京
堂派參將劉玉豹四品頂戴舉人臧紆青等進勦初
四日擊賊於茶葉嶺勝之在籍知府葉法助戰又勝
於斛樹嶺白沙嶺自午至酉連奪兩關初五日又破
賊於呂亭驛斬其目吳鳳珠等十二名進抵桐城城
下十一日廬江賊糾合安慶之賊來援臧紆青與千
總郭錦伏勇於天靈莊斃賊數百復抄至賊後兜戮

殆盡十四日潛山援賊至復擊斃五百餘名十七日
再戰各逆前後圍裏城紆青衆寡不敵力竭陣亡劉
玉豹馳至始勦散

九江逆匪勾合田家鎮餘黨竄擾江西吳城

逆匪自楚軍攻破田家鎮後屯聚九江對岸之小池
口竝有賊黨自安慶來援江西總兵居隆阿兵勇潰
散十一月初五日大股竄入吳城經江西陳巡撫啓
遣派都司吳錫光等水陸夾擊追至南康府城下前
後斃賊二千餘人焚賊船三十餘隻餘匪逃往湖口

十二月曾侍郎督軍獲勝於九江湖口

逆匪自黃梅受創後糾合安慶新到之賊盤踞孔壠驛小池口與對岸九江逆相勾連李孟羣率水師會合各營七戰七捷潯江賊船焚盡塔提督羅澤南李續賓等由北岸督兵進至濯港遇賊衝殺賊尸山積塔提督率諸軍攻孔壠破其土城逼賊入泥淖中復縱火焚街市賊無一得脫生擒長髮老賊七十九名偽丞相總制等多名孔壠既破小池口之賊亦遁乃調陸路渡江攻九江府城水師各營乘勝進規湖口

賊酋羅大綱趨救大戰於梅家洲水師屯八里江更番迭戰焚燬小河木簾賊船殆盡十二月初十日復攻燬沙洲賊壘浮橋簡舳板小船駛入鄱陽湖內兩岸賊衆突出焚我八里江水營李孟羣等率戰艦退紮九江

皖軍克復含山縣

福巡撫等久攻廬州不下欲斷其接濟而東南一路通巢湖運賊糧不絕計惟以偏師先取含山巢縣方能致其死命以地遠勢險難其人翰林院李編修鴻

章合肥人有膽識爛韜略先爲呂侍郎賢基奏帶赴
皖今

封一等伯爵江蘇巡撫署兩江總督時在廬州戎幕慷慨
請行福巡撫壯之令帶衛千總莫青雲等練勇會佐
領輯順帶吉林馬隊繞道赴含山十二月初九日督
兵勇進攻二十四日三戰三捷十五日攜帶攻
具梯繩直至城下分門攻擊逆尸紛墮忽城內火藥
震發延燒民房賊自驚亂兵勇攀登擁進合力兜勦
先後斃賊二千餘人生擒十三人遂克縣城移兵攻

巢縣

九江城賊襲我水師塔提督血戰獲勝

十二月二十五日九江城賊見水師戰船集北岸連營二十餘里聲威甚壯乃於是夜以巨舟自焚於南岸水營開礮轟擊南風微起礮煙迷江不辨上下賊用小划奪我戰艦率衆犯陸營塔提督血戰獲勝水師退上游遏守

湖廣總督楊需失利於廣濟逆黨復回竄漢口鎮直入襄河

楚南水陸各軍已復蕲黃諸城已直下湖口分兵攻九江城各路敗賊收合潰散竄至黃梅楊總督親率兵勇往冀一鼓而滅駐廣濟縣值歲除軍中置酒高會賊大至官兵方派隊出禦營中已火起楊總督親隨將官李士林力鬪突重圍保之出已斷後死李士林曾從賊投誠後受楊總督恩故得其捍衛乘別騎馳至漢口鎮派豫勇一千五百人守蔡店楚勇三千駐楊店自率各標兵勇六千餘趨德安防賊北竄賊旋於次年正月初七日至漢口遂進襄河十四日上

犯漢川復擾沔陽天門各縣

THE NEW YORK PUBLIC LIBRARY

ASTEN LENOX TILDEN FOUNDATION

平定粵匪紀略卷四

咸豐五年乙卯正月江蘇巡撫吉爾杭阿克復上海縣
自三年秋另股土匪踞上海縣與粵逆通縣屬洋商
總埠百貨盈例爲賦稅所出官兵攻勦累歲無功江
蘇巡撫吉爾杭阿督總兵虎嵩林參將富安守備向
奎等水陸進攻浙江道員石景芬等督兵勇會戰排
日攻擊四年十二月二十九日江甯府知府劉存厚
挖地穴成用城雷轟塌城垣二十餘丈正月初一日
各兵奮勇登城生擒逆首謝安邦僞元帥陳芝等首

逆劉麗川率死黨逃出虎嵩林等追至虹橋斬之上
海縣城遂復

楚軍水陸回援武漢

楊總督於廣濟敗退會侍郎卽派通判俞晟領守備
洪定升等水師戰船湖北臬司胡林翼領陸軍回援
武漢賊至漢口卽渡襄河踞漢陽府城沿江設壘竝
於漢陽下游南岸嘴高築礮臺以阻下游之師俞晟
等督師船至楚正月十一日開仗毀其南岸嘴礮臺
斃賊多名泊船省城下游之塘角胡臬司擢湖北藩

司率陸軍駐上游池口等處李孟羣水師由九江先
歸紫黃鶴磯曾侍郎復派知府彭玉麟水師至紫望
山門外鮎魚套戰船雲集屢出勦均獲勝

曾侍郎馳援江西

九江礮船已先後派援武漢其隔於湖內之舳板各
船聯絡成一軍爲內湖水師時江西賊入腹地饒州
告陷曾侍郎乃親馳西省籌辦竝調羅澤南陸軍自
九江移師與內湖水師相依倚

僧郡王珍逆於連鎮河北肅清

四年十一月官軍勦洗連鎮鎮舊濱河分東西二鎮
西鎮已破盡焚其樓棚房柵餘賊悉梟水而東蟻聚
東鎮死守巢穴是年正月十九日僧王遣西都統等
分隊竭力驟攻破之生擒僞總制檢點將軍等逆魁
林鳳祥先已薙去長髮圖潰圍遁傷重不得出匿身
地洞汙泥中搜獲檻送京師凌遲處死賊之渡河爲
亂者僅高唐一隅僧郡王遂移得勝之師赴高唐會
勦

荊州軍擊仙桃鎮岳家口踞逆同知林天直副都統貴

陞先後陣亡

入襄河之賊自川沔以至天門各處裹脅出沿無常
備極狡譎官將軍先遣升用同知林天直沿途勦捕
賊所恃爲老巢者二曰岳家口隸天門縣曰仙桃鎮
隸沔陽州天直屢破賊有功正月二十一日至仙桃
鎮殺賊正酣忽有騎馬賊徧身插刃繪面挂髯猙獍
若厲鬼乘間掩襲天直倉皇搏擊身受重傷猶將賊
殺退收隊時血流如湧而死倉都統貴陞亦殞於岳
家口副都統之未出師也將軍知其性卞急臨別戒

五日天門潛注諸勁勇未集則無趣戰遂行二月初
二日抵天門擊賊於漁泛洪大捷獲賊旂幟無數斬
級百餘駐營南岸其北即岳家口次日凌晨欲渡河
將弁以諸勇未集請暫留貴陞滅賊心急策馬先渡
至岳家口殺賊一千有餘忽於街內突出賊數千名
人馬奔騰我兵首尾不相顧致貴陞陣亡

二月僧王誘賊出巢收復高唐州

高唐餘匪日久稽誅勝大臣以遲延獲譴僧王自連
鎮移師進勦正月二十九日夜密令南面守陣官兵

分開列隊停止更籌故作疏防狀逆果疑城外無防
兵全股南竄僧王伏兵於前與追兵合勦遂收復高
唐州整隊窮追狂奔至荏平縣屬馮官屯入邨踞守
三月初一日官兵一擁而前短兵相接立奪西面二
邨餘匪五百餘名蟻聚馮官屯東莊圍之

江南軍討高資賊平其壘

鎮江賊數出窺伺是月初九日分股竄高資夾江而
陳內築臺壘外擱箛箎思以牽制官軍已革提督余
萬清總兵虎嵩林屢勦屢勝賊往來死拒竝擾及旬

容十九日向大臣遣總兵德安四面合攻賊不能支
轟殲溺斃無數連日毀其土臺擊沈賊坐船七奪獲
小艇百餘賊遁入城

三月逆陷武昌巡撫陶恩培知府多山等死之副將王
國才援師入城旋退守城外署湖北巡撫胡林翼聚軍
上游圖進取

逆匪踞漢陽漢口爲犄角懼水師上下攻擊不敢渡
江武昌省城兵力雖單尙能自保陶巡撫恩培抵任
甫月餘率司道及武昌府知府多山嬰城固守胡布

政等水陸屢戰於小河口鸚鵡洲白沙洲逆鋒稍挫
詎逆衆遽由興國通山取道青山至塘角攻撲省城
胡布政李孟羣等正獲勝間瞥見省城火起鮎魚套
水營亦被焚亟馳援而城已陷陶巡撫多山及歸州
營游擊陶德壽等力戰陣亡是日副將王國才自九
江率隊來援三更時抵省不知城之已失也呼門而
入賊亦不知爲官兵直至蛇山之前兵與賊始相認
殺聲互起王國才因孤軍深入不敢戀戰退出紮營
城外胡布政於四更時結筏潛師渡江駐湓口收集

潰卒時饑益支絀乃發運私家穀濟軍歸者日衆軍始振旋奉

命署湖北巡撫遂調諸路軍會武漢以復城爲先而楊總督慮賊北竄奏令巡撫上扼漢川胡巡撫上方略言荆襄據東南形勝江漢又荆襄咽喉漢陽旣陷北岸已形梗塞武昌失守南岸又被蔓延惟急攻武漢一城獲而兩城必復乃可內固荆襄而外遏上竄之路疏入得

旨嘉納之

楚南軍克復江西弋陽縣收復興安攻克廣信府

饒州賊匪於三月初四日分股陷弋陽曾侍郎派羅澤南李續賓往勦三月二十日敗之於大水橋陳家山乘勝追擊克復弋陽賊退踞興安縣二十三日馳抵興安賊先逃竄入城安輯將赴廣信已於先一夕失守羅澤南憤甚二十七日馳抵城西之烏石山賊出城與我兵奪隘令佯爲拒守而重兵繞趨城根血戰斬其魁府城卽日克復

浙軍攻克安徽之徽州府及歙縣休甯婺源各城

徽州居環山之中地勢險阨賊未敢輕犯有土匪爲
鄉導遂致失陷民受荼毒相約殺賊時浙兵出境防
勦浙江金華府知府石景芬副將魁齡密啓浙江何
巡撫桂清派兵會練進勦先攻東南北三門景芬督
衆長驅如破竹勢逆黨聞風開西門遁追殺十餘里
生擒賊目二十餘人土匪數十收復徽州府及歙縣
城乘勝追復休甯縣賊由黟縣竄婺源向大臣派已
革提督鄧紹良等會同石景芬並游擊周天受分門
攻擊鏖戰三時之久城中練勇內應賊匪潰亂奔田

擒斬五百餘名生擒僞將軍將使司馬八名落水溺斃者無數遂克婺源賊又回竄休甯亦經鄧紹良周天受石景芬等攻克由黟縣石埭一帶逃竄浙軍會鄧提督追擊之

江南軍擊敗諸路賊於江浦

四年十月向大臣攻破雨花臺逼南門賊不敢由通濟門出是年三月督辦揚州軍務托大臣偵知北固山鎮江瓜州金山四路賊約期進犯遣巴革總兵王鵬年等伏兵南北岸之七里九淤等洲迎擊破之斷

賊鎮船鍊二道獲其攜箭浦口水師亦隨至接應鏖
戰大捷焚賊船三百有奇諸路賊被剝殲焉

荊州軍殲賊於岳家口仙桃鎮

自副都統貴陞陣亡省垣繼陷江襄郡邑賊蹤殆徧
官將軍分派佐領協領督兵勇迅勦岳家口仙桃鎮
二賊巢誅斬無遺又飭前涼州副都統魁玉同知銜
李光祿捕襄河南岸之賊上荆門下沔陽疊次有功
飛咨楊總督會勦賊之在襄河北者鍾祥京山防堵
亦嚴內則固保荆沙外則扼絕援賊

江西軍克復饒州府

饒州陷後分擾樂平德興弋陽等縣陳巡撫啓邁派都司吳錫光等率領水陸往勦三月二十八日圍攻饒州府賊出五隊來撲竭力擊散城賊由東門逃出水陸分東北兩路殲擒極多郡城立復

四月渡黃河逆衆悉俘獲於馮官屯北軍凱撤

高唐餘匪竄保馮官屯東莊僧王修築套隄引河水圍繞以圍之四月十五日轟破賊壘生擒首逆李開芳竝僞職黃懿端謝金生等八名髮賊無一脫逃者

李開芳檻送京師與授僞職各賊均凌遲處死北軍
告蕞後於五月十五日行凱撤典禮大將軍參贊大
臣恭繳印信關防京城巡防裁撤在事文武

賞賚有差

西安將軍扎拉芬會勦隨州失利陣亡

是時楊總督由德安駐隨州

旨調西安將軍扎拉芬由陝西統兵至襄陽會勦行至隨
州適湖北參將劉富成失利於長林港扎將軍督兵
前進四月十三十五等日賊由平林寺等處直犯隨

州扎將軍迎擊於五里墩殺賊千餘人逆匪愈集愈多身受重傷猶復裹創督戰擊賊退旋因傷重溘逝楊總督退守棗陽

江南軍進埽三山賊壘

托大臣督飭水師沿江埽蕩疊破賊船賊壘金陵上之三山爲濱江要隘逆匪以重兵據之致水師不能上駛三月二十八日向大臣派總兵吳全美德安副將李德麟等駕廣東紅單等船迤邐上駛紅單者廣東商船由造船商人稟海關給紅單以備稽察因爲

名前經江南調防海口爲水師之剽捷者吳全美等率之水陸會剿焚燬賊船二百餘隻奪獲拖罟多漿快蟹等船二十五隻大小礮八十餘尊生擒僞先鋒陳長順等六十一名四月十三日逆匪竄至江甯鎮被擊敗退十六日吳全美等揮船猛進搶上賊隄燒其木壘哨樓乘勢上山蹋平營卡王鵬年等將賊斃焚盡三山江面一律肅清水師棹行始便

官將軍總督湖廣

扎將軍陣亡賊於四月二十九日棄隨州陷德安府

豫境戒嚴德安府河一帶警報時至奉

旨楊總督革職留營差遣四月二十七日

詔荊州官將軍爲湖廣總督乃以將軍印交荊州副都統
載增署理飭署右翼副都統魁玉扼守襄河南北岸
防逆西竄趣兼理藩司鹽道常恩由宜昌率新募豫
勇一千名駐潛江爲德安應援部署定卽赴襄陽受

督篆

五月楚軍連破撲營之賊進逼武昌駐紙坊建議先攻

漢陽

胡巡撫之初著布政也卽分營金口及任巡撫派知府彭玉麟駐陸路堵賊南犯蔽湖湘而自率水陸兩岸防禦逆謀襲金口斷官軍糧道屢戰斬其僞總制丞相等逆復率大隊來撲整兵擊敗之乘勝直擣其壘屯兵紙坊進逼省城小東門逆閉門固守潛自他門出掠是月楊載福自湖南率水師來會聲勢漸壯胡巡撫慮相持無益遂建議云武昌城周二十里門有九合圍則兵政不足攻其一門則賊可輪環抗拒而外擾糧道此自困之道不如先攻漢陽以重兵扼

涓口蔡店要隘則竄襄之路絕濟江隄以水師爲腹
背攻之則漢陽孤而城可破疏入

上嘉納之後奏功悉如所議

楚南水師在江西內湖勦賊疊獲勝仗

水師前自田家鎮駛湖口簡舳板輕舟燔賊船進鄱
陽湖自大孤山以至都昌縣南康府當者輒靡會值
水勢益涸賊以戰船塞湖口鐵鎖環之進湖之師船
不得出遂與外江水師分而爲二自四月二十一日
起至五月十三日曾侍郎先後派營官何啓長孫昌

國賀虎臣蕭捷三等殺賊於都昌城下及馬家堰土塘青山姑塘等處凡六戰斃賊數百名燒賊船約四百隻湖內肅清

浙軍出嶺勦賊克復安徽石埭縣

浙軍再克休甯出嶺追勦探知逃賊前隊踞石埭縣後隊由祁門竄走提督鄧紹良等督兵逕趨石埭奮勇登城殲賊二千餘人尸積衢市奪路逃出之賊追至城外琉璃嶺圍殺淨盡其逃往祁門者亦勦逐出嶺徽郡肅清

六月楚軍會攻德安城

楊總督前由棗陽走襄陽致隨州德安以次陷
察哈爾都統西凌阿爲

大臣已入楚境官將軍亦行抵襄陽受總督關防軍
威復振逆嬰城固守不敢出初賊由府河入襄所過
州邑悉殘破官總督遣知縣李民邦李光榮沿港岸
岸伏礮叢葦處狙擊之轟碎賊艇殲斃無數襄圍協力
力賊分途潰退六月初九日收復雲夢縣初十日收復
安一城縣未復者惟德安一城而已固原提督孔廣順

督參將劉富成四面環攻斷其出入總兵楊昌泗署
布政使常恩奉官總督檄派員弁三路進一取皂市
一勦京山一駐沙洋爲兩路聲援兼杜回竄逆之翼
從益少始不敢窺伺荆襄

江南軍敗賊蕪湖重收太平府

於是太平已三陷矣沿江上下數千里殘破略盡兵
來賊去兵去賊來居民亦習常視之至是向大臣劾
張國樑等以全力攻之始得克復

七月湖南提督塔齊布卒於軍

塔提督由侍衛揀發都司洊升副將在湖南疊著戰
功超升提督素以智勇著名所向無堅敵先會水師
追尋江逆黨爲所陷血戰以免南康青山間疊獲勝
仗以少制衆斬驍賊如摧枯振落是月備雲梯數百
乘攜簾竹盔布袋幾千具圖大舉七月十八日傳令
攻九江城未出師以力盡忽患心悸半日而卒

楚南陸軍大捷於義甯州復其城

曾侍郎聞義甯失陷派羅澤南率全軍往勦七月初
八日破賊於梁口十二日抵碁盤嶺由嶺入州城有

二道正道頗平易賊堵禦極嚴越乾坑度小南嶺齧
嶺爲間道澤南取間道從前山中盤旋而入羊腸險
途兵有難色澤南奮身促行令營官今廣東巡撫蔣
益澧守乾坑率勇掩旂前進襲殺守齧嶺之賊疾據
山巔恐乾坑爲賊所困勒兵回援而益澧已獲勝收
隊遂於十六日進薄州城不顧矢石登時克復斃賊
四五千名賊之扼拒正道者分兵擊之棄柵壘遁去
楚軍攻蔡店克之進拔漢口鎮逼漢陽城
賊踞襄河內之蔡店上通德安下達漢鎮互爲援應

七月初九日胡巡撫督知府彭玉麟分投進勦大獲
勝仗十二日克蔡店遂水陸併進十五至二十五日
奮力攻勦用火龍快蟹等船將襄河口鐵索浮橋上
下游賊船焚燬殆盡漢口鎮襄河兩岸賊巢全行蹋
毀竝將省城下游塘角賊船漢陽大別山賊巢一律
焚破初德安賊每日出濬濠掘地引水通府河泛艇
數百伏賊衆其丙夜下行晝上竄眩耀鄉民曰此援
兵來自武漢者及官兵收復雲夢應城逆大恐二城
者府河出入要道也蔡店再克衆知無援德安之窮

賊益蹙

江南軍克復蕪湖縣

蕪湖自咸豐三年冬復陷幾二載江皖往來道梗逆以爲上下關鍵水則聯艦陸則砌壘官軍乘屢勝威不能拔是月向大臣遣總兵吳全美德安明安太前提督鄧紹良等分道齊攻麤戰旬餘斬賊近萬遂復

縣城

楚軍收復漢川縣

胡巡撫旣破蔡店督軍攻武漢而漢川爲蔡店後路

賊游行衝突無已德安踞逆亦資以通聲息官總督
慮巡撫之軍腹背受敵遣副都統魁玉署布政使常
恩迅圖漢川時帶勇知縣李光榮李保邦分督礮船
正克分水觜賊巢飭令乘勝下勦遂於十四日會同
克復漢川縣武漢首尾聯絡聲勢益張

楚南水陸各軍進攻江西湖口城克之收復都昌縣

逆踞湖口縣內湖水師相持數月未遽攻蓋地勢極
形勝而逆壘環抱星羅非東岸有陸兵不能得手是
月十一日同知李元度知縣李錕劉希洛帶平江勇

由南康渡湖十五日至文橋併力破之賊趨蘇官渡
又破之陸路之險隘已得乃會水師焚燒賊艇五路
夾擊賊於西門外陷坑內伏大礮因躍坑而過力破
守門悍賊遂克縣城其都昌縣城亦於十六日收復
於是湖口一帶無艘惟下鍾山賊壘未克而已

八月楚軍金口大營失利

胡巡撫攻克漢鎮其金口大營惟按察使李孟羣居
守詎崇通大股驟至勾連武昌城逆分道撲犯李孟
羣力戰四日衆寡不敵陸營失守水師勢孤胡巡撫

亦敗於麥山退保大軍山旋移營新堤賊勢復熾分
竄漢陽各鄉及侏儒山竝繞道襲陷漢川縣

九月官總督赴德安督勦

西大臣與幫辦軍務荊州總將軍洵等久攻德安未
克兵勇屢次潰散奉

旨革職提督孔廣順遼間九月二十五日

授官總督爲

欽差大臣馳赴德安接受關防督辦湖北軍務官大臣時
因武漢緊急由中路馳援在京山途次接

旨卽馳往德安督勦

浙江甯紹台道羅澤南赴援武漢克復通城崇陽二縣
羅澤南克復江西義甯州奉官大臣胡巡撫檄調馳
援武漢九月初五日至通城賊移崇陽桂口之衆七
八千人屯於西門外築大木城拒我初六日破其木
城縱火焚壘賊奔西門我軍尾追守城賊以磚石下
擊兵勇冒死奪門而入斬馘三千餘人遂克縣城賊
竄崇陽約通山之賊入城助守澤南選擇精兵分作
數十隊設伏輪攻城中大亂遽開北門逃出兵勇截

殺千餘人又將崇陽收復

賊擾應城沔陽爲荊州軍擊敗之

漢川之賊分股竄擾應城縣之長江埠休儒山之賊竄至沔陽州之周家幫官大臣先派副都統魁玉都司文瑞等由中路進兵兼爲荊州屏蔽魁玉等分馳堵勦設伏誘戰斃賊五六百人遁溺湖中者無數餘匪由原路遁回

十月皖軍克復廬州府

廬州爲安徽省垣僑治被陷已及二年和提督福巡

撫駐軍城外之三里岡大小數百戰屢勝不拔自本年入春以後賊援無日不至皆大受懲創而去我軍仍晝夜嚴攻十月初一日和提督福巡撫親自督陣總兵鄧魁士與守備馬昇平等潛至城根豎立雲梯都司熊天喜首先登城都司于昌麟亦由東門繼登副將嵩瑞等山東門殺進火箭拋入賊火藥局硝磺轟發賊首僞軍帥均被焚燒羣賊奪路狂奔適城中內應紳民王子願亦在各門放火接應光可燭天呼殺聲震山谷逆衆自相踐蹋流血成渠逸出之賊和

提督帶馬隊馳至德勝門外全數截殺是日計斃賊
五千餘人割賊首二千餘級生擒僞官十七名長髮
賊三百七名遂克府城

楚軍克復德安府城

逆黨踞德安衆不過數千恃武漢爲下游與主襄府
二河羣匪蟻集官兵勝東挫西疲於奔走以是負隅
延息及官大臣督兵前往前大臣西凌阿等愧憤猛
力攻擊賊不能支先是脅從僞總制陸長年僞監軍
馬超羣不甘從逆欲爲內應而所部長髮眼目多恐

不成蒞醢乃藉端戮老賊數人屢放難民出遣親信
潛赴大營告機密官大臣稔其誠購安陸人鄭蘭芳
蔡業廣僞爲從賊者混賊隊入城定計豫其謀者惟
麾下副將顏朝斌一人自前大臣以下秘弗命知是
月初四日大雨暴風我軍冒雨圍攻陸長年馬超羣
在內放火開門接應游擊馬天貴等首先奪門而入
賊衆爭逃我兵合力截殺殲斃無算入城安撫

楚軍克復漢川縣逆黨略平

逆之竄蹤靡定牽掣我軍者三路自隨棗至襄陽爲

北路武昌上下爲南路漢川中路尾潛河首德安爲
尤要屢收屢陷官大臣旣取德安派西都統帶重兵
鎮之兼堵北路編將軍督馬隊由天門馳赴仙桃鎮
提督孔廣順統郢陽鎮竹山協官兵發長江半抄新
溝兜擊魁王錫齡阿李保邦蕭蔭恩等先後分四道
進兵齊集漢川十四日賊衆潰散克復縣城中路肅
清遂率兵東下與胡巡撫合謀武昌漢陽二城
楚軍克復蒲圻咸甯二縣

羅道澤南分勦崇陽餘匪進駐蒲圻之羊樓峒逆首

石達開合悍賊二萬餘人自蒲圻分途來撲澤南派
李續賓等迎擊之斃賊二千餘人十月十九日督兵
進攻千總楊再佑等首先登城燒殺五千餘人蹋破
賊營九座克復蒲圻縣逆復糾興國大冶之賊嘯聚
咸甯縣十一月十一日黎明澤南等乘霧進兵鼓勇
登城縣城遂克餘匪遁歸武昌省羅軍與胡巡撫會
十一月楚軍水師破賊於金口沙口
武漢之賊聞官軍陸路大捷分賊由水路上竄金口
楊提督水師自六溪口拔營派都司鮑超等由南岸

而下游擊李成謀由北岸繼發齊抵金口官大臣遣副將王國才由沌口出新灘協同水師營官鮑超王明山李濟清陳金鼇萬化林等分五隊圍勦賊礮子雨落鮑超等欲乘其憊令快蟹船迴環周繞其計疑之賊礮赤藥罄乃奮迅奔撲彈毬飛滾賊不能支泗水潰遁獲賊船無算焚燬亦多遂紮水師於大軍山是日陸師副都統都興阿亦敗賊於下游沙口焚其新築板屋上下游火光相望浮尸蔽江官大臣乃與胡巡撫商定令提督楊載福駐水師於金口分二隊

一扼上游一截下隘以慎江防將軍綿綸等領馬隊
分駐蔡店等處杜北竄羅澤南偏師道嘉魚會胡巡
撫攻武昌官大臣督李孟羣攻漢陽仍互爲應援以
期必克

金陵逆匪大股出竄向大臣督兵殲除之

金陵首逆因瓜鎮屢被懲創意圖往援十一月十六
日龍驤子等處出賊窺伺向大臣派總兵張國樑等
由仙鶴門甘家巷一帶進攻逆以二三千人來撲張
總兵從後路兜至縱橫抄擊斃賊無數黑龍江馬隊

四圍包抄斬馘一千數百人生擒二百餘人維時有
另股由東陽竄至棲霞街焚掠張總兵繞至牌頭庵
與總兵德安副都統順庭游擊李鴻勳協領武精阿
等橫衝直擊斃坐轎賊首一名偽丞相周少魁等四
十名追至石埠橋江邊十九日復會總兵秦如虎敗
之於觀音門又斃賊二千餘人餘賊逃歸城中不敢
復出

六合防軍攻破九泮洲賊壘

金陵逆於對江之九泮洲築石壘浚深濠悉銳守之

爲金陵援蔽賊竄江北每藉爲進步屢攻未克是月
升用知府留署六合縣溫紹原派都司秦懷揚千總
王家幹攻之乘大霧銜枚疾進越濠數重緣壘而入
賊覺死守竝分賊抄裹秦懷揚見事急欲自裁王家
幹力止之取賊燄置膝上實藥轟之羣賊駭潰隨克
其壘後因孤懸外江未能堅守復爲賊踞至同治二
年五月始克

揚州軍於瓜州外築長圍成

揚州官兵與瓜州踞逆相持已二年餘自托將軍接

在後轉戰無虛月而瓜州與鎮江一水相望兩城逆
衆往來無阻竝時有合竄揚州岡北犯意托將軍遣
諭士民捐築長圍於瓜州之北以扼之是月成羣逆
水陸分撲我軍大勝奪其餉船生擒偽參護鄭金桂
等十名

鎮江軍勦揚郡城

江蘇吉巡撫旣克上海移兵駐鎮江前提督余萬青
副之萬青先爲湖南提督守道州賊至委去論劾赴
大營自贖回大臣委令帶兵萬餘贊吉巡撫軍時吉

巡撫軍祇七八千人而余軍少紀律不得用總兵虎
嵩林副將周兆熊參將吳世斌李若珠知府劉存厚
皆上海得勝從吉巡撫來者顧弁兵尙少乃馳檄調
募又得武弁慶文師長鏢張汝琳陳一銘文員知縣
松壽鹽知事張翊國各率兵勇隸麾下與余提督分
營而立余營城東京峴山吉巡撫營小九華山復於
黃鵠山及京畿嶺築城置礮以逼賊是月爲地道轟
去城垣十丈餘城中賊死拒官兵不得入反乘間犯
我東軍營亦連戰卻之

江西收復各城池

湖批崇通餘匪竄入江西疊陷安福分宜萬載新昌等縣周藩司玉衡會同贛州鎮總兵阿隆阿護吉安營參將柏英等管帶練勇先後夾擊援應將各縣城卽時收復

十二月楚南軍大捷於樟樹鎮收復新淦縣

崇通餘匪勾結湖南茶陵州股匪於十一月初犯瑞州候補知府劉希洛李錕督禦陣亡府城於十一日失守又分股由新昌闖入臨江府城逆黨已逼南昌

曾侍郎飛調副將周鳳山統九江全軍往援鳳山取道臨江十二月初三日遇賊於樟樹鎮鳳山謂其部曰賊稱勁悍者惟簾牌手我軍鈎連槍足制之努力前進毋退後遂選鈎連槍數隊先攻其簾牌隊賊果敗斬驍銳五六百人蹋平西南賊壘五座其東北岸一壘兼築礮臺以拒水師者鳳山約江西水師營官劉于涓會攻劉于涓令軍功李廷棟首先登岸以火彈焚其壘衆勇齊入搶其礮臺焚燬賊船鐵賊一千餘名新淦賊聞風他竄遂於初十日進復其城新淦

通撫州亦省垣要衝

楚軍分攻武昌漢陽水陸獲勝

十二月初一日官大臣親赴三眼橋督隊李孟羣率各營直撲漢陽西門立毀賊卡龜山尾月湖隄等大股悍賊抗拒奮勇擊殺數百名賊勢潰退逼入襄河死者極多水師礮船攻至五顯廟被水卡二座燬奪賊船二十餘隻漢陽東西門外賊壘一律蹋平其武昌之賊胡巡撫與羅澤南分紮李家橋洪山盡破賊壘晝夜環攻不令少息武漢各營兵勇皆有臨戰不

懷生之慨爲前所未有者

江南軍擊走安慶蕪湖諸賊

蕪湖下至揚州沿江汶河套港皆賊逋藪向大臣遣水師副將李德麟總兵吳全美節次捕勦去來無定是月偵無爲州城賊糾合安慶蕪湖羣醜東下圖解鎮江圍乃檄調水師派江會攻敗賊於神塘河又裕溪口援賊由范羅山連亘陶陽浦同日亦爲官軍所殲生擒傷檢點趙元發僞將軍王化興等數十名楚軍擊敗援賊於梁子湖金牛鎮

武昌城外賊壘如林胡巡撫督飭羅澤南李道續竇
分路攻焚城寨悉盡漢陽城外自龜山沿河而下賊
艇蠡聚水師焚燬之上游大江之梁子湖下游之金
牛鋪羣賊赴援水陸各軍督紳民團勇數千人分勦
掃其巢穴擒獲匪黨數十名奪馬牛無算武漢外患
至此盡除

古今圖書集成

三十一

平定粵匪紀略卷五

咸豐六年丙辰正月江南軍敗竄賊於倉頭

瓜州逆屢出衝突金陵逆遣大隊援之托大臣檄副都統德興阿都司趙樹棠屢敗賊於土橋蛙橋尹家橋瓜州逆不敢復出金陵援賊亦受創去初金陵逆糾合上游來賊以數萬計由陸路嘯聚於倉頭鎮聲勢頗壯余提督萬青虎總兵嵩林等分途抄殺賊鋒不可止遏總兵張國樑奮銳摧其中堅截賊不能首尾顧各軍乘之俘斬數千賊始潰遁

皖軍克復舒城縣

廬州復後和提督會商福巡撫以南路舒城東路巢縣皆賊久踞爲廬郡腹背患宜分兵攻之一軍由柘臯進攻巢縣一軍攻舒城和提督與總兵郝光甲珠克登等赴舒城分門攻擊已革總兵音德布首先山東門登城各軍掩殺斃賊三千餘名縣城立復是日總兵鄧魁士分擊三河踞逆亦獲勝

月楚南援師克復江西萍鄉縣

時江西賊勢猖獗瑞臨未復吉安府復於正月二十

五日被陷湖南邊界均戒嚴今直隸劉總督長佑從軍江楚屢以戰功擢候選道時在江西統兵勇回湘援勦由醴陵進攻萍鄉二月十一日有黃衣賊目自葡萄口出撲我軍圍之數重賊目入民舍自焚死諸賊乘夜鼠竄遂復縣城

楚南軍擊破吳城賊復建昌縣

賊踞吳城復陷建昌縣曾侍郎以水師之在吳城者無陸軍依助恐致挫失遣都司黃虎臣率三營步兵馳赴吳城相機進勦二月二十二日賊出數千人逼

沙洲河而陳水師哨官許志清突陣被刺獲救免虎
臣乃分軍二隊一繞其後一背水出其前鼓勇夾擊
我軍始振水師亦轟礮助勢遂大破賊衆追至建昌
縣賊開門遁收復其城

三月瓜州鎮江逆合攻揚州城陷之旋爲官軍收復

咸豐三年逆陷鎮江時有捐職都司劉廷鏜販商也
帶湘勇從上海來勇而足智敗賊於鎮江之南門逼
城爲壘是年六月援鄧提督紹良於丹陽復至鎮城
扼守逆不敢南向者二年廷鏜戰死賊乃猖獗附鎮

城江中水營二一總兵周士法部浙艇泊焦山一總
兵陳國泰部粵艇泊金山而瓜州逆結連鎮城逆往
來金焦間晏如也二月杪鎮江逆渡江糾合瓜州逆
突然內犯金陵逆又撥大股助之三月初一日復陷
揚州知府世焜參將祥林力戰捐軀托大臣兵潰退
保北路副都統德興阿帶馬隊衝突遏賊進竄賊乘
間撲東路萬福橋意圖擾及裏下河經總辦糧臺江
甯布政使文煜帶勇擊退

詔革托大臣及幫辦提督陳金綬前侍郎雷以誠職加德

興阿都統銜爲

欽差大臣以在營之詹事府少詹事翁同書幫辦軍務德
大臣親督總管西昌阿等耀兵於揚城西北隅破薛
家樓撲營悍賊直搗中堅轉戰皆捷賊遂披靡潰遁
十三日收復揚州

布政使銜浙江甯紹台道羅澤南力攻武昌城死之

澤南湖南湘鄉縣諸生請學宗法程朱體用兼備咸
豐二年賊犯長沙卽倡率生徒爲團練忠義至性感
動鄉里遂率其鄉人轉戰三楚江西大小二百餘戰

克城二十所向悉身先士卒由訓導超擢浙江甯紹
台道加布政使銜至是力攻武昌禁營賓陽門外之
洪山三月初二日乘勝追勦直抵城下左額中槍子
入腦至初八日因傷殞命事聞

上深加憫惻照巡撫例優卹之胡巡撫派澤南弟子記名
道安慶府知府李續賓統其衆

逆匪陷江浦縣踞浦口攻六合官兵擊卻之旋復浦口
江浦

揚城賊闖入江浦縣分股由寶鳳莊等處抄至浦口

總兵武慶退保六合縣賊復隨攻之德大臣派總兵
穆克登額督帶馬隊馳往向大臣派總兵張國樑帶
隊渡江來援駐六合之龍池逆黨由毛許墩焚掠而
至張國樑俟賊近揮兵衝擊斬其目餘黨卽潰追至
水家灣適畱署六合縣事知府溫紹原督兵至合力
攻勦斃賊一千餘名賊竄浦口張國樑會穆克登額
武慶等追擊又敗賊於葛塘集隨於十八日克浦口
二十三日復江浦縣

安徽甯國府失陷皖南逆氛復熾

逆匪經皖浙防軍追剿復由太平涇縣犯甯國府三月二十八日陷之逆氛復熾向大臣派兵馳往剿辦四月楚軍督黃州練勇擊援賊於新洲敗之

江西省城頻告警曾侍郎撥兵赴援其駐潯水陸各軍僅得自衛九江逆上突麻城縣至新洲修營築壘搜掠民糧爲牽掣武漢計衆約三萬官大臣檄黑龍江營總多隆阿吉林參領額爾庫等率馬隊會同黃州府知府許廣藻督集鄉團助勦行至柳子港西岸賊於東岸列陣以迎馬隊從淺水渡將弁有傷者裹

創牆進賊不能禦紛紛潰退軍功吳之傑偵賊欲歸
三店巢謂所屬勇曰楊汭河者三店必由之渡大軍
馬隊破其前我當以民勇勝其後乃伏勇叢葦處賊
果至汭水乘其不備槍礮齊施無虛發生擒偽檢點
指揮將軍各一人長髮賊八十餘人進勦三店馬隊
隨至圍斬無算毀其營壘未及新洲三十里賊棄寨
遁追敗之於團風鎮鷺公頸焚賊屯聚一空竝獲木
牌二裝載而還

楚南軍克復江西東鄉進賢二縣會圍撫州水師復豐

城縣

逆復踞樟樹鎮撫州被陷曾侍郎派兵分路往勦同知李元度率留饒之軍取道東鄉會知縣吳朗帶團勇於三月二十日克復縣城知府鄧輔綸同知林源恩副將周鳳山自進賢進三月十二日克進賢縣會於東鄉二十七日乘霧攻撫州破其對河賊壘五座四月初二日李元度督勇挽搭浮橋賊以大股來撲兩軍相持間李元度念搭橋劇難不若乘隙飛渡因令左營新中營用小划先濟各哨濟之半解衣鳧水

閱兩時畢渡連日猛攻屢敗踞逆及建昌來援之賊以城堅賊衆未能遽復記名道劉于涓帶水師二營防上游瑞臨之賊因豐城被賊占踞四月初十日督船往攻豐城一線單隄賊得隱避船礮不能及乃於二十日初更三門放礮攻擊督帶哨勇登岸各持火具燒其南門外賊壘賊疑陸軍已至向樟樹鎮逃竄遂復縣城

江蘇巡撫吉爾杭阿擊金陵援賊於高資力戰死之吉巡撫至鎮江受幫辦軍務任慨然謂攻堅不如斷

糧野戰不如扼要高資者賊運糧要道也飭候補道
江甯府知府劉存厚結三營於高資煙墩山以扼之
金陵逆大恐出賊衆數萬由句容會鎮逆盡銳犯高
資存厚被圍知縣松壽鹽知事張翊國均戰死諸將
各固壘圖保守巡撫所統不及萬人或說巡撫曰賊
護糧而來生死所關其鋒不可敵姑撤此營鎮江賊
喜於得命必不我迫巡撫憮然曰我以一部郎不數
年位開府仗節麾受

國恩厚矣今一戰而捷賊糧必斷逆穴可平上解

聖王之憂下甦生民之困詎可避難趨易遂率親兵小隊
馳往救之衝入高資營賊衆四合巡撫登高瞭望中
擡礮立亡存厚左右衝突欲翼其尸出不克血戰死
京口副都統綳澗已戰脫哭曰吾與吉公偕入吉公
死吾何忍生亦自投江死

五月江南軍馳勦援賊於鎮江克之賊竄回金陵

向大臣聞吉巡撫之難遣總兵張國樑馳救五月十
五日戰於丁卯橋勝之又勝之於五峰口磨筭由游
擊李鴻勳自丹徒鎮至總兵余萬清李志和自徒陽

運河至福將軍與副都統德宗額督馬步隊自京峴山至會張國樑兵四面兜剿斬賊數百級賊回走如華山張國樑夜往襲其營破之賊皆棄壘走游擊張玉良亦敗賊於東陽甘家港大軍尾追之竄入金陵城賊又分股陷溧水向大臣撥兵馳勦之

江南大營失陷

鎮江圍甫解賊回金陵議夾攻以撼我大營於是鎮江之賊趨江甯從東而西江甯之賊從西而東溧水大小關金柱黃馬等處之賊分出衝擾向大臣因分

勦甯國溧水屢經抽撥兵力過單遂不能止過城遂復出通濟門會紫荆山羣匪撲七橋堯大營官兵正併力截殺各營同時火起兵勇潰散張國樑突圍保向大臣衝鋒而出收聚散卒由涇化鎮退保丹陽

楚軍殲除水陸援賊開長濠困武昌城竝克復安徽英山縣

楚軍破新洲拔賊後寤大臣與胡巡撫會商乘賊驚魂未定先派水師下擊以清江面遂令楊載福督六營礮船於四月三十日下駛遇賊船卽焚靡戰不勝

如破竹勢數百里賊船資糧埽蕩一空五月初四日
抵九江盡燬江面逆船初九日仍回沙口十日之間
往返千里賊衆驚爲神奇陸路援賊石達開率衆至
武昌縣之葛店胡巡撫將省城下青山嘴塘角開空
長濠由大江直通南岸嘴以拒援而困城逆連戰皆
捷追援賊至樊口斃賊數千先有另股賊由安徽突
入英山縣城撲羅田署黃州府知府許賡藻督代理
羅田縣彭應鯉率紳練敗賊於樂利河乘勝追襲四
月二十三日克復英山縣復有九江股逆合蘄州之

賊上竄亦經彭應鯉帶七區勁勇會同官大臣所派
四品軍功馬有功夾攻於嚴家坳殺賊千餘生擒二
十七名餘匪翻山遁去

六月楚南水師收復江西南康府

南康外接大江內控鄱湖爲全省水道總匯前爲水
師入內湖時埽蕩迨樟樹鎮失利調分駐青山屏風
之水師移紮吳城南康復爲賊踞曾侍郎遣水師彭
玉麟等於六月十四日往勦賊方督民夫造戰船未
竟連勝焚燒其業艦延及岸上積聚竝令各船壘高

礮口使礮子轟入城中賊大驚開門遁收復府城

楚軍乘勝攻黃州竝截勦漢陽竄賊

六月初六日沙口陸營獲逆謀得僞文爲八十指揮
熊逆知照漢陽賊首僞尙書鍾逆者云九江逆石達
開憤樊口之敗大集逆黨萬餘卽日由廣濟蘄水黃
岡至漢鎮合逆衆堅守以待官大臣密派荊州將軍
都興阿率馬步由陸路進至黃州上二十里之堵城
投誠四品軍功范潮蘭赴東路爲前隊都司王玉琳
繼之派劉藍田赴西路爲前隊馬有功繼之馬隊則

以營總多隆阿統帶擇要埋伏步隊則與知府許賡藻督團勇會合相依倚賊衆果由下游驟至我軍奮勇兜合砍倒執旂賊目一人長驅直入左盪右決殺聲震天地斃賊極多餘匪四竄沿湖溺死者無數我軍乘勝齊會黃州城下盡毀賊壘其武漢之賊尙死守官大臣與胡巡撫分南北岸逐日攻逼大小數十戰均獲勝

江南軍大破逆衆於丹陽城外

大軍退保丹陽後逆衆分途逼近重營壘壘以百計

和定橋鳳凰岡五里牌黃莊橋皆賊巡徼所及也向
大臣晝夜憂憤疾轉篤張提督國樑密商諸將謂賊
以吾主帥病危衆皆驕怠諸君若舍生努力擊之必
大克衆皆唯命乃遣參將虎坤元游擊張玉良督馬
步先攻五里牌焚賊寨柵渡河至黃莊橋破其礮臺
副將秦如虎由定埠南渡截賊衝創斃極多明安太
虎嵩林旁伏伺勦亦有斬獲張國樑偕福將軍興整
大隊撲賊巢縱火鏖戰遂奪和定橋賊衆大潰鳳凰
岡之賊亦不戰而遁追至黃土橋斬級數千丹陽城

外賊壘悉平捷聞

詔以提督銜福建漳州鎮總兵張國樑幫辦大營軍務

七月楚南軍合江西軍圍攻瑞州府江湘路通

瑞州府居江湘之衝自逆踞文報多阻有南北城北
曰官城南曰民城中隔一河四月初參將普承堯同
知吳坤修曾國華知縣劉騰鴻帶楚南兵勇勦咸甯
蒲圻崇陽通城新昌上高等縣之賊悉復其城於七
月初三等日馳抵瑞州曾侍郎亦先後撥兵勇六千
合勦援南城韋逆昌輝自臨江赴援至北城遂資以

爲雄驟挑戰我軍堅持不動昌輝儀衛奮僭勁悍前
驅劉騰鴻曰是羊質虎皮不久見犇宜乘其敝攻之
旬餘賊跳浪氣衰我軍彈厲從北岸渡兵抄其後南
城勝兵角其前賊受創大敗我軍圍攻北城自長沙
以至南昌文報無道梗憂江右全局始振

江南向大臣卒於軍

大軍既移營丹陽嬰城固守而賊重圍密壘勢甚鴟
張有以退保勸者向大臣太息曰吾病不能進何顏
更南走當死於此耳遂以軍事付幫辦張提督國樑

曰汝才足辦賊吾死何憾復踴身疾呼曰終負

朝廷恩一慟而絕向大臣自道光三十年調任廣西提督
卽勦粵匪追賊東下直抵金陵大小千百戰嘗自鑄
私印曰誓滅此賊乃大功未定竟以積勞殞於軍奉
旨優卹竝

賞世職江左紳民以數載勤勞爲東南保障實能禦災捍
患呈准入祀江蘇名宦祠是時張提督已擊走丹陽
諸賊賊竄金壇卽偕福將軍興派總兵虎嵩林等赴
金壇督精銳渡河破賊尋奉

旨命江南提督和春爲

欽差大臣馳赴丹陽接統軍務人心以安

楚南水師疊敗賊船於瑞河口臨江口謝師塘等處

逆匪自陷吉袁瑞臨諸府城銳意修戰船議秋間大

舉圍撲省城瑞臨賊船出而下湖口賊船入而上冀

困我水師復於生米司瑞河口臨江口等處築立賊

壘七月初一日由松湖帶戰船三十餘隻陸賊千餘

將抵瑞河口我水師偵知之於瑞河口豫釘排樁出

入僅可容一舟賊船笨重甫至排樁卽經我軍衝入

縱火環燒之記名道劉于瀆督師船堵賊臨江口破
其礮臺盡焚賊船生米口之賊聞瑞河口敗亦棄壘
遁彭道玉麟水師自收復南康後率船巡哨適見下
游謝師塘逆旂招展自神雪湖列陣而出對敵逾時
賊舟敗北追至屏風山下南風忽起賊黨返攻彭道
傳令下旋與之坐戰賊復勢蹙敗去

八月皖軍大捷於三河

自廬州克復賊黨竄踞三河分營金牛一路壁壘相
望屢抗我師和提督謀知有隙可攻八月十七日親

督文武麟瑞熊天喜江忠信等攜帶雲梯乘夜踰濠
舉火賊棚房藥局一時騰燄木瓦燕飛用雲梯紛登
石壘賊倉皇奪門而出逃往巢湖上船我軍追至擊
燬賊船多隻先後斃賊五千餘名獲首三千餘級踐
蹋溺水死者無數生擒僞指揮張大有僞將軍秦標
盛等十一名匪黨二百餘名皖軍殺賊之功克廬州
後以此爲最惟副將銜參將程智泉軍中最驍勇者
以追賊受傷亡爲微憾云

楚南軍破賊於江西瑞州府收復靖安安義縣

官軍方駐瑞州府八月初一日僞指揮黃姓糾黨分五色旂出犯聲勢浩大我軍派定隊伍待其撲近以劈山礮禦敵賊陣大亂圍而殲之橫尸遍野窮追三十里羣賊將欲分竄有僞將軍石姓自九江來援勸羣賊回瑞州初四日劉騰鴻普承堯彭山呖羅萱等軍出隊盡踣賊壘前官軍急攻瑞州時上高新昌二縣又爲賊踞湖南之路復梗乃抽派吳坤修相機進勦先於七月二十日將二城之賊掃除遂於八月初八日行抵奉新連戰數日十三日收復靖安十六日

收復安義次日仍回奉新

江西邊錢會匪起句結粵匪竄擾建昌一帶圍廣信府
擊卻之

江西吉安建昌等府屬有邊錢會名目以錢塗硃描
金爲號屢禁愈衆遂句同粵逆竄入南豐縣連陷新
城瀘溪貴溪等縣圍攻廣信今江西巡撫沈葆楨時
署廣信府籌饟於河口鎮聞貴溪失守單騎馳回函
招浙江派防玉山之貴州安義鎮總兵饒廷選赴援
甫抵城賊已麇聚城外吏民盡散沈葆楨徒步守陣

妻林氏爲前雲貴總督林則徐之女同在危城中無媪婢躬汲爨具壺漿以饑士卒八月十二等日開城擊賊斃三千餘人斬其渠帥餘匪潰遁郡境肅清

江南軍克復高淳縣進攻溧水句容

總兵傅振邦克復東壩後於八月二十三日直抵高淳界立營賊分途迎拒擊走之親督大軍會高淳文武各員進勦縣濱湖蘆葦菖蘘塞港蔽洲賊潛伏以狙害官兵先遣參將李定泰等帶練勇爲鄉導燒賊艇數十伏賊多誅死遂克高淳縣進攻溧水張提督

國樑亦攻克寶堰賊巢乘勝進攻黃茅莊拔之移營
句容

僞北王韋昌輝殺僞東王楊秀清昌輝復爲僞天王洪
秀全所殺僞翼王石達開竄安慶

向大臣薨後金陵羣逆相慶次逆首僞東王楊秀清
素以洪秀全爲贅疣至是陰有自立意令其下呼以
萬歲洪秀全趣召僞北王韋昌輝僞翼王石達開歸
密圖之昌輝先至秀清招之飲昌輝戒備以往飲次
抽刃刺秀清洞胸割而烹之盡殺其黨石逆自湖北

至責韋逆太酷韋逆怒將併圖之石逆覺縋城夜遁
韋逆悉誅其母妻子女洪秀全益懼乃密諭其黨與
楊秀清餘黨共攻僞北王府韋逆乘亂逸出潛渡江
爲楊秀清逆黨所獲縛送金陵寸磔之誅其族石達
開遂竄安慶秀全傳昌輝首至甯國達開回金陵後
因秀全猜忌復之皖

月江楚軍克復江西安黃崇仁縣

同知李元度林源恩統江楚兩軍轉戰撫建間自五
月至八月小勝三十餘大捷亦十數賊星散蟻聚終

不得制其死命或說以宜黃崇仁者撫建二處賊所
去來欲斷建昌莫若取宜黃欲斷撫州莫若取崇仁
二人稱善曰此搯吭拊背計也從之九月初二日督
舉人陳大力哨官彭厚坤等先攻宜黃城破之由北
關直趨崇仁崇仁亦有官民二城與瑞州似二城之
間隔一河中有大橋百長鍾廷陞首先衝橋伏賊突
起短兵相接相持兩時彭厚坤等已登梯入城斫倒
守礮二賊力開城門官兵齊入賊竄臨江
皖軍克復無爲州

無爲濱江久爲賊踞皖營自和提督渡江後福巡撫
主軍務總兵鄭魁士副之飭各屬整飭團練助以官
兵各圖克復八月二十八日派候選知府李元華督
勇會前知州林蘭攻無爲州九月初二日設伏圍攻
克之殲賊二千餘人沿途團練截擊又斃悍賊一千
七百餘名

江南軍擊敗句容溧水賊

和大臣接統江南軍未至兩江怡總督良權其築已
遣將弁復高淳進逼句容溧水此二城近金陵爲逆

倚角九月初八日張提督奪近關橋十四五日敗賊於吉利邨擒斬無數復會總兵傅振邦參將虎坤元李定泰等抵溧水城下賊從小道襲我軍後我軍已踰濠附城奮勇回戰賊不得前溺死殲死者千計金陵逆聞之氣沮大營始安

皖軍大捷於巢縣復其城

賊踞巢縣堅城浚池水陸連壘無數擄糧掠餽輓饋金陵亦一老巢也福巡撫屢欲勦殄之聞援賊萬餘自裕溪上駛乃遣副將扎隆武等馳往截勦敗賊於

姚廟岡破丁家橋直抵縣城福巡撫與李編修鴻章
督營官吉順嵩瑞于昌麟馬昇平知府恩禧等攻其
西北門鄭魁士督麟瑞蕭開甲余兆清江忠信余成
竣等攻南門鄭魁士身受礮傷猶復督兵力戰遂於
九月二十九日克復巢縣湖中賊連檣下援勒兵迎
堵轟覆賊艇數百浮尸盈湖計旬日之內毀平賊營
十三座礮臺十座卡二十殲斃七千餘賊生擒四百
斬首三千餘級兼獲其偽印七十餘顆大礮二十六
器械四千船隻千廬州所屬諸邑以次肅清是月提

督秦定三分兵擣桐城亦屢有斬擒旋因捻匪猖獗
秦提督移師蒙亳鄭魁士督兵攻桐城

十月江西劉于濶一軍再克新淦縣

前白新淦克復後我軍進攻撫臨未能分兵出防復
爲賊踞十月二十一日劉于濶一軍督戰船夤夜襲
之賊見人數無多負嵎固拒蔡康業等分攻三門其
西門濱大河礮船攻之賊見四面受敵於城上擲大
黃旂二求暫解圍卽出投誠我軍以一晝夜未得少
息收隊傳餐暗以稻草置城門洞以噴筒射入頃刻

火起城內鼎沸各勇踰肩而入賊已開門逃竄

楚軍斷逆外援武漢逆圖竄路絕

賊糧道不通田鎮下游官兵扼其險要石逆達開先
因楊韋二逆內亂已竄回金陵官大臣督臬司李孟
羣總兵王國才攻漢陽東南兩路前荊州總將軍知
府魁聯往來策應平毀近城五里墩賊壘連紮大營
四座環掘長濠以總兵楊昌泗統之外江內湖礮船
巡防爲陸路聲援楊提督遣都司鄧清守之城賊危
蹙思外竄十月十三日武昌賊擁衆渡江知縣李光

樂架礮轟截覆溺過半是夜副將顏朝斌亦圍殲漢陽賊於沌口生擒僞總制朱長清等上下嚴備賊圖竄之路以絕

十一月楚軍同日克復武昌漢陽城

先是襄陽縣北鄉竹篠舖等處土匪朱中瑞黃其中等煽饑民爲亂焚燒樊城連陷豫省之鄧州新野官大臣抽調北岸兵勇千名派游擊溫發魁管帶與武昌道常恩馳往飭與駐襄之布政使馬秀儒等會商勦辦又隨州土匪趙邦璧藉募勇援襄爲名亦勾引

土匪滋擾復分馬步往勦大營兵力稍薄不及大舉
武漢二城之逆得少延殘喘嗣襄樊等處肅清諸將
回營協力官大臣胡巡撫督戰益急漢陽地接荆襄
外江內湖爲武昌屏蔽逆陷武昌自漢陽始克漢陽
則武昌自復以是官大臣親督重兵圍漢陽水師則
責成楊提督南岸則專倚胡巡撫漢陽逆久不能抗
旣拔五里墩後沌口水師泛舟下沙口礮船亦上駛
水陸合攻臬司李孟羣總兵王國才楊昌泗分西南
北三路盡破城外賊壘架雲梯攻城翼長巴場阿平

海率馬隊繼之副將顏朝斌前提督孔廣順前總兵
訥欽又繼之水營都司鄧清亦自襄河駛出環城轟
擊十一月二十二日逆出數千賊於東門外拒戰礮
子雨落兵勇皆蛇行而進數伏數起賊礮不能傷卽
反奔我兵直抵城下盡拔其濠內竹簽楊昌泗自報
國庵破城入王國才李臬司亦斬關而進衆軍鼓勇
畢登或擣其衝或遮其軼合計斃賊七千有奇生擒
僞將軍司馬師帥旅帥五百餘名奪獲大小礮一百
三十二位守城逆渠僞丞相鍾姓僞指揮劉滿乘馬

下河被礮轟斃有從沙洲爭渡者爲水師擊盡有上
船渡江者爲暴風覆舟江面浮尸紛若鳧雁是日胡
巡撫楊提督同攻武昌省城上下夾擊水帥斫斷橫
江鐵鎖陸軍攀援登城逆不能守分七隊突門而出
我軍乘勢兜圍殲賊萬計生擒僞檢點古文新等十
四人斃先鋒悍賊八百餘黨匪五千餘二城同日克
復官大臣胡巡撫入城安撫益省城自五年三月失
守至是已二十一月矣前二次淪陷未有如斯之久
也大功告竣遂息兵整旅分堵諸邊飛咨河南巡撫

英桂會勦鄧州新野餘匪先清北境卽擬東征

楚南軍克復江西分宜縣袁州府

楚南援軍轉戰數千里由萍鄉萬載合攻袁州九月
以後屢破援賊袁城之逆於吉安等處糾台股匪悉
屯合山候選道劉長佑等飛調在萬載之蕭啓江田
興恕來袁助戰十月十六日蕭啓江等分三路進破
合山之賊焚賊壘數里成焦土二十四日劉長佑派
隊攻克分宜縣城援賊路絕十一月初一日游擊劉
培元會諸軍攻袁州城誘賊出戰以精兵蹙之賊望

城奔竄而門牆已下不得入四散奔潰是夜諜知有以索縋城遁者我軍力迫之奪其索狻緣而上啓北門納大軍人生擒僞檢點黃逆賊衆盡戮

克復安福縣

既拔袁州大軍欲進勦吉安府恐安福賊議其後未發適吉安府知府黃冕前湖北布政使夏延樾前廣東羅定協副將周鳳山在湖南共籌援師勦吉安湖南駱巡撫遣同知今

封一等伯爵前浙江巡撫曾國荃帶湘勇二千人先發黃

晁夏廷樾繼之均由萍鄉入周鳳山由萬載入約定
會攻安福以趨吉安庶無首尾憂十一月十二日鳳
山至楓溪距安福四十里十三日國荃至江口距安
福三十里均遇賊接仗斬驍悍數十守備劉之能楊
光福亦踰大小嶺破其伏先後至城下守城賊目迎
戰爲張開輯劈山礮轟斃卽克復安福縣城
防饒軍大捷追賊至鄱陽

饒州近鄱陽湖常被肆擾防饒者雲南臨元鎮都司
畢金科勇而謀謂都司林保曰吾以一千人防饒聞

賊自建德東流來者五六千又探報李邱一賊目亦
率三四路悍賊與之合統計近萬人此豈可力敵者
非竒兵不爲功且鄱陽不靖饒州終無一日安乃於
十二月十六日派營官龔廷貴領兵五百潛伏陶溪
渡爲疑兵諷曰如官軍追賊至則出擊之畢金科分
左右翼迎敵岳炳榮將右翼出其前朱洪章將左翼
繞其後前隊遇賊故少卻賊追之後隊橫出截爲兩
軍金科督壯士居中縱馬衝突當者披靡鏖戰至渡
伏兵起賊猝遇大驚接應不暇登高望林中旂幟徧

滿以爲官兵大至相率逃竄乘勢兜裏斬獲千計追至鄱陽連戰連勝戈矛皆磨爨有聲賊衆盡颺去危城獲安

揚州軍擊瓜州逆勝之勦平高旺賊黨

逆踞江浦瓜州遠近亡命多依倚爲逋藪來安天長間土匪竊發假其聲勢嘯聚於高旺圖北竄德大臣遣總兵羅玉斌禦於小東店游擊魁霖等督步隊由東西葛進勦總管台斐音保等督馬隊分捕餘黨諸路皆捷盡殲賊之踞高旺者而瓜州逆方出衆往援

總兵鞠殿華督後隊迎擊之大敗援賊毀其望樓營
柵前後俘斬約三千餘名

楚軍克復武昌縣黃州府分兵東下續克興國州大治
縣蘄水縣蘄州

克復武漢之日楊提督統水師乘勝清江面逃賊官
大臣胡巡撫分師三路由蕩灣出東興洲爲一路游
擊何紹彩領之由雞窩出胡家墩爲一路游擊張寅
茶領之馬隊大軍由魯家港繞出葛店爲一路都將
軍及記名道李續賓領之賊望風瓦解大戰於樊口

各路斬首三千餘級於二十四日克復武昌縣城合
兵圍黃州殲賊二千餘焚燒賊營毀水壘四座獲礮
位百餘尊馬五十匹器械千餘件二十五日克復府
城遂水陸竝下楊提督統帶長龍舢板等船破上下
巴河賊卡焚奪賊舟數百隻直抵武穴陸路南岸李
續資由武昌縣進取興國大冶北岸都將軍由黃州
擣蘄水蘄州或間道襲勦或分路兜擊各軍電掣星
馳逐節埽蕩遂於二十六七八等日克復二州二縣
湖南軍克復江西武甯縣

十一月初七日署武甯縣知縣冒溶擊賊於潘蝦港
兵潰縣城失陷冒溶等退蔡豐溪適曾侍郎調駐蔡
奉新之鄭奠帶義武營至居民憾賊深持鋤助戰逐
北四十餘里十一日攻克縣城

十二月楚軍克復廣濟黃梅二縣

既克蕪黃征旆已經指九江敗匪竄保黃梅廣濟二
縣十二月初三日都將軍會提督孔廣順等由曹家
河殲賊三千餘人克復廣濟縣初九日由大河鋪攻
黃梅都將軍率翼長多隆阿副將王國才都司石清

吉等分路盪決斃賊無數克復縣城官大臣胡巡撫
既分遣羣師悉東下尋顧念腹心兵單鄰逆尙熾江
西之瑞州義甯與崇陽通城壤地犬牙相錯不可關
防奏留湖南候選道王鑫迅提精銳堵崇通界以固
鄂北藩籬

通城崇陽蒲圻通山餘匪平

四縣地險而俗悍逆入楚北皆爲陸道衝乘機伏莽
者漫村徧堡賊資以出入吏紳亦習常視之及王道
鑫督湘勇至先攻通城之北港次遣同知張運蘭訓

導沈至田勦崇陽蒲圻斬逆目偽將軍張庸忠曾天
爵梁一舉等搜穴焚巢殲盜數千鑫嘆曰彼賊如風
此民如水水爲風撓終無靜止誅之可勝誅乎夫丙
奸不清外宄不可得而詰故團練者非獨禁盜兼可
收捕盜之功也乃召邑父老子弟赦已往懲將來頒
示成規有桀驚不受約束者軍法從事數月團練成
按戶編籍民漸知漸洗圖自新鑫率以節次整刷遂
抵通山一律遵奉罔敢抗違

曾侍郎至九江勞軍

江西自五年饒廣告陷賊悉衆踞湖口楚南水師分
爲外江內湖隔閩不相通烽火逼省垣曾侍郎以省
會者百城所隔無南昌是無江西也遂勒水陸軍兼
程赴援且葺整舟師徐圖大舉時章門官私交迫戰
士懸釜甑待炊岌岌不終日侍郎至調餼轉糧人心
始定是年六月復南康湖南援軍至瑞州築壘遏賊
次收袁州上月武漢報克城捷楊提督自蘄州抵潯
陽會李續賓合圍九江章省亦疆圉整固曾侍郎無
西顧憂乃親至九江勞軍統水陸決志取九江以聯

絡內外

楚南軍克復江西之建昌瑞昌德安新喻永甯五縣

曾侍郎由省派千總張金璧等帶勇赴建昌擊敗德安援賊克復縣城南旋省又爲城匪竄陷十二月初三日復往克之李續賓自興國大治追賊東下十二月初六日駐軍瑞昌縣上十里亭子山逆已先遁收復縣城李續賓進攻九江派弁收復德安縣候選道劉長佑率楚勇及投誠之李能通由袁州赴分宜賊已退踞新喻經十二月初八日在寶山遇賊李能通

匹馬衝陣各勇鼓譟從之賊遁入城我軍從入遂出
東門遁去同知趙煥聯會湖南鄰縣各軍攻永甯亦
於是月十三日拔之獲偽協理王起盛等

上入五、目等四、先王

三

平定粵匪紀略卷六

咸豐七年丁巳正月江南軍攻收句容逆

江南大營退駐丹陽後逆踞句容屢出窺伺正月二十
十六日張提督國樑調集兵勇四路合攻張提督獨
領壯健間道抵城下焚燒外壘斬黃衣騎馬賊酋斃
賊千數百名橫尸塞濠生擒七名逆不敢復出

楚南軍克復江西奉新縣

縣距省百二十里賊盤踞久江西軍不遑分勦流毒
煽虐百姓銜之刺骨湖南援軍同知吳坤修既克安

義靖安二縣在籍辦團御史帥方蔚貽書勸攻奉新
坤修辭以兵單恐難必克方蔚曰姑督隊來當飭民
勇助聲勢乘衆怒之氣挾屢勝之威必克無疑也正
月初五日坤修發隊至逼城爲營四鄉義勇皆號衣
纏頭儼軍家裝攜器械來會金鼓之聲十餘里賊登
高瞭望驚以爲大軍薄城不敢拒戰謀宵遁我軍由
北門獅子山梯繩入餘賊無多盡殲之

二月會侍郎以父憂解任提督銜總兵楊載福等分領
其軍

武昌之陷也曾侍郎留塔提督羅澤南攻九江而遣
道員彭玉麟援鄂及偽翼王石達開躡江西連陷瑞
臨袁吉建撫諸郡又檄玉麟赴援時湖江道梗是服
爲賈客跼繭千里達大營轉戰頻捷屢收甸近州邑
上年冬武昌克復楊提督載福統水師至九江而曾
侍郎適丁外艱

朝議奪情固請終制

上特嘉其孝給假歸里兵勇暫交其弟同知曾國華管帶
上恐職分較卑須大員統理

詔提督銜湖北荊陽鎮總兵楊載福就近統領而以廣東
惠潮嘉道彭玉麟協同調度

揚州軍擊敗瓜州撲營賊水陸竝捷

是月瓜州賊分途狙擾諸路逆同出撲營德大臣檄
參領富明阿總兵鞠殿華副將陳國泰迎勦有功連
奪要隘沿河賊縱亦爲我水師總兵周士法擊覆馬
隊官成明海全亦至三面兜圍旬日之間迅掃賊衆
斬殺數百名獲其僞檢點監軍二名

江南軍進勦溧水敗援賊於鄔山

金陵安慶逆偵溧水勢蹇出大隊至郎山築壘爲援
二月初七日和大臣飭副將曾占鰲傅振尹乘賊營
未定邀之賊敗走渡河復結壘四座副將李定都
司鄧聯科周光培分三路環攻先以羸卒誘賊出追
一伏其後一衝其旁焚燬賊壘而誘賊之卒易精銳
回擊賊奔潰自相踐藉遍野橫尸遂合兵攻溧水賊
副將米興朝敗其出城賊前後共平賊壘二十六座
殲賊三千餘斬首六百級斃逆目僞靠天侯以下十
餘名生擒八十餘名移營已及一年戰功無逾是役

逆黨圍壽州署廬鳳道金光飭擊走之

壽州古壽春形勝地故置重兵鎮守焉二月十九日賊從西北來攻兩門邀戰敗之二十日復進攻南門廬鳳道金光飭督兵男激厲同心嬰城固守而時出精騎攔截之二十二日賊擁至愈衆合圍驟攻光飭飭壽州知州黃元吉鳳臺縣知縣李霖勇目朱在國募死士縋城斫其營斬驍賊二十餘逆鋒大挫遂定議力戰約鄉圍舉火爲接應二十五日整隊開東門出擊奮勇酣戰自辰至酉團勇四至助勢縱火焚巢

賊寨營潰走追殺二十餘里斃賊千餘名斬首二百級重圍立解越旬又攻正陽迺車之枸杞圍賊壘飭練勇孫家熾等由雙橋橫擊斃賊二千餘刺死僞將軍吳守剛僞先鋒楊得應張定邦鼠賊悉數殲除自此逆燄不敢近壽州光飭勇敢素著屢立戰功奉旨加按察使銜後於四月勦正陽關擒匪身受重傷猶復揮兵督戰河深溜急舟覆而亡

浙軍收復安徽婺源縣參將師良鏞陣亡

江西景德鎮賊竄陷安徽婺源縣圍犯浙浙江晏巡

撫端書飭總兵周天受督勦賊由香口竄穰溪河等處二月二十七日復犯三折嶺知縣楊裕仁督率團勇會游擊王夢齡及甯防五嶺之吳偉奇等同日進攻賊受創潰走收復婺源縣已革參將師長鑣於三年十一月在揚營因勇潰獲譴旋隨吉巡撫於鎮江奉調赴浙屢著勞績是役力戰陣亡奉

旨開復原官照例議卹

江西軍擊敗撫州賊

撫州賊會合梅港匪黨竄入貴溪之虜潭屯踞街市

另股自婺源竄入興安弋陽江西巡撫文俊飭同知李元度督營官楊得意等率水陸軍馳援擊退婺源逆斃大族悍賊數人乘勝撲進鷹潭火攻街市豫飭師船剋期至內外夾擊焚殲溺斃統計二千餘名宿松太湖逆犯黃梅縣楚軍大捷

九江爲江西重鎮皖楚咽喉逆力爭天險匯踞九江而以對岸黃梅之小池口爲外蔽自官軍進達九江宿松諸逆酋聚衆數萬築城於小池口以遏拒官軍圖上竄李臬司孟羣楊提督載福遣將弁迎勦燬其

壁壘是月賊衆分三路人寇一出停前驛之南一出
停前驛之北後隊由獨出鎮結營於魏家涼亭距黃
梅城僅數十里騎賊千餘效我軍馳驟近郊欲張甚
都將軍曰彼假虎耀威耳豈能如吾軍走馬施槍其
若星月哉吾知所以破之矣知縣覃瀚元以邑垣脆
薄不足保請空城誘賊入可聚而殲之將軍以爲然
派提督孔廣順營大河舖爲旁翼總兵王國才駐桂
家畝爲後拒營總多隆阿伏城南游擊倭克錦衣伏
城北副將鮑超都司方映川伏城西營總巴依爾呼

蘭爲往來接應約俟破騎馬賊後合力並攻遂勒騎
獨當賊東面不動逆果悉衆自二郎河東山鎮撲縣
城直入都將軍撥馬率隊抄勦疊發連環槍賊不能
禦紛墮馬下又運矛攢刺馬足賊落輒踐踢之騎馬
賊無一生還者諸路軍建旂鼓會圍斬殺近萬賊棄
城逃命分途截擊斬其僞擣天侯陳姓僞天王婿鍾
姓曾姓三名收馬騾無數狂逆在小池口者問風膽
喪

三月官大臣檄臬司李孟羣督兵援皖

逆匪於皖北肆意衝突上月壽春鎮總兵鄭魁士兵
潰於桐城文武大吏俱獲譴

上廬念廬州重地密邇桐城備豫宜嚴

命湖北撥水陸軍協堵是時襄豫餘匪突入宜昌府城雖
卽克復而荆襄防兵難於抽調水師又已齊集湖口
迅圖九江乃奏稱孟羣謀勇素優最利行陣令督兵
二千五百人裹糧援皖

楚軍進攻小池口削平附近諸賊壘

逆踞小池口築堅城爲固守計復於段窰楓樹坳獨

山鎮各處依山砌石爲壘數十座引水浚濠以屏蔽
小池口而阻我東下之師都將軍戒諸營官曰小池
口者九江犄角也沿山諸壘者小池口爪牙也爪牙
不除何日拔其角而扼其吭乃先遣鮑超攻小池口
城西牽掣賊勢不令出而部署諸營弁多隆阿王國
才等分途攻段窩楓樹坳既破其壘斬馘千餘遂捲
甲疾趨獨山鎮提督孔廣順以輕騎誘賊出巢而令
馬步隊各伏要隘賊出追開化勇越濠拔椿簽焚燬
篷柵賊大驚回救伏兵齊起縱橫盪決僵尸枕藉諸

自來田
二
隘壘悉平惟小池口尙拮据自支

四月揚州軍大捷於瓜州

時大軍圍攻已久逆屢形危蹙乃出背城計水陸並
撲德大臣遣參領富明阿擊之於土橋斃賊三百擒
其僞總制二名總兵成明等踰濠毀礮臺二座斃賊
五百總兵鞠殿華亦敗賊於四里舖賊以大船數十
划船無數衝鋒進分兩路一沿港助勢一渡江他擾
均爲水師所敗陣斬僞將軍統計連旬共殺俘賊一
千三四百名焚溺死者甚多

楚軍克復英山縣

英山先爲皖軍克復四月初六日逆匪復竄踞之以
通蘄黃爲上竄計署蘄州知州兼署羅田縣知縣彭
應鯉由大河畝越境進攻適李臬司孟羣援軍取道
至皖飭都司盧文熊參將趙鴻舉併力扼擊斬騎馬
逆目四名生擒三百餘名餘賊大潰縣城立復
皖逆犯湖北界連戰破之

逆首陳玉成由桐城率賊三萬餘沿途裹脅號稱十
萬以擾湖北之黃梅廣濟蘄水蘄州羅田諸邊界官

大臣派臬司李績賓帶湘左右營駐小池口以小池口原駐之統帶五營副將鮑超移屯孔壠黃梅阻遏逆衝其蘄州羅田則調福武寶三營應援恭鳳虎三營繼之又派都司段清平張志超趨黃州扼蘄水竄省之路逆衆各路分撲均經擊退副都統舒保巴楊阿等旋領勝兵自襄陽宜昌至會都將軍分途迎勦斬殺數千破賊壘二十一座軍威振而衆志益固官大臣上方略曰勦賊之道首貴摧堅九江者吳楚關鍵也江西兵勇數盈五萬饒紉口籌而九江圍城尙

闕一面以致踞逆進犯湖北退擾章皖游行掉臂防
不勝防九江若拔則可以直擣金陵而東南免奔波
之累昔吳臣紀陟言長江五千七百里疆界雖遙而
險要必爭之地不過數四所謂險要必爭者荆襄武
漢九江湖口耳今上游悉定討賊急務必盡力攻克
九江而後江西之門戶以保江南之全局可圖時議
欲分援江皖故抗疏縷陳之

五月九江軍濟長濠困賊屢戰勝之水師深入失利尋
獲捷

初臬司李續賓督步騎會水師攻九江逼城爲營自
官牌夾迤南而東至白水湖募丁夫掘濠三十餘里
深二丈廣三丈五尺踞逆患之東西出賊六千餘人
欲圖格沮李臬司令步隊護濠戒勿戰親率馬隊繞
至八百坡後岡又伏兵於馬宿嶺約俟坡後礮發出
擊約兩時許賊已逼近各軍聞礮聲齊出殺賊三百
餘名追斬七百餘名賊旋出西壩伏於坡後茶庵李
臬司乃繞道譚家畝楊樹背先敗其伏而伏我兵於
其處回隊迎敵且戰且走至伏所賊不知其伏之已

敗也正以爲得計及伏起官軍也倉皇潰奔掩殺無
算越旬餘安慶逆來援約衆七八千城逆大出衆二
萬蜿蜒數里旂幟如林我陸軍飛檄舟師會勦楊提
督遣水營將弁從甘棠湖趨城下轟退援賊陸路軍
亦敗賊於湖坪自三月至五月連戰皆捷水營副將
李成謀守備易景照見賊船數十隻上駛乘屢勝之
威從老河追之深入湖口距本營已百餘里爲梅家
洲扁擔夾賊艇所襲風水俱逆不能駛歸失戰船十
餘隻楊提督出防武穴駛回救之成謀鼓勇再入賊

方賀功未設備成謀率衆驟進獲賊舳板船四隻沈
逆船百餘李臬司亦撥隊接應北岸之聲勢益壯

江南軍克復溧水城

逆踞溧水後招援賊屬集團大營屢加懲創斬殺約
以萬計勢雖危蹙猶抗拒復於鄔山築壘數十座五
月十四日總兵傅振邦督營官周天培等節攻環擊
令賊首尾不暇顧外壘數十座以次削平乃會集城
下噴火如繁星飛墮大燒城中房屋賊內亂副將虎
坤元率衆突蹙登西北二門斬守城賊酋官軍齊入

殲盪六千餘名生擒三百兼斃其僞副丞相

閏五月皖逆悉衆復犯湖北

英山霍山二縣近羅田而黃梅蘄州山徑歧出多與宿松太湖相通皖逆自四月上犯壘受斬刈旋去復來都將軍督各營諸將分途堵禦已敗賊於大河舖逆趨武穴圖阻截我軍糧道馬步力擊之水師搶護毀其四壘我軍益修營十里舖以資轉運然謹護計賊數出擾斬其驍健營壘始成壘敗賊於張家塆青石嶺汪家壩望天畝合節山黃土岡桐柎河等處前

後一月之久大小二十五六戰平賊壘十有餘座殲
逆目三名斃賊衆七千有奇而賊裹脅太多殄滅難
盡仍踞蘄州

汪南軍克復句容縣

金陵逆陷踞溧水句容成犄角勢和大臣已克溧水
謀取句容而城逆勾接外援聲勢尙壯閏五月二十
一日張提督國樑會總兵傅振邦圍攻賊以大股抗
拒張提督率親兵衝入立刺執旂黃衣悍目數名賊
乃奔潰和大臣揮軍衝進內濠殺賊無算二十四日

銜枚急進越濠豎立雲梯張提督首先登城賊尸山積遂於二十五日夜克復縣城

湖北胡巡撫馳赴前軍部署方略

時蕪黃一路賊蹤狂甚閏五月二十七日蕪州諸營並挫賴舒保力戰水師左光培等扼巴河得免上竄官大臣飭諸營謹守復派道員唐訓方領帶增添馬步擇要堵禦飛咨都將軍力扼黃梅嚴後路之防整齊行陣先爲不可敗以徐圖可勝並咨商胡巡撫親赴上游察驗前軍營壘情形申明軍法指示方略力

固危疆以是黃州上下烽火雖驚而武漢商賈懋遷
耕耨不變

六月皖逆傾巢援蕪黃楚軍戒嚴

李臬司續賓浚長濠力攻九江水師礮船復沿江環
擊賊衆多死宿松太湖羣逆糾合皖省饑民十餘萬
乘虛圖武漢且解九江之圍分四路進一據黃梅之
停前驛參將石清吉禦之一屯廣濟之大河鋪孔廣
順王國才禦之大河鋪地勢尤要助以副都統巴揚
阿知府許廣藻一紮斬州之張家塆知府邢高魁彭

應鯉朱啓仁帶練勇禦之一聚蘄水之劉公河副都
統舒保記名道唐訓方禦之大小戰五十餘殺賊一
萬有奇賊勢未衰我兵亦有傷亡初小池口之勝也
北岸官軍近三萬馬隊調良皆精於技擊南岸亦師
船林植潯陽湖口立望肅清及皖逆間道上援九江
之陸軍梗阻而上游舟師又不可驟撤楚軍馬步不
及萬南勇入險失利而賊所竄伏之徑皆崎嶇泥淖
難於衝突馬隊幾勇無可施惟統將一心壯士併力
屹然不爲所憾

楚軍擊逆衆於童司牌克之

楊提督聞蕪黃有警派都司胡友亮率礮船節次十
堵復戒之曰賊不橫江必憑湖當順道繞廣濟以扼
內湖之險李臬司先遣其弟知府李續立督南勇三
營由瑞州回援逆大隊果據廣濟內湖之童司牌深
溝高壘伺隙後動十里舖在童司牌之北逆精悍所
聚而西有億生寺道險狹翼長多隆阿與副將鮑超
定議向十里舖進攻而以勁旅繞道襲億生寺逆排
隊方注意北路而不虞西路之掩至也乘其驚駭擊

敗之復與十里鋪合兵兩路獲勝逆又造浮橋於河
中東通北湖西連武穴築壘綿亘望之若長虹會李
績賓親督隊伍自南岸渡江至六月二十九日統三
營爲左右中以進先擊其腰開劈山礮轟之首尾不
救紛紛墜溺盡毀兩岸賊壘其內湖賊艇復爲胡友
亮礮船所焚竝燒其浮橋是役也其平逆壘十九座
殲逆目十餘俘斬以數千計惟貴州安義鎮總兵王
國才於移營時爲火藥轟傷陣亡胡巡撫旋率唐訓
方紫營黃岡之傅家嶺分撥巴揚阿守馬鞍山要隘

參領舒保爲諸路接應戰守咸備逆餒稍衰

七月楚軍勦逆於黃梅破其要衝

李續宜援勇至黃州都司左光培亦以礮船巡巴河
上下屢有擒斬重以胡巡撫繕輯裁制軍氣益揚遂
於七月初一日攻黃臘山翼長多隆阿謂賊所守壘
者必疲病老弱也其強悍驍銳皆伏邨落約鮑超分
兵繞賊壘之後自以精騎直衝邨落殪伏賊數十鮑
超亦縱火焚燒合軍勦洗蹋毀黃臘山附近之甘家
畝王家河賊壘四十八座斬賊五千餘溪水爲赤生

擒長髮老賊數百名正法下游城窟漸空而在蕪黃者仍不下數萬官大臣令水師中營都司宋美富領礮船扼蕪黃江面竝先於六月二十六日折毀菩提壩賊巢擊散賊衆陸軍沿要設防各逆上竄之路始絕其孫家嘴流水灣踞逆當黃岡蕪水之衝胡巡撫遣知府李續宜率五營進攻以馬隊舒保繼之游擊孫昌凱左光培統水師會勦竝令唐道訓方與同知唐協和督勇伏鳳凰山右都司余雲龍余際昌伏鳳凰山前以拒柳家灣馬家園之援賊又派參將何紹

彩繞山岡爲疑兵防其抄擊五路皆捷統計陣斬及溺斃者三千餘名追掃巢穴斬黃路通

江楚軍克復瑞州府

瑞州舊有南北城並踞之上年七月官軍攻克南城而商賈居民多奸宄與賊通氣不可驟詰同知曾國華副將普承堯商同築壘於南岸屹如石城尋於石鼓嶺環以雉堞北岸亦固數絕逆糧道援師曾侍郎勞軍之月飭瑞州效九江圍城法撥水師數百往來巡防兼護長濠逆勢益蹙至是楊提督彭道玉

麟遣水師會楚軍水陸助攻逆突圍潰走我軍血戰
夾擊之俘斬極多府城遂復謀擣臨江

楚軍復大剗皖逆於黃岡蘄水界

官軍旣破孫家菁流水灣二賊壘而黃蘄連界之馬
家河大石港火樹林等處賊勢尙強知府李續宜以
地形已審願率所部爲前驅胡巡撫壯其言派十二
營馬步令統之蓋以副都統舒保帶湘寶三營爲後
隊相機助戰續宜分軍爲三路而進七月十八日黎
明賊出三千人拒右路四千人拒中路大隊八九千

直撲我左路續宜登高望謂舒都統曰賊入吾穀中
矣彼弱當吾強而強當吾弱能先勝其左則右亦不
支然後合力於中軍乃密泐張文煥劉芳貴等選諸
營勁旅由山左蛇行襲其後而自領中軍竝馬隊掩
旂息鼓出不意擊其前左路之賊潰我左營與中軍
合於是如竹節已解無停刃遂克其中路唐道訓方
同知唐協和率右營力攻右路右路之賊亦潰鏖戰
未日沒賊三路皆退焚其老營營中賊悉燔死賊之
未歸壘者網張禽獮無倖免者黃岡肅清蕪城勢孤

乘勝搜勦連戰皆捷破僞城五座賊壘百餘擒斬逆
目僞檢點僞指揮三十四名

八月小池口逆壘平

自黃岡蘄水戰勝賊望風披靡蘭溪月山之兵所向
無敵直抵小池口小池口與潯城隔江對峙爲江皖
入楚咽喉逆先驅石爲城濠濠外衛內築重垣堅固
無匹官大臣胡巡撫以賊寇正衰亟宜水陸大舉咨
行都將軍楊提督上下合勦先拔小池口僞城以撤
其犄角胡巡撫親督唐訓方李績宐等湘勇由蘄水

達黃梅設卡建棚塞宿松上竄之路復商令都將軍
多隆阿鮑超破黃梅後山至五里涼亭三賊巢楊提
督等礮船亦於八月初四日自陸家背移營進逼晝
夜環攻偵知偽城內炊與之具已被大礮擊碎炊煙
數日不起賊不敢復立女牆乃飭各軍士攜稻草沙
囊爲填濠登城具十五日風雨大作兵勇以稻草推
地障身而進頃刻濠已填平楊提督趣十四營水陸
環薄之都將軍縱馬隊施火箭射城內賊篷一時火
起四門官軍乘賊亂亟登悉數殄除察看城內擊斃

之尸積如山阜自小池口之逆滅盡全楚始一律盡
清

江西軍克復東鄉縣

縣隸撫州爲賊踞已久復新踞萬年等縣福將軍興
以東鄉爲撫城保障必拔之而撫州可圍乃遣總兵
李定泰於八月二十八日冒雨由五里牌進擊命縱
火平塘絕賊竄路平塘者附城往撫州之衝也賊果
懼棄城而逃遂乘勝攻金谿

九月楚軍克復江西湖口縣

初逆踞石鐘山悉銳守湖口兩岸致外江內湖之水
師間阻蕭提督捷三統舟師屢擊不克中礮卒及楊
提督等總理內外水師軍威壯盛然江湖迄不能合
者以石鐘山爲之隔闔也協理水師廣東惠潮嘉道
彭玉麟建議力攻湖口若石鐘山拔則九江可唾手
得是月楚軍已克小池口乘勝下勦李臬司續寶密
商楊提督彭道水陸夾攻爲聲東擊西策湖內舟師
冒死衝出湖口集山前結營布陣賊衆堵禦而李臬
司先拔營起傳令勦宿太餘匪中道折回乘夜渡江

繞湖口山後出賊不意撼其城總管巴依爾呼蘭督馬隊亦由陸路濟八里江爲應兵內外夾攻於九月初九日克復湖口縣遂破梅家洲僞城燔石鐘山賊巢巖壁皆赭獲戰艦八十九巨礮千二百有三殪悍賊萬餘外江內湖水師之三載阻絕者乃得合併是役也水師裒創血戰傷亡極多幸以死命爭得之事平彭道商之曾侍郎請於

朝立楚軍昭忠祠於石鐘山頂祀水師之前後歿於

王事者

楚南援軍敗江西臨江賊於太平墟舉田

官軍圍臨江亟撫建新淦之賊奔援候選道劉長佑
奉湖南駱巡撫檄同副將蕭啓江督楚南兵勇赴臨
江協勦八月二十七日距太平墟五里遇賊接仗乘
勝追奔其踣賊營五十三座同知王勳聞賊擾太平
墟亦率部往助斬賊六百餘生擒三百餘敗賊在竄
舉田九月初六日知府張運蘭移營獅子山賊傾巢
至設伏夾擊亦殲斃千餘援賊悉敗三路兵勇合擊

臨江

皖軍水陸大捷焚燬逆艇壘略盡

逆自楚北敗竄回皖糾合河南捻匪撲廬州府及巢縣之柘皋九月二十七日安徽福巡撫檄總兵吉順等分路堵截敗其援賊殲斃三千餘斬首六百級柘皋諸賊壘悉平而柘皋迤南之巢湖派河丙子舖逆船如鷺聚散游衍爲運糧地鄴總兵魁士命輕舸順風縱火盡焚其帆檣獲大艦十餘小艇無數燒斃四百餘名生擒僞指揮陳上林先是逆前隊陷桃鎮官軍水陸旣大捷遂派副將蕭開甲游擊羣桂榮知府

今浙江巡撫馬新貽會合得勝兵節次追勦搜殺各
要隘桃鎮派河上下悉無賊蹤

楚南軍克復江西彭澤縣

湖口下六十里爲彭澤縣南有小孤山挺立江中逆
卽廟成壘設礮當門爲居高建甍勢南北兩岸復修
築石城環以深濠密排椿木持此以守彭澤而爲九
江聲援時逆首石達開會集都昌鄱湖賊踞景德鎮
遣逆日賴漢英等抗守茲城已五年矣楊提督合軍
進取以欲克九江非拔彭澤不爲功調馬隊營官四

克垣布由橫壩頭趨北岸統帶湘凱兩營官楊得武
由湖口趨南岸師船向縣城修營壘作長圍誘賊出
鬪佯敗賊追至急水溝楊提督親統大軍由望江馳
勦擒斬無算而李臬司續賓亦率都司楊明萬等馬
步合攻遂於九月二十二日克復縣城其南北岸石
壘亦同日攻破盡埽小孤山賊巢下游之巨險悉夷
乃分兵守彭澤湖口要隘大軍復回攻九江

江南軍勦鎮江逆壘獲大勝

鎮江賊嬰城固守諸路官軍持重伺釁以故久稽

天討九月二十二日鎮逆出東北兩門至甘露寺逕撲官營分路四掠和大臣檄總兵余萬青督兵迎勦先後殲斃六百餘名張提督國樑偵逆欲西竄接應金陵密於高資增營扼要賊亦築壘於運糧河之北遣參將余兆青都司賴鎮海督兵力戰毀其礮臺而自率親兵渡河奮擊總兵虎嵩林李德麟副將今廣西提督馮子材亦水陸會攻鏖戰六晝夜沈賊巨艦十餘隻削堅壘二座生擒逆目魏長仁等六名斬俘無數十月江楚軍擊安仁逆於貴溪敗走之

景德鎮股匪竄踞安仁縣後復糾衆三萬餘分擾貴溪經福將軍興派同知李元度守陣捍禦相持浹旬備益堅不可陷安仁逆復遣賊接援練紳姚步瀛聞風迎堵於貴溪境外敗其援衆元度知攻城賊已懈鄉兵獲捷十月初二日奮勇潛出東門直衝賊壘揮矛躍馬如摧拉枯朽賊潰走城賴以完

江西逆股竄祁門浙軍截勦連勝於五里牌

十月初一日江西浮梁賊匪竄安徽祁門縣境經浙江晏巡撫所派游擊馬懷珍擊斃多名退踞五里

牌復經周天受江長貴自率勁旅督戰焚其木卡斃
賊五百餘名生擒四十六名追殺三十餘里

楚軍水師克復安徽望江東流銅陵三縣

先是江南水師定海鎮總兵李德麟率紅單船自下
游人皖勦賊至繁昌縣之舊縣峽口爲賊艇遏抑不
得上賊沿江岸築壘聲勢聯絡困我師已七閱月楚
軍水師楊提督克湖口彭澤東下所過焚賊船無數
安慶首逆偽成天豫陳玉成派偽丞相曾逆帶船數
百號乘風而來泊馬當峽華陽鎮一帶楊提督率各

營奮力攻勦兩處賊船敗退追殺二十餘里焚奪略
盡九月二十二日焚華陽鎮二十三日派李成謀一
營克復望江縣二十四日乘勝復東流縣疾趨安慶
攻破西門外鹽河口及對岸賊壘各三座二十五日
寅刻全軍衝安慶而下未刻破樅陽二十六日破大
通鎮二十八日攻銅陵縣李成謀斬關直入立克縣
城又破土橋賊壘至舊縣城內與紅軍船合不出旬
日轉戰一千餘里克復三城燬破卡壘羣賊望風走
解附近之泥汊賊築堅城二座紅軍船懸賞萬六千

金卒不能克揚提督親統各軍直逼偽城李成謀率
衆前驅拋擲火彈適中賊之火藥烈燄騰空城石迸
裂我軍長驅直入勦蕪殆盡得糧米六屋並船礮軍
火悉付紅單船爲勞軍費曰非爾輩扼要疲賊我軍
雖銳成功不如此之速紅單船驟見旂幟正驚愕疑
上游水師何以能飛渡也及見破泥汊賊壘咸愧服
又饋饗豐馭驚桀感生誓同心協助咸稟籌畫楊提
督旋聞江西有賊出竄十月十三日回軍駐彭澤

十一月揚州軍克復瓜州

逆憑險負嶠遙聯金陵近接鎮江阻官軍進勦之路
歷五年矣官軍屢受牽掣一篲難收德大臣激將勵
兵定期大舉適賊援之在南岸者爲和大臣懲創有
隙可乘遂於十一月十二日派八成兵勇將土城四
面圍裹大兵踰城而入逆衆無路脫逃殲斃千餘人
蹋平賊壘五座其登舟南竄之賊被艇師截擊溺斃
無遺卽於是日復瓜州城

江南軍同日克復鎮江城

十月二十九日張提督國樑大捷於瓜州之南岸陣

斬僞王奪壘十七座遂圍鎮江城副將虎坤元等追
勦金陵四次援賊匹馬片旣無返者城賊猶死拒十
一月十二日張提督會總兵虎嵩林劉季三余萬青
李若珠等四門驟攻潰垣入悉誅羣逆是日亥刻克
復郡城有突鋒逸出高資倉頭者同時追勦沿江樓
殺約計萬人惟逆首吳知孝潰圍逸至金陵復竄皖
北後於九年八月在盱眙爲總兵張得勝陣斬
楚軍勦援賊於安徽太湖等處

江西逆渠糾大股二萬數千人由浮梁建德都昌鄱

陽竄湖口楊提督已泝江回駐彭澤嚴申戒備而宿
松太湖之逆憤九江困圍糾黨麤集於楓香驛仙田
舖紫方界水河等處聲勢相依合計不下五六萬官
大臣已以湖口任楊提督復書勗都將軍極意周防
將軍乃於十一月十五日督隊簡員派糧道唐訓方
駐陳德園固蘄州門戶翼長多隆阿副將鮑超領石
清吉西林布祿昌鄭陽和等迎勦太湖馬步竝進斬
四千餘賊唐道亦敗賊於陳德園級功相埒是時楊
提督之師已大獲全勝李布政續賓撥陸勇五千遣

候選道李績宜會水師彭道玉麟分三路直擣水陸相資竒正互出戰必有功斃賊七千餘名邀擊殲溺五六千統計盈二萬有竒裹脅之衆羣散隊攜又將萬餘逆勢大挫

十二月皖逆陷霍山縣城旋卽收復楚北軍分防羅田麻城

江南北旣收瓜鎮敗賊竄聚安慶楊提督圍九江得手不便分兵堵禦而潛山太湖之逆又陷霍山縣旋退出欲從羅田麻城圖上犯踞獨山西河口爲營李

布政孟羣所統入皖之兵較單難於兼顧因奏請

飭楚北撥兵防勦官大臣前因逆匪勾結各捻近河南之
商城固始與湖北羅田麻城毗鄰已遣員帶兵勇設
防守隘遂上言鄂居天下之中道途四達密邇賊氛
路徑紛歧未敢鬆懈將軍都興阿兵力太寡無可分
撥謹再調九江步軍三千名撥暫駐襄陽之馬隊二
百兼程馳赴豫皖接壤處相機進勦以固楚疆

楚南軍克復江西臨江府餘匪竄楚境擊殲之

楚南援軍候選道劉長佑等於八月二十七九月初

六等日破太平墟皋田各賊與副將普承堯等合兵
攻臨江府十二月初八日拔之餘匪由瑞州德安瑞
昌竄入湖北興國州境在籍給事中陳光亨集團防
守浙江布政使李續賓派兵一千六百人於十二月
二十五日自瑞昌馳援九江兵勇亦先期馳至副將
周寬世等率馬步四面兜圍殺賊一千餘人溺斃無
數餘賊僅二百餘名鳧水逃逸

平定粵匪紀略卷七

咸豐八年戊午正月楚軍進勦安徽太湖逆勝之

皖逆糾豫捻犯商固旋擾光州六安窺伺隨棗一路
官大臣檄納總兵欽襄陽道毛鴻賓督鄉團會同副
都統舒保扼要隘察情形爲緩急備而太湖渡石牌
等處賊黨連營三十里略計七八萬衆乘我軍度歲
之際竄近蘄州界官大臣等豫度有此詭謀密飭準
備經管帶訓勇之唐糧道訓方連戰擊退正月初七
八等日又竄荆橋好漢坡等處都將軍派巴依爾呼

蘭石清吉等赴宿松協守而飭副都統多隆阿選三營四起馬步隊迎勦賊衆於仙田舖鏖戰風火山殲斃多名追抵太湖城賊沿江逃竄生擒長髮逆百餘獲礮械無算

二月楚軍分道勦逆大捷收復安徽英山縣

都將軍已追勦太湖獲勝遂連營宿太以扼賊衝而僞燕王秦曰綱遣其黨北趨避實擊虛欲犯蘄州蘄水時李布政孟羣回固始故六安之賊亦併力上竄陷英山縣分七路竄羅田署羅田縣知縣崔蘭馨會

在籍主事姚敦禮督練勇連日鏖戰二月十八日大
敗賊於樂利河焚燒其壘追勦二十餘里乘勝圍攻
收復英山縣唐糧道訓方亦大捷於黃泥阪守備梁
洪勝生擒僞丞相韋朝綱逆股又由黃花嶺竄楚境
之楓樹坳牛頭冲等處都將軍派參將富森保德明
前往南陽河迎擊唐糧道亦奉官大臣檄會勦賊築
壘北岸依山爲壘數十座唐糧道先遣兵勇自下游
渡伏岸北山谷間而親整隊伍列陣南岸賊渡河而
南都司余際昌邀擊之知縣丁銳義守備張養吾爲

兩翼左右衝突賊紛紛潰我軍乘勝北渡壘中賊已
陳於山腰潰賊續至而山谷伏兵起賊大驚我軍合
力併擊殲斃無數橫尸滿坑計平賊壘二十九座楚
軍勢振都將軍之宿太諸營始紓後顧憂

江南軍攻克秣陵關

秣陵關爲金陵南面外蔽賊守甚堅二月初二日和
大臣派總兵李若珠等移營節節進逼直渡河北將
黃泥庵等處賊壘蹋平斬關直入賊匪紛竄豫派副
將劉季三游擊馬德昭等潛伏葛塘寺等處截勦其

殺賊五千餘人遂於十四日夜刻克復秣陵關

三月英山羅田逆竄商城官軍擊走之

逆糾豫捻圍固始正月二十四日官軍大勝解圍遂
擾商城警報頻赴於楚副都統舒保奉檄督馬隊湘
勇防商城及英山羅田之敗賊與商城合勢益張李
布政孟羣派兵援勦賊踞金家寨守備楊光澤知縣
戴鴻經等堵截邀擊掃盡巢穴賊乘霧越嶺遁商城
肅清

江南軍攻金陵城賊於七橋甕等處

和大臣率張提督國樑總兵戴文英周天培副將李若珠等圍攻金陵三月初二日擊賊七橋壩殲斃賊數千直抵外濠毀更樓數座李若珠從間道撲賊巢設伏誘戰逆遣悍賊出西南門張提督督隊與李若珠合兵圍其二門戴文英亦會攻雨花臺卽子山槍斃黃衣騎馬賊目張提督派王交蔡起榮分道搜勦斃賊二千餘逆閉守不敢復出

賊入浙江界連陷江山常山開化諸邑

西安將軍福興奉

命督江西東路軍務駐兵弋陽時撫州逆勢窮蹙紛出竄
擾福將軍派員堵禦益勦益深欲爲蓄銳計退守廣
信圖進取逆遂由廣豐竄浙江境壘陷江山及常山
開化諸縣

上以福興遷延貽咎

詔切責之飭浙撫撥兵會勦

逆陷湖北麻城縣楚軍會勦

黃州所屬交安徽界者黃梅廣濟蘄水蕪州羅田等
縣而麻城則兼界河南之商城縣副都統舒保前督

平定回疆方略卷一百一十一
兵出境堵守商城駐麻城者僅游擊李曙堂一營數百人河南軍旣平金家寨逆竄踰嶺走丁角山一日夜行百餘里三月十一日入麻城舒保聞警倍道回援至則城已陷矣擊敗南路之賊力遏其上竄黃陂孝感之路官大臣急調水師堵截湖路以防偷渡飛飭副將鮑超將駐宿松二郎河五營候補同知直隸州何忠駿將新募平江右營千人馳往協勦都將軍亦拙撥馬隊二起令富森保統帶官大臣又添派喜昌等馬二起分路馳援各道尅期集麻城

四月楚軍水陸大舉克復江西九江府城首從各逆悉
伏誅

逆首林啓榮竊踞以來植援湖口石鐘山彭澤等處
層柵密壘聲勢相依十易寒暑矣上年克復彭澤湖
口摧其翼角南岸肅清得以專力於九江逆百計死
拒糾皖逆分擾蘄黃冀緩其圍我軍已濬濠環攻更
番休息磨盤洲近大東門城垣外高岡危峙虬蟠虹
帶下可潛開地道乃精選勇壯築牆爲蔽內穴岡洞
城而外張旂幟木梯僞陳攻具以疑賊三月二十五

二十九兩日城下地道成轟塌東門十餘丈又塌其南門逆以火器力禦先登將士多死傷官大臣爲書勞苦意謂良將者

國家資爲股肱也精兵者良將之爪牙也股肱之力可勞而不可竭爪牙之用宜惜而不宜傷今逆勢雖衰堅城尙多未克諸君子已激義憤輕蹈危機後宜蓄養鋒銳勿輕淬厲馳各營徧慰之將弁兵勇聞溫卹語感泣愈奮自忘其苦是月初六日迤東而南地道復竣楊提督會集李布政續賓彭臬司玉麟總統水陸

軍十六營四門進攻初七日寅刻舉火地雷驟發磚石飛騰山巔震撼立場迤東竝南面城垣一百餘丈兵勇痛兩次傷亡之慘歘歔飲泣人盡思奮踴躍先登呼聲動天地衝鋒掩殺約兩時之久斃賊一萬六七千餘尸積填巷血流成渠賊首僞貞天侯林啓榮僞元戎李興隆據各賊目於亂尸中指出寸磔梟示以抒積憤從逆者悉數伏誅

楚軍攻勦麻城逆大勝

逆目陳玉成勾結捻首張落刑龔瞎子等匪衆三四

萬詐稱十萬竄踞麻城縣以守險築壘爲固計四門
其壘五十八座溝濠層疊儼若天塹前調之軍已至
城下胡巡撫復抽調九江湘副等四營併鮑超何忠
駿等三千五百人均歸候選道李績宜統帶會勦定
議四面破其壘然後肉薄攻城派營官張文煥等伏
兵附近爲策應其南路則何紹彩西路則黃日勝皆
張旂以出馬隊輔之李道舒副都統親督兩大隊攻
其東壘北壘逆匪出衆迎拒我軍竭力苦戰斬悍賊
百餘賊入壘自保乘勝攻圍蹋平東北各壘西路宜

軍聞東北得手併命惟恐後時西壘亦破賊奔赴南壘城中出數千人協守礮落壘外如雨我軍四面伏兵齊起副將張文煥首先馳入賊營中礮陣亡弁勇憤怒驟進遂平南壘共殺賊五千有奇生擒七百餘兼斃其偽總制將軍指揮二十三名

官大臣胡巡撫等議水陸東征

九江旣克官大臣胡巡撫會籌東征之策江楚各留兵五千防潯陽以得勝之師水陸東征陸師渡江先皖北而後及於江南水師先安慶而後及於金陵請

於九江設轉運糧臺由安徽巡撫派員赴都與阿李
續賓行營支應竝陳李續賓忠勇誠篤可獨當大任
今越境遠征應否加銜准其專摺奏事以一事權而
免牽制得

旨報可李續賓加巡撫銜

江南軍攻雨花臺

逆屢伺官軍之懈悉衆突犯冀一勝以解其圍而雨
花臺形勝尤絕勢所必爭和大臣偵知道情遣總兵
李若珠伏兵慈湖銅井二路并飭艇師嚴爲防倣親

與張提督更休壘巡是月逆果由雨花臺撲營大敗
之斃賊千餘伏兵亦獲勝斬黃衣逆目二名賊艇亦
爲水師所敗燬奪無數

揚州軍擊敗援逆於石橋

皖逆糾合捻衆竄石橋薛家口築營壘圖窺江浦爲
金陵聲援德大臣派營總富慶阿等分路進攻先敗
賊於大劉莊崔廟集平賊壘三座賊奔石橋復拒戰
富慶阿等設伏合圍斃賊六七千生擒長髮千有奇
賊之竄歸滁州及旁擾和州者亦悉數殲除

卷十
皖逆竄陷黃安縣

副都統舒保李道續宜方會勦麻城獲勝而安慶暨英山霍山諸逆由廣濟蘄州邊界繞光山商城趨黃安陷之官軍分兵馳堵舒副都統率領馬隊往來策應頻戰雖小挫其鋒仍相持未決官大臣檄李布政續賓率五營兵上援是月二十六日抵黃安城外續賓本任浙江布政使時逆入浙境金衢嚴處各府騷動浙省在京大員合詞奏請
飭令李續賓速赴新任藉資捍禦得

旨俞允官大臣以楚皖安危大局所繫不可不剴切陳明
遂上言逆犯麻黃數道戒嚴我軍僅六千當驍賊五
倍之衆所恃者續賓威聲素著爲逆所憚耳浙江兵
力雖單江南大營已派弁往援疆圉可固楚北少有
蹉跌後患至深當今切要之計迅堵黃安全力以復
麻城如能使逆首聚殲於二邑不惟紓楚省邊患卽
江淮皖豫中原腹地亦可節次肅清

上嘉其切中機宜從之

福建軍擊敗政和諸逆黨

先是江皖遊竄入福建界陷政和縣邵武府城亦失守遂踞浦城分擾建甯府閩浙王總督懿德福建慶巡撫端飭候選知府陳維漢督帶兵勇進攻政和遇賊於西門斬獲甚多又擊退浦城游賊署延建邵道趙印川參將顧飛熊救邵武不及糾練丁結營鐵羅巷連戰獲勝擒賊七十餘名

五月楚軍克復黃安麻城縣追至商城並防勦太湖潛山英山霍山諸遊黨

皖逆踞麻城分陷黃安圖窺漢陽德安道北竄官

大臣先飭湖江各師船屠布要隘令曰使逆入腹地者罪無赦師船以死守之一面分撥馬步以勦爲防接值李布政續賓援兵至軍威益振逆計沮隙負隅抗拒而已隨定議攻黃安破其四堅壘而進以劈山礮轟城排礮繼之五月初二日賊開三門擁衆出諸將弁迎戰正酣忽旌旂捲地槍發如雷則布政之伏兵起麥田而驟來也賊大潰棄械紛逃陣斬僞丞相檢點指揮數十人賊尸滿野黃安縣城旣復乘勝抵麻城先是營將蕭積仰駐兵殷家河敗賊由黃赴麻

者扼險邀截生逃僅十之一二麻城逆皆膽落閉門不敢出初四日宵遁我軍窮追數十里殲斃不可億計越境至豫之商城皖之潛太英霍邊界大申捷伐楚南軍克復江西諸郡縣湖北分兵援浙

九江既克逆黨無固志而練勇愈奮湖南援軍卽遣道蕭啓江知府今江西巡撫劉坤一進取撫州於正月二十九及三月初六等日先後收復新淦崇仁縣四月二十日攻撫州招降城賊黃揚水陸各軍相機登城殲賊數千人克復郡城餘匪逃至千金陂逼瀨

千餘人竝經團練在流坊等處截殺無數餘匪踣金溪縣參將劉芳貴帶寶勇擊走之其卽選道張運蘭知府王開成一軍由永豐規取建昌二月十五日克復樂安縣三月初四日收復宜黃縣初六日攻破磁甌賊巢乘勝收復南豐縣遂於四月二十四日收復建昌府城各失守之守令帶同團練先後收復新城等縣時同知曾國荃都司張勝祿李祥和等會參將遮克敦布等攻吉安添竒長濠屢敗之白鷺洲天華山逆堅伏不敢出遂劾克吉水萬安二縣於是江西

陷城收復八九矣逆黨畏懾竄入閩浙境警報日亟
時議趣李布政績賓赴浙官大臣疏爭之皖北獲安
及是見江西漸平兵力彌厚奏請

飭蕭啓江劉騰鶴等酌量抽撥由祁門甯國馳保杭州繞
出前路回攻爲捕鹿勢

皖逆復圖犯蘄州楚軍擊敗之

黃安麻城旣克皖逆尙未之間也思下游馬步大半
調防他處蘄州必單可逞志遂糾衆二萬餘築壘彌
陀寺南陽河分三路齊奔界卵石距蘄僅數十里唐

糧道訓方移勝軍馳勦派同知丁銳義游擊張嵩齡
當賊之右路游擊朱恢三率所部當賊之左路自勒
兵居中策應而分團勇爲三隊伏林菁深處賊中路
先敗陳德圍鄉隊突出夾擊敗其右路張嵩齡先以
羸兵誘賊至伏所故大勝復偕丁銳義朱恢三直上
山岡揮旂截擊左路賊不支紛紛潰三路俱捷燬賊
壘無數游擊余際昌又敗賊於白洋堡黃龍庵追至
彌陀寺逆聞風遁

福建軍克復光澤縣進攻邵武

江西逆闖入閩境由鐵牛關陷邵武等郡縣按察使
保泰移駐建甯杜賊蔓延而是時金陵逆勢亦窮蹙
力圖外擾騷動皖南北迄浙閩邊界冀官軍分援延
旦夕喘

詔起復曾侍郎前往浙江辦理軍務浙屢報捷而逆之入
閩境者亦大受懲創參將顧飛熊旣擊敗浦城賊會
同副將賈開泰都司武明良先於四月十一日克復
光澤縣至是會各軍進攻邵武

江西軍擊敗常山逆於玉山子午口

時江西兵勇多調援浙境又撥五千守九江以扼皖楚之衝常山逆乘虛竄擾玉山子午口等處候選道李元度奉檄督附近鄉團多方抄擊殺斃黃衣目三名派都司彭定發結營屏風關逆傾巢撲營左營童梅華右營郭世源中營彭舉從水田截出生擒髮賊三十羸斃溺死者無數

江南軍攻復安徽來安縣並平毀金陵城外及沿江各逆壘

時江浦克復皖逆竄踞來安圖爲江南北聲勢和大

臣派總兵成明協領博奇等進勦立復縣城金陵逆
愈形危蹙急欲潰竄和大臣思先剪其翼密派水師
總兵李德麟督都司黃廣泰分勦繁昌縣賊囊土填
濠錫壘壘數座土橋以平又派水師總兵吳全美游
擊郭定猷守備鄭榮勳攻破峩橋楊家邨魯港等處
殲賊二千餘名沿江漸靖城逆憤恚出太平神策門
分犯大營副將張玉良馮子材游擊孔朝斌等踴躍
陷陣奪其大旂斬驍健數名賊敗退自龍脖子至莫
愁湖尸相積如橐相遂攻金川門悉毀東北城外之

壘柵收隊

浙江軍克復壽昌縣

逆黨自廣豐陷江山縣金華衢州處州三府所屬邑
焚掠屠毒蔓延幾徧總兵李定泰自遂安馳抵楊溪
揜賊不備悉燬其沿河營柵進逼壽昌縣之七里亭
分路兜擊斃逆目三名斬獲數百名立復縣城遂由
壽昌赴衢州會勦

六月揚州軍大捷於全椒

逆竄入全椒城三面築壘滁州九洲洲等處皆所盤

踞聲息相通總兵鞠殿華奉德大臣檄會督帶兵官
海全富明阿畱攝六合縣溫紹原分途攻全椒旋爲
九洑洲逆偵知遂出上游龍王廟竝約滁州城逆剋
期會合意圖襲襲溫紹原富明阿奮兩翼擊之滁逆
敗走水陸竝進大敗九洑洲之賊獲巨艦二鞠總兵
統大隊薄全椒城下蹋平賊壘縱火燒城門城內賊
撲救死拒而城外賊紛紛蟻聚海全衝入左右馳驟
當者披靡鉛子中其騎卽舍騎步戰刀矛電閃頭顱
滾滾如落瓜賊大潰城逆負隅不敢出

曾侍郎由長沙起程援浙

曾侍郎於七年二月丁父憂得假回籍假滿固請終制情詞哀切

上鑒允之至是以浙江危急

諭旨敦促起行六月十二日抵長沙由水路至九江登陸

赴河口大營星馳入浙

浙江軍攻克武義永康常山江山開化五縣

總兵周天受督帶各隊攻武義縣六月初八日子刻克之賊鼠永康大路復會和大臣所派副將陳開選

一軍追殺是日午刻克復永康縣自衢州解圍以後
總兵李定泰等派知縣丁峻等攻常山副將陶茂森
等攻江山江西巡撫瓜侯選道李元度由屏風關進
兵會攻六月初四日勦賊於曹會關常山之賊乘夜
逃竄初五日克復常山縣江山之賊竄往浦城卽於
初六日收復江山其開化之賊亦經總兵秦如虎等
攻克數日之內連復五城

浙軍續克縉雲宣平縣

武義永康餘匪分竄縉雲宣平二縣周天受派副將

陳開選督同游擊吳再升移師縉雲分頭衝擊擒斬
及滾巖落澗死者不可勝計六月初九日克復縉雲
縣周天培督攻宜平四面兜擊斃賊無數亦於初十
日克之

浙軍復克處州府

諸縣城以次攻復衢圍亦解逆衆悉竄處州郡城失
守周天受飭副將陳開選瞿先仲等由陸路溫處道
俞樹風督兵勇由海口約期會勦潛伏敢死士入城
縱火爲內應逆堵禦禾備大軍猝至環攻城中復火

起開門竄往松陽遂於六月十六日克復府城

浙江分軍援福建

閩逆蔓延猖獗所復各城旋失又陷松溪崇安建陽等縣建甯府亦被圍告急浙江晏巡撫端書以衢處少安卽檄總兵饒廷選副將張騰蛟督兵勇馳援閩省又出師江山界勅浦城逆巢副將陶茂森游擊韓廷桂統之咨商幫辦軍務周天受李定泰各挑選勁旅三千派員管帶取道龍泉赴浦城會勦是時曾侍郎由河口營到浙復奉

命援閩省方擬自鉛山進軍逆始有懼心諸軍未合又潛圖牽掣之計矣

七月江南軍水陸皆捷

泥汊河居金陵上游前爲楊提督水師攻克後逆復濬濠築壘爲犄角勢和大臣遣總兵李德麟帶艇船集鄉圍攻毀之總兵李若珠復督水陸軍巡上下要隘城逆不敢出和大臣與總統諸軍張提督國樑定議在金陵城外建長圍以困賊鑿山越水屹若長城周城百餘里諸營大小相雜度圍形之險夷定攻具

之厚薄復於開牖口等處連舳板船爲水營城遊益
蹙增防各門潛築柵壘於壽德洲悉衆出撲欲潰我
長圍張提督合南北軍分南太平金川門東西軍各
擣雨花臺自七里洲至壽德洲則令游擊賴鎮海等
駛艇師擊破之張提督策馬率諸軍前進勇氣百倍
逆不能當我軍踰溝焚賊壘無數殲斃千計

皖逆復竄陷廬州總兵蕭開甲知府武成功死之

逆黨踞三河窺伺廬城福巡撫以師老無功

召入京候

簡用以勝都統保爲

欽差大臣調揚防之翁侍郎同書巡撫安揚書辦勝大臣
軍務待未至李布政孟羣署巡撫事駐兵店埠逆衆
乘虛於七月十五日竄入廬州城總兵蕭開甲知府
武成功督勇堵禦衆寡不敵皆血戰陣亡

閩逆竄回江西界圍廣豐玉山城官軍擊走之

閩省諸軍重克光澤收復建陽解順昌之圍先後抵
浦城逆爲牽掣計遣其黨擾江西廣豐匆趨玉山縣
平江營營官守開彭大壽侯選知縣夏宏江迎戰於

廣豐之五都小挫入城堵禦逆繞東門山之背悉銳
來撲三面環攻於小北門南門開窆地道大壽兩次
冒險衝賊營均將地道填塞十五日夜復出隊破其
五壘賊始越嶺去其擾玉山者李道元度率勇守禦
自是月十五至二十二等日出城迎擊殲斃無算城
圍亦解逆黨盡棄其輜重竄德興

福建軍克復松溪政和甯化三縣浙江收復龍泉縣合
境肅清

浦城逆分黨四竄諸邵縣皆已解圍知府陳維漢勦

松溪連戰勝之政和逆遣黨來援未至攔截出腰擒
斬其酋餘匪潰散我兵整隊回攻於六月二十九日
克復松溪縣游擊袁良政和縣知縣楊國榮督率兵
勇於七月初一日克復政和縣其甯化縣踞逆爲代
理知縣劉潤田挑選壯勇假稱援賊賺開南門知府
雷瑞光督隊攻入於七月初六日克復閩困稍紓而
浙江於是月初七日收復龍泉縣已全省肅清矣
浙援軍克復浦城縣閩兵克復崇安縣
逆在福建以浦城爲老巢屢巡撫咨同援勦亦以會

集浦城爲先著總兵周天受周天培督游擊馬承恩等自龍泉出師節次勦賊所至輒斬其驍目復在龔邨與賊力戰追奔三十里乘勝由關莊松波橋攻浦城之東北門毀城外賊壘七座逆匪喪膽奪門而遁分途截殺槍傷溺斃無數遂於七月二十二日克復縣城福建建甯鎮游擊王興業亦於二十九日由四渡橋進攻崇安縣緣梯登城克之建甯肅清

廬州逆竄定遠縣境皖軍擊走之

勝大臣之自豫赴皖也沿途勦捕聞鳳陽臨淮捻逆

與粵逆勾結意圖分撲遣游擊唐玉輝攻鳳陽獲捷
臨淮匪黨分擾紅心驛亦經副都統銜薩薩布等殲
除略盡廬逆聞風懼派匪竄至定遠縣之界牌勝大
臣派副都統穆騰阿副都統銜克蒙額等迎勦遇賊
於藕塘穆騰阿督馬隊兜擊施放連環槍礮轟斃四
五百名燬柵壘七座逆黨繞至池河襲官營亦擒斬
疊勝界牌藕塘賊皆潰奔關山大路竄江浦

八月楚南援軍克復江西吉安府

逆踞吉安最久自端臨撫建先後克復江西漸就肅

清惟吉安孤城死守先是七年二月知府曾國荃
湘添募吉中營勇水陸進攻十月紮天華山屢攻未
克八年七月二十一日以後官軍緣城直上斃賊甚
多賊已膽落八月初四日曾國荃會道員趙煥聯參
將遮克敦布游擊成章鑑胡定泰副將劉培元守備
周惠堂等水陸環攻毀賊划於白鷺洲初十日賊以
木解順流衝營禦之於棧潭灣等處小划小解擊奪
淨盡竝擊散大解一座斃賊無數賊之踞城者有二
股一爲僞先鋒李雅鳳一爲僞丞相翟明海屢敗互

相疑忌翟明海爲李雅鳳致死其黨於十五日夜乘
船忽遁曾國荃等各帶礮船迎擊各路兵勇薄城而
登克復府城生擒賊首李雅鳳及僞副將軍吳大法
等解省正法其初十日竄出之賊陷崇仁縣知府江
忠義馳往攻克二十日竄陷宜黃縣亦經知府元善
收復餘匪於克吉安之次日追至茶山嶺等處勦殺
殆盡江境肅清

楚軍克復安徽太湖縣

李布政續寶旣自爲一軍得專達與都將軍由英霍

進攻太湖縣溪山險阻逆屢抗未下時閩省騷動慶
總督端飛調參將石清吉赴援清吉者入皖之行軍
驍將也統飛虎三營屬將軍麾下將軍以情自官大
臣疏留之而廬州陷後翁巡撫兵新敗器械亡失皆
急於布政令繞豫赴廬官大臣又上言太湖方血戰
有功若舍之應廬州緩不濟急

上聽其議遂有八月十五日攻克太湖之捷先是賊於東
岸及楓香舖小池驛東山頭各築堅壘都將軍李布
政飭副將朱希廣趙克彰何紹彩總兵李績燾參將

謝永祐等分段攻城用火箭燃燒火藥賊匪駭散各
勇奮呼登城各路搜殺克復縣城竝攻毀黃泥港賊
壘共計斃賊六七千人各軍進攻潛山石牌

楚軍克復江西安仁縣

曾侍郎奉

旨改道援閩未至而閩逆復分股萬餘人回竄鐵牛關由
江西之瀘溪金溪竝許灣鄧家埠一帶入踞安仁縣
曾侍郎親率所部移營弋陽派道員張運蘭自河口
鎮拔營與知府王文瑞等軍先絕賊由樂平萬年分

竄之路又派主簿吳國一軍與張運蘭等分路進攻
安仁令平江營戰船橫截河面使賊不得偷渡張運
蘭等行至青山埠卽分軍誘賊出城伏兵齊起賊敗
入城跟蹤追勦逆閉閤抗拒矢石如雨各勇攀堞而
登縱火焚燒水師戰船亦自河而轟擊賊不得逃伏
尸山積計斃四千餘名其奪路夜奔官軍追殺者約
二千餘人水師轟斃溺斃者千數百人生擒一百七
十六名立將安仁縣城克復

福建軍克復建陽

逆踞建陽城以水吉邨爲險要置重壘柵虬結周總
兵天受等旣敗賊於迴龍塘卽進攻建陽分遣副將
郭啓舉往老佛庵都司榮升往上瑤襲勦二處皆獲
逆三窟也逆果自水吉出黨二三千名分路來援我
軍迎擊痛創之賊紛紛鳧水逸去遂焚燬二處賊巢
合兵攻水吉南北岸賊壘悉毀擒斬無算七月初八
日已革知府匡開督帶濠墩等鄉聯勇至聯勇首先
登城官軍繼進遂復縣城

福建軍克復邵武府

自崇安建陽克復後逆衆聚於邵武府八月十六日
都司武明良自光澤帶兵前往協同上圩聯丁攻進
西北兩門千總吳連升管帶平安軍親兵協聯丁大
東門斬馘甚多卽日克復府城計江西逆匪擾竄閩
疆壘陷郡縣十城經慶總督端出省督勦浙江等軍
馳援次第攻克並有爲本處守令率聯丁收復者至
是一律肅清

楚軍進克安徽潛山縣及懷甯縣屬之石牌鎮

潛山石牌爲皖省南北要道逆厚集黨翼以援應諸

路而抗我東征之師太湖既克都將軍等遣副將趙克彰率精銳抵潛山營北門外之彰法山賊黨擁來撲殪悍賊數人副將何紹彩等左右包抄馬隊繞至賊後四面掩襲署知縣胡履坦率鄉團助戰殲賊千餘羣賊驚潰人城率城賊宵遁八月二十一日克復縣城追奔三十餘里前後斃賊七八千人遂派翼長多隆阿副將鮑超率馬步於二十五日分二路取石牌一由李家店攻破雷公埠收下石牌一由蠟樹柯收上石牌石牌鎮老巢皆平斬獲與克復潛山縣等

官大臣飛章報捷竝以吉林黑龍江馬隊屢建奇功
節次傷病九十餘員各請如數選換竝請添撥兩省
西丹各一二百名以濟兵力得

旨允行西丹者清文餘丁也

九月揚州城復陷大軍退保邵伯萬福橋等處

逆首陳玉成自上游率大股會九洲羣逆越江浦
猛撲浦口德大臣大營幫辦總兵鞠殿華迎勦賊三
路兜截我兵進退爭一橋致大挫和大臣派參將馬
子材總兵向奎率兵六千先後來援賊分兵綴之仍

力撲浦口軍心不固八月二十日大營失陷升用知
府南河同知孔繼鏢河南知府宣維祁儘先副將陳
昇等均陣亡賊壘陷江浦天長儀徵等縣竝分賊攻
六合大隊徑奔揚州犯西北二門營總富明阿督馬
隊出北門與守備詹起綸之勇會合包抄張德彪亦
帶勇於西門力拒殊死戰乃賊勢太衆於九月初三
日由南門攻破入城初浦口之陷德大臣登江口水
師艇船繞赴揚州乃與幫辦等定議守邵伯防北竄
竝紮營萬福橋等處以固東路

楚軍克復安徽桐城舒城二縣馬隊會艇師進勦安慶
大捷削平城外諸逆壘

大軍之入皖也楊提督率艇師沿江東下遙爲聲勢
自太湖潛山復城後都將軍親督馬隊分道勦安慶
其由石牌抵桐城者惟李布政一軍副將趙克彰爲
前隊擊斃桐城撲營賊一千六七百名生擒逆目劉
清桂等蹋賊壘四座後隊肉薄城根九月初七日總
兵李續燾督勇先登克復桐城縣李布政獎勵三軍
整隊前進舒城逆聞桐城已拔皆無固志續燾攻城

西北賊巢盡破而城東南亦爲副將李存漢趙克彰圍亟十八日逆悉衆棄舒城走入三河僞城死守運同丁銳義率團練搜殺賊尸盈路李布政之師遂追賊至三河時都將軍率馬隊攻安慶破大橋頭賊壘翼長多隆阿自總埠副將鮑超自團山趨集賢關賊棄壘而遁楊提督水師亦至立毀北門近城四大壘東西山灣小壘亦掃蕩無遺復奪獲賊艇於樅陽洲港悉拔其木椿鐵練之攔截官軍者先後斃賊五千餘安慶逆膽寒氣奪閉城不出

皖軍及清江防軍拒賊於三河集獲勝

逆匪踞天長後意圖北竄分股二萬人於九月十二日直撲三河集集在清江浦蔣壩之南濱臨洪澤湖向設仁義禮智信五壩以時啓閉淮揚道郭沛霖以逆勢方熾雷三河關口不堵以存天險庚河督長派候補道赫特赫訥等督勇駐蔣壩守之賊至欲覓渡赫道等開礮拒之適勝大臣派副都統麟瑞等督兵馳至於商橋遇賊殲斃多名十三日復加痛勦蔣壩防兵亦竭力堵擊賊始奔潰悉數南遁清江以安

江南軍會北軍克復揚州城

逆踞城後屢至西北山焚掠竝及黃珏橋圖犯邵伯
警報日達江南營張提督國樑領大軍渡江九月十
四日夜挑選精銳攻東南兩門賊擁眾出撲我軍一
可當百賊卽敗退游擊馮觀勝黃靖分路截殺突有
悍賊出北門張提督飛馬迎擊如風掃敗箠賊狂奔
倒斃城不及閉江北軍鞠殿華成明富明阿亦相繼
驟進卽於十五日克復府城遂移攻儀徵縣十六日
亦克之

逆陷六合縣補用道溫紹原死之

縣居金陵北以浦口爲咽喉形勢鞏固粵逆入鄂之
歲湖北江夏人溫紹原權知六合縣事募鄉勇爲守
禦計長江東下重城皆望風瓦解六合以彈丸獨存
大小百戰屢殲賊衆歷六年之久逆以全力始破之
揚州之變陷也德大臣駐邵伯不復能顧六合逆以
大隊圍城紹原激勵諸同志涕泣誓以死守割衫嚙
指草血書告勝大臣乞援不至張提督十五日復揚
州亟引兵救六合十七日至陳板橋遇大股賊接仗

不得驟進賊知張軍且至十八日寅刻穴地道轟城
城塌十餘丈蟻附而上紹原聞變攜妻王氏次子候
選知縣溫輔材長媳陳氏投水以殉從事者多不屈
死紹原以積功擢道員加運使銜充江南大營翼長
仍留防六合代其職者爲李守誠江西宜黃舉人選
授六合縣清儉勤幹城陷自縊於堂上有總兵羅玉
斌者自來安奉檄守六合賊入城大呼曰我羅總兵
也手刃數賊而死投劾知縣馮明木典史集楸奎都
司王家幹夏定邦守備余承恩城守千總海從龍等

皆巷戰陣亡

皖軍擊敗天長縣竄黨進克縣城

勝大臣擊敗三河集之賊抵行營聞馬頭城上審一路逆黨久屯聚恣擄脅卽派營總薩薩布穆隆阿等分途捕勦屢有斬擒而天長竄匪復擁踞馬家壩憑河負險爲南北通聲氣乃遣副將張德勝由高橋進直抵馬家壩賊大潰縱火焚毀其巢穴廬室無存九月二十四日攻天長先有擒首李昭壽歸誠效順勝

大臣奏請

賞給三品頂戴花翎至是爲內應率衆由內殺出前後夾擊賊勢不支棄城逃竄卽將縣城克復搜殺髮逆淨盡事聞奉

旨李昭壽更名世忠以參將卽補竝飭嗣後各路軍營遇有被陷賊中棄邪歸正者果能立功自贖克復城池亦當一體施恩以昭激勸

楚南軍勦竄匪於江西新城等縣殲之

閩省逆竄回江西新城等縣屢次堵勦而此出彼入邊境騷然曾侍郎耆巡撫齡以補用道劉長佑誠集

善戰添派兵勇專任之劉道偵新城賊尤衆獨督軍
進連戰皆勝斃賊三四千羣匪自熊邨來接遣李明
惠等迎擊於南豐新城邊界之呂公嶺李家出等處
斬首三百級適遇江忠義軍遂合兵追至七都殺賊
一千六七百名復由七都至橫邨生擒五百七十餘
獻馘四五千級劉道督隊至沙坊傳坊戮悍賊百餘
進盪甘家隘老巢僞指揮數十悉伏誅計殲賊逾萬
另股由瀘溪竄安仁經張運蘭等及各屬團勇水師
合勦殲斃七八千名江境之賊約略無唯類矣

十月江南軍克復溧水縣

皖逆援金陵於九月復陷溧水署知縣周觀銘等督戰陣亡逆遂分衆築壘江藍埠等處爲扼要持久計和大臣遣總兵張玉良由祿口進攻埽賊壘無數夜渡河追擊盡平江藍埠斬首千餘乘勝合圍溧水城和大臣等以城池單小必可旦暮克而銅井六郎橋龍磨山高古山皆要隘援賊所必爭逃賊所必趨不可不豫爲防總兵李若珠飭所部副將劉季三游擊朱紹科等往來巡徼張總統駐兵高古山以備侵軼

城逆果不支玉良督副將馮子材陳朝宗等裹創力戰豎雲梯登城殺守陣而入十月初七日克復逆狂奔西竄伏兵節節兜抄斃賊四五千名無一得脫其援賊夾攻高古山大營張提督親率數十騎怒馬陷陣左衝右突萬衆披靡刺斃其黃衣逆目總兵李若珠亦督部將各處兜截生擒僞銅天侯斬僞國宗洪姓斃賊五六千名賊尸相望合兵窮追直抵江甯鎮燬賊卡壘數十座小丹陽以至采石磯老巢悉平楚軍失利於三河巡撫銜浙江布政使李續賓死之

我軍旣克桐舒皖逆待救攻廬州益急惟三河鎮爲水陸衝途欲援廬州非攻拔三河不可馬隊已隨都將軍會勦安慶所克潛太舒桐四縣留兵駐防李布政所統銳卒僅四五千人而已逆設立僞城於三河磚壘九座憑河扼險李布政督隊至結營連戰皆捷殺賊數千我軍亦陣亡參將蕭意文都司胡在位及兵勇千餘而逆首陳玉成李秀成李世賢由和州江浦六合廬江等處分道台援連營數十里我軍較敵不及二十分之一逆屢出挑戰李布政慷慨誓師部

下士皆涕泣効死殺賊過當賊四面圍襄愈集愈厚
又喪參將彭友勝游擊胡廷槐饒萬福等丁勇盡銳
突出歸伍者不滿三千十月初九日親自督戰盪決
直前游擊鄒玉堂杜廷光守備趙國棟力竭死七營
均陷李布政知勢不可爲焚香九叩首捧

廷寄

硃批奏摺焚之曰不可使

宸翰落賊手次晨復督衆血戰竟日力竭陣亡臨戰時顧
諸將曰我義當死戰報

國諸人可自圖生也僚佐謂公不負

國我等豈可負公皆願死戰卽補道孫守信同知曾國華
運同丁銳義何裕何忠駿同知直隸州董容方知縣
王揆一等數十餘員皆從死其棄壘先逃及不能援
應之總兵李績燾等八員經官大臣胡巡撫奏參逮
問擬以遣戍褫職布政湖南湘鄉人幼讀書端凝沈
毅器識過人咸豐二年奉父命應羅布政澤南倡辦
團練七年之間克復四十餘城身經六百餘戰一時
諸將無與倫比死之日湖南北及江皖四省士民皆

哭如失所依舒桐難民猶不遠千里負送忠骸歸葬
官大臣等覲縷上陳得

旨加總督銜照總督陣亡例優卹竝奉

硃批詳覽奏牘不覺卽涕惜我良將不克令終尙冀其忠
靈不昧他年生申甫以佐予也

煌煌天語李總督雖死猶生矣

楚軍擊平荆橋諸賊壘

三河之敗爲東征一大蹉跌遠近震動都將軍方攻
安慶屢獲勝仗忽聞三河之警勒兵回援已無及矣

三河潰卒入桐城致潛太復爲賊踞將軍恐悍賊抄襲收潰卒由石牌駐兵宿松而唐道訓方李道續宜舒副都統保奉官大臣胡巡撫檄率馬步大軍赴潯陽節次進援將軍喜曰三河恥可雪矣吾當爲諸軍先遂進勦黃泥營賊衆敗之復督副都統多隆阿大戰荆橋逆前隊數萬迎拒十合十勝士憤恨氣盛賊雖衆莫敢當乘勝奮殺賊衆棄壘而逃蹋平三十餘座斃賊六千餘生擒五百有奇軍勢復振

浙軍援閩克復諸縣城

江西逆擱入閩界肆擾將樂縣竝陷浦城永吉建陽
順昌各城會侍郎由杉關入閩勦賊軍士染患時疫
者數千人遂駐建昌先檄周總兵天培督將弁赴援
所向克捷張道運蘭一軍肅清將樂等處逆分三路
復竄回江西遂以次收復浦城順昌諸城是時江州
府甯化長汀等城均陷旋亦收復惟連城尙聚賊萬
餘人

十一月皖南各軍先後勦逆獲勝

皖南祁門青陽之賊竄犯崇覺寺及卓邨和大臣派

總兵江長貴分路迎勦自九月初九日至十月初三日疊敗賊於九鳳嶺苦竹橋焚燬陵陽鎮賊壘其太平縣等處竄匪亦經官兵擊退又南陵之匪竄擾甯國爲總兵米興朝等抄賊於赤嶺牧家亭敗之逆從烏溪渡河水陸竝進爲提督鄧紹良等殲斃蕪湖之賊從鷹邨橋小蒜山五里亭等處來犯亦經鄧提督等分途迎勦悉有斬擒逆復由小荆山撲孤山壩兵少劄鄧提督飭諸軍進勦奪賊艇數隻獲其僞丞相承天侯首級陣斬將軍各賊月乘勢追奔又連捷於

黃池黃島坡等處甯國之匪復竄水陽鎮擾至雁翅
時門和大臣所派總兵戴文英副將朱承先等於十
一月初八日三路攻擊游擊馮觀勝衝入賊隊殲賊
無數立克逆卡二道進薄賊巢鏖戰五時之久殺賊
千餘名奪獲賊械無算又賊股分陷徽州之婺源縣
時前江西巡撫三品京堂張芾奉

旨督辦皖南軍務派副將王夢麟等會同署提督周天受
督軍進勦十月初二及十一月初三十一日疊獲
勝仗復與白沙關總兵李定泰一軍會合

十二月江西逆匪竄信豐陷南安府城

景德鎮陷後官軍失利於鱖魚山竝陷東流縣揚言欲竄湖口九江等處及閩逆回竄由瑞金會昌徑入信豐抵南安界警報日急張道運蘭奉檄調自閩赴建昌會侍郎謂曰閩事不足慮信豐南安賊亦無害所以調至者圖商景德鎮耳若東犯廣信西踞湖口則九江危矣卽日撥帶勁旅倍道馳抵景德鎮與劉道于清會勦屢戰皆捷賊鋒少挫入南安城者旋卽收復信豐城堅守得完

楚軍敗逆於南陽河等處

三河鎮之失桐舒潛太四縣復陷皖楚之交游賊往來無停趾官大臣已調兵赴援都將軍以斬黃羅麻者九江之尾閭而全楚門戶也急派李道續宜督知府唐協和等分駐要隘備不虞又派蔣道凝學一軍趨宿松界飛飭總兵曹承堯劉道騰鶴集重兵防潯陽彭澤湖口等處北岸始固而自龍坪黃州以上至漢鎮水師礮船聲勢聯絡則以知府蕭翰慶副將李成謀統之部署嚴密重振軍威荆橋旣勝唐道訓方

游擊余際昌阿達春等復有南陽河之捷自後又敗
賊於花涼亭楓香驛蓮花塘分茅嶺斬馘一萬二三
千有奇

湖北胡巡撫駐軍黃州

巡撫以七月丁母憂照軍營例回籍穿孝百日固請
終制會三河變起李巡撫死綏

朝旨敦迫乃勉起督師念墨經從戎金革無避之義以兵
事自在十二月初八日渡江駐黃州蒐軍實察夷傷
卽死弔孤汰弱補闕經意規畫兵氣益揚

三上人身目糸田

卷一

三

平定粵匪紀略卷八

咸豐九年己未正月江南軍克復浦口城

是時江浦守城逆爲薛三元遣其心腹羅華清等謁見張總統願獻城勦賊贖罪和大臣遣參將李世忠詣城受降獻出江浦縣城於正月二十七日進攻浦口出不意陣斬僞懷天福等逆渠數名斃賊千餘遂復浦口當世忠之未往受降也羣逆知三元有變率隊急攻江浦三元已下令皆薙髮歸正協力死拒潛乞師於水師游擊賴鎮海鎮海以兵往援會世忠至

三才身目系此
圍遂解三元改名成長後於十年復叛爲李提督世
忠擒斬以徇

楚南軍大捷於南康勦平新城墟及池江等處逆巢

逆由南康縣窺贛州在新城墟築僞城其首逆則踞
池江補用道蕭啓江奉旨侍郎援贛之檄正月十七
日抵賢女埔偵知賊有七八萬衆當以計取伏兵附
近各隘令管帶田勇知縣周慶榕誘賊出擊精兵盡
起陵谷中建楚軍旂幟驚以爲天外飛來棄營壘遁
追斬無數削平僞城進攻池江小溪鳳凰城燬其老

巢賊竄南安

皖軍再復浦口

參將李世忠等既克浦口奉勝大臣檄會擊高旺之賊奮勇衝殺立踣其棚壘十餘座逃匪復糾合小店諸逆驟撲浦口擊走守城兵盜擁而入世忠引勝兵回勦鏖戰數日賊勢漸挫都司朱光興等三面環擊復克其城殲斃無算擒髮逆百餘浦口肅清

福建軍克復連城縣龍巖州

閩逆戰敗回竄江西閩之汀州甯化等郡縣先後皆

復惟連城逆尙負隅陰圖觀變東南濱海地沃衍物
產極豐惟閩僻阻獨磽确多貧民逆便於誘煽故
雖無所獲不肯去閩督撫密飭延建邵道潘駿章督
同紳耆設法散其羽黨陸續投誠者七八千人選其
精壯充新勇老弱還鄉里官吏妥爲存卹從賊多無
聊賴旣喜自新有路皆相引舍賊去乃調集總兵豫
祺副將王捷元參將袁良等督諸軍於正月初十日
一鼓進攻盪平之餘匪由葛溪一帶竄陷龍巖州復
派都司賴正修巴革汀漳龍道英樸等二十三日夜

進攻城內紳民開城接應逆衆四散奔逃殲擒二百餘名立將州城克復

江南軍克復灣沚黃池

逆踞宣城縣屬之灣沚與黃池相依倚大爲徽甯患和大臣先飭提督鄧紹良攻灣沚力戰陣亡總兵鄭魁士繼往派參將鄭朝棟等分路進攻斃匪千餘名於正月二十四日收復灣沚復督副將朱承先攻黃池盡平其壘

二月皖南軍克復婺源縣

婺源於上年八月失守張京堂飭接辦軍務之皖南
鎮總兵江長貴攻勦獲勝正月間密派得力將弁斷
其接濟二十八九等日疊次大勝二月初一日會同
各軍鏖戰七時俘馘無數斬險直入立復縣城

江南軍擊敗皖逆於江浦浦口

江浦浦口次第克復皖北各路悍賊暨黃池灣沚諸
潰匪不下七八萬合踞烏衣鎮汊河口等處圖伺釁
奪兩城爲六合援張總統國樑遣總兵李君珠游擊
薛成良於二月初九日由黃山迎勦逆酋結連九洑

洲之賊直撲浦口張總統躬率大軍分三隊長驅截賊數段李若珠等亦自黃山得勝回前後夾擊殲斃二千餘生擒偽固天福洪方偽立天豫莫興等二十餘名江浦亦爲逆所撲竝橫截浦口大道總兵周天培游擊賴鎮海出城接戰而大軍亦至賊棄械遁

江楚軍克復南安府城信豐解嚴

蕭道啓江已平新城墟及池江賊壘擬由龍迴間道先援信豐徐圖南安屢獲諜訊南安逆勢窮蹙且畏官軍日暮至民一夕數驚因有機可乘遂率所部及

管帶田勇之周慶榕由青隴黃隴至三角嶺見城中
火突起知已內亂大軍鼓勇攀堞而登東北門已徧
立官軍旂幟遂於二月初三日克復府城時信豐告
急之函日至初五日冒雨往援初七日會同知府曾
國荃總兵遮克敦布進攻初十日分八路痛勦踣毀
賊巢伏尸徧野遮總兵一軍適當逆賊竄路斬馘尤
多信豐之圍立解

皖逆逼犯廬州大營前署安徽巡撫事布政使李孟羣
死之

孟羣河南進士湖北殉難按察使李卿毅之子以廣西卽用知縣從軍自廣西湖南北安徽轉戰數千里累著戰功洊升安徽布政使自湖北帶兵援皖獨當一面以署安徽巡撫時廬州失陷奉

旨禡職畱營自効時駐軍官亭長城一帶以堵廬州西面賊由六安州來撲奮力堵退二月十五日復以大股撲副將鄧清知縣李孟荃兩營相繼失陷復併攻左右兩營自辰至戌賊來愈衆李布政中營力不能禦被賊擁入猶持矛屹立圍牆厲聲罵賊手刃悍賊三

平定身目名日
名力竭死得

旨優卹其忠骸藁葬廬州千總沈國泰深入賊巢覓獲與
練總褚國泰護送至壽州翁巡撫派其兄李孟荃送
回原籍父子先後殉難遠近哀之

三月皖軍勦逆於八斗嶺克之

先是逆糾安慶黨圍撲護城營四面築壘數十座
以困我師副將格洪額等射火箭入賊壘悉焚其棚
帳賊驚退營圍頓解而渠逆陳玉成憤賊衆屢敗思
逞志於我糾合大股齊竄八斗嶺勢極猖獗勝大臣

親統大軍進剿密遣得力將弁選精銳爲後勁防賊抄襲前隊旣捷毀壘四座逆果分萬餘悍賊繞出大營後諸員弁豫爲戒備連環轟擊賊紛紛潰退勝大
臣復回隊督戰追斬無數遂移駐張橋撥馬隊扼守
八斗嶺

楚軍水陸援湘

逆首石達開自出金陵至安慶久與洪逆隔絕續誘脅擁衆已至十餘萬欲因便踞險白雄乃由江西南安府取道崇義竄入湖南桂陽縣總兵劉培元彭定

泰率一千二百人防堵爲賊二萬餘人包抄致大挫
失桂陽城陷興甯宜章縣亦相繼失守方賊之由湘
入鄂而擾豫章也湖南官紳籌勇籌餉百計分援湘
力自弱故石逆乘虛而入幸猛將壯士之假歸於家
者肩摩轂擊駭巡撫與邑紳左京堂今閩浙總督宗
棠等星檄諸郡一月內成軍四萬餘人擇隘設守官
大臣胡巡撫復飛咨都將軍調撥吉林黑龍江馬隊
回鄂馳赴湘南派知府蕭翰慶率水師礮船三十二
隻克期會長沙時逆蹤已擾及新田嘉禾沿途襲脅

官大臣恐由衡永竄長沙復增派參將趙福元率南
勇二千數百自黃州往副將陳金鰲自揚提督水營
往副都統舒保選員帶馬隊二百自皖界往皆先入
鄂稟受方略分馳而去其湖北軍務胡巡撫駐黃州
督辦以固守爲事姑緩謀戰先增募蕪黃襄鄖勇各
千餘人且守且練以補援湘之虛

皖軍克復六安州

逆黨踞六安分擾英霍以圖旁竄勝大臣督重兵赴
正陽關堵扼賊援調諸練勇勦六安薄城下逆出戰

敗退前六安州知州茅念劬霍邱縣練總守備趙春和開礮轟擊斃賊四百餘名附城卡壘及關廂木柵數十處蹋毀罄淨官軍晝夜環攻三月十九日填濠直上茅念劬趙春和首先登城已革副將盧又熊等繼之逆黨出南門奔舒城霍山追殺三十餘里

楚南軍敗逆於永州城諸州縣解圍

逆陷桂陽興甯宜章等縣復間道撲郴州桂陽州進窺衡州魏喻義帶勇迎勦斬髮賊千名逆不敢犯改道由甯遠竄永州府時記名道劉長佑帶兵回援飭

副將奈星元等分路擣棚桂諸賊巢均獲捷劉道獨
勦永州焚賊壘二十餘處斃賊六七千生擒五百餘
遂解永州圍其另股竄至祁陽縣下游之觀音灘亦
經兵勇追勦斃賊無算

皖軍克復霍山縣

逆盤踞皖境每藉擒匪爲聲勢勝大臣於三月二十
三日受擒首張元龍降投誠衆以萬計鳳陽府縣及
臨淮關三城同日收復聲威益壯自復六安後敗匪
紛竄茅念劬等跟蹤追殺直至霍山北而署知縣王

自籓兒大隊齊到奮勇進攻將守陣之賊擊退乘勢
登城賊由東門逃竄立復縣城追勦逃匪數百名生
擒百餘名其舒城來援之賊先經我軍在白洋舖截
殺千名大獲全勝

江南軍擊敗九洑洲諸逆

三月十五十八等日張總統派總兵李若珠副將馮
子材進勦九洑洲各率所部直擣中堅斬馘無數逆
於浦口之西南連築營壘張總統周天培選隊攻勦
三戰三捷直趨九洑洲二十五日三路進兵殺賊數

百近處逆壘一律塌平

五月皖逆陷盱胎城尋克復

盱胎濱臨洪澤湖五月二十六日被逆衆闖入勝大
臣卽派營總烏勒興阿伏高橋左側衝城賊爲數段
逆衆踉蹌敗歸濱湖水師開礮斃賊無數勝大臣復
挑選湖內網船配以槍礮由老子山一路溯流上駛
扼盱胎之背復派副都統富勒德恩布等分路進逼
六月初二日夜陸兵銜枚疾走抵東關馬隊先登步
隊繼進逆衆倉皇潰竄我軍槍箭齊施水師亦鼓勇

登岸轟擊再接再厲斃賊不計其數立復縣城其澗溪一帶副都統麟瑞等接仗亦獲全勝

六月楚南軍攻克景德鎮及浮梁縣城

逆初踞景德鎮勢能薰熾江右要衝之區肆行無阻及南安既復信豐解圍大爲官軍所創懲張道運蘭會同王文瑞等圍鎮半載斬獲雖多仍未得上月曾侍郎添派知府曾國荃帶湘中等營五千八百人赴鎮協攻六月十三日夜逆出大箬四十餘座輔以夾岸陸賊圖襲艇師劉道于清屯軍西瓜洲燃火彈

拋擊陸師亦排礮助勦燒其大陣竝延及賊卡無數
賊衆棄鎮竄浮梁曾國荃與張運蘭等水陸進攻十
五日抵浮梁縣悍逆三四千人出浮橋列陣以待我
軍迎擊立斃二百餘名落水死者千人遂將縣城收
復

皖逆犯來安及滁州擊卻之

用胎城復後陳玉成圖報復六月初六日率死黨攻
來安參將李世忠守城豫伏壯勇於南北兩門外自
督守備董正昂衝入賊營所向披靡賊乘虛襲城伏

起搆擊世忠回隊夾攻賊敗走十五日偵陳逆連夜
走滁城四面環攻卽親帶弁勇乘勝由水口焚燒賊
糧斬逆目十一名分三路進勦逆衆又潰

逆陷定遠縣前淮揚道郭沛霖知縣周佩濂死之

逆之未攻來安也遣其黨糾合捻匪圍定遠縣前淮
揚道郭沛霖畱守與知縣周佩濂激厲勇丁百計自
固竝屢出城痛勦賊氣沮解圍去及來安旣敗復率
人隊擁至總兵惠成出隊攻勦因賊勢太衆兵饑久
絀不得力遂於六月十八日夜失陷知縣周佩濂督

所親巷戰身受數十創猶挺刃奮殺斃數賊而死自
外委周汝諮周炳濂以下從死者十餘人前淮揚道
郭沛霖由翰林起家素以志節自勵守揚州時爲兵
勇挾護出城以不死自恨獲咎後爲翁巡撫奏調赴
皖以守定遠功蒙

賞五品頂戴至是無守土責可趨翁巡撫大營以前咎效
死勿去遂及於難

卹贈光祿寺卿

湖南逆大隊圍寶慶府楚軍擊敗之

石逆以邠陽之敗圍衡州不獲乃攻寶慶府裏脅極
衆號稱數十萬連營百餘里長圍僅闕北一面時鄂
省援師先後至管帶水陸諸將亦皆自長沙進勦副
將田興恕軍府城之南卽選道趙煥聯總兵周寬世
軍府城之東城西濱資水各艇師扼之官大臣胡巡
撫愛寶慶重地不可無良將爲總統飛檄荆宜施道
李續宜率湘營由上巴河督馬步大隊星馳至寶慶
軍心資以鎮定先是逆以五月上旬攻寶慶續宜未
至趙煥聯周寬世屢挑戰獲勝諸員弁告奮勇開壁

門出擊斬前鋒驍悍奪其大旂水師亦轟礮助成逆
不爲動前隊攻城後隊築壘石逆達開踞城南十里
之澄水橋賴逆文光踞城西五里之神灘渡傳逆踞
城東十二里之泥灣是爲三逆首大壘其餘纍纍若
貫珠者不可枚舉田興恕驍勇夙著數衝鋒血戰駐
營城外最近賊爲之少卻劉道長佑部楚勇由武岡
州繞道郡城西北巨口埠總兵劉培元率艇師由益
陽溯資水而上與劉道會從北路調集副將余星元
楊恒升等紮范山從東路調集候選知府今雲南巡

撫劉猷昭副將朱品文等紮龍安橋剋期大舉縱橫
盪沃逆衆雖數敗於勢無損北路逆新壘悉成自是
寶慶城四面皆被圍矣官軍之營於洪橋者復受挫
潰散守城大恐六月十九日李續宜由安化進駐監
田距府城一百四十里閱伍籍其兵勇三萬有奇悉
受節制聽調遣逆首聞援軍大至且畏續宜威挑精
悍併力致死裏三日糧罄破寶慶兼分賊四出撲營
李道進兵高家冲會劉道商破逆之策劉道言東路
逆勢厚且巖壑幽邃不可用武李道乃定計由北路

進攻旋敗半邊街藍江半襲營諸賊遣劉培元造浮
橋於釀溪濟師飭劉嶽昭余星元等朝暮率游兵突
東南二而牽賊勢俾不得防禦西北自督大軍渡資
水而西賊衆方撲半邊街官營未之覺大軍直擣匡
家嶺逆巢掩旂鼓從山背襲之賊大潰乘勝躡毀田
家渡柵壘東路逆聞亟渡資水以拒李道戒各營勿
動密令副將沈俊德胡裕發等出西路爲橫截之兵
參將毛有銘出後路爲包抄之兵林密山曲伏兵則
派營官于高勝郭鵬程濠內外賊蹤徧滿防兵則派

副將蕭慶衍梁作楫自督親兵勁旅及馬隊伺賊懈
縱擊之聲震山谷斬驍賊無數諸將亦齊集報捷李
道以賊勢已靡然悍且衆慮多傷我戰士不如分擣
其巢穴令黨衆散亂自後東討西擊發縱指示戰輒
有功共毀賊壘柵一百八十餘座斃賊二萬餘生擒
三千餘獲器械馬匹諸雜物巨萬賴傳二逆皆潰竄
石逆亦氣奪心驚不敢復萌自湘圖鄂之志

七月皖軍疊破悍賊來安滁州解圍

陳玉成率死黨攻來安犯滁州副將李世忠擊之逆

少卻尋復糾衆圍來安竝分屯於城西北卓家巢等處賊壘幾徧七月二十日世忠督令李元忠等帶勇出隊偵賊志已驕挑戰僞敗而精銳四伏不動賊笑官軍怯亦退休李世忠又環謀賊營以激其怒賊不爲意惟槍聲斷續作備禦而已夜各壘寂然知賊火藥漸竭乃鳴鼓角驟進躡厲迅發火彈火箭滾滾落賊壘赤光燭天賊猝驚無所措乘勢掩殺破壘二十八座追奔數十里獲米糧器械運轉入城二十二日李世忠帶隊回滁州飭都司朱元興蔣立功等破沙

河集龍停口賊壘四十七座滁州之圍亦解

江南軍擊敗六合天長各賊

德大臣師久無功爲和大臣奏參江北軍務改歸和
大臣統轄派福建陸路提督李若珠渡江攻六合總
兵張玉良攻天長七月二十三、四等日接仗各有斬
擒水師總兵吳全美攻魯港鴉山總兵李德麟攻大
通蕪港亦於七月初五、初八等日獲勝破賊壘多座
生擒僞指揮羅開文等九名

楚南軍勦寶慶竄逆連戰皆捷

石逆受創於寶慶猶聚踞東南路七月十二日諸營
分路進勦大戰於賀家坳營總德海等馬步奮擊李
道績立率候選同知直隸州金國琛等督隊衝殺陣
斬僞元帥胡德孝僞統戎陳麗江殲斃數百名其東
路襲龍安橋之賊趙道煥聯敗之南路九鞏橋白楊
舖之賊田副將興恕敗之陣斬僞佐旂總制黃立英
僞檢點陳明官等十餘名生擒五百餘名內有僞將
軍蔡光遠周學福王智明僞提審孫子安割獲髮辮
三千二百餘件候選道江忠義一軍亦生擒僞將軍

李定發偽通傳許六祥等四十五名十七十八等日
劉道長佑追賊至白倉大臨橋生擒偽統戎將軍十
餘名石逆張黃蓋指揮迎拒副將胡福發督營官羅
重世等躍馬直進奮力衝殺賊始潰竄追斬一千有
奇二十四五等日復追擊於白茅寺直至東安縣沿
途殲戮極衆其竄永明縣之賊擾近道州小坪一帶
亦經知縣魏喻義等追至筒車尾痛勦之湘省以次
肅清石逆旣與洪逆隔絕其偽官名目以意另立之
如統戎佐旂提審通傳等偽官皆前所未有云

江西信豐餘匪竄廣東惠韶等府討平之

江西信豐之賊二月初十日竄出後闌入廣東竄擾
惠韶兩郡經兩廣黃總督宗漢飭已革廣西臬司張
敬修署惠州府知府海廷琛等督帶兵勇擊賊於順
天湖層坑連平坡頭墟等處追至古洋峒山坳各匪
爭先渡河我軍分隊勦擊水勢奔溜斃賊五六千名
殲斃四五千名餘匪散逸粵東肅清

八月皖軍擊賊於盱眙之清壩高家凹
逆數不得逞志於盱眙糾合捻匪沿淮肆擾伺釁進

圖勝大臣遣副都統穆篤阿由洪澤湖東南進勦沈
燬賊船賊壘無數復沂淮而西督守備余通海破船
往來搜殺逆情漸窘乃於八月二十八日撲我清壩
高家凹營盤營官張得勝格洪額併力迎拒偽前軍
主將吳如孝素以剽悍稱自鎮江逸出至皖北肆毒
張得勝直前衝殺用手槍擊斃割取首級並所服黃
馬褂懸馬首死黨爭先奪尸被我軍殲戮殆盡賊衆
向南潰走追殺數十里

楚軍攻石牌鎮拔其偽城

石牌鎮隸安徽懷甯與潛山太湖等縣接壤爲由楚
入皖要衝先於八年八月爲多隆阿鮑超攻克後因
三河之失陷賊益加堅守造僞城高二丈餘礮眼星
列環以深濠椿籤密布阻我入皖之師兼通太湖糧
運官大臣以僞城不坂終礙東征嚴飭總兵鮑超謹
守太湖營而令福州副都統多隆阿總馬步兵勇攻
之是月二十八日銜枚捲甲齊抵城根參將楊朝林
雷正瑄游擊趙旣發東路進都司周天祥守備李德
謙陳天佑北路進參將穆正春南路進多副都統勒

所部馳西路四面會攻安慶潛山逆裔聚來援撥馬隊分二路迎擊之賊敗走我軍遂專力攻城衝冒矢石抉礮眼而入生擒偽霍天燕石廷玉等四十七名擊斃數千名力拔偽城醜類無漏網者

九月石逆全隊犯廣西桂林省擊徂之竄陷慶遠府

廣西自洪秀全等全股下竄近十年頗安謐間有廣東土匪竄擾隨時堵勦地方肅清石逆達開在湖南寶慶永明道州疊次懲創知無可竊據劄皇路歧老賊多籍廣西者懲令歸竄遂由新甯城步等處山僻

小路直犯桂林曹巡撫澍鍾督率文武固守竝挑選
精銳或輕師出襲或左右環攻夜乘大風拋擲火箭
噴筒焚燒賊壘使賊無刻安時官大臣駱巡撫已遣
將奔馳援劉道長佑蕭道啓江各統湘營部曲由新
甯赴省前廣西布政使蔣益澧參將蕭榮芳自柳州
聞警趨至九月初四日蕭道啓江一軍由南門文昌
門分投進勦破賊壘數座與前布政使蔣益澧水陸
兜擊擒殺無數初十日逆衆由南路潰散省城解圍
二十日竄陷慶遠府

十月皖軍克復懷遠縣

縣濱淮河毗連定遠爲廬州犄角自逆踞後官軍屢爲阻撓勝大臣計清淮河必自懷遠始十月初四日遣副都統穆騰阿知府秦榮游擊黃開榜等督馬步礮船水陸進攻由臨淮入渦河破賊壘五座直抵文昌閣焚燒沿河賊壘斷浮橋截其糧運三戰三捷城圍遂合奪賊艇三百擊沈無數殲斃近萬人十四日黃開榜獨拔幟先登兵勇繼進逆大潰立復縣城

江南軍勦六合失利

李提督攻六合被援逆竄踞紅山寨橫截大營後路
和大臣派總兵馮子材等援勦營於紅山寨之東因
大礮震裂兵勇驚潰致東營復爲賊踞六合大營被
圍糧盡援絕統帶忠勇詹啓綸列營南門外密探得
逆壘口號呼嘯而出李提督率衆從之逆突重圍駐
揚州西路

皖南軍勦涇縣逆黨獲捷

皖南涇縣之賊由查邨進犯周總統天受派副將石
玉龍游擊申明照等併力擊退周天受親往督勦十

月初七日逆大隊至南山嶺石玉龍力戰逆少卻復
竄章家渡參將周天孚自灣灘馳往逆衆猶隔河死
拒周天受率參將朱景山等各軍接應內外夾攻逆
衆潰走石玉龍申明照均以血戰亡玉龍鎮守行伍
自廣西轉戰至皖南戰功卓著明照亦屢立戰功於
浙東均奉

卹優卹

江南軍復失利於浦口

和大臣派湖北周提督天培扼浦口連營結壘爲江

浦聲援自六合軍潰逆衆益肆糾合諸死黨窺圍浦
口張提督撥兵勇馳往協堵時逆勢驕張屢戰失利
周提督力竭捐軀營壘皆陷大軍退保江浦

十一月江南軍壘破江浦逆壘

自浦口官軍失利逆匪東何揚儀西逼江浦南窺溧
水兇燄復熾張總統渡江躬親督勦十一月十一日
平毀北山新卡十四日攻破城南賊巢十五六日逆
於磨盤洲築壘官軍四路蹙之賊衆大挫狂奔北門
外賊營亦同時攻破其陳家集等處之賊竄回天長

南路之賊窺伺溧水亦經防軍擊退二十三日江浦對岸地道內火藥轟發官軍並未受傷賊匪自斃無數乘勝擊之復將西北逆壘二十餘座平毀揚州邊界一律肅清

皖南軍復敗賊於黃池南

既獲捷涇縣逆退踞董家邨十二月十九日撲高級黃柏嶺官營副將榮升督都司張維坤擊走之又竄擾河西爲參將朱景山等所敗副將吳再升遂乘勝進勦黃池南岸之牛頭山逆壘北岸逆糾黨來援分

兵迎拒殺斃極多逆壘皆平北岸逆瀆走渡河我軍
遂收復南岸

池州府內應獻城既克復陷

楊提督彭玉麟水師駐安慶聞池州府爲賊守城之
韋志俊堅志投誠遂由彭玉麟親率三營赴池剴切
開諭受其降令獻城贖罪遂收復池州府韋志俊旋
派其部下頭目古隆賢等進攻蕪湖古隆賢等甘心
從逆糾眾回撲府城韋志俊等隨同官軍迎勦自十
月十四日至是月二十五日屢敗賊於西北門外柳

波磯青溪關等處因衆心不一府城復陷

楚軍會籌勦皖敗賊於槎水畝

曾侍郎既解閩浙圍駐軍建昌居中調度江西恃以保障嗣石逆竄湖南蔓延千數百里獲謀稱欲入蜀官大臣胡巡撫以蜀之安危關係中原大局請以曾侍郎率兵入川得

旨允行八月二十五日曾侍郎由湖口抵鄂時石逆屢經懲創川中已有備無患復於九月內會奏暫緩入川會籌勦皖曾侍郎紮營上巴河俟湖南撤回各兵分

攻皖逆先是多隆阿鮑超率馬步九千餘人攻太湖道員蔣凝學唐訓方率七千人駐荆橋扼安慶石牌之衝以爲援應以參將余際昌率二千人攻英山以保蘄黃胡巡撫旋由黃州親往策應及曾侍郎會師軍心益壯賊由天堂王婆坳等處進撲圍解大湖之圍已爲我軍勦退是月十九日桐潛大股逆黨三萬餘人陸續圍集將襲我天堂後路余際昌帶昌字全軍會同帶禮桂三營之訓導丁華先商令潛山縣知縣葉兆蘭糾集本地練勇分路設伏二十一日一戰

克之陣斬偽漢天侯拱天豫二名斃賊數千名生擒一百餘名獲騾馬旂幟無數餘賊奔潰

十二月湖南建表忠祠求忠書院

湖南自曾侍郎倡率團練羅李三布政先後募訓練丁悉成勁旅陣亡各大員已蒙

恩許立專祠駱巡撫請再建於長沙省並以提督鄧紹良瞿騰龍等未得專祠者別建表忠祠部曲員弁兵勇一律附祀復建求忠書院令陣亡後嗣入院讀書所需經費由官紳倡率捐辦得

旨允行

卷之三十一 禮記 祭義 第十

四四

皇朝通志

三

平定粵匪紀略卷九

咸豐十年庚申正月江南軍攻克沿江逆壘九洲老巢亦平之

張總統國樑既擊敗江浦羣逆聲威復振部勒各軍期大舉正月初九日水陸並進薄浦口沿隄逆壘九洲出悍賊三面赴援總統躬率敢死士直前嬰鋒再接再厲縱橫出入所向皆靡總兵張玉良踵至亦分投痛埽援賊大潰乘銳蹙之擣其壘沿江戰艇林立礮聲不絕逆首尾不能相顧副將陶茂森等鼓勇

先登衆兵蟻附而上平逆壘八座卡十餘斬首千餘級初十日遂合兵攻九洑洲老巢洶涌潮進越重濠縱火焚其穴煙燄蔽天賊自相踐藉死者以數千計楚軍痛勦援賊克復太湖潛山二縣

九年十二月僞英王陳玉成以其悍衆竝勾結捻首張落刑龔瞎子等由江浦廬州定遠上犯號稱十餘萬時楚軍圍皖破天堂之賊圍攻太湖副都統多隆阿會蔣道凝學總兵鮑超分兵迎敵二十二日多隆阿等三軍斃賊六七千名賊趨小池驛二十四

至二十八九等日圍逼寔字營鮑超率兵勇血戰兼旬不卻步官大臣等咨商曾侍郎抽添分派各營駐小池驛新倉竝潛山之落溪河等處堵勦十年正月十一日賊衆分四股撲營知府金國琛帶兵蔡仰天庵會集諸路軍靜鎮以待賊乘霧登山我軍驟起撲之或橫攻腹背或攔截首尾賊衆紛紛潰敗隊崖落澗者不計其數生擒賊目監承宣素擾害斬黃者寸鏃之而高橫嶺逆壘同時爲參將余際昌等率昌字禮字九營破之斃賊三千餘生擒四百餘名二十五

六等日各營奮力攻勦縱火燒山各路殺賊約計二
萬餘名太湖城內之賊見援賊全敗竊路宵遁卽於
二十六日克復太湖縣城餘賊竄入潛山併力抗拒
副都統多隆阿等督兵尾追距城數里賊衆悉行出
撲兵勇奮力迎擊賊遂大潰因馬隊截其歸路不敢
入城狂奔至青草隔被殲無數二十八日卽克復潛

山縣

楚南分軍援川

石逆受創於桂林賊勢雖衰擁衆尙十餘萬聲稱取

黔道入蜀四川將軍有鳳權總督事咨調湖南蕭啓
江一軍前往蕭道先奉曾侍郎檄以皖逆上犯移綏
就急率所部赴楚行至常德適有太湖之捷官大臣
曾侍郎乃飭折回不必來鄂時聞川省叙州土匪滋
事令由常德取道入川先勦土匪以保全完善之區
如石逆果至四川亦可就近堵勦

皖軍克復鳳陽府縣二城生擒捻首張元龍等

淮河上下爲捻匪盤踞與粵逆消息相通互爲援應
勝大臣濮城一挫軍威不能復振致廬州定遠久淪

賊中奉

旨飭赴河南督辦勦匪事宜皖省軍務

特派袁甲三爲

欽差大臣責令速殲醜類袁大臣遂督兵克復臨淮關圍

逼鳳陽屢獲大捷府城逆首鄧正明等潛來乞降正

月二十三日克復府城擒首張元龍先於勝大臣軍

前投誠仍踞縣城首鼠兩端陽降陰叛經袁大臣飭

總兵張得勝誘出擒縛凌遲處死竝獲僞丞相張先

等十四人卽時正法二十六日克復縣城

皖軍克白鑪橋

逆踞白鑪橋爲定遠聲勢屢撲官營均擊退正月二十四日翁巡撫用投誠圩民李林豐爲鄉導攻東北二圩內應獻出首逆二名圩壘悉平二十五日總兵鮑雲焄督馬步兵練進勦白鑪橋生擒髮逆二十餘逆勢漸蹙二十七日總兵慶端由壽州至派副將于昌麟都司袁祚烺韓殿甲副都統薩薩布游擊王懋勳參將馬升平等四路齊進悉平白鑪橋諸壘掩殺略盡進規定遠

楚南援皖軍克復建德縣

皖南之建德縣毗連江西在東流縣迤南久爲逆匪
占踞九年十二月楚南官軍由江西進勦屢勝逆堅
伏不出是年正月前廣東南韶連道吳坤修總兵普
承堯分路直薄城根斬擒極多二十三日吳道偵賊
將遁約諸軍合力驟攻兵勇緣城而上立將縣城克
復賊衆竄馬田哨官高得勝等中路邀擊刃悍賊數
名竝刺斃黃衣賊目餘匪驚潰由九都遁去
逆陷安徽涇縣旌德縣

張京堂督辦皖南軍務克復婺源縣後逆衆仍於皖南竄擾屢擊獲勝九年冬竄踞涇縣之黃柏嶺灣灘等處經官軍擊退是月二十五日大隊進撲縣城副將楊名聲知府陳炳元督戰斬逆首偽副天燕賴汶禾賊黨四面衝至遂陷涇縣二十六日旌德亦相繼失守張京堂力保徽郡飛調江長貴一軍援勦

石逆竄擾廣東界

石逆自桂林解圍後竄踞慶遠府城復分股由富川縣境竄入廣東撲連山廳兵勇奮擊獲勝生擒僞先

鋒范亞侗副將恒通亦敗賊於三江寨令鄉團沿路
邀截生擒老賊五名餘匪回竄湖南是年正月復由
湖南藍山桂陽輾轉至廣東樂昌仁化始興等縣皆
爲兵勇擊敗正月二十三日又擾及南雄州屬之百
順司副將哈芬布擊走之殲賊四五百名

二月江南軍克復上下關焚逆巢壘

金陵上關濱江有壽德洲下關濱江有七里洲久爲
賊踞官軍旣破九洑洲老巢和大臣張總統定議招
降以解散賊黨申明大義諭令去逆就順壽德七里

二洲守營賊日秦禮國謝茂廷相率投誠願約期攻
上下兩關爲內應二月初三日張總統會諸路軍進
勦總兵熊天喜由七里洲寶塔橋平毀賊壘乘勢收
下關秦禮國亦從壽德洲轟礮內擊總兵劉季三率
官軍長驅直進斬馘無算上關亦復沿河以上諸逆
巢爲官軍痛勦逆連夜棄壘退守江東門是役也克
復重關平賊巢數十計獲大燹百餘戰船六十拔難
民男婦撫定脅從約五千餘人

江南軍擊退江浦逆

正月十四日江浦逆勢蹙結連瓜子山匪黨突出衆數千紛撲官營總兵張玉良分軍爲左右夾擊張總統聞警卽至從中路衝殺援賊大敗奪路而逃斬馘無數逆回保江浦

逆陷廣德州入浙江界

自涇縣陷後皖南諸郡縣震動二月初三日廣德州失守闌入浙江之安吉縣距杭城一百數十里羅巡撫遵殿乞援於曾侍郎時湘營勁旅悉派攻安慶而由徽赴浙約程必兩月餘緩不濟急合辭入請

上命欽差大臣和春兼辦浙江軍務提督張玉良總統援
浙諸軍撥兵馳往

擒匪竄陷清江浦

擒匪自咸豐四年十一月爲袁大臣在臨淮關督勦
後旋復四路竄擾以蒙城霍邱宿州壽州爲老巢於
江皖及山東河南四省恣意出沒本年正月已奉

旨以袁大臣勝大臣專勦安徽河南之匪復派都統德楞
額赴山東督辦三等侍衛哈勒洪阿副之以提督傅
振邦畱徐宿督辦總兵田在田副之俾各有專責時

擒匪均在老巢凡欲出擾傳僞令整行具名曰裝旂
臨行以賊馬前驅名曰邊馬邊馬所至大股隨之前
所擾害以未占城邑且與粵匪隔越故未悉紀此次
擾清江浦則爲粵匪所喉也粵匪將犯蘇杭豫結擒
首張落刑龔瞎子等使內擾清淮以分江皖兵力清
江爲河漕聚匯處居室器用踵事華富各擒首垂涎
非朝夕而自咸豐三年春辦理防堵經前楊河督以
增及接任河督庚長講求整飭屢勦擒匪土賊海寇
稱勁旅焉至是聞擒匪有裝旂信庚河督卽撥兵勇

出防於上游三十里之順清河河通南北運道有險
可憑正月二十八日邊馬驟至河標中營都司德興
欺賊少因初春水涸河底不深恃勇率衆梟水迎擊
邊馬疾退須臾大隊擁至德都司等不能敵復梟水
退歸賊馬亂流追襲兵勇潰散二月初一日捻衆由
吳家墩至庚河督退保淮城致清江浦失守運使銜
淮海道吳葆晉陣亡署宿南通判沈鴻罵賊被害捻
匪踞浦擄掠分股撲淮城庚河督會署漕運總督布
政使聯英率在城文武及邑紳中書丁晏等登陣守

樂賊不敢攻邊馬順運河西隄薄寶應而下今安徽
喬巡撫松年時以兩淮運使署江甯布政使總辦江
北糧臺駐邵伯咨撥兵勇扼守運河兩岸防下竄奏
派候補知府署泰州運判杜文瀾馳赴鹽城守天妃
廟以防下河後路署淮揚道朱善張撥礮船由運河
上堵袁大臣派候補道張學醇副都統克蒙額統帶
馬步馳援傅提督派總兵田在田由安東北路繞道
至庚河督亦督江南援軍會勦各路奮勇殺入尸徧
衢巷賊衆驚潰由埔口奪路狂奔遂於二月十二日

克復清江田在田克蒙額等躡縱西追十四十五等
日敗賊於桃源縣及倉家集匪竄宿遷睢甯意圖兩
路歸巢均經官軍擊退奔竄邳州復經傅提督等設
伏親勦斃賊三千餘名生擒一百八十餘名其潰散
之賊百十成羣多爲各路兵勇所殲

皖軍大捷於滁州克復全椒縣

參將李世忠守滁州逆糾黨萬餘自全椒往襲圍東
西北三門城外築堅壘十三座爲久困計二月十七
日李世忠商同知州李元忠乘賊壘未固督敢死士

出擊逆伏匿不出統兵官朱元與自三界石壩至協
援副都統銜全福亦領馬隊先一日至商定合兵埽
盪乘夜銜枚疾趨激火箭焚燒賊壘朱元與等踴躍
爭先刀矛齊刺逆衆敗奔追至烏衣巷前後抄勒生
擒殲斃無脫者腰舖小店諸逆壘平毀悉盡二十二
日世忠督諸將攻全椒城約投誠日唐得華爲內應
火起我軍奪門而進立復椒縣城

浙江杭州省城失守巡撫羅遵殿等死之

逆匪由廣德州竄安吉道武康直撲杭州援軍未至

守陴兵寥寥二月二十七日逆衆在清波門暗掘地道轟塌城垣三十餘丈滿營官兵接仗衆寡不敵以致省城失陷巡撫羅遵殿署布政使王友端署鹽運使繆梓杭嘉湖道葉莖杭州府知府馬昂霄仁和縣知縣李福謙均殉難在籍辦團兵部右侍郎戴熙城陷後從容盡節官紳殉者極多杭州駐防瑞將軍昌與副都統來存勒兵堅守滿城鏖戰六晝夜得援軍

解圍

三月提督張玉良克復杭州省城

張提督玉良總統浙軍馳援三月初二日由湖州抵大關遣從九品徐殿臣改裝進城密約瑞將軍接應初三日大軍至杭州派守備王玉林攻毀武林門錢塘門外各賊壘參將張應祿勦昭慶寺逆黨令守備龔占釐等伏居艮山門外民房樓上張提督聞城中礮聲大震知瑞將軍已出營勦賊遂督親軍攻艮山門張應祿由右路游擊蘇如松由中路併力薄城縣丞呂調陽率鄉團肩長梯倚牆而立兵勇緣梯齊登守陣賊拋擲磚石抗阻伏兵從房樓突出支板爲梁

躍上城梁斬長髮賊數十大軍破艮山門而人瑞將
軍會副都統來存亦自滿城出隊殺退校場悍賊開
武林門納師各逆匪亡命巷戰殲斃以數千計復追
勦於獅虎橋城隍山餘逆倉皇竄出遂於是日戌刻
克復省城初四日復追殺於萬松嶺橫山等處敗匪
向餘杭而遁

皖南軍克復績溪縣

績溪踞逆進撲徽州府副將余永椿分路迎勦至佛
嶺爲另股賊橫截幸參將袁國祥文生江濤守備張

泰忠等策應振旅而還三月初八日賊復由牂頭撲
郡城張京堂芾督總兵江長貴先後進兵逆匪傾巢
而至知府劉兆璜催集鄉練助戰馬隊亦繞出山徑
會合夾擊賊勢少卻官軍趁勢搶渡浮橋都司江長
太奮斬僞企天侯鄧傳意生擒十餘名梟首三十三
級賊衆大潰追奔四十里遂於十二日夜密派隊伍
進攻績溪縣逆迎拒受剗棄城逃竄兵練追出羣嶺
收復縣城

皖軍擊賊於舒城桐城援逆敗走

逆首陳玉成由江浦六合援潛山太湖圍撲六安州
壽州翁巡撫飭副將盧又能等迎戰擊走之舒城亦
屢戰獲捷二月二十日知縣甘文瀾督勇丁薄賊頭
營賊拒守不出勇丁繞營後突起躍濠斃賊數十縱
火焚次營燒賊房多間餘賊潰遁同時北路官軍及
桐城東鄉練勇擊賊於破岡烏金渡等處燬其營壘
斬獲極多三月初八日桐城在籍知州毓長庚齊集
練勇會水師駛往大龍潭俟賊半渡出擊之覆逆艇
無數生擒八十餘名已渡河賊衆亦爲外委裴人傑

擊敗斃賊二百餘名斬逆目洪球琳楊國宗

江南援浙軍克復長興縣

浙逆竄出省垣屢爲官軍追敗羣賊氣沮杭州屬之
臨安縣湖州屬之孝豐縣於初八十四等日克復逆
大股踞長興縣二月十五日和大臣所派總兵熊天
喜曾秉忠分水陸路其規復長興熊天喜督步隊與
參將劉熙賢由湖州至立毀虹星橋兩逆壘而進知
縣徐之鑑領民團萬餘助官軍與賊相持曾秉忠已
帶長龍船由太湖夾浦駛入包洋河合陸兵夾攻長

龍船從山泰門水關攻入民團追賊尾入卽於是日克復長興縣餘匪紛潰

閏三月江浙軍克復廣德州金壇解圍

官軍防守建平東壩已閱數年三月十八日廣德逆匪進撲建平與官軍晝夜鏖戰旋有浙西回竄之賊益以皖南江北新到諸匪紛至合圍衆寡不敵遂於二十一日失守東壩溧陽縣相繼竝陷圍金壇甚急閏三月初一日欲由厚圩犯常州兩江何總督桂清浙江王巡撫有齡遣總兵馬德昭會秉忠熊天喜副

將劉成元等分途迎勦逆悉衆抗拒馬德昭督鄉團
張兩翼夾擊截斷賊之首尾殲斃七八百名盡毀陽
漂準逆巢會秉忠白埠後兜圍斬獲無算劉成元亦
於閏三月初二日會練勇銜枚趨金壇轉戰皆捷城
圍以解其廣德踞逆自進犯建平後守賊無多總兵
熊天喜偵知乘其不備驟攻之逆潰走先於三月二
十八日克復廣德州

克復建平縣

廣德城既復飭已革總兵米興朝於西北路扼要紮

營以杜回竄復抽撥兵勇進攻建平署廣德州知州邵啓元督率團勇會同已革參將方國淮游擊田宗興先後前進分攻東南門轟塌城垛十餘處緣城而上官軍一擁齊入刃光所過積尸填街方國淮田宗興等追賊出西門復敗之於分水龍王廟追殺二十餘里遂於閏三月初二日克復建平縣

江南大營退駐丹陽

和大臣於上年添募壯勇增築長圍意謂克復金陵在指顧兵將志驕本年二月浙江告警派師出援存

營兵力漸薄值軍饑不繼擬每四十五日發一月之糧兵勇私布傳單心漸攜貳城逆糾合各處死黨先由後路竄踞句容縣遙相聯絡自閏三月初七日起紛撲大營總統張提督晝夜拒戰而賊來益衆勢漸不支十四日大雷雨酷寒一夜之間各營紛紛大起乃於十五日與和大臣等均退守丹陽收集潰兵以

圖後舉

楚軍援皖南會克太平旌德石埭三縣

三城接壤逆踞已久首尾相應援湖北派援浙江之

記名道蕭翰慶等督知府蘇式敬夾攻太平縣城中
內應舉發哨樓火起我軍乘勢奪門殲斃無數於閏
三月十三日克復縣城其總兵江長貴一軍率游擊
黃朝升都司黃占超等直薄旌德城亦同日克復二
城旣拔蕭道遂會合投誠義勇韋志俊等環攻石埭
縣十四日城逆夜出東門撲官營韋志俊率所部由
西門迎擊蕭道揮諸軍夾攻城中火突起營官唐仁
連已率衆登城殲斃不可勝計遂於十五日克復石
埭蓋三日間疊復三城云

皖南軍克復涇縣

官軍連克旌德等三縣涇縣逆膽已寒猶負岫固守
張京堂會同總統周天受進勦令參將文芳等紮三
溪副將吳再升等紮琴溪江總兵長貴由茹蔭司溪
里進擊毀白華晏公堂一路賊壘直抵城下而副將
陳太富與吳再升等先以馬隊攻克赤灘游擊田應
科亦涉河擊賊獲勝閏三月二十二日諸軍齊集涇
縣城下甯國府知府顏培文帶兵勇踵至江總兵督
率進攻轟斃守陴賊目斬關直入逆黨出西南門分

兩路奔竄知縣劉西園率團掩殺斃賊二百餘名立將涇縣克復其由蘭山嶺等處竄出者亦經知府蘇式敬等截殺無算

江南水師攻克礮磯逆巢

礮磯在蕪湖對岸爲逆老巢與蕪湖之賊聯絡拒守江南水師總兵吳全美帶知州毓長庚督率團練水陸齊進先是從九品殷建中文生陳日煊奉檄招撫逆目陳芸桂率衆投誠爲前驅是月二十四至二十八日連破逆壘六座斃匪千餘人遂克之

金陵逆匪竄陷丹陽幫辦軍務提督張國樑陣亡常州
被圍和大臣以陣傷疾發卒於軍

大軍退屯丹陽後溧陽宜興同時失陷逆匪進圍丹
陽初猶憚張提督聲威不敢近逼徧築土壘爲步步
結營計令點賊潛入大營中伺提督出戰自後狙擊
之受創甚猶血戰刃數賊躍馬入丹陽河而死張提
督初名嘉祥廣東嘉應州人在粵頗不逞後率所部
於南甯鎮投誠時頗有疑之者廣西巡撫周天爵知
其忠勇保護甚至繼隨向提督轉戰數省所向無敵

山偏裨擢升提督幫辦江南軍務東南半壁倚如長
城及其死丹陽遂陷和大臣突圍而出賊衆進逼常
州和大臣聚潰兵迎敵胸前重受槍傷衝圍退至滄
聖關火毒內陷嘔血而死營務處湖北提督王浚壽
春鎮總兵熊天喜先於丹陽五里亭外分翼迎戰賊
乘霧冒官軍旂幟數道竄王浚中槍墜馬殞命熊
天喜馳救持短兵殺賊甚厲亦力竭捐軀

四月逆竄揚州大軍擊卻之

天長六合之逆乘金陵大營退守分三路進犯一由

陳家集圍場城一由東溝窺瓜州一由僧道橋編筏
偷渡襲邵伯李提督若珠調上游礮船副將王萬青
駛邵伯湖堵勦派參將詹啓綸帶馬隊從三汊河抄
擊皆擒斬多名賊不敢進乃築壘僧道橋設木城圍
久踞詹啓綸復由黃珏橋中路直搗逆巢右路副都
統海全出楊獸壩左路副將劉成元出陳家集疾趨
會攻逆出衆五六千人迎戰詹啓綸輕騎陷陣盪決
無前毀逆壘兩座將木城焚燒積尸枕藉生擒長髮
賊四百餘名逆衆合股退踞陳家集

蘇州省城失守巡撫徐有王死之

蘇省東南財賦區以常州爲屏蔽歲輸金數百萬充餉或豐六年四月大營潰向大臣力障常州蘇州得保及是羣逆圍竄常州何總督桂清遽率司道退保蘇州徐巡撫不納乃以照料糧臺爲言退往常熟常州城遂於四月初六日失守蘇州藩籬盡撤守兵不滿四千脆弱不習戰徐巡撫激厲拊循強爲支拄令張提督玉良守高橋扼賊衝三戰皆捷危城少安逆分股間道繞出九龍山壓高橋背師潰玉良率敗卒

人省城逆衆追蹤至號稱數十萬城中大亂敗卒應
之遂於十三日失陷徐巡撫遇害妾施氏次子候選
郎中徐震翼族弟徐曾庾幕友候選布理問鮑鄂銜
家丁楊安等從死署按察使糧道朱鈞投井殉蘇州
府教授張鏡溇死之布政使薛煥先由常州派駐上
海署布政使蔡映斗長洲縣知縣李瀚文元和縣知
縣馮樹勳吳縣知縣沈偉田城陷後逃出均奉
旨逮問署蘇州府知府吳雲先期奉巡撫委劄持令赴上
海南借援師得免於難

常熟縣知縣周沐潤督練克復江陰縣

逆匪蟻集蘇城恣意擄掠附近民競相圍練爲自保計以永昌徐氏爲最常熟縣知縣周沐潤躬親勸諭願聽指揮者遐邇景從江陰與常熟接壤慨然以殺賊自任得沙勇千餘會集各鄉堡練丁旣保常熟遂進勦江陰率練首黃元昌嚴康保等屢戰獲捷斃賊逾千生擒守城逆首餘匪潰散於四月十九日克復

江陰縣城

江皖援浙軍克復淳安縣逆黨入徽州境

浙省以次克復諸城時皖南江西援軍尙駐界上遂會勦涇安四月二十一日總兵饒廷選知府彭斯舉分城薄城副將王夢麟亦奉檄率所部兵來會逆勢不支出北門由靈溪竄徽州南鄉之山陽坑官軍遂於二十二日收復涇安縣張副都御史飭王夢麟回皖與已革副將羅承勳合軍追捕大敗山陽坑竄黨隨遁入績溪同知羅仲山守備汪勝又敗之於陽溪十里巖等處民團亦響應助勦旌德縣知縣李焜同在籍翰林院侍讀呂錦文亦迎擊於縣屬之白沙敗

之餘匪踰黃華嶺至太平縣境

浙江嘉興府失守

浙師方圖上游克復溧安縣不圖蘇省失守後逆衆陷吳江直往南竄由王江涇水陸竝進四月十六日嘉興府失守張提督玉良於蘇州衝出率潰兵赴杭王巡撫有齡籌備饟需商令整飭舊部馳往嘉興以勦爲防藉作省城屏蔽

楚軍水陸敗逆於樅陽平其僞城

逆踞池州以殷家匯爲犄角而精銳悉聚於樅陽復

築僞城堅甚楊提督彭玉麟遣投誠之都司韋志俊
率步騎由青陽進窺殷家匯而自統水營總兵李成
謀參將劉德亮駛舳舫板船進兩道夾攻盪毀逆壘斃
賊一千有奇生擒僞承天福逆目等一百三十七名
旣平殷家匯進攻池州平城外四門賊寨獲逆艇八
逆悉衆人城固守不敢出遂飭水陸軍乘夜渡江襲
樅陽江蘇候補知州毓長庚帶領桐城練勇來會遂
圍僞城城逆僞連天福萬宗勝窮蹙投誠韋志俊入
城受其降尋察萬宗勝有異志誅之僞城遂平池州

逆始孤立

廣西軍克復慶遠府

石逆既攻陷慶遠竝擾平樂思恩河池等處餘匪紛竄湖南廣東界蔓延滋甚惟慶遠爲逆首踞劉巡撫長伯遣前布政使降補道員蔣益澧擊賊晝眉嶺殲斃二三千名生擒數百名逆目陳金釭屯聚沙田蔣益澧督參將陳友勝抄截獲捷平樂昭平以次肅清復分途痛勦思恩河池翦除略盡慶遠逆聞風震恐知府榮林率勇練由西路進知縣况逢春由北路進

轉戰追逃斬獲無算四月十九日會集慶遠城城逆
開南門遁去追殺數十里殲擒多名卽於是日收復
郡城逆先曾分股攻撲百色廳爲右江鎮總兵富順
百色廳同知陶兆恩迎擊斬悍目僞國宗石達德等
逆衆敗走關入泗城府境凌雲縣知縣余萼銜等堵
勦又竄思恩府經知府徐引督民團力戰卻之

廣東軍勦逆清遠縣屢戰皆捷

竄逆分擾樂昌南雄等州縣爲官軍擊走齧集清遠
縣四出恣掠徧擾英德陽山境韶州府知府段詰會

都司方輝鍾南俊督兵勇前勦四月十四日逆衆糾
合萬餘人由圓仔墳等處分路抄襲我軍三路迎戰
斃賊無數十五十六等日將蛇灣水車岡等處巢穴
蹋平逆復由廣甯竄入白芒我軍奮勇追捕所至披
靡肅清清遠諸邊界

逆入貴州界連陷廣順永甯州

逆黨由廣西西隆州竄入貴州境分擾興義貞豐歸
化諸州縣廳所在兵勇鄉練竭力堵禦匪黨往來無
停趾徑撲廣順州知州史悠漢帶練丁迎擊逆由間

道抄官軍後尉入州城總兵巴揚阿由廣興鎮進勦
史悠漢亦集鄉團隨同助勢立復州城逆敗走復竄
陷永甯州州附近省垣糾苗匪合撲水田壩官營劉
巡撫源灝檄鎮遠鎮總兵趙德昌馳援連戰皆捷

貴州軍敗逆於甕溪

逆聲勢猖獗所過悉受其塗炭大衆踞石阡府屬之
潮添碼等處由提督興恕遣副將沈宏富由龍潭進
勦四月初三日擊賊六井山毀逆壘二十一座斬僞
先鋒二十八名斃賊一千有奇逆首悉衆撲甕溪官

營初七日宏富會副將劉吉三周學桂設伏槍杆劫誘賊深入四面兜圍學桂冒險衝突刺斃其督戰逆首生擒偽將軍二十七名餘黨瓦解

曾侍郎加尙書銜署兩江總督督辦江南軍務

侍郎入川未果督兵江皖是月蘇州失陷何總督桂清褫職逮問

命新任江蘇薛巡撫煥暫權督篆以曾侍郎素著聲威不避艱險

特命署理兩江總督時在江皖因破賊必據上游應以江

楚爲根本逐節進兵乃商調總兵鮑超靈字營七千人朱品隆所部三千人竝令左京堂宗棠添募湘勇四營訓練成軍以資進勦

楚軍援浙道員蕭翰慶至湖州陣亡

鹽運使銜道員蕭翰慶自咸豐三年隨彭侍郎水師轉戰數省九年由江西調援湖南本年由官大臣胡巡撫派帶訓字營竝韋志俊之軍六千餘人援浙行至皖南爲張副都御史芾畱攻太平等縣三月內連克太平石埭二縣馳援常州行至中途因浙江長興

失守湖州被圍卽馳湖郡四月二十日至距湖州二十里之同心橋遇大股逆匪兜圍蕭翰慶困人垓心力戰陣亡都司李斌彪等亦同時受害守備銜千總李楚材等力戰衝出至湖州城下收集三千餘人奮勉殺賊立解重圍

五月江蘇軍克復嘉定縣太倉州城

蘇常陷後餘匪紛踞各城邑薛巡撫煥總統蘇軍督勇行抵南翔聞嘉定太倉失守於五月初五日遣知縣陳壽溫綸等先勦嘉定自西門進攻逆以馬隊衝

營爲我軍擊退各民團持械助戰一鼓克復嘉定縣
其太倉州城亦同日攻克敗匪竄崑山新陽
賊撲滁州皖軍擊走之

逆匪屢圖滁州均經擊退銜憤愈切糾合和州含山
諸逆黨驟至總兵李世忠派參將蔣立功等分門出
擊殲賊極多五月初三日賊於西南門築壘九座副
都統銜全福督兵攻毀又連壘三十座於七里岡我
軍更番血戰三晝夜至初十日盪埽悉盡斃賊二千
餘名生擒三百餘名餘圍立解逆之分撲全椒者爲

代理知縣陳炳等敗之於赤鎮焚殲無數

貴州軍克復永甯州旋陷歸化廳

上月州城陷總兵趙德昌馳援屢捷劉巡撫源灝復遣記名道署安順府知府周夔參將全興督兵出關嶺助勦生擒長髮賊四十四名進攻象鼻嶺逆匪敗退大軍薄城下鼓勇登城斬馘無算州城立復另股逆衆於五月十二日分陷歸化廳我軍於收復永甯後進紮距歸化五里之連升關逆衆大股圍襲致周夔全興力戰陣亡

湖州團勇敗賊於平望盡毀賊壘

平望巨鎮爲浙江之嘉興湖州江蘇之吳江總匯處賊踞之沿河六里橋梅堰等處編築堅壘密釘排樅扼險以阻江浙之路湖州在籍道員趙景賢督率團勇修造礮船槍船進勦沿河賊壘五月二十二日親統光澤營都司李桂材同知蔣羅筮廩生李調元等分途往一由鶯脰湖一由六里橋逆出四五千衆兩路迎拒水陸軍槍礮齊轟賊不能支紛紛潰退斃逆目三名餘匪二百餘名趙景賢復添調楚軍之在

近界者會攻平望其湖州之南潯雙林晟舍等鎮鄉團亦合衆助力悉受調度二十五日夜趙景賢密爲布置由鶯脰湖畫眉橋進兵令李桂林從東路攻賊卡李調元從西路撲賊濠以必破爲期東路先捷羣賊自相踐蹋逆尸橫道西路李調元亦踰濠冒矢石躍而登壘逆衆驚潰遂克復平望會軍於米市湖盡毀逆礮臺巢穴賊黨紛竄進圖嘉興

江蘇軍克復松江府

府城旣陷逆遣其黨出巢圖窺上海薛巡撫煥飭候

補道張景渠直隸州州同應寶時督率兵團於五月
二十七日乘其不備直擣南門轟斃守陣賊數十名
逆衆惶懼應寶時破南門而入斃黃衣賊目十三名
長髮賊千餘名奪獲大小船七十餘隻械幟無數當
將府城克復餘匪捕戮淨盡自松江至上海沿途團
練咸能奮勇立功先出巢者悉爲截殺

楚南援軍克復廣西賀縣

逆目陳金釘哨聚慶遠府之沙田叻石逆聲勢上月
爲廣西官軍擊敗退踞賀縣劉道嶽昭奉湖南駱巡

撫檄援廣西約會前布政使蔣益澧合兵勦賀縣用
投誠目包禮安爲鄉導攻蓮塘克之渡河勦河東街
悍賊殲斬無遺逆衆自東塔來援我軍分兩路夾擊
大勝乘夜追逼賊衆從浮橋潰竄進復縣城

六月江南軍敗逆黨於橋頭

時大營潰軍未集鎮揚上下皆爲逆蹤往來六月十
六日自鎮江西路竄橋頭增設卡壘分擾泥山湯岡
等處江甯將軍巴棟阿飭副將馮日坤由中路炭渚
進副將陶茂森由南路山梁進副將賴鎮海駕師船

拒橋頭險塞水陸軍剋期會攻兼令總兵馮子材督
勁旅爲諸軍策應十七日合兵鏖戰自寅至午斬逆
目二名擒獲極多橋頭炭渚諸逆壘一律燬平追殺
七十餘里

曾大臣駐軍祁門

曾尙書署兩江總督徵集兵勇部署峻整六月十一
日渡江進紮祁門以固吳會人心兼壯徽甯聲勢是
月奉

特旨實授兩江總督並

授爲

欽差大臣督辦江南軍務時張副都御史芾駐軍徽州久
無成效奉

召入都院南軍務統歸曾大臣督辦周提督天受聽調遣
曾大臣請以浙江溫處道李元度調補安徽甯池太
廣道以重徽防而聯軍勢

浙江軍克復餘杭臨安縣城

逆匪竄踞餘杭臨安直逼杭州省城瑞將軍遣總兵
劉季三督兵前勦復獎勵民團以同仇敵愾相勸勉

守望計六月二十二日劉季三等攻餘杭燬賊壘
數座進薄東南門後隊自西路抵城根登梯而上大
軍鼓譟以入逆遂驚走盪餘匪一空乘勝平臨安縣
之青山頭逆壘逆援衆大至我軍奮力衝殺民團亦
齊力助戰聲震山谷逆衆退保臨安二十九日復環
攻縣城克之同時富陽新城昌化於潛諸逆蹤所至
者皆爲民團擊敗始不敢恣意肆掠

皖南逆窟陷廣德州

浙江逆衆出擾皖南屢受懲創由孝豐竄犯廣德州

是時皖南軍赴甯國府解圍壘破賊壘三十餘座揮
軍轉戰城南七壘亦盪平正得手間警報忽至未及
回戈而廣德陷矣方逆入廣德州界江提督長貴已
革總兵米興朝登陴督戰手刃多賊以援師未至遂
至失陷江提督衝圍出退保四安鎮

2
人
目
家
目
ノ
ハ
ハ

1001

平定粵匪紀略卷十

咸豐十年七月江南英圍金壇縣守城力竭失陷知縣李淮參將周天孚等死之

是時金壇被圍已數月矣參將周天孚艾得勝會同知縣李淮激勵紳民協力堅守屢馳書乞援於鎮江巴將軍棟阿派令總兵馮子材等前往解圍爲丹陽逆黨所阻兵不能進乃力攻丹陽連奪賊卡三逆壘一逆衆迎戰都司黃才貴怒馬突陣斬黃衣賊目二名馮子材督大軍抄擊乘勝直薄丹陽城下匪黨退

入固守不敢復出金壇路通急遣副將向奎統勁旅
星夜馳往未至已於七月十六日以力竭失守周天
李芟得勝等均殉難僅衝出兵勇七百餘人分隸鎮
揚各標下

江南上海縣解圍

逆黨自青浦松江窺伺上海七月初四日四面合圍
悉力攻撲勢極嗚張時薛巡撫駐上海親統文武兵
勇等堵禦蘇松大道吳煦屢擊有功賊勢少卻助逆
匪黨復有萬餘自東而西繞越來撲亦經兵勇擊退

賊衆轉趨北門練董候選道楊坊等率甯波義勇迎
頭截擊殺斃無數逆黨復合衆進圍署按察使道員
江清驥憑雉堞開礮斃附城悍賊數名逆始敗退西
奔追斬二百餘生擒七十有奇西門之逆氛盡埽初
五日復分十餘隊犯西南兩門我軍乘勝痛勦匪衆
不支初八日擊衆遁去

江南水師擊敗丹陽逆

七月二十一日丹陽逆糾黨六七千衆由辛豐等處
分途撲我水師意圖北渡竝沿河築壘於土山設礮

轟擊總兵周希濂派營官馬成林等嚴防東西岸飭
水師乘煙霧迷漫中輪隊架礮對擊逆衆應聲倒斃
不計其數遂掩旂遁回丹陽我軍登岸尾追殲擒甚
夥其小河口賊船十餘隻詐稱投遞公文逕撲艇船
亦爲我軍擊退

八月徽州府失守

皖南逆陷廣德州移由湖樂鎮竄叢山關直犯徽州
府皖南道李元度甫奉調補率兵勇三千抵徽界聞
警卽由績溪馳入府城逆前隊已至八月十九日出

城分兩路迎擊斃賊百餘名時張道運蘭亦敗逆於
楊溪斃賊馬數十匹悍賊千餘二十四日逆大隊齊
逼城下李元度親出督戰奮勇進追斬馘數百伏賊
自嶺後出抄我軍兩翼李元度急收軍入城保守賊
乘夜專攻北門李元度身臥城頭力堵一晝夜二十
五日賊伏民房燃槍飛礮子入城中守陣弁兵不能
立腳城遂失陷

廣西軍敗賊於興安縣鬱林州北流縣

石逆達開自慶遠潰走尙擁衆數萬竄往武緣縣六

月初糾潯州容縣諸匪黨攻圍鬱林州及北流縣又遣匪黨撲興安已經知縣榮志督城守弁蔣顯敷擊走八月初四日復回竄薄城榮志等出城迎敵賊衆自間道入蔣顯敷裏創力戰而死榮志亦受傷墜馬適副將鄔世堂督軍至奮力接戰賊敗走乘勝追北殲擒數千名城池復完而左江道吳德徵亦同時擊武緣斃賊萬餘鬱林北流爲兩粵要地知州鄒德純督兵勇固守五十餘日博白縣知縣王達材陸川縣知縣覃遠璉馳援北流圍始解

都將軍由楚帶隊赴揚州督辦江北軍務

督辦江北軍務提督李若珠忽患痺症不能軍奏

旨以荊州將軍都興阿督帶馬步迅赴揚州六合擇要駐紮督辦江北軍務都將軍帶原撥馬隊四百餘員名挑選楚軍英字選鋒各營步隊一千一百餘名於八月十九日自鄂起程取道英霍六壽赴揚旋於九月內聞京師夷務戒嚴官大臣請以都將軍馬步改道赴僧王大營以備攻勦竝與曾大臣胡巡撫各請提兵入衛因撫局就緒未果行都將軍仍赴江北

身目第...
九月逆圍壽州皖軍擊走之

陳逆王成率悍賊二十餘萬圍取壽州由東淝河跨
山越谷盤行抵淮河南岸聯營楸比餘黨竄入姚家
灣擄船欲水陸會攻翁巡撫同書登城相度形勢豫
爲布置派都司彭楚文守備黃慶仁統帶礮船駛飛
漿沿河截擊而自督總兵慶瑞副將黃鳴鐸堵禦策
應彭楚文至姚家灣奪賊船十餘衆賊乘霧泗水入
小港亦爲黃慶仁圍殺逆水路旣不能逞志遣步騎
撲北關城上疊發大礮賊衆披靡折回兩河口紮筏

坐二千餘人復圍捨渡黃鳴鐸募敢死士數百人直前轟其後墜水溺斃者無算是夜密令水勇梟登山麓縱火焚燒逆壘多燼逆亦遣衆乘黑夜涉淺水襲城僉斃於槍礮木石逆衆潰退追斬極多生擒僞總制檢點等數十名城圍遂解

皖南逆陷甯國府前提督周天受皖南道福咸等死之賊陷徽州府之前已分股攻甯國府周提督天受偕皖南道福咸誓以死守至七十餘日糧盡援絕遂至失陷周提督福道與巷戰遇害周提督之弟天培上

年 在河北堵賊死本年七月金壇之陷其弟天孚亦
守城亡兄弟三人先後殉節事聞

詔於原籍四川省及本縣建祠祀三人另於甯國府建周
提督專祠以道府縣及竹塘營殉節之袁州副將朱
景山等從祀焉

浙江嚴州府失陷

浙省經瑞將軍昌王巡撫有齡會籌攻勦軍務漸平
九月初六七等日徽州大股逆衆由淳安下竄窺伺
嚴州副將周萬遠知府松海等帶隊出戰逆衆兜裏

突圍出而城陷署副將封九貴手刃逆首一名破賊
四面圍困力竭陣亡

通州兵民渡江克復江陰縣

初逆之竄踞蘇城也竝時城陷者以數十惟昭文常
熟以民團齊心奮力保守竝越境克復江陰嗣江陰
復陷於賊常昭二縣亦自保不暇矣江陰居大江尾
閭狼山對岸逆匪踞之以窺伺江北日有警報人心
皇然署通州知州張富年率靖江縣知縣齊在鎔都
司龔致福等統帶兵勇及沿江民團渡江攻勦先將

江陰內河賊船轟燬竝奪獲城外礮臺初四日
攻東門斬關直入盡殲逆黨立復縣城

十月上海軍敗賊於金山縣等處

蘇州之賊分股撲金山縣之楓涇鎮薛署督飭總兵
會秉忠督長龍礮船截擊分遣守備楊貴福會同金
山縣知縣周紹濂於十月十五日由陸路併力合勦
斬悍賊甚多收復楓涇鎮逆等復糾蘇常大股襲廣
富林圖犯松江時副將向奎等率水陸軍守廣富林
以衆寡不敵潰散適曾總兵自楓涇鎮收隊回泊越

王廟聞警馳援初六七日分三路進攻逆黨又敗竄
寶山縣之羅店鎮爲都司姜德設伏擊卻之

楚軍水師間道援南陵縣救拔難民數十萬

皖南賊熾自陷甯國金壇與金陵逆勢聯爲一氣南
陵縣孤懸賊中總兵陳大富竭力守禦援糧並絕勢
難自全福建水師楊提督載福統舟師於江皖間欲
援無路值連旬秋雨江水急漲小港皆可行舟探得
南陵北門外一港可達魯港水程約百餘里而近城
賊壘極多惟右邊沿港有一線小路非陸兵相輔不

得進乃就近調樅陽守兵千總尹昌景韋以琳兩營
隨同前進揚言攻無湖十月初二日次魯港派總兵
李成謀紮港口以遏蕪湖上竄之賊於峩橋小河窰
等處步步爲營初四日水陸竝進港左壘賊出撲丁
副將泗濱等奮力衝突將左壘焚燬尹昌景等沿岸
進擊亦破其港右壘陳大富知援軍已至自內衝出
盡埽東南西三面之壘城圍立解拔出全軍百姓從
者十餘萬同赴上游江邊駐紮

逆犯杭州官軍擊敗之進收餘杭城

先是逆陷富陽縣瑞將軍寺遣兵馳勦立復其城逆
復糾集臨安黨衆攻餘杭陷之逕撲杭州省城官軍
出城迎戰副都統傑純協領瑞慶副將吳再升等擊
賊於觀音橋傑純手刃執旂賊目數名逆衆敗退十
月十四日分兩隊來撲副將文瑞派隊迎敵立斃悍
賊西湖水勇及文瑞礮船勇登岸迎抄後隊翻山之
賊殲斃無數署布政使麟趾爲諸軍策應亦屢戰有
功十五日文瑞由寶樹塔進襲賊壘逆死拒不退傑
純吳再升等揮戈陷陣斬黃衣賊目二名左右馳驟

賊勢披靡尸骸徧野十六日官軍乘勢追殺數十里
直至餘杭逆黨潰走立復縣城

廣東軍越境解江西安遠縣圍

廣東南雄州踞逆於八月十三日竄江西攻安遠縣
連營六十里廣東都司方耀等督兵勇由南雄追勦
駐安遠縣之龍頭墟升任浙江布政使林福祥署總
兵阿隆阿督江西大軍會合粵軍於九月十四十七
二十七日三次進攻斃賊多名十月初三四等日
各營大隊痛勦焚燬水口塞古田等處賊壘六十餘

座殺賊二千餘名生擒一百三十二名城圍始解

清江防兵敗賊於三河

定遠之逆由盱眙山路北竄麇集洪澤湖濱之三河
十月初四日由龍岡馬壩一帶直逼湖岸意圖搶渡
經王漕督夢齡所派清江兵勇架大礮轟擊竝於下
游淺水處施放火器堵截斃賊千餘賊不得渡是月
十八日復領衆數萬撲進我軍竭力攻擊斃賊無數
向東南竄去其分股撲犯蘄陽黎城等鎮之賊亦爲
我軍擊敗沈擄船偷渡賊五六十名餘匪全遁

曾大臣兵勇攻休甯壘勝進復黟縣

曾大臣駐軍祁門飭令霆營總兵鮑超湘營張道運
蘭會攻休甯九月內屢戰獲勝十月初二日鮑總兵
移營西館張道亦移營於迪祥湖距城各止十餘里
初四日賊由榔市撲營張運蘭派隊出擊陣斬偽將
軍汪懷忠徽州逆援休甯聚城東萬安街爲城逆犄
角十七日二營兵會齊出不意夾擊之殺賊千餘燬
城外壘二座偽侍王李侍賢在浙江嚴州派解火藥
大礮入城偽忠王李秀成亦自蕪湖率賊數萬來援

由羊棧嶺竄入黔縣游擊趙廷貴受傷黔防皆潰二十日鮑總兵張道遣副將宋國永帶隊迎勦會老湘營各勇奮力攻擊賊勢敗退迫入黔縣立將縣城克復次日復大戰於柏莊嶺斬偽檢點艾逆偽丞相吳桂先等李秀成受傷遁

浙江軍克復嚴州府壽昌縣

嚴州府城於上月爲逆竄踞糾合死黨意圖抄我軍後路經廣西提督張玉良揮兵進勦連戰三晝夜逆黨大受懲創猶嬰城死拒參將韓廷貴等分攻各門

守備陳永椿帶礮船登岸轟擊已革衢州鎮總兵李定泰首先登城兵勇踴躍隨上逆衆驚惶逃竄我軍乘勝追勦斃賊千餘奪旂幟無算遂於十月初八日克復府城其金華府所屬之壽昌縣兩次被賊竄擾經署金華府知府程兆綸派令兵勇民團進攻斃賊無數克復縣城

楚南軍克復綏甯東安城步三縣武岡州新甯縣解圍石逆達開壩衆欲由黔入川未果遣黨分竄湖南疊陷綏甯城步二縣綏甯縣知縣吳熊與第三子吳鏞

典史馬星恒署城步縣知縣安和均殉難武岡州新甯縣亦被賊攻圍甚急當經官軍擊退仍留悍賊屯踞武岡城外道員江忠義派游擊徐良埙等出城迎敵自率親兵爲策應兵勇爭先衝殺斃賊極多逆黨復乘夜負梯潛謀登城參將黃仁遺暗派兵勇下城奪獲長梯十餘架復經江忠義分道出擊窮追數十里殲斃七八百名生擒四百餘名武岡圍解新甯之賊則經道員江忠濬派營官李承立等會知縣徐白燧力戰解圍賊衆盡趨東安十月十六日陷其城知

縣趙榮祺與長子燕棠幕客胡琅笙吏目周炳勳訓
導肅國煦殉難江忠義卽率所部分三路進攻薄城
下逆遣衆繞道出營後抄襲督隊官陳希祥截擊之
賊大敗城逆由六埠頭逃去其綏甯城步二城踞賊
圖犯洪江經署靖州知州張士寬寶慶府同知何鍾
秀分路攻勦同於十月初八日克復

貴州軍勦青岩獲勝逆分黨陷長寨廳

石逆敗後遣黨竄踞定番廳撲青岩等處皆爲官軍
勦退十月二十一日復攻撲赤土長田各營亦經參

將王萬升等擊敗餘匪潛由間道襲長寨廳副將賈
連升等追抄失利以致廳城失陷同知劉宗元罵賊
而死

楚軍會勦桐城等處捻逆獲捷

楚軍銳志圖皖正月旣克太湖潛山胡巡撫駐皖督
辦以曾道國荃總統湘勇萬餘人圍安慶省安徽按
察使李續宜福州副都統多隆阿等攻桐城逆首陳
玉成勾捻首龔瞎子孫葵心等各率悍黨上竄桐城
縣之挂车河等處多隆阿於十月十四日列隊扼截

賊匪退往河東二十三日復率衆在望鶴墩增築營壘協領溫德勒克西等衝擊獲勝二十六至二十八等日賊由新安渡圍犯小松園官營多隆阿會同李續宜所帶湘勇分作八路列陣二十餘里副將王聯芳督兵衝殺立破棠梨山等處賊壘合兵竝進圍殺三時之久斃賊八九千名溺水死者二三千名生擒一千三百餘名解散脅從一萬三四千人餘匪竄逃其分股竄霍山之賊胡巡撫飭副將余際昌記名總兵成天吉等火攻夾擊破之賊衆退奔舒城

十一月浙江軍斷富陽浮橋

富陽初陷卽爲民團收復逆黨潛往江口搭浮橋數座以便上窺諸暨下竄甯紹兵勇出不意攻之大敗逆衆縱火將浮橋焚燬擊沈逆船無數江口肅清

會軍勦南贛竄逆獲勝克復德興婺源縣

逆黨自廣東韶州竄南贛圍逼建昌左京堂一軍先駐樂平聞警移駐景德鎮探聞南贛逆分黨由貴溪境過安仁有直撲饒景之勢派游擊王開琳等二營沿途迎勦十月二十一日行抵大田坂逆踞周坊及

丁家坊等處夜乘月亟擣之至鶴嶺距周坊僅三里
賊尙不知我軍之亟至也遂分三路翻山進勦適黨
逆紛至我軍奮力齊敗之遂奔高山竄陷德興縣左
京堂復派卽選道王開化督三營前往敗賊於楓樹
嶺十一月初一日收復縣城而安徽之婺源縣復陷
初三日我軍趨婺源遇擄糧賊於高沙陣斬悍賊百
餘乘勝力追進克其西北兩門逆衆由東南遁婺源
縣亦復

曾軍克復建德縣

時守建德者惟寶勇一軍總兵普承堯統之池州逆
撲犯官軍出戰小挫十一月初四日城陷曾大臣聞
警先派副將沈寶成往援知失守復添派副將唐義
訓統祁門各營與寶成合兵會勦至利涉口賊築壘
河洲列陣以待竝以馬隊扼拒各卡我軍分東西兩
路緣山上立破賊卡前軍夾擊河洲賊而後哨從山
上抄賊後賊敗至三里街唐義訓復分軍爲三自街
口及街左右進攻城賊及壘中之賊齊出死拒官軍
軍河南賊軍河北相持逾時有金盃騎馬賊中礮墜

地賊遂潰敗入城朱聲隆等由南門尾追而入賊出東門逃逸收復縣城其河洲壘賊搜殺略盡賊撲湖口水陸各軍擊退克復都昌縣

建德失陷寶勇潰散賊卽長驅深入官軍與賊所必爭者莫如湖口縣曾大臣先派記名道吳坤修帶團防營千餘人馳守彭道玉麟亦遣前營都司胡友勝隨同楊提督水師會勦而檄左營副將成發翔後營都司丁義方迅赴湖口協助十一月十二日賊撲彭澤縣爲水師擊退卽率大股上竄馬影橋距湖口縣

僅十五里丁義方等先至湖口截留寶營潰勇選精壯者五百人登陣守禦正慮兵單適吳道率圍防營至彭道亦自黃石磯來援同日入城十三日馬影橋之賊直撲各門諸軍並力擊退城南門爲水浸塌數丈修築未成賊乘之昇長梯鼓譟而上我水師登陣助戰砍斃登城賊數百人開城追殺奪長梯三百餘架十四日諜知賊欲乘夜復來攻撲時寒雨連夕陰風怒號江濤洶洞有聲鎗影慘澹彭道躬巡城堞戒勉慰勞兵勇雨立城頭一無懈色至天明偵知賊已

符迺竄入都昌縣卽調成發翔礮船赴援十五日駛
至都昌縣擊退踞賊收復縣城

賊踞羊棧嶺圖犯祁門曾軍連戰卻之

僞忠王李秀成前自羊棧嶺進犯黟縣竄敗後猶復
窟踞羊棧嶺圖伺隙犯祁門曾大臣飭參將楊鎮魁
游擊蔣信玉統禮字前後兩營協同參將張應超之
百勝軍台焚盧邨十一月十七日逆自古隆賢賴裕
新繞道抄盧邨大營後路楊鎮魁等堅壁固守俟張
道運蘭援軍至齊出夾擊賊遂敗退十九日嶺外添

賊萬餘進犯之計益切副將宋國永密受曾大臣方略帶勁旅馳赴黔縣轉由盧邨進攻老湘營二旅張天習等繞出羊棧嶺斷賊歸路禮字等營前後夾出賊勢大潰我軍追者反出其前賊墜巖挂樹死者不計其數自此賊膽始寒不敢再窺祁門而休甯城賊因鮑超一軍回勦景德鎮由藍田擾及小溪一帶張運蘭擊敗之另股在鄧家橋屯聚者進逼漁亭二十六日霆營將官今直隸提督婁雲慶會合各營出隊兩路抄擊賊衆奪路狂奔殺斃逆首黃世瑚等多名

老賊千餘人申刻後復敗上溪口來犯之賊追過牌
嶺至馬金街而還

蘇州賊撲寶山縣拒戰獲捷

寶山縣濱臨大海近接吳淞口爲松江府門戶都司
姜德統勁勇與原防之川沙營參將李延舉吳淞營
參將劉錫溫合力堵禦十一月二十四日蘇城逆黨
數萬陸路屯寶山城外三里之丁家橋而礮船由劉
河海塘直薄城下劉錫溫與知縣曹錫燾入城固守
姜德營城外深濠堅壘運吳淞口大礮至連次轟擊

斃賊無數次日賊復進逼把總張振揆奮力衝殺手
刃三十餘賊挫其兇鋒姜德往來策應斬首二百餘
級賊始敗退張振揆因力竭陣亡海塘之賊亦爲民
團擊走二十七日各軍分路追殺復斃賊二千餘名
寶山縣賴以完

浙江湖州解圍

浙江之賊因湖州國防屢殲其黨糾合大股圍攻郡
城四十餘日記名道趙景賢督勵民勇屢戰輒勝十
一月十五至十七等日逆由杭坊港等處來撲竝分

之
人
身
目
系
州
不
十
犯青銅門橋及橫溪塘橋各卡均被擊退斃賊多名
二十二日復有騎馬賊犯楊家莊又由奚家莊西分
撲官營後路竝用礮船直犯西門我軍分投迎勦賊
衆受傷落水死者不計其數逆勢少卻二十六日我
軍由龍山追殺復斃賊千餘水陸夾擊兼破其屯紮
後山賊衆其自仁廣山來犯者亦大敗遂焚燬各路
賊壘力解城圍

江西賊陷饒州府及浮梁縣旋即收復

毓巡撫科撫江西其軍務仍由曾大臣會督辦理十

一月內逆匪竄入浮梁縣會大臣派左京堂督兵截擊十三十四等日先後擒斬多名賊猶列隊抗拒我軍槍礮齊施賊衆披靡陣斬僞指揮三名乘勝追擊斃賊數百名墜水死者不計其數城賊聞風逃去其闖入饒州府之賊爲游擊任星元等督兵轟擊逆不能踞亦遁

十二月廣東軍克復平遠縣

廣東軍越境解江西安遠縣圍賊受創竄回廣東闖入平遠縣者巡撫齡派都司長青方耀等率兵勇會

同勞總督崇光所派嘉應州及潮州鎮道兵勇四面圍勦自十月二十七日至十一月二十五日疊次環攻殲斃守城賊無數十二月初四日被城外賊柵毀礮臺三座焚燒賊壘十餘處賊不能支出東門逃竄追殺數十里沿途賊尸枕籍生擒四十餘名斬首三百二十餘級遂復縣城

浙江軍克復江山常山二縣

賊黨竄陷江山常山兩縣城十一月十一日總兵曾玉明派參將林文察等督兵勦江山斬黃衣賊目一

名燬逆壘三座竝擊敗常山援遊二十五日復攻破
西山一路賊壘十餘座殲賊極衆生擒長髮賊一百
六十餘名江山城當卽收復提督張玉良已革總兵
李定泰統水陸師進規常山三十日城逆水陸迎拒
擊沈賊船二隻礮船一隻將後路三里灘賊壘木柵
悉數焚燬乘勝薄城轟斃守城賊目城內火藥局延
燒賊衆突門出竄遂復江山縣

江西賊竄福建陷汀州府

閩境漸次肅清惟武平尙爲賊踞上月汀州鎮總兵

袁良督游擊許忠標等進攻殲斃甚多燬逆壘二座
正加痛勦冀剋期殄除而另股粵匪偵汀州府兵單
於十二月初三日由江甯界突入陷之

平定粵匪紀略卷十一

咸豐十一年辛酉正月浙江軍克復富陽縣

上年十二月逆匪由桐廬突入富陽意圖東竄副將
貴廷芳等督兵勇水陸夾擊疊次獲勝賊復編竹爲
箛乘間駕駛撲營亦經轟擊敗退本年正月初四日
我軍直薄城下水師亦架礮助攻斃賊千計初七日
鏖戰至暮蹋毀西門外賊壘多座夜半時守備包文
舉伏東西兩門舉號火兵勇奮力攀梯登城知縣蔣
貴斌率四鄉團丁緣城鼓譟賊猝不及防紛出北門

逃竄我軍追殺數十里立復縣城

江西逆犯景德鎮曾營左鮑兩軍敗之於石門洋塘

江西逆屢竄浮梁縣窺景德鎮近鎮之里市渡西瓜洲羅家橋等處賊蹤時至至必懲創之偽堵王黃文金忽糾大股匪黨五路進犯正月初九日左京堂會總兵鮑超分途迎擊鏖戰於石門洋塘斃悍賊千餘名其下游逃竄之賊及山岡來援各匪亦轟勦獲捷尸積如山兼斃逆目許茂材林世發二名黃文金踉

踰宵遁

賊撲祁門曾軍勦殲之

正月初六日石埭逆分撲大赤大紅二嶺江提督長
貴擊敗之於大紅而黨衆已由大赤入歷口距祁門
大營僅二十餘里曾大臣派副將唐義訓等往堵設
伏於石門橋逆黨張白幟自橋外田隴猛撲而來伏
兵突出四面包抄殺聲震山谷賊勢大潰我軍窮追
三十餘里踰大赤嶺初九日收隊回盡殪羣賊之竄
聚歷口程邨者

曾營鮑軍破賊於黃麥舖等處克復建德縣饒州九江

境肅清

石門洋塘之勝總兵鮑超一軍追賊至彭澤縣之下
隅坂而青陽銅陵諸援賊與敗黨合復入建德分踞
黃麥舖等處鮑總兵督各營前勦逆衆迎拒我軍奮
勇力戰乘勝壓之斃賊二十餘人撲港跌巖而斃者
以萬計血濺林壑追至建德適水師總兵陳大富亦
至遂合兵收復建德縣城生擒逆匪林天福等多名
長髮逆賊三百餘名九江饒州府屬一律肅清

二月皖逆勾結捻匪竄擾湖北羅田縣之松子關楚軍

截擊獲勝陣斬擒首龔瞎子

楚軍全力圖皖候選道曾國荃統軍一萬餘人攻安慶新授安徽巡撫李續宜援湘回鄂駐青草隔福州副都統多隆阿駐桐城之挂車河胡巡撫駐太湖縣副將余際昌紮霍山之樂兒嶺副將成大吉駐羅田縣之松子關逆首偽英王陳玉成卽四眼狗圖援安慶糾令擒首龔瞎子帶髮擒五萬餘人撲松子關二月初四日賊分兩路左出平頂山右出五十坳抄我官營之後成大吉所統僅二千五百人賊多二十倍

乃激勵士卒派都司曾昭仕副將張運馥等分投迎擊一可抵百正酣戰間成大吉暗令武後營參將王名滔從左側山腰橫截而出捻首龔瞎子騎馬衝陣爲我軍擊斃賊衆驚潰覓路狂奔墜巖望樹自相踐蹋我軍儘力追殺計三時之久斃賊四千餘人初七日賊黨欲爲龔瞎子復仇挑選先鋒悍賊分五路進撲成大吉等奮力抵敵賊復敗退次日率隊追勦直至距關二十里之觀音塘始收隊捻黨因龔瞎子死散去二三萬人粵匪亦散數千人餘匪繞道英山與

陳玉成合股

逆首陳玉成竄入蘄水縣陷黃州府及蘄州

楚軍分途圖皖胡巡撫於十年十二月由安徽之英
山縣移駐太湖縣以節制諸路留副將余際昌率昌
字四營駐霍山之樂兒嶺分昌禮三營駐三石嶺爲
後應戒余際昌如賊至堅守勿戰以待援師陳玉成
探知霍山兵薄旣喉捻首龔瞎子犯松子關自率悍
賊十數萬乘虛於正月二十九日從霍山之黑石渡
直撲昌營余際昌貪功出隊迎勦相持四晝夜力竭

而潰昌禮三營孤懸三石嶺外經營務處同知孫振
銓馳往調回紮守天堂賊於二月初四日抵英山初
七日入蘄水縣假官軍旂幟趨襲黃州府初八日陷
之竝於十四日分陷蘄州擾麻城

黃州逆衆上犯武昌省城戒嚴

逆踞黃州後分黨數萬裹脅曰衆闌入黃安黃陂孝
感雲夢等縣竝陷德安府隨州勢極猖獗時省城僅
存標兵二千餘人官大臣督率司道唐訓方文輝厲
雲官盛康恩祥等晝夜登陴固守飛咨李巡撫率湘

撫十九營自青草隔回援副都統舒保率馬隊馳回
廣東惠潮嘉道彭玉麟督水師戰船亦至扼與外江
內湖人心以安賊不敢犯

上海軍截勦青浦嘉定之賊獲捷

青浦踞賊紛出滋擾二月初一日逕撲廣富林官營
參將李恒嵩都司王玉林守備何慶福迎戰斃賊多
名乘勢掩殺獲械幟無數敗匪由水路下竄經水師
曾秉忠督率長龍船擊走之另股賊竄撲鎮橋北營
竝在附近縱火李恒嵩等會同參將郭太平分隊截

勦陣斬騎馬賊目二名都司張應選越濠欲斃衝鋒
賊目數名賊衆奔竄其嘉定之賊同時由南翔竄至
江橋華槽亦經各路兵圍截擊獲勝

會營各軍破上溪口逆巢克復休甯縣

逆陷徽州竄踞休甯城築壘於上溪口河邨石田小
當等處層密周匝與休甯屯溪之賊互相犄角曾大
臣以休城不克徽郡難圖祁門亦屬危地於二月初
八日派副將朱品隆唐義訓由祁門赴魚亭會張道
連蘭攻上溪口及河邨諸賊巢而調霆勇安勇更番

出隊以牽制休甯援賊初九日各軍猛進焚燒河邨
上溪口賊壘追至石田復平賊壘六座賊竄小當是
日靈安各勇直抵休甯城下十一日會合環攻踞逆
乘夜遁去收復縣城

會營各軍進勦婺源樂平逆連戰皆捷

僞侍逆李侍賢糾黨陷婺源屯踞青華街左京堂飭
各軍移營前勦陣斬騎賊二百餘名步賊二千餘名
匪黨猶死拒不退我軍出奇兵大敗之方乘勝薄城
而城賊忽分大股由中靈竄入樂平界內左京堂復

親統數營趣駐樂平之柳家灣扼賊衝二月十一日
接戰大勝賊甫退而援匪漫野至返旆截殺盪決無
前賊復大潰而去

皖南嶺外逆匪分路進撲曾軍擊卻之

二月二十三日皖南逆分由西路櫟根嶺北路未黍
嶺進犯副將沈寶成時駐營歷口當西面堅壁不動
江提督長貴率兵勇出北路拒之曾大臣恐西路兵
單復派記名總兵朱品隆率各營由祁門馳援與寶
成合軍出歷口追勦殲其賊目竝將陳田葉各邨餘

匪埽蕩賊越嶺而逃江提督至北路亦敗賊於禾黍
楓樹大洪三嶺賊始退出嶺外

江蘇青浦縣民團擊竄匪獲勝

自常熟昭文以團練有功諸城邑紳民皆勤修堵禦
逆黨亦畏之二月初六日蘇城逆出擾爲守備方聚
與擊敗由南翔竄青浦練紳何長治沈維城許子蘭
會各鄉義民連日轉戰生擒逆首徐太湖賊衆不敢
踞追至嘉定城而城逆出援沈維城獨奮身越壕刃
賊甚衆以力竭戰死青浦所屬之黃渡安亭香花橋

等處賊各設僞局盡爲練紳等所毀兼獲其僞官胡銀龍楊中三僞師帥劉蘭升等鄉團激於義忿齊心殺賊所保全實多

三月楚軍克復孝感縣收復雲夢應城黃陂黃安等縣麻城解圍

省城兵勇漸集官大臣商派李巡撫所部會合舒保馬隊出勦審察賊勢踞聚孝感而以德安雲夢隨州三處踞逆爲長蛇勢意圖窺伺荆襄宜先攻孝感以扼其吭三月初一日派道員金國琛等率湘勇七千

餘人由楊店進彭玉麟率都司王吉等帶舢板小戰
船入府河陸師拔其木城水師斷其浮橋分門攻入
於初九日克復孝感縣斃賊四千餘衆生擒五百餘
名官大臣復派游擊王元昌等馳勦雲夢應城二縣
兼爲孝感各軍聲援賊卽遁去二城旋卽收復黃陂
黃安二縣亦經各縣整齊團練殺賊多名收復城池
麻城之賊知府梁作楫會縣督同民團壘獲勝仗城
得固守

浙江海鹽縣復失兼陷乍浦鎮平湖縣及金華府屬龍

游等縣

二月內浙江嘉興府踞逆分陷海鹽等縣瑞將軍等
飭已革副將張威那會同署江南提督曾秉忠進剿
二十九日克復海鹽縣已革總兵米興朝沿河截殺
毀賊壘罄盡竝擊走鍾埭踞逆乘勝收復平湖縣三
月初八日逆黨乘浙軍已退復竄陷海鹽分撲平湖
縣之乍浦鎮駐防副都統錫齡阿軍潰戰死平湖縣
復於初九日失守浙西各賊復竄入金華府連陷龍
游湯溪長興三縣

江西軍克復新淦縣吉安府

江西逆匪於二月內由樂安竄陷新淦縣知縣李輔會合民團協力圍攻至三月初二日賊始遁去收復縣城賊趨吉安甫渡河參將李金暘率隊先退府城遂於初十日失守知府曾詠廬陵縣知縣丁日昌督率民團進勦時城中積存火藥甚多日昌募敢死士貌賊裝入藥局密施引線二更時風雨暴作火藥轟發屋舍皆飛民團鼓譟力攻賊驚惶竄出卽於十三日收復府城

浙遊陷江山常山二縣旋卽克復復陷遂安壽昌蘭溪
武義等縣

僞侍王李侍賢逆黨踞皖南由婺源竄白沙關至華
埠三月二十五日連陷常山江山二縣民團聚集殺
賊於三里灘大溪灘二城立復賊衆乃僞集華埠遣
黨由開化陷遂安入淳安之港口副將余永椿帶隊
迎勦受傷退扼桐關賊不能過遂分兩路竄陷壽昌
蘭溪武義三縣

曾營左軍破賊於樂平

逆黨於二月內由鄱陽故縣偷渡昌江抵范家邨時
左京堂奉

命幫辦會大臣軍務率兵勇擊敗之毀賊巢五處殺賊三
千餘以景德鎮復陷拔營赴樂平三月初五日賊至
桃嶺塔窺湧山爲各營擊退初十日復率大股由龍
珠桃嶺擁至我軍按兵不爲動俟其懈奮勇突擊追
奔二十餘里十三日僞侍逆李侍賢挑悍賊進逼樂
平連壘十餘里左京堂督諸軍開城出戰人馬如疾
風怒濤賊駭愕不知爲計我軍縱橫盪決斬四五千

級燒賊壘二十餘座賊大潰侍逆易服遁去

楚軍截勦安慶援賊

皖逆竄入楚疆官大臣胡巡撫策賊必有分股回攻安慶圍師之舉飛飭懷桐水陸各軍嚴密戒備三月十三日逆首陳玉成果於隨州德安各畱悍賊萬餘以死拒牽制我軍陳玉成自率悍黨由蘄黃回竄宿松境內窺伺太湖後路見胡巡撫建礮設卡防守綦嚴不敢犯竄至宿松縣所屬之桃花舖福州副都統多隆阿時紮桐城之汴市河派記名副都統溫德勒

克西金順各率馬隊馳擊敗之陳逆率衆竄至安慶
於集賢關外築壘抗拒多隆阿派總兵雷正瑄副將
楊朝林趙旣發曹克忠王可陞參將穆正春姜玉順
王萬年楊正彪朱希廣余福象等各選隊七成馳往
二十一日紮高路舖二十二日忽報桐城廬江逆首
僞璋王林紹璋僞珩王洪仁珩等率賊二萬餘自新
安渡至練潭一帶連壘三十餘里將由馬蹋石渡河
竄往安慶與陳逆聯合圖解城圍多隆阿察定形勢
撥隊分擊竝令王萬年余福象由橫山後抄至困賊

亥心橫尸徧野逼人菜子湖淹死無數維時新安渡
出援賊萬餘人官軍圍殺殆盡追過天林莊統計斬
賊目五名斃賊一萬餘人二十四五等日逆首偽定
南主將黃文金卽黃老虎復糾合蕪湖逆賊七八千
名竝捻匪二萬餘名至天林莊築壘二十餘座冀竄
入安慶復經多隆阿設計誘敵殲斃二千餘名統領
安慶全軍卽用道曾國荃固守圍師不少動水師楊
提督率總兵李成謀等梭巡江湖焚奪賊舟斷其接
濟困城逆不使得逞

四月楚軍皖南軍勦退安慶援賊連獲大勝

上月多副都統敗賊於天林莊四月初二日拔營過河攻之陳玉成棄壘而遁屯於集賢關內外適曾大臣於皖南軍中抽調總兵鮑超一軍胡巡撫添撥總兵成大吉一軍同赴安慶協勦分路夾擊五戰五捷先是陳玉成至集賢關騎馬親至圍師後濠窺視次日卽於菱湖北岸築壘十三座安慶城內逆首葉芸來率黨出城接應亦於南岸築壘五座城中出賊划置湖中以通來往道員曾國芝請楊提督撥水師破

船數十隻由東岸擡入菱湖往來轟擊斃賊極多曾
國荃復派隊於東路橫濠倚水捨築新營水陸嚴防
無隙可乘陳玉成知前阻圍師後受鮑超成大吉兩
軍攻擊於四月初十日晚由馬蹋石鳧水遁去尙於
集賢關外赤岡嶺畱賊壘四座與關內近濠之十三
壘互相死守曾國荃見關外赤岡嶺之壘已有鮑成
兩軍圍攻惟十三壘之賊非一時能克遂調各營一
萬餘人開挖長濠斷其去路數日濠成壘賊盡歸阱

內

楚軍湖南援軍分攻德安隨州

陳玉成於二月內陷德安隨州畱悍賊死守初省城
戒嚴官大臣奏請飭調湖南駱巡撫入蜀之師移緩
就急迅援湖北派道員劉嶽昭率所部勇丁四千六
百人於三月初旬由宜昌抵安陸府官大臣飛飭劉
嶽昭馳往隨州攻勦兼保荆襄門戶李巡撫續安駐
軍灞口派道員金國琛等率各營勇丁會同舒保馬
隊攻德安劉嶽昭一軍於四月初三日接仗斃賊數
百名值天雨收隊嗣後疊次進攻逆衆堅守不出金

國琛一軍於三月二十三、四等日於德安城外鳳凰山、南壇山等處築礮臺。四月初七日設伏誘賊斃賊六七百名，生擒一百五十餘名。十一日賊衆乘霧潛出撲營，又斃賊三四百名。自此不敢再出。我軍開挖地道，俟逼近城根設計進取。

揚鎮各軍擊賊獲勝

江皖各逆合黨撲揚州，分二路一出僧道橋，敗於已革總兵王萬清。一自儀徵進，敗於徐州鎮總兵詹啓綸。四月十八日敗黨復合，競奔揚州西北鄉，捨築多

壘二十一日都將軍出隊分途迎勦逆傾巢出拒爲
營總杜嘎爾馬隊所衝賊勢少挫游擊刁經明乘勢
直搗中堅英字選鋒二營楚勇繼之斃悍賊多名杜
嘎爾復派馬隊出戰賊紛紛潰退追殺三十餘里將
所搶築新壘及甘泉山等處賊壘三十餘座悉數踣
平斃賊數千生擒七百餘名初賊之撲揚州也潛糾
匪黨令襲鎮江城巴將軍棟阿派總兵富升蕭知音
等夾擊大勝復派總兵朱啓先部司春貴會勦斬擒
無數賊亦潰遁

福建軍克復汀州府

上年十二月福建逆陷汀州府於城外築壘柵幾徧
圖久踞福甯鎮總兵曾玉明會同記名道張啓暄督
兵勇進攻四月初九日敗賊於長坑擒髮逆十二名
又接戰於十里舖擒偽帥帥鍾觀海等三名匪黨三
百餘名進擣郡城逆列陣抗拒斬獲無數十四日乘
勝合圍敗馬隊賊於東南北門官軍破東門而入斬
守陴悍賊二百餘名逆出西門逃竄追殺十餘里遂
復府城

上海軍進勦浙江嘉興逆獲勝

浙江嘉興府逆首偽狼天義等糾西塘鎮逆匪偽印
天福率黨撲浙蘇交界之章練塘窺伺洙涇鎮署江
南提督曾秉忠派守備林隆祥府經歷胡鈺等督帶
戰船練勇進勦攻破白虎頭等處賊壘沈賊船甚多
曾提督親統諸軍爲接應越境窮追焚燬西塘鎮及
俞匯賊壘斃賊二千餘名生擒數百名二十二日青
浦援賊撲北韓山官營亦經參將李恒嵩設伏擊之
勦斃無算

五月江西大股逆匪竄犯湖北興國通城等州縣

逆首僞忠王李秀成大股竄踞江西義甯州武甯縣
逼近湖南北邊境湖南平江縣有已革皖南道李元
度由浙赴湘募勇七營駐縣堵勦湖北興國崇陽通
城通山大冶各邑軍戒嚴官大臣酌撥知府唐協和
已革副將余際昌都司江得勝三營勇二千三百餘
人守興國副將何紹彩游擊王允昌參將唐敏興等
三營每營五六百人分守崇通山冶四縣逆匪於義
武二處裹脅七八萬人由興國內犯五月初二三日

一由苦竹南樓二嶺犯通城一由蛇箭嶺犯通山因
衆寡不敵均被闌入直抵崇陽之白霓橋其窺伺興
國之賊初四日撲余際昌營與唐協和等均接仗失
利退至大治初五日賊蹤隨至大治竝擾及連界之
武昌縣經管帶礮船游擊曾紹霖突起轟擊斃賊數
百名賊始退回大治逆氛距省垣較近官大臣咨商
李巡撫統勇三千餘人渡江回省紮東門外二十里
之魯家巷派署荊州左翼副都統巴揚阿帶王允昌
何紹彩馬步三千餘人紮距省六十里之東湖站紙

坊一帶擇要駐守相機進剿

上海軍擊退平湖乍浦諸賊

浙江平湖縣乍浦海塘與江蘇金山衛相接嘉興踞
逆陷平湖卽於境內設卡圖犯金山五月初一日副
將黃金友督民團往勦獲勝於廣陳地方初二日復
勦除太平橋竄匪生擒僞官四名初四五日毀徐家
埭賊壘轉戰象皮橋陸巷港魚潛港等處所向皆捷
初七日逆衆復回撲廣陳黃金友被困中槍殞命賊
竄明珠菴爲曾提督水師擊退其乍浦逆黨亦分路

來犯爲已革總兵米興朝所擊賊敗回巢
楚軍圍攻皖逆赤岡嶺四壘悍賊悉數殲除

鮑超成大吉專攻集賢關外赤岡嶺四壘壘中皆積
久悍賊官軍多傷亡乃環濠修礮臺數十座晝夜輪
攻五月初一日圍兵四合賊已糧盡勢窮鮑超遣守
備吳亮才入壘招降賊衆畏服投順獨第一壘賊目
劉瑿林抗拒不服乘夜突圍希圖他竄適河水暴漲
不得渡爲我軍所擒老賊四千餘無一漏網者

楚軍圍安慶埽平菱湖兩岸賊壘

集賢關外之賊既搜擒淨盡而城賊仍敢死守者恃
有關內菱湖南岸賊壘五座北岸賊壘十三座錯綜
分布以抗我師先是道員曾國荃竭萬餘人之力作
長濠圍之五月十五日以後城賊陸續逃出乞降分
別斬釋三十日菱湖北岸壘賊僞主將吳定才率悍
賊焚營爲我軍擊退遂會水師力攻北岸十三壘各
營官率勇躍登生擒賊衆五千四百八十三人內有
僞安燕福豫侯及將軍指揮等數千人釋放淺髮者
三百餘人餘悉斬決南岸五壘同日攻克斬賊一千

餘人其平賊壘十八座斬馘九千有奇

江西逆匪竄陷浙江遂昌松陽處州永康義烏各府縣
處州府旋即克復

江西逆匪由江山縣竄至湖口邨五月初六日遂
昌松陽二縣相繼失守復竄處州知府李希郊馳往
堰頭堵勦以衆寡不敵力戰陣亡五月十六日失陷
署溫處道志勳會署總兵特保督兵攻處州十七日
賊撲厦河營截擊獲勝十八日志勳派隊由僻路攀
援登陣特保由大南門進勦麗水縣知縣姚復輝帶

之六 卷之二
團勇夾擊逆衆開北門遁去郡城立復武義之賊由
宣平竄永康縣十八日失守三十日復陷義烏縣

浙江軍克復長興縉雲遂昌松陽宣平等縣

逆黨自竄陷長興築卡南路虹星橋盤踞烏鎮練市
擾龍灣一路圖犯夾浦兵勇疊次痛勦斃賊甚多賊
勢不支入城抗拒五月初九日都司江振聲等水陸
竝進拆毀其所搭浮梁斬首數百級直薄小東門一
鼓登城克復長興縣竝蹋平虹星橋卡柵其盤踞鎮
市者亦皆爲民團擊走處州敗匪於五月十九日竄

陷縉雲次日卽經知縣馮格督率兵圍攻擊賊未踞
守卽復縣城遂昌松陽二縣亦於二十一日收復賊
由遂昌小路竄宣平經宣平縣知縣何仁杰調集鄉
團會游擊黃載清兩路夾擊斃賊甚多賊向武義遁
去處州境內已無賊蹤

蘇州踞逆援青浦另股竄逼上海官軍擊敗之

上海官軍駐青浦圖進剿五月二十三日蘇州踞逆
遣大股往援副將李恒嵩以賊勢猖獗移絳山鳳凰
山二營退紮塘橋整軍迎敵適會提督派水師助剿

合力夾攻斃賊多名竝擊沈賊船多隻盡遁入青涼
城內另股由嘉定竄出之賊陷大場華漕等處官軍
營盤進逼上海經游擊金文廷等力勦擒髮逆四名
奪回營盤參將梁勝章親撚巨礮殲賊百餘參將王
國安單騎入賊隊手刃賊目一名諸軍努力痛勦斃
賊甚多餘匪亦潰回嘉定

會軍乘勝收復徽州城

會大臣由祁門移營東流皖南逆黨度嶺內空虛糾
衆由方干嶺樟嶺衝防軍而入潛陷黟縣築壘於西

武嶺等處圖窺祁門五月初四日江提督長貴率朱
品隆等攻西武嶺賊卽敗退福建按察使張運蘭亦
會同署皖南鎮唐義訓副將婁慶雲等克黟縣嶺外
援賊續至分踞洋樓方干及樟嶺三處均爲我軍擊
敗初九日合軍進勦賊併入盧邨十都增新壘五座
竝舊築爲七固守抗拒我軍攻克新舊七壘賊悉駢
誅餘匪遁出嶺外初十日跟蹤追勦徽州城踞逆知
失險無所恃望風分竄張運蘭遂督隊入府城駐軍
防堵

會營左軍由廣信府回駐景德鎮克復建德縣

太常寺卿左宗棠一軍於四月間追勦侍逆李侍賢
直至廣信府旋因池州逆首劉官方於四月十五日
再陷建德竄入鄱陽視田街距景德鎮僅六十里乃
冒雨遄返五月初七日抵景德鎮賊聞信宵遁左京
卿出桃樹店橫截之大戰於桐樹嶺擒斬甚多賊走
建德後河我軍追至三里街復有斬獲克復縣城
六月楚軍竝湘南援軍先後攻克武昌通城崇陽三縣
收復興國大冶通山咸甯蒲圻五州縣

逆首僞忠王李秀成竄踞江西瑞州府義甯州武甯縣糾集大股分三路竄犯楚境連陷南岸之武昌等七州縣官大臣於省城布置旣密卽會商安徽李巡撫調派水陸馬步分路勦辦道員蔣凝學會同廣東按察使彭玉麟水師先於五月十六日攻復武昌縣已革皖南道李元度先紮湖南之平江縣咨會率隊前進遂將馬港乾塘坳麥園何葛墩等處賊壘節節掃蕩於六月初三日克復通城縣逆衆奔崇陽各營鼓勇前進初六日復克崇陽縣胡巡撫於六月初三

日自太湖拔營進省商派總兵成大吉副將何紹彩
知府毛有銘唐協和等由保安金牛一帶進兵沿途
勦洗殺賊甚多興國大冶通山之賊均竄往義甯初
六七日收復三州縣咸甯縣知縣金東昫蒲圻縣知
縣孫寶田亦督率鄉團並水師礮船於初六日各收
復縣城

湘南軍克復江西義甯州

李元度克復通城崇陽後敗賊逃竄江西義甯州之
官溪李元度率兵圍攻賊敗入城六月十三日分三

路進壽州城十四日黎明各勇攀堞競登殺賊二百
餘名生擒十餘名克復義甯州

湖北敗賊竄擾江西瑞昌建昌等縣擊走之

湖北敗賊竄至江西瑞昌縣經知縣楊林盛會同哨
官張三元等督水師堵截槍礮齊發適斃逆首賊卽
敗退復撲建昌縣守城官檄水師乞援六月二十二
日營官楊宏勝督勇應期而至知縣李慶芳亦集練
會勦三面攻擊斃賊無數城賴以完

曾大臣分兵移駐婺源破賊於江西德興縣之白沙關

曾大臣克復徽州後以後路尙虛而婺源縣界江皖浙三省之衝尤爲扼要咨商左京卿分兵移駐時左京卿巴克建德乃飭王開琳督軍守景德鎮而自率各營於六月初移紮婺源縣適逆首賴裕新糾合福建汀州竄出頭起股匪約二萬餘人由常山晝夜進行六月二十三日抵德興縣之白沙關二十四日分隊踞九都之新建候選道王開化審察地勢分奇正兵蹙之二十七日督戰斬首數百級賊衆由新建五里外鳧水渡河追軍馳及攀登高嶺而從下截擊賊

勢大潰墜巖落澗死者無數我軍追至白沙關其計
殲斃一千一百餘名生擒八十餘名敗匪仍向浙江
之開化華埠竄逸

--	--	--	--	--	--	--	--	--	--

平定粵匪紀略卷十二

咸豐十一年七月江西克復新昌奉新縣瑞州府

偽忠王李秀成自本年三月竄踞瑞州府分陷上高
新昌奉新等縣以瑞州爲老巢前皖南道李元度於
六月十四日既克復武甯等縣官大臣由楚籌給饑
需飭令乘勝前行七月初二日進駐新昌交界之棗
橋分屯奉新交界之茅竹山爲合取瑞州計初四日
馬隊抵天寶距新昌城七十里賊沿鄉肆掠不虞官
軍驟至螺陂嶺圍練亦來助戰賊匪敗退追至曹家

嶺初七日合兵薄城下都司楊在田從西門包抄殺賊三百餘名斬關直入克復新昌其駐茅竹山之軍由九仙湯羅坊一路追賊前進初八日克復奉新縣是日復分兵收復上高縣敗賊均趨瑞州遂遣游擊賀接華都司吳得意等擣瑞州初九日抵塘溪賊列隊城外馬步布滿山岡我軍正慮衆寡不敵營官朱得博以五營由新昌振旅至殺賊四五百名都司易咸臨羅寅等首先登城郡城立復後李元度因所報克復各城有虛飾處獲咎議遣戍

楚軍克復德安府

陳逆王成率衆退援安慶於孝感德安各留悍賊以牽制我兵而圖窺荆襄蓄謀甚毒官大臣等派撥水陸各軍節次嚴勦旣克復孝感縣卽添派隊伍飭令副都統舒保卽用道金國琛副將張啓基等進勦迅籌攻克金國琛等於陸路增設礮臺水師沿河排擊賊衆尙堅忍死守各弁勇分挖地道轟城屢坍而賊仍搶堵乃築四面長圍以困之七月十一日派定隊伍激厲士卒圍大舉部署甫定城賊五六千冒死突

出爲諸軍擊潰不得入復出賊五六千圍抄我軍後以援前賊楊富有闌門斷絕歸路敗賊奔河西伏兵四合架雲梯一鼓緣登斬守陴悍賊數十開門納師斃城內外老賊三千四百餘名克復府城分兵窮追沿途斬馘橫尸徧野餘匪無幾竄往河南

楚軍擊退援賊力解太湖之圍桐城安慶圍師連捷

陳逆王成安慶敗竄後糾僞輔王楊輔清嚮集匪黨號稱十餘萬自無爲州竄英山繞宿松徑撲太湖爲救援安慶計官大臣胡巡撫飛檄諸營慎密戒備總

兵胡裕發沈浚德副將巢日升候補道歐陽正壩會
同署安慶府知府孫振銓等守太湖登陣捍禦七月
初一日賊排隊山岡作長蛇勢復有賊數萬自龍山
宮對岸至塔下表延二十餘里分途誘敵我軍穩守
不爲動賊不敢逼夜大雨衆賊洶湧潮進城中飛槍
礮隨雨落城受創多斃次晨始退殺賊千餘名奪馬
匹輜重無算太湖之圍頓解賊由太湖之黃泥港小
池驛竄至清河三橋頭高樓嶺欲結桐城之衆包裹
官營以解安慶圍副都統多隆阿派隊赴馬鞍山堵

勦而僞璋王林逆等自桐城至挂車河蔣家山列陣
以待參將譚仁芳副將石清吉等分途迎敵賊衆悉
披靡追抵城根城賊出撲多隆阿親督兵勇堵截三
門復派員率八營疾趨蔣家山拔木城二燬堅壘五
座焚柵帳二百餘處賊向東路逃竄陳玉成楊輔清
二逆已率大隊竄至高河鋪馬鞍山多隆阿添派馬
步分擊令雷正綰王可陞繞攻賊後賊又敗遁桐城
之圍復合安慶圍師經曾國荃會楊提督分道攻城
城外各壘荆平略盡竝燬其東門外月城惟北門外

三石壘最固十一日營官程學啓督弁勇從礮眼躍
入生擒壘中賊三百七十餘名越日復入乘機猛攻
石壘皆破又擒老賊八百三十七名獲僞將軍僞侯
及丞相先鋒指揮檢點等數十名北門之路已爲官
兵扼絕

楚軍攻黃州獲勝竝勦蕪水野掠賊

逆踞黃郡築堅壘城外環浚深濠總兵李績燾游擊
王允昌會營總花淩阿等率馬步驍要紮營扼賊上
竄時南岸肅清官大臣調派記名總兵成大吉候選

道蔣凝學知府毛有銘率所部十八營由南岸渡江
先勦黃岡蘄水掠野之賊以孤其勢七月十八日李
續燾等馬步進紮迴龍山攻七家嶺賊衆三路獲勝
斃賊三百餘名生擒四十名十九日水師副將成發
翔督參將丁長春等會合陸軍敗賊於玉帶橋焚卡
壘數座殲其悍日敗匪悉潰竄入城成大吉等軍亦
獲勝蘄水縣無城郭匪黨竄伏鄉邨割禾稻以充饑
先經蘄水縣知縣蔣照督練勇截擊屢有擒斬副將
何紹彩補用知府唐協和奉檄由興國馳赴與成大

吉合軍至蘄水二十四日偵縣屬李店等處有賊蹤
派游擊唐啓虞參將唐敏興都司何文喜密約蔣照
等出奇夾擊蔣照自蔣家山後進唐協和統率各營
自山前進賊腹背受創紛紛潰散卡壘悉平

曾營各軍獲捷於江西樟樹鎮

僞忠逆李秀成等自瑞州竄出由臨江渡河盤踞樟
樹鎮豐城等處綿亘百餘里曾大臣派提督鮑超督
諸軍進勦七月十九日赴豐城二十四日逆黨於樟
樹鎮搭浮橋過河至西北岸列陣山岡與官軍抗拒

鮑提督飭總兵陳由立自中路進總兵黃慶攻賊之
左副將易昌煥攻賊之右總兵宋國永勒兵山後鼓
譟迎戰鮑提督傳令四路並進迅猛踔厲賊不能當
紛紛潰退追殺五十餘里橫尸遍野斬首八千餘級
八月楚軍克復安慶城

時省垣已淪陷年九矣楚軍自攻克九江後節節掃
蕩於上年進兵水陸合圍城內之賊不下三四萬卽
用道曾國荃統領全師銳意圍之陳逆玉成糾南北
路悍賊疊次上竄冀解城圍副都統多隆阿力遏兇

鋒援賊皆受創而退楊提督水師往來攻擊絕其糧
道曾國荃復築長濠晝夜穩守逆之圖竄牽掣各計
皆無由逞及德安克復逆計更絀而安慶諸圍軍益
得專心致力七月十一日攻破北門石壘二座援逆
敗走旋復僑集陸續入關焚燒民舍在關口毛嶺十
里舖一帶築壘四十餘座散布山岡晝則旌旂林立
夜則火光燭天城賊亦列隊四門相接應二十日援
賊撲後濠分十餘路疾趨而進我軍俟逼近濠邊以
檣礮轟擊斃賊無數二十二日悍賊入中路第二層

濠修月墻于第一層濠外以避礮子曾國荃縱壯士
數十人出濠外踢燬之竝親率各勇增修新壘置礮
伏精兵於濠之左右以防衝突賊衆傾巢出由鹽河
至十里舖以東直撲新壘我軍奮力夾擊僵尸徧田
壠陳楊二逆首援桴鼓督陣揮刀砍不前者衆賊猛
撲十餘次而新壘已成自夜達旦殲銳賊三千餘賊
鋒大挫乃收隊自二十三日至二十八日賊輪班遞
攻曾國荃督各營官亦輪營應之羣逆既屢戰皆挫
又於菱湖北岸築壘十餘座舁小艇泛湖以齎糧入

城水師副將蔡國祥駛礮船阻截奪獲是夜城賊運礮赴賊壘亦爲我軍奪得賊計窮無所施三十日我軍地雷已成八月初一日卯刻發火轟塌西北門城垣曾國荃整隊而進分班勦殺臨水一面之賊多出南門投江死其西東北三門之賊皆爲我兵勇截殺從百花亭跳城逸出者水師盡殲之踞城逆賊死亂軍中共斃賊一萬六千有奇四僞王在城外者喪膽竄出集賢關

進克池州府

曾大臣先與楊提督約如安慶克復卽進圍沿江各
府縣池州爲要衝八月初二日楊提督派總兵王明
山黃翼升率水陸各營攻池州府王明山飭副將趙
三元先發而自統水營繼之黃翼升率水師由安慶
北岸載周萬倬陸師東下初五日趙三元先至繞城
攻擊萬礮雷轟賊不能支又聞諸路軍齊進開西北
門遁去王明山黃翼升駛至會同追勦斃賊極多立
復郡城

續克桐城宿松黃梅蘄州廣濟各州縣

桐城爲七省要道安慶咽喉城堅而高形勢險阻逆黨志在必踞故死守待援我軍旣克安慶曾道國荃與副都統多隆阿會議以陳逆王成尙擁衆數萬徘徊於集賢關外不早圖翦滅必與桐城合併勢將復振遂於八月初二日派營官曾貞幹朱洪章等從東路石塘湖相機進勦殪悍賊十餘逆衆敗潰且斬且追關內外壘館悉平計殺賊二千有奇多都統遣記名副都統穆圖善迅往桐城而自率吉林黑龍江各馬隊由間道抄出三橋頭初三日遮擊陳玉成楊輔

清各隊皆大敗越山而逃穆圖善之馳勦桐城也分遣副將譚仁芳朱希廣等率六營由挂車河大路抵北門總兵雷正綰楊朝林等率六營由棋盤嶺抵南門總兵石清吉副將劉寶國等率六營由官板橋抵西門剋期至桐城齊集穆圖善親率馬隊百餘隨後至用草填濠而過架雲梯奮呼登城賊衆出東門逃遁戮其不及出城者一千餘賊克復桐城派副將石清吉統勁兵留守而自引諸軍回挂車河老營初四日陳逆等由三橋頭竄至石牌之蠟樹窠多都統派

記名副都統溫德勒克西協領舒亮督三營總率領
吉林黑龍江馬隊西丹竝飭儘先協領蘇倫保格通
阿隨同督隊分三路馳抵蠟樹窠四面抄擊逆衆宵
遁馬隊連夜追出太湖殺賊一千餘敗黨竄宿松之
桃花舖溫德勒克西等督馬隊三路取勝一抄其前
一躡其後一橫截突擊復斃賊二千餘名餘匪入宿
松城馬隊合追抵賊松薄其城初八日賊衆出西門
竄往黃梅追殺十五里遂復宿松縣多都統旣遣馬
隊度賊敗後必與黃梅踞逆合股派雷正綰率步隊

往黃梅邀截宿松敗賊未及入黃梅城賊隊已至馬
隊復追抵東門賊繞城敗潰城賊亦開大西門出竄
知縣覃瀚元率團勇隨隊入城計馬步沿途追殺約
三千餘名蘄州知州李瑜亦督練會同水師副將喻
俊明等水陸攻城與黃梅城同日克復其廣濟縣踞
逆間官軍克復桐城所至瓦解亦膽落先逃十一日
多都統派隊收復竝追斬多名

楚軍克復黃州府

黃郡踞逆負隅固守於城外凌濠築壘以抗官軍官

大臣胡巡撫調總兵李績燾卽補道蔣凝學等督八
營兵勇會廣東按察使彭玉麟水師進勦竝飭總兵
成大吉率馬步隊駐紮上巴河助戰是時宿黃廣蘄
旣克復多都統帶全隊紮蘄州曹家河扼堵下游敗
匪以絕其援蔣凝學令投誠賊目劉維楨仍用賊衣
黃旗僞爲援衆趨三台河對岸徧燒野火與水陸各
軍虛放槍礮造陳王成僞文誘城賊出隊接應我軍
設伏待之城賊墮計於八月二十四日率衆出城欲
圖襲營我軍伺其離城已遠驟發號礮伏兵四起焚

燒賊館火光燭天馬步縱橫衝擊積尸如山敗黨竄
入玉帶橋三台河又爲水師攔殺賊多自沈死河水
爲之不流大軍遂乘勝搶城斃賊極多生擒二十餘
名有覺水脫逃者劉維楨花凌阿等跟蹤追勦擒斬
四千有奇有由小路入山者多都統馬隊搜勦亦斃
二千餘名漏網無幾

曾營鮑軍敗逆衆於湖坊河口克復鎔山縣

忠逆李秀成竄出豐城卽踞白馬寨另股圍攻撫州
鮑提督超聞警馳援城圍立解尋奉檄勦安慶援賊

至則安慶省城已克復乃星夜折回八月十四日再
抵撫州偵賊已竄湖坊是月二十二日督隊前進賊
已整隊於河口迎敵勢甚洶湧我軍分五路會攻壘
戰三時賊大敗蹋平七十餘壘乘勝追殺至鉛山城
外賊壘七座一鼓平之火箭入城延燒藥桶突烟燄
進擊賊開東門遁克復鉛山縣

楚軍克復銅陵縣

水師總兵王明山等既克池州率所部水師之船分
載陸軍下勦先派內江親兵於八月十一日赴銅陵

決東北門外隄堦水師從決口駛入王明山攻東門
黃翼升會陸師攻西門相繼登城殺賊千餘卽於是
日申刻克復

浙江嚴州府餘杭縣城先後失守

侍逆李侍賢率衆攻圍嚴州幾兩月竝於烏石方門
二灘連環築壘逼近外濠已革提督張玉良選銳衝
鋒皆爲賊阻腹背受敵不能前進賊自南門攻入經
副將羅大春殺退守至八月十七日糧盡援絕羅大
春身受重傷率領將士突北門而出府城遂陷另股

賊匪由幽嶺關薄餘杭城署知縣吳滢督團勇固守
以衆寡不敵迎戰失利同日亦陷

湖北胡巡撫薨

胡巡撫賞罰嚴明知人善任克復武昌後與官大臣
會大臣合德同心會議東征所向克捷在楚整飭吏
治籌備饑需農不病而課充法不苛而吏肅釐剔漕
弊紀理廩規尤爲善政三月內在太湖營中因積勞
咯血力疾治軍務不少輟八月朔克復安慶以首誅
功

加太子太保閔

文宗顯皇帝龍馭上賓拊膺大慟病益不可爲二十六日薨

事聞蒙

恩追贈總督

賜祭葬如例

加恩予諡入祀賢良祠併於湖北省及湖南原籍建立專

祠嗣會大臣以故撫忠節盡率勲績最多上陳

詔宣付史館

九月浙江逆分黨連陷蕭山諸暨縣紹興府城亦失守

逆陷嚴州府句通八槳礮船由臨浦攻陷蕭山及諸
暨等縣復率領羣匪分道犯紹興府時在籍副都御
史王履謙督辦團練會同守城文武堵禦九月二十
九日賊衆架竹梯登城入西郭門戕捍陣兵勇數十
人奪開城門羣賊一擁而入府城遂陷

曾營各軍克復無爲州

時廬江舒城皆收復惟無爲居皖北形勝控金陵引
蕪湖爲賊必爭之路故於附近泥汊口神塘河等處
築石壘以阻我師曾大臣派知府陳湜帶兵勇五千

人由廬江規取而令補用道劉連捷統三千人守廬
江九月初二日記名按察使曾國荃督副將蕭孚泗
彭萬全等坐陸師以礮船同水師總兵王明山黃翼
升順流東下十五日抵泥汊口見賊壘居高難仰攻
令修壘安營檣礮聲徹夜不絕而自率勁旅迅赴楊
家橋鳳凰頸決隄埽斷賊歸路賊果大懼於十六日
夜遁入無爲州城十八日進攻神塘河賊壘賊亦遁
歸乃乘勝直抵城下先是曾臬司克安慶時無爲州
賊目馬玉之妻子居安慶曾臬司生致之不殺密

諭玉棠獻城降既有成議而其機於十九日先洩馬
玉棠爲逆首僞頂王朱逆幽閉馬玉棠之黨舉兵攻
朱逆我軍囚之逆衆大潰由北門出竄水陸軍圍勦
斬悍賊二千餘名王明山分隊入城復殺賊五六百
斃僞豫侯丞相等州城立復

楚軍攻拔運漕鎮及東關

無爲含山界有運漕鎮者外瀕大江內通巢湖賊糧
皆屯於此上濟安慶蘆州下輸金陵爲南北鎖鑰僞
巨王洪逆率賊五六千人並礮船數十號以守之與

東關相援應九月二十三日記名按察使曾國荃遣
總兵王明山撥水師三營泊黃澗河退巢湖出路而
自率親兵與總兵黃翼升水師進取運漕鎮逆衆以
礮船迎敵我水師飛槳而前奪賊船十餘焚者倍之
賊衆鳧水遁去岸賊亦不戰自退各營躍登追逐殺
賊約三千名二十九日黃翼升與知府陳湜領水陸
各軍徑攻東關槍礮甫施賊已驚潰不敢歸壘遂併
力抄擊奪石壘守之

浙逆陷處州府

浙江松陽逆自縣城克復後竄逼處州九月十七日
由碧湖水陸竝進直撲郡城處州鎮總兵特保等督
隊迎勦開礮擊沈賊船二艘賊目數名後隊大衆蠶
擁而至官軍大軍不能禦城遂陷特保退守石帆收
集潰卒整隊伍修礮船十八日分攻各門水陸夾擊
斃賊甚多擒髮逆五名賊踞城固守二十日乘竹簾
撲我厦河營我軍俟半渡轟之賊大敗落水死者無
數城南等處擄糧賊亦爲官軍所敗慶總督端復派
游擊黃載清馳往助之

十月楚軍克復隨州

湖北自黃州德安攻克後髮逆盡殲惟隨州尙有遺孽以毗連豫境捻黨擾及襄陽因之以爲援應憑堅死守屢抗我軍前派副都統舒保率馬步紮城外會同卽補道劉嶽昭環攻賊屢受創擒斬多名而層濠疊壘未能卽拔官大臣旣派員弁勦退豫捻乃調已保都司之投誠義勇劉維楨赴隨授以機宜令用前取黃州舊計劉維楨遂於九月二十九日馳抵隨州假用英逆陳玉成僞文誘令出城交劉嶽昭派親信

勇丁陳勝清於三十日傳遞入城是夜未返劉嶽昭
度已中計乃分撥隊五四路設伏十月初一日逆衆
果由西南兩門齊出遂由東北殺入初一日戌刻克
復州城竄出之賊合力痛勦前後擊斃萬餘名生擒
一千五百餘名逆首馬清太斃於亂軍中

兩江總督曾大臣兼轄浙江全省軍務

時浙江逆勢猖獗全省糜爛逆氛進逼省垣故有是
命自巡撫提鎮以下均受節制

上海官紳遣使如皖營乞師

上海自蘇城不守避難者四集賊氛日惡薛巡撫煥
龐大臣鍾璠招集潰兵添募壯勇署布政使吳煦勸
諭互市英法各國會勦雖有斬擒終不能支適湖北
鹽法道顧文彬自楚歸以曾大臣軍已克安慶擬將
遵江東略軍威甚盛因倡乞援之議並議立會防局
預備輪船濟師吳署布政使願任餉事薛巡撫龐大
臣從之遂遣戶部主事錢鼎銘候補知縣厲學潮候
選訓導張瑛如皖乞師會

上屢念東南博求將帥曾大臣疏舉福建延邵建遺缺道

李鴻章率師進援

十一月逆攻陷杭州將軍瑞昌巡撫王有齡等死之

各省攻勦劇嚴重城壘克金陵唾手可得首逆洪秀
全懼甚乃令僞忠王李秀成僞侍王李侍賢分途竄
擾以分我兵力李秀成竄浙江壘陷各郡邑直至餘
杭縣杭州省垣戒嚴九月二十四日陷蕭山縣三十
五日從塘路直抵杭州撲武林門外賣魚橋踞我營
卡二十六七日布政使林福祥饒提督廷選先後
引軍還省賊隊大至運糧道阻十月初五日張提督

王良由上游來援列營城外王巡撫有齡在城百計
嚴防賊技無所施乃自海潮寺至鳳凰山環以木柵
實土其中爲堅壁使城外官兵隔絕競以槍礮轟城
十九日張提督督隊攻木柵中礮陣亡內外兵勇愈
怯城久乏糧人多餓死蕭山陷後諸暨繼失復被乘
虛竄陷紹興另股由奉化攻撲甯波郡城亦失致杭
州援兵路絕堅守兩月餘至十一月二十七日失陷
王巡撫自經於署越四日駐防滿城亦陷瑞將軍殉
難先後死節者學政張錫庚浙江提督饒廷選處州

鎮總兵文瑞浙江鹽運使莊煥文署福建漳州鎮總
兵副將繼興等

揚州軍敗逆於丹徒鎮進攻天長

蘇常逆圖撲鎮江時都將軍方會勦皖北擒匪恐鎮
江有警飭令總統水師總兵黃彬等率師船沿途迎
敵行抵丹徒鎮遇賊開礮轟擊賊亦鋌險抵拒鏖戰
逾時賊衆始潰遂蹋平其壘殲斃無數追奔數十里
尺橫徧野守備劉連升進攻圖山關爭先砍殺賊奪
路狂奔燬沿邊賊卡數處而天長踞城逆猶抗踞北

岸爲敗匪聲援都將軍親督兵勇乘勝抵天長城城外賊壘甚多守禦亦嚴遙見大軍至出壘迎拒副將劉成元等陷陣力擊敗之平毀賊壘斬擒略盡逆被圍迫密遣使投誠冀暫紓急困都將軍知其詐不許十二月逆圍徽州府大軍獲捷解圍

逆初圍杭州懼官軍進援乃爲先發制人計於十一月十四日分黨由淳安開化竄入皖南境二十二日至徽州屬之街口二十六日抵深渡僞輔王楊輔清率甯國大股圍攻徽州休甯兩城二十七日僞成天

安桂逆竄休甯之屯溪總兵唐義訓擊退之二十八日又竄篁墩十二月初二日進圍徽州府總兵張運桂督湘營兵勇堅守待援乘間出擊破賊壘多座殲斃甚衆逆復竄踞屯溪巖市街潛口一帶以絕徽軍糧道自初八日至二十六日文報均阻曾大臣調總兵朱品隆出嶺之師入援初八日進嶺十三日馳赴休甯與唐義訓商援徽之策十七日兩軍齊赴屯溪先破街口賊卡旋攻毀河邊四壘十九日將石橋潛口賊巢掃盪二十二日派三營護糧赴徽賊由萬安

街分股包抄我軍奮勇力擊賊不敢逼張運桂以巖
市街爲賊踞糧道終不通密檄總兵黃萬友出隊間
道馳赴休甯會商兜勦巖市二十六日諸軍合攻燬
賊壘十餘座楊輔清受傷暫退值大雪平地深數尺
馬步難行故不能窮追逆黨亦因擄掠無所得於除
夕全股遁去城圍頓解

皖軍克復六合天長二縣

江南李提督世忠隸袁大臣臨淮軍勇銳激發力圖
肅清江北知六合天長有隙可乘於十二月二十一

日督兵勇克復六合縣乘勝直擣天長二十五日薄
城下誘開城門記名總兵王茂元李昭宸等奮勇衝
入李提督督隊繼進投誠之陳士成率衆內應將踞
城逆首龔長春等擒斬殆盡降衆數千三日內克復
兩城奉

旨優獎

上海官紳議結夷兵勦賊

浦東廳縣復陷上海縣知縣劉郁膏率師往援失利
官紳集議請立會防局在藉刑部郎中潘曾瑋航海

人都謁

議政王軍機大臣議准與夷兵會勦

平定粵匪紀略卷十三

同治元年壬戌正月江北克復江浦浦口

李提督世忠攻克天長後乘勢進攻江浦浦口約守
壘之賊劉元成單玉功等爲內應正月初四日揮隊
直前賊衆驚潰劉元成等率衆倒戈殺斃僞報王秦
逆僞王宗操天福等七十餘名餘匪搜殺殆盡立復
江浦縣城次日至浦口城下九洲洲援賊鬪至李提
督激勵將弁痛殲之復得其城餘匪竄江邊追殺落
水者無算

浙軍解衢州圍克復常山平陽二縣

逆酋李秀成自陷常山與龍游踞匪同撲衢州府城
慶總督端飭總兵李定泰援勦屢有斬獲逆以大隊
衝撲官軍內外夾擊將賊壘悉數踣平賊退銅錢嶺
又破之遂克常山城賊向東北竄去是月平陽縣踞
逆亦爲總兵秦如虎勦逐收復縣城

逆匪窺伺上海英法各外國助勦

逆竄奉賢後直撲吳淞口進擾上海縣之東西擺渡
適法國輪船在彼開礮相助斃賊無算賊退分踞天

馬山陳坊橋參將李恒嵩破其壘敗匪退入青浦城
中其浦東大股踞高橋欲斷我要隘美國人華爾納
同英國水師提督何伯法國水師提督卜羅德各帶
中外槍礮隊伍礮船排列海濱華爾與美國人白齊
文撲進賊巢立將賊壘掃蕩各外國自天津就撫紛
集上海貿易極散和好立會防局後薛巡撫等撫綏
駕馭諭以同仇至是竟得協助之力華爾白齊文感
慕華風願更服色爲中國臣民薛巡撫以聞得
旨嘉獎並賞給四品頂戴花翎以示鼓勵薛巡撫卽飭於

松江教兵勇習洋槍協同勦賊稱洋槍隊爲常勝軍
浙軍由徽入浙屢獲大勝開化肅清

逆酋僞輔王楊輔清糾合大股分路竄擾蔓延浙江
開化之張邨等處窺伺衢州左京卿宗棠率練兵由
徽州之婺源入浙連破賊巢陣斬大小賊目六十餘
名生擒二百五十餘名斃賊二千餘名獲僞印五十
餘顆是月十八日復大破賊於馬金陣斬逆首藍以
道計斃長髮悍賊五千餘名生擒二百餘名奪獲大
小僞印九十餘顆開化一律肅清

二月十海軍勦除蕭塘賊壘

自攻破高橋後進擣蕭塘賊壘二月初一日華爾與副領隊白齊文率常勝軍猛撲各受重傷仍不少卻破壘五座官軍亦分路兜勦斬擒極多

楚軍進勦安徽廬州毀賊壘卡

副都統多隆阿率楚軍由舒城進勦廬郡漸次逼城逆乘我築營未堅出賊六七千人分股來撲我以馬隊包抄分路直前斃賊五六百名二月初一總兵雷正綰率隊渡河焚其礮船及買賣街初二四等日復

飭雷正綰與記名總兵石清吉等攻破賊卡四處木
城四道西門得勝門賊壘四座連日斃賊三十餘名
安徽潁州解圍

逆匪糾合捻股圍困潁州乞掘重濠密排鹿角以阻
官軍進攻之路布政使賈臻被困力保危城正月初
賊用地雷轟闕東北關營牆率衆上撲游擊范文英
李安邦裹創力堵適起狂風煙燄回撲賊陣我軍將
闕口堵合時勝大臣由太和縣督兵馳援初三日斫
砦衝入賊壘斃賊千餘賈布政在城巡瞭見勝軍得

手亦鑿隊出城夾擊破北面賊巢賊東竄我軍乘勢
掃蕩蹋毀東西南三面賊壘三十七座城圍立解

皖軍克復店埠要隘

店埠在廬州東北三十里爲定遠赴廬要隘前和提
督福巡撫攻勦時屯重兵於此逆築石城極堅皖軍
亟攻之逆首僞英王陳玉成由廬城添派賊首卜姓
協守總兵張得勝乘夜前往直抵石城一擁而入立
將卜賊砍倒賊衆驚潰追殺十餘里遂克店埠

三月福建延邵建遺缺道李鴻章統領湘淮諸軍東下

先是曾中堂議以曾布政使國荃由陸路先攻和州
巢含各州縣李道統領諸軍乘勝東下會馮提督子
材軍由鎮江進勦而上海賊氛日逼勢甚危吳署布
政使籌借餉銀二十餘萬兩由會防局僱備輪船仍
遣厲學潮錢鼎銘先後赴安慶迎餉到時曾布政使
全軍已次第前進李道軍前隊亦將開行錢鼎銘厲
學潮昏夜叩中堂營力陳上海危困及可進兵狀籌
議終夜中堂許之遂改令李道率程學啓等軍十一
營於三月初七日乘輪船東下初十日抵上海營城

南淮揚鎮黃翼升統領水軍相繼來會

三月揚州軍勦退渡江逆衆

逆匪由金陵下擾糾合蘇州之衆計十餘萬人渡江撲揚州都將軍興阿知賊衆且銳嚴約各營勿輕出戰俟賊至近登壁擊之賊傷亡甚多退而赴鄉掠食三月十三日我軍至徐家集等處誘賊出卡殺斃四百餘名十六日賊由法海寺起至虹橋七里甸等處排列長陣都將軍督隊出擊直趨虹橋翼長徐州鎮總兵詹啓綸副將左起龍由三汊河率隊抄擊各斃

賊四五百名十七日逆等選洋槍隊衝至西門外列
於河西此隊爲張提督玉良舊部在蘇州從逆者極
跳浪廣西平樂協副將刁經明等梟水往攻賊以大
隊壓下我軍驟退儘先都司廖長明率驍騎勇五百
人奮勇衝過十餘回合賊始漸退各軍轉身再戰大
敗之追殺十餘里始歸後數日復派隊分路攻擊賊
退往儀徵

皖軍奪取駐馬邨要隘

金陵逆渡江爲李提督世忠擊走竄踞安徽和州之

駐馬邨依險築壘以通山南竄北之路李提督飭總
兵王茂元等由林浦等處分道進攻衝爲兩截賊棄
壘狂奔我兵沿江趕殺所有賊壘一律蹋毀立將駐
馬邨要隘奪回

鮑軍克復青陽縣

曾大臣派浙江提督鮑超於上年十二月進攻青陽
壘破援賊本年二月十五日飭副將劉順隆等先平
西北門山背賊壘濬治長濠爲四面合圍計城賊勢
蹙潛糾浙江死黨三萬餘衆進撲銅陵冀分我軍之

勢以解青陽之圍三月初六日鮑提督出青陽分軍
親率赴援初七日遇賊於橫塘飭三路進攻又令左
石抄擊賊恃衆悍迎拒兩時副將王衍慶等大呼陷
陣副將顏紹榮等潛取小徑縱襲賊後知府伍華瀚
等分領馬步四出盪決遂將橫塘等處百餘卡二十
六壘一律剷除先是僞奉王古隆賢偵知鮑提督分
兵而北陰統涇太惶賊在青陽南門外豬婆店增築
九壘將欲阻我之師以通糧路適鮑提督已振旅而
還遂於十五日督飭將士拔開鹿角躍過濠溝不逾

時而九壘悉毀自是軍心愈壯賊膽愈寒鮑提督知青陽利在速攻乃於十六日秣馬蓐食銜枚疾進諸將弁裹創血戰志在必得劉順隆等攀堞先登衆軍乘之登時將縣城克復

曾營水陸各軍擊敗竄匪舊縣荻港等處肅清

蕪湖首逆偽堵王黃文金等糾黨二萬突入荻港三月初四日復分股竄陷繁昌之舊縣勢將下伺三山峽初五日水師營官李朝斌等在營房背擊賊獲勝遂率所部駛上舊縣會合營官萬化林等登陸襲賊

排礮環轟賊負創潰走初六日亦多斬獲逆不敢踞
卡專事野掠潛約荻港一股勾結繁昌蕪湖魯港之
賊別圖窺竄時同知曾貞幹陸師進駐三山峽距舊
縣三十里密諭各營堅壁以待十三十四等日賊果
分道來犯曾貞幹卽率各營及螃蟹磯水師循江岸
而進一敗賊於洋夾河再敗賊於三華山賊始悉衆
遠遁荻港等處一律肅清

河南南陽府戒嚴

楚軍攻安徽廬州甚急僞英王陳玉成密令僞扶王

陳得才率黨三萬餘人勾合捻匪孫光危陳大瀋兩
股約二萬餘人出河陽唐縣直逼河南南陽府城以
圖分我兵力河南鄭巡撫元善駐師許州派兵勇馳
援湖北官大臣等亦派總兵何紹彩領新訓八營由
宜昌移營赴隨棗襄樊探蹤會勦竝咨陝西瑛巡撫
檄迅撥重兵以防商維

賊撲江南三山峽官軍併力擊退乘勝克復繁昌縣
偽匡王賴文鴻竄入繁昌縣糾約彼處踞匪撲我三
山峽官營同知曾貞幹升高瞭望見旌旂掩映山谷

間往來如織乘逆未逼營督率各軍分道馳勦賊隊
更番迎撲我軍槍礮齊施乘風縱火羣賊大亂殪其
魁吳大猷敗匪退踞繁昌城內不敢復出曾貞幹以
有隙可乘定計潛師襲之三月二十日夜掩旂息鼓
進薄城下束薪爲炬列礮環攻賊衆奔潰薄城將士
從西北闕處猱升而上衆軍一齊擁入遂於二十一
日克復繁昌縣城

水陸各軍克復巢縣含山縣和州三城攻奪銅城牯雍
家鎮裕溪口西梁山四要隘

江蘇布政使曾國荃回湘募勇於二月中抵皖與水營總兵李成謀成發翔等熟商賊之糧道在巢湖欲制賊命必先從巢縣進兵欲攻巢縣必先從銅城牐下手三月十五日曾布政親率十二營由林頭過河以遏巢縣東北一路候補道劉連捷等督飭各營赴望城岡以扼巢縣正南一路逆分股來撲均爲我軍奮力擊退曾布政卽派隊會水師攻銅城牐十八日會於渡口以水師攻牐東石壘以陸師攻牐西土壘總兵成發翔等帶隊登岸抽刃環刺逆黨棄壘竄散

石壘既破土壘亦平立將銅城牯攻奪復乘勝攻取
雍家鎮時曾布政親率陸師渡河已在巢縣蘄山等
處紮營副將王東華鄧永林等水師亦先後進駛併
力奮攻二十日收復巢縣是日分三路窮追直抵含
出城外逆衆聞風喪膽相率狂奔各軍遂克含山縣
城二十二日進襲和州乘賊譁亂之後追至江口之
鍼魚背合軍痛勦江流爲赤二十三日攻克裕溪口
賊之據金陵也以全力扼東西梁山東爲古之博望
西爲天門俗以東西梁山呼之兩山對峙大江至此

一東水急流洄較小孤山尤爲形險曾布政以此關
金陵鎖鑰統全勝之師循江復上逼西梁山賊壘而
陳二十四日賊向江州一路衝走水陸各軍爭起搏
擊逆衆潰亂引頸受誅遂克西梁山自是金陵重關
我軍已得其半

鮑軍連破賊壘克復石埭太平涇三縣

浙江提督鮑超在青陽息兵三日策逆黨立腳未定
利在速攻應先取石埭太平以固徽州之防繼取涇
縣以達甯國之路二十日徧諭諸將裹飯傳餐捲旂

疾走次軍龍口二十一日由龍口直抵石埭縣城城
壘各賊閉關死守我軍分五路環攻填濠而進將附
城十四壘一律削平城上矢石交下猝不可近總兵
婁雲慶等率領將士直薄城根從西北二門斬關而
入立復城池石埭既克賊愈惶懼糾合援賊數萬人
麇集甘棠鎮以阻我師二十二日各營分三路進擊
復分兵由山後整隊衝出賊不能軍盡棄甘棠十七
壘而遁我軍悉力追遂進撲太平縣西門奪賊高山
四壘俯瞰城中賊遂驚潰棄城逃遁縣城亦收復二

十八日我軍馳至灣灘分路夾擊破其卡壘尾追至涇縣城下毀其西門水卡及東南土壘一擁入城又將涇縣克復

曾軍會克魯港要隘進復南陵縣

繁昌既拔蕪湖賊援潛在魯港屯踞以圖抗拒同知曾貞幹會同水師總兵李成謀分撥水陸各營合力併擊二十七日曾貞幹等引軍分攻南北兩岸李成謀督率各營在江面專擊水路之賊奪其船百餘隻撲水死者甚衆陸師見水賊已挫急攻石壘石卡水

師登岸助勦賊卽潰退立將三壘十餘卡埽盡魯港
餘匪悉向蕪湖竄走二十九日曾貞幹飛調分守魯
港各軍於四更時各挾火具馳抵南陵城下薄城而
營萬炬齊燃賊衆倉皇無措曾貞幹揮令施放火礮
轟坍城墻數丈各勇攀躋而入遂復南陵縣

浙軍回援衢州江山兩城圍解

僞侍王李侍賢率巨股圍撲衢州府城總兵李定秦
嬰城固守左巡撫宗棠肅清開化後馳抵常山攻克
招賢關逆衆棄城狂竄追殺二百數十名衢城糧路

遂通其撲犯江山之賊屯踞大溪灘毛邨一帶已革
臬司李元度親率十營進勦毛邨獲勝左巡撫復飭
知府劉典率所部會合進攻石門花園港賊巢毀壘
十四座殺賊數百名賊勢不支乘夜向台州潛遁

四月徽州防軍收復旌德縣

鮑軍克復青石太涇四縣旌德與甯國府賊勢中斷
駐徽之福建臬司張運蘭恐踞旌德之賊鋌走徽境
遂於三月三十日率所部進勦親督戰士懸軍深入
排礮仰攻轟坍城垣十餘處總兵張運桂冒火礮援

而上將士受傷甚多張運蘭恐有挫失暫令收軍四月初二日方圖決戰賊已宵遁遂復旌德縣

揚州軍續獲勝仗全境肅清

賊退儀徵後仍分踞各路時出擄糧四月十一日總兵詹啓綸帶隊出勦於儀徵北門十二里岔等處斃賊數百名獲騾馬二十餘匹大小洋槍百餘桿其竄擾沙漫洲等處逆匪亦經江南水師浙江黃巖鎮總兵黃彬等分路截勦過儀徵三十餘里逆黨計窮遠

竄揚境肅清

曾營水陸各軍克復太平府蕪湖縣攻奪金柱關東梁山各要隘

逆匪竄踞金陵固以東西梁山爲鎖鑰亦以蕪湖爲屏障而尤以金柱關爲關鍵兵部右侍郎彭玉麟與江蘇布政使曾國荃定計水陸并攻將上游水師悉調赴裕溪口曾布政馬步十五營近逼金柱關下彭侍郎派總兵李朝斌等從上下游攻擊曾布政復潛率各哨疾抵太平府北門揮軍突進逆衆不及閉關相率狂奔我兵擁進北關遂於四月二十日將府城

克復彭侍郎親率各軍瞭見曾布政已繞出三汊河遂分水師爲三隊以二隊分扼江汊要隘以一隊攻金柱關礮箭環擊逆衆於烈燄中衝突而出我軍躍上隄埭短兵擊刺積骸滿渠卽時攻克金柱關將三汊河上駟渡數十壘平毀奪獲大礮三百七十餘尊旂械萬餘件其時分撥總兵黃翼升等軍往襲東梁山亦已一戰而下移軍進次蕪湖先是同知曾貞幹有招降蕪湖之約至是金柱關等相繼攻拔正可乘其自疑而圖之二十二日曾貞幹率各營循江而進

適與黃翼升等水師會合萬礮同轟羣賊內亂立將
蕪湖克復提督王明山等復攻破烈山石壘二座上
下名城要隘悉爲我有矣

皖楚軍會克廬州府勝大臣購擒首逆陳玉成

僞英王四眼狗陳玉成與僞忠王李秀成皆賊中驍
健洪逆倚爲左右手李秀成竄擾蘇常陳玉成則盤
踞皖楚交界之處自我軍攻克安慶陳玉成率黨由
石牌而上調宿松黃梅之賊同至野雞河欲赴湖北
德安襄陽一帶招集醜類以各賊酋不從乘夜由太

安竄廬州衆志漸紛洪逆督責復切遂欲效死於廬
久踞不退楚軍荊州將軍多隆阿節節攻打四面合
圍至是月初十日密約皖軍總兵張得勝帶隊至北
門設伏誘戰逆果出城迎敵鏖戰逾時我軍佯退引
賊追過小岡見我軍旌旂密布驚潰回奔多將軍揮
兵掩殺斃賊甚多賊不敢復出張得勝等紮營緊逼
城垣逆已路窮率悍賊分出東北兩門攻撲皖軍挑
選精銳出營力戰楚軍已於東門獲勝馳至北門從
賊後包抄斷其歸路賊遂大潰兩軍合力衝殺乘勢

搶越城濠逆衆回城無路遂向西北奔竄轟斃殺斃
及落水死者不計其數副都統克蒙額等各帶兵勇
會合夾擊多將軍等分隊進城搜殺餘匪淨盡卽於
十五日克復府城統計殺賊九千餘名生擒老賊八
百四十七名內有僞官二百十三名訊明正法多將
軍派隊追勦陳玉成率餘黨三四千人於十七日竄
至壽州城外中津渡先經勝大臣密飭已革川北道
苗沛霖與已革副將苗景開設計開城誘之玉成帶
悍賊二三千人入城苗景開卽將吊橋撤去會同署

游擊朱佩棻齊集兵練將王成縛獲竝搗僞導王陳
仕榮僞從王陳德僞統天義陳聚成僞天軍主將向
士才僞虔天義陳安成僞禱天義梁顯新及親隨僞
官二十餘人擒逆張落刑聞知糾合大股擒逆七八
萬人於二十六日突至江口集北岸屯紮意欲半途
劫奪各營與苗練併力攻勦立將前隊悍賊擊潰擒
逆紛紛逃竄追殺二十餘里將賊壘百餘座悉數埽
除殺賊二三千名餘衆奔潰解陳玉成等至勝大臣
營訊供奏奉

諭旨卽將陳玉成在軍前凌遲處死傳首皖楚以伸

國法而快人心陳仕榮一併正法苗沛霖前此作亂壽州
獲譴極重至是免其治罪後仍謀叛於同治二年冬
伏誅

陝西各軍殺賊於尹家衛等處

粵逆僞扶王陳得才等勾結捻匪由河南竄入陝西
武關復由孝義廳竄出山口至尹家衛直逼省城游
擊孟柏林帶兵堵戰陝西瑛巡撫榮添派參將阿揚
阿帶兵會同紳團進勦四月初九日賊分兩路蠶擁

而至阿揚阿列隊抵禦斃賊數百人阿揚阿身受重傷猶復奮勇殺賊官兵無一退卻提督孔廣順調兵應援賊不敢進另股從韋曲入犯亦爲兵勇民團截勦斬獲長髮老賊首級九顆殺賊六十餘名向藍田宵遁其圍雒南之賊經署知縣張國均力戰解圍此外零股復經地方文武帶領兵勇民團追剿殆盡商雒已無賊蹤

上海軍克復青浦縣

四月初三日參將李恒嵩等率松滙官軍與副將銜

華爾之常勝軍攻克嘉定縣進規青浦十四日英法將士環攻南西二門華爾攻東門李恒嵩等督飭各隊竝青浦縣知縣廖秩璋帶團會攻北門其小西門水道亦經已率提督曾秉忠派游擊曾毓行等統帶礮船堵截賊匪負固抗拒西兵施放炸彈火器竝以大礮轟塌西南城墻十餘丈卽由西門登城華爾督勇繼進羣賊惶亂我軍一擁而上殺賊甚多餘匪奪門衝出痛加截殺進退無路投水死者不計其數陣斬悍賊千餘名生擒三千餘名當將青浦縣城克復

英國提督何伯法國提督卜羅德奉

詔嘉獎華爾授副將

皖軍追勦援賊江北肅清

揚防肅清後賊尙麇聚江邊各邨莊李提督世忠親督馬隊奮勇直入兵勇均奮不顧身短兵相接賊勢不支適副將李顯發等各隊馳至逆膽已喪李提督立投誠免死旗被脅之衆棄械乞命者三千餘名賊衆驚惶南遁我軍併力追殺殲斃二千餘名生擒九百餘名竝先期設伏江浦東岸擒斬無算賊衆爭船

搶渡撲河落水者極衆江北一律肅清

楚軍追勦竄逆直抵壽州大獲勝仗

陳王成竄出廬州時率黨三四千人已盡殲於壽州
矣其大股餘逆由吳山廟瓦埠余家埠基橋逃竄多
將軍派溫德勒克西等帶隊窮追疊次抄攔截殺計
斃賊一萬七八千名內有黃衣賊目五十餘名生擒
一千三四百名訊明正法廬城悍賊至此殲除殆盡
賊擾陝西渭南等處與川匪藍大順藍二順相通
粵逆偽扶王陳得才偽端王藍成春偽增王賴文光

偽啓王梁成富偽主將馬融和等均爲偽英王陳王
成羽翼前由河南邊界竄逼陝西省城官軍擊敗東
竄渭南經知縣曹士鶴登陴守禦因賊衆兵單縣城
於四月二十四日失守曹士鶴手刃數賊力竭捐軀
其妻萬氏罵賊殉難縣丞銜陳茂軍功張龍驤於黃
家屯戰歿陳得才等因陳玉成在廬州被圍甚急南
向往援由陝境竄河南南陽一帶其時有川匪藍大
順藍二順李短搭搭等先於咸豐九年在雲南昭通
府倡亂蹂躪全川戕官據城經川省痛勦李短搭搭

就擒藍大順與藍二順弟兄分股竄入陝西藍大順
一股踞洋縣竝陷佛平廳藍二順一股踞商州山陽
縣至是與粵逆陳得才等相通互爲援應

上海軍攻克南匯奉賢交界處之南橋鎮賊壘隨收復
柘林奉賢二城法國提督於南橋陣亡

四月初十日李道奉

旨署理江蘇巡撫接統諸軍四月十五日受事卽令參將
程學啓滕嗣武都司銜今直隸提督劉銘傳同知潘
鼎新通判韓正國以四千入進南匯縣周浦鎮爲北

路英法兵自松江進金山衛爲南路兩軍相距百數
十里以嘉定青浦新復飭常勝軍守之十九日會攻
南橋鎮逆恃三道土城更番施放槍礮子密如雨法
國提督卜羅德勇往直前撲近城濠揮軍冒烟衝入
賊衆驚潰當克南橋鎮賊壘二十日進攻柘林賊方
負固英兵及常勝軍營西南金山賊來援擊走之二
十二日遂克柘林二十三日奉賢縣知縣陳化鯤率
民團收復奉賢縣程學啓等屯周浦亦於二十二日
屢毀杭頭新場賊壘追賊至南匯卜羅德於南橋督

戰時中槍陣亡李巡撫馳奏

上以遠涉重洋協同中國兵將勦賊臨陣捐軀無忝使命
勇烈可嘉令李巡撫派員

賜祭竝賞庫貂彩絨給其家

知府李慶琛覆軍太倉致嘉定縣城失守

時西兵方議直趨金山衛知府李慶琛以五千人攻
太倉蘇賊李秀成自率衆來援李巡撫檄慶琛相機
撤圍城之兵慶琛未卽應命四月十九日賊大至全
軍皆陷慶琛及同知周士濂死之嘉定青浦寶山同

時大震李巡撫檄英法二國全軍回援而移周浦之
軍屯南橋以扼浦東要隘二十日賊至寶山參將姜
德劉錫溫悉力固守二十八日賊別隊由婁塘攻陷
嘉定縣城英法二提督護其兵及我軍突圍走上海
李巡撫令副將熊兆周知縣率克勤駐法鎮扼滬西
賊遂踰青浦徑逼松江

陝西賊攻撲潼關官軍勦擊獲勝立解城圍竝收復
陽縣

逆匪由陝西之華陰縣竄至潼關經漢中鎮哈連升

潼商道蔣徵陶督率兵勇固守逆衆直撲西門勢甚
猖獗官軍開礮轟擊斃賊多名其竄撲東門外之賊
亦轟斃四五百名逆衆環攻三晝夜遂往東移動官
軍追殺一千餘名生擒百餘名逆衆由小路竄向河
南閩鄉一帶城圍立解其山陽踞匪因潼關之賊敗
竄勢卽窮蹙副將張維義等督率兵團勦逐之當將
山陽縣城收復

浙軍克復台州等一府六縣

逆匪竄踞台州竝溫處各屬慶總督端札飭紳團會

同官弁分路攻勦署仙居縣知縣費希濂督帶民團
圍攻田市賊卡殺賊四百餘名進攻仙居縣城復斃
賊數百名賊退入城四月初三日民團設伏誘賊出
城殺賊數千竝擒獲逆首延天義李元徠臬示當將
仙居縣城克復卽補道蘇鐔蓉等於初九日分帶兵
團攻復台州郡城殺賊甚衆竝擒斬逆首僞王李洪
藻李遇茂二名各兵團直擣黃巖分路截殺陣斬僞
主將李尙揚僞佐將鄧積士初十日克復黃巖縣其
太平甯海二縣亦經地方官獎率義民攻殺克復至

分踞縉雲樂清二縣逆匪疊經夾擊已革縉雲縣知縣周士英督民團於四月二十日復縉雲縣總兵秦如虎等派撥師船於四月二十九日復樂清縣餘匪竄遁計二十六日之間克復台州一郡仙居黃巖太平甯海縉雲樂清等六縣藉民團之力爲多士氣爲之一振

浙軍克復甯波府鎮海縣青田縣

浙江前甯紹台道張景渠招集廣艇借助英國兵疊克甯波府鎮海縣城英國提督何伯請江蘇李巡撫

分常勝軍前往助守時有大股賊竄踞青田縣慶總督與總兵秦如虎各派兵練及長龍礮船往勦環攻三晝夜四月十二日黎明青田縣知縣吳兆祥等率勇由東門架梯直上手刃執旗賊目二名兵勇一擁而登逆衆不能抵禦由西門竄去立將縣城克復五月上海軍招撫賊目收復南匯縣並克復川沙廳僞什天安吳建瀛等統衆踞南匯與僞淋天福劉玉林屢爲李秀成養子所凌自官軍蹋毀杭頭新場賊壘後吳建瀛等屢次乞降五月初一日都司銜劉銘

傳等分帶勇團直抵城下城內降衆全行薙髮竝將
偽印兵器呈繳官軍整隊入城秀成養子方踞金山
衛聞吳建瀛投降令偽將吉慶元率賊萬餘犯南匯
射手書偽示入城吳建瀛隨同署知縣鄧賢芬帶勇
擊卻之初四日復合川沙賊來犯劉銘傳吳建瀛登
城固守竝派隊出城夾擊賊衆敗潰官軍直逼川沙
賊隊由海塘窟出沿途截殺甚衆遂於初五日收復
川沙廳城進規松江

浙江湖州陷在籍總辦團防布政使銜福建糧儲道趙

景賢被執不屈

景賢前刑部趙侍郎炳言第三子由舉人議叙知府幼有奇氣以千古自命善撫循士卒人樂爲用自成豐二年總司湖州圍防每戰必捷洊升道員加布政使銜

簡授福建糧儲道屬杭州再陷逆衆於十一年十二月以全力困之戰守數月糧援並絕五月初三日千總熊得勝開門延賊城遂陷景賢冠帶罵賊不屈被執至蘇州拘繫之後至二年三月我兵克復太倉潰賊回

蘇播言景賢通官兵將襲蘇逆首僞慕王譚紹洸詰之曰汝通官兵耶曰我本官兵何得謂通曰汝獻蘇州耶曰蘇州本

大清土地何得謂獻曰汝今死期至矣景賢大笑曰求之一年而不得者遂肆謾罵逆舉洋槍一發中胸而殞

事聞奉

旨照巡撫例賜卹予謚立傳

曾營水陸竝進疊復秣陵關江心洲等六要隘圍逼江甯府駐軍雨花臺

江蘇布政使曾國荃於四月二十八日率所部各營
乘勝前進破周回一十遂駐江甯鎮之板橋熟察形
勢必從大勝關三汊河下手陸師乃有運糧之路水
師乃有立營之所然橫距三十里外尙有秣陵一關
環水魏時亦天然雄鎮也賊備未嚴可以襲取五月
朔曾布政引軍馳抵關下守關賊酋汪伍等舉衆獻
關初二日奪取大勝關三汊河二壘平之彭侍郎聞
曾布政懸軍深入急約提督王明山率水師策應初
三日拔頭關過此以往則爲江心洲堅大石壘倚洲

雙聳彭侍郎會同王明山親督將弁直驅舟次各勇
挾火具登岸延燒蘆草一片火光我軍振臂齊呼躍
入賊壘燒薙羣醜竝奪取蒲包洲遂泊金陵之護城
河口曾布政由陸路倚護水師驅軍逼紮雨花臺距
金陵南門五里許

鮑軍進攻甯國府勦平寒亭等處逆壘

僞輔王楊輔清糾衆十餘萬竄踞甯國府城復分股
屯聚團山寒亭等處阻我進兵之路浙江提督鮑超
飭將士進薄寒亭逆衆出巢猛鬪羣賊響應數逾四

萬鮑提督直擣中堅縱橫盪決總兵宋國永等橫躍
入陣衝賊數段山後伏兵齊起扼賊歸路賊始驚潰
追殺二十餘里將寒亭管家橋柵家甸獅子山賊館
數十處賊壘三十五座一律蹋平殺賊六千餘人僞
衛王楊雄清糾合零匪遁回甯郡

河南軍勦賊於澠池等處

逆匪由陝西潼關小路竄撲河南閩鄉縣因城垣坍塌
被賊入知縣王其昌巷戰被戕陝州知州王詒
督兵馳援立即克復逆匪回竄由新安澠池一帶向

宜陽大路疊撲嵩縣伊陽葉縣均經地方文武及帶
兵將領堵剿並於澠池縣之濬旬宜陽縣一大辛旬
汝州之古堆邾縣之長阜等處疊有斬擒逆蹤漸戰
仍游弋於邊界

上海軍連獲大捷松江解圍滬防解嚴

逆匪圍逼松江府城李巡撫以松江扼浦東西之中
爲尤要地不可失自赴新橋令參將程學啓等時出
兵緞賊屬華爾撤歸甯波防軍與知府賈益謙及李
恒嵩等嚴令固守伺隙出擊賊初營西門妙嚴寺土

山逼城近華爾以礮毀之竝奪其大張涇營以通上海初八日賊復攫據之增築礮台環攻四門我軍乃盡括城中大礮數十洋槍千餘環列城堞擊賊兩晝夜不絕賊頗創初十日常勝軍三百人自甯波歸與賊戰於寶福浜毀其礮臺城內各軍乘夜分門出擊殺斃無算賊向西北分股竄遁次日華爾思往青浦而賊騎仍逼城且青浦圍裏數重不可守乃議棄青浦十三日夜分簡常勝軍之銳猝破天馬山賊營由礮路突入青浦城盡焚米糧輜重軍船率隊伍死戰

出併力守松江其分紮廣富林及泗涇大股賊匪經
李巡撫督兵往勦十一日前隊近逼泗涇斃賊多名
生擒十餘名立將賊卡攻毀餘賊遁入營斷橋以拒
李巡撫令參將張遇春等復誘賊出巢轟斃賊數百
名二十一日逆首偽聽王陳炳文等糾集悍賊五六
萬直撲官軍新橋營盤蔓及徐家匯九里橋包過營
後直逼漚城勢極兇猛其圍攻開字營賊匪填濠拔
椿洋槍大礮併力死撲參將程學啓督兵抵禦槍礮
磚石同時竝施賊匪尸與濠平隨斃隨上勢將躡登

程學啓手燃巨礮乘勢開門衝殺賊衆卻而復進自辰至申凡八九次另股分圍林字等官軍各營亦經通判韓正國等督兵殺斃悍賊數百名賊匪更番疊上四五次不退李巡撫督隊分三路進援參將張遇春等遇賊於徐家匯之九里橋分路併攻張遇春馬傷落地復奮砍賊目奪馬躍上都司張志邦斬取賊目首級擲入賊陣逆衆萬餘鬩然駭退官軍追至營邊逆匪數萬復合抵死鏖戰各營官兵齊開壘門內外夾擊賊盡棄械狂奔自相踐蹋而死共計殺賊三

千餘名落水淹斃及解散脅從各數千名生擒四百
餘名奪獲槍礮馬匹旂幟數千件槍傷偽聽王陳炳
文其偽納王邵永寬亦負傷竄遁二十三日官軍復
乘勝進攻泗涇逆衆喘息未定不戰自走當將賊壘
數十座全行蹋毀竝焚燒賊棚三千餘座其附近廣
富林等處踞賊亦聞風全數逃走松江圍解滬防亦
解嚴

四川逆匪竄入貴州正安等州縣境內兵勇擊卻之由
黔西邊界仍竄川境

粵逆僞翼王石達開竄擾四川分股入貴州正安等
州縣境內經貴州韓巡撫督飭兵練擊敗後齎聚鴨
溪總兵吳安康與候選知縣羅燦奎帶練會勦四月
二十八日夜挑選練勇暗入鴨溪施放火箭火彈逆
衆驚亂紛紛潰遁我軍追殺數十里餘匪從黔西州
邊界仍竄入川韓巡撫等督飭文武跟蹤追勦並會
合四川官軍兜擊之

川軍攻勦石逆立解綦江縣城圍進攻長甯縣

石逆竄涪州爲官軍擊敗尙擁衆數萬圍攻綦江縣

城知縣楊銘率衆固守知府唐炯率黔勇由石佛岡
攻進焚燒賊巢城中練勇殺出前後夾攻賊衆披靡
城圍立解道員曾傳理先駐合江扼賊上竄臬司劉
嶽昭總兵唐友耕會同唐炯率隊緊追沿途截殺逆
又圍攻永甯復經兵勇擊敗向興文奔竄其另股賊
匪張逆圍攻江安因官軍由藍田壩急進聞風解圍
先遁遂勾結石逆攻陷長甯縣劉嶽昭等派隊追擊
賊遂分竄珙縣及高縣之巡檢寺等處復經曾傳理
馳勦將賊壘焚燬賊遁回長甯各路兵勇會攻之

陝西山陽縣踞賊藍三順通粵匪竄陷湖北鄖西縣官軍克復之

藍三順踞商州之山陽縣於四月內與粵匪陳得才等通五月初九日竄陷湖北鄖西縣官大臣會湖北嚴巡撫樹森先飭調赴隨棗之總兵何紹彩率新訓四營往勦復派安襄鄖荆道金國琛等帶軍馳往逆衆聞風喪膽分股由馬安次溝香口等處潛竄官軍整隊馳擊於二十六日將縣城克復

六月鮑軍克復甯國府旋收甯國縣城降其酋洪容海

偽輔王楊輔清竄踞甯國聞寒亭戰敗卽糾約遊黨
繞城結壘延亘三十餘里力拒官軍五月初十日浙
江提督鮑超引兵進紮烏沙舖相度形勢十五日先
令總兵婁雲慶等設伏於望城岡仍令總兵宋國永
等誘賊賊果輕我兵寡直壓山岡而下鮑超復令總
兵黃慶等張兩翼抄來賊已卻走瞥見旂幟掩映山
谷間以爲賊衆來援回鞭轉鬪伏軍突起騰蹕而前
衝賊數段參府韋志俊等截斷賊後宋國永揮軍進
擊遇者輒殪逸出之賊又爲副都統明興騎隊追及

斃賊約八千人遂破望城岡竝將抱龍岡一帶十數
邨逆壘悉平逆首復陰結另股列隊城根築壘堅拒
六月初八日鮑超率各軍逼壘下寨逆黨日出巢迎
敵屢爲我敗十四日各僞王出大隊於南北兩門以
冀夾攻鮑超督飭將弁向各門分進搏戰逾時賊旂
漸亂潰奔浮橋我軍焚橋截殺幾無脫者南路之賊
旣敗北路遂遁適西路之捷亦至削平附城賊壘會
集於小東門外十五日楊逆復收合餘燼以圖再戰
鮑超率各軍驟進勢如風雨逆已敗至洪林橋忽回

陣返撲鮑超令作圓陣圍之環加勦洗楊逆單騎脫
去城賊見首逆不返議降議守紛紜未定我軍已自
洪林橋直入東門斬雉無遺立將府城克復鮑超追
勦敗匪隨收復甯國縣城有僞保王洪容海驍勇善
戰本爲石達開死黨咸豐十一年轉隸僞忠王李秀
成隊下賊黨援甯郡洪容海在其中屯衆數萬於孫
家埠未開一仗卽遣人乞降稱與羣賊有隙願取郡
城縛輔逆以獻鮑超與之期約許以自新適郡城克
復洪容海經走廣德於二十日襲取州城又申言率

衆六萬就撫曾大臣察其誠乃許來歸酌畱三千人編爲六營餘部一律遣散

金陵陸師屢卻撲營悍賊

江蘇布政使曾國荃督軍在雨花臺秣陵關等處屢次擊賊獲勝六月初六初十等日僞王宗李逆糾集悍黨自蘇州來援火器對轟互有損傷十六日城中出賊四五萬人分撲各營我軍憑濠穩擊斃賊極多候補道劉連捷等見黃衣騎馬賊指揮督陣猛鷲無匹潛燃巨礮一發而殪卽乘羣賊靡亂之際併力掩

擊立解重圍各將弁亦拔卡而出馳斬賊酋與劉連捷所派之隊合軍追勦殲賊近二千人二十四日甯國餘匪復句合城賊襲營知州易良虎等令各勇穴墻施礮伺賊稍懈出擊之逆衆返奔不及半就誅戮東路之賊亦經劉連捷引軍擊走俘馘無算

陝西粵逆陳得才等竄河南

陳得才等自渭南竄出欲至安徽廬州援狗逆陳玉成經西安將軍托明阿等督飭兵團沿途截勦斃匪數百餘名逆衆竄至河南聞陳玉成已爲我軍擒戮

因在浙川內鄉一帶掠鄉攻城均爲各地方官擊敗復乘雨圍攻新野縣城竄入唐縣境內唐縣知縣高天寵督勇截勦殲賊三百餘名生擒十餘名河南鄭巡撫元善飭調各路官軍馳往兜勦

上海軍攻克奉賢縣進克金山衛城

初奉賢縣旣克未設守仍爲賊踞五月十一日知府潘鼎新都司劉銘傳令降酋吳建瀛劉玉林攻復之玉林率所部由柘林進攻漕涇鎮賊營又破之時賊踞金山衛城地界江浙爲浦東門戶李巡撫議規取

金山檄鼎新等屯軍漕涇由海塘進東北檄華爾由
張堰進西南會攻之十四日官軍至南沙十七日軍
功潘鼎琛把總徐道奎攻毀海塘賊壘直薄城下逆
衆於南門突出二千名搏戰銘傳燃洋槍斃其魁賊
始却十八日參將覃聯陞帶隊馳至而華爾及李恒
嵩軍亦至進紮城根屢敗逆衆遂於二十一日將衛
城克復浦東一律肅清李巡撫令鼎新銘傳聯陞三
軍分駐要隘扼守之

江南提督黃翼升統水師至上海

翼升奉

旨統水師東征於五月間下駛以二營駐浦口四營分駐揚州下之三江營六月初八日自統四營至上海會大臣奏請以翼升署江南提督

平定粵寇紀畧卷十四

同治元年七月楚軍援豫解南陽府圍

粵賊陳得才等竄入河南境會合五月內竄宜陽
汝州之賊同犯南陽府鄭巡撫元善劄飭候選道
何元普督馬步兵勇往禦由唐河至白河力戰十
餘日竝會南陽鎮總兵圖塔訥兵勇進紮河口賊
復糾合賴毫捻首陳大濤一股共眾十餘萬將我
軍包抄分黨攻府城在白河兩岸築壘延袤百餘
里勢極披猖鄭巡撫添派撫標副將盧得勝由汝

州裕州前往湖北官大臣等劄飭安襄鄖荆道金國琛候補道梁作楫督馬步十餘營越境馳援內外夾擊竝有民團助戰殺賊二千有奇生擒正法一千餘名於七月十六日解圍賊由鎮平內鄉竄逸官兵分道追之

石達開黨賊由川省竄陷湖北鄖陽府屬竹谿竹山縣旋即收復

石達開一股由四川之大甯竄至陝西平利縣擾及楚邊七月十九二十六兩日闌入竹谿竹山二

縣均爲團勇擊退城卽收復賊仍竄陝西平利關
埡子松杉河等處

賊由河南竄擾河北光化縣屬之老河口

陳得才等自陳玉成伏誅後窮無所歸前竄南陽
爲楚軍擊退復由淅川廳馬蹬雙河鎮厚坡李官
橋一帶竄擾時河南兵力單薄無制勝之師致被
沿途裹脅竝糾合捻匪復有眾四五萬是月竄湖
北光化縣所屬之老河口官大臣嚴巡撫飛飭道
員梁作楫統率凱字五營輔以馬隊馳往督同在

防水陸各營合力勦辦

上海軍復克青浦縣又會同浙軍攻克餘姚縣

李巡撫謀復青浦令副將程學啟等進屯北簕山
劉士奇郭松林屯塘橋巡撫弟統領李鶴章率親
兵營往督之常勝軍華爾李恒嵩又自松江來會
分圍各門十四日夜學啟敗賊於東北門十五日
以大礮裂城垣十數丈諸軍鼓勇畢登賊奪路逃
遁鶴章於西北門設伏截殺之窮追至白鶴江黃
渡遂將青浦縣城克復李巡撫令學啟軍與提督

黃翼升水師駐守青浦時分往甯波之常勝軍亦會浙江道員張景渠軍攻克餘姚縣城

浙軍攻克處州府竝收復縉雲縣

賊嶠踞處州牽制援師屢攻不克慶總督端派總兵秦如虎林文察力圖進取又令營官馬雲標侯定貴分帶楚勇夾攻松陽民團啣賊甚赴文察營請借號衣軍火以助官軍文察給之先攻處郡東南連戰皆捷秦如虎身受礮傷督戰自若賊傷斃無數開門逃竄遂於七月十九日克復處州府城

賊復分竄縉雲縣各營躡蹤追殺敗賊聞風而遁
收復縣城

八月楚軍赴陝攻克荆紫關連獲大勝

統帶楚軍多將軍隆阿白克復廬州後奉

命督辦陝西軍務已抵商南復奉

旨勦辦粵豫各賊時粵賊糾合豫捻已由浙川後路暗

襲荆紫關踞之多將軍自商南督軍回勦八月二

十一日夜由陡溝出隊偽扶王陳得才與偽啟王

梁成富僞主將馬融和等率黨萬餘列隊迎拒副

都統穆圖善總兵趙旣發姜玉順王萬年等分軍
爲四前後環攻賊隊紛潰我軍追至荆紫關縱火
攻之擊死賊目三名生擒七十二名斃賊三千四
五百名焚溺死者無數餘賊向淅川大路而遁踰
關追殺二十餘里天始黎明遂奪荆紫關

楚軍擊退光化縣老河口各賊

南陽羣賊於上月竄老河口距光化縣城十里道
員梁作楫援兵未至八月十七日圍撲縣城蔓延
三四十里勢甚披猖駐防總兵成得升等會督水

陸兵勇迎頭痛擊斃賊七八百名退踞南門外馬窟山十八日黎明復出大隊蠶擁而來我軍連開大礮轟斃數百名賊復紮旛從上流潛渡亦爲水師焚勦溺斃無數城圍立解成得升等復率所部進勦老河口賊壘乘雨夜月黑出其不意各路齊進焚其棚壘賊眾奪路狂奔追殺二十餘里賊由襄樊下竄

上海軍克復浙江慈溪縣副將華爾陣亡

浙江賊窺伺甯波值廣艇與法國兵構釁引賊攻

陷慈溪縣致甯波鎮海餘姚同時竝震華爾聞警
率常勝軍越境攻之八月二十六日抵慈溪指揮
兵勇登城立將慈溪克復賊從城上放槍適中華
爾胸腕子從背出華爾自上年正月在滬呈請願
隸中國版圖屢以戰功由四品頂翎游升副將陣
亡後奉

旨於甯波松江兩府建立專祠仍從優議卹

僞慕王譚紹洸率賊黨攻青浦縣城官軍擊走之竝
解北新涇之圍

偽慕王譚紹洸方踞湖州李秀成遣援金陵紹洸聞青浦已克恐官軍躡其後乃合嘉湖蘇崑之賊犯松滬西北七月二十日逼青浦官軍敗賊於北蕘山賊不得逞遂犯北新涇大營北新涇爲上海西路之蔽李巡撫先遣已革總兵況文榜熊兆周副將梁安邦等統兵守其地力戰扼之賊稍退二十八日官軍小挫賊圍北新涇分據法華鎮距上海僅十餘里八月初一日張遇春敗賊於法華鎮而北新涇之圍益急時上海存軍只三千人餘皆

分防百里外李巡撫飛檄劉銘傳等軍由金山衛
常勝軍由松江兼程赴援密飭統領李鶴章會程
學啟防守青浦諸軍以五成留守以五成趨泗涇
七寶出賊後初七日學啟等軍問道至七寶已爲
賊所先據紹洸率悍黨三萬圍裏官軍學啟督諸
軍苦戰逾時賊乃大潰追殺十餘里而北新涇之
圍仍未解李巡撫督軍至虹橋賊方憑河據壘伏
左右以待李巡撫策騎疾馳過之與學啟軍合下
令分道擊賊我軍見李巡撫旂幟爭歡呼奮力盡

毀賊壘賊遁吳淞江黃翼升率水師敗之毀賊北岸七壘初四日賊伺我軍歸防又圖回竄值銘傳軍由浦東至敗之於野雞墩初五日追至南翔賊遁嘉定

閏八月粵賊陳得才等糾合各股捻匪竄入楚境賊首僞扶王陳得才等於南陽糾合捻首陳大濬一股於浙川糾合捻首張總愚一股竝句結盧氏縣捻首張落刑一股聚黨已眾上月襲荆紫關竄光化老河口皆其分股迨多將軍奪獲荆紫關總

兵成得升擊退老河口之後各股髮賊豫捻全竄
棗陽爲安襄鄖荆道金國琛迎擊賊眾於閏八月
初七日竄陷隨州分爲兩股一至京山之宋河一
至應山邊境京山一股十五日陷縣城擾及天門
縣之皂市十八日陷應城縣應山一股十九日至
廣水驛擾德安府迤北一帶官大臣嚴巡撫飛調
總兵穆正春帶毅字桓字營馬步會合護軍統領
舒保馬隊營總花凌阿由雲夢馳赴應城向西進
勦飭道員梁作楫帶凱字營由襄樊馳赴安陸會

合又調道員歐陽正埔一軍由河南之邢集回防
德安府城以遏應山股賊下竄之路飭令水師總
兵張啟基等督率礮船分赴襄滙各河上下策應
復將進攻陡溝之副將周鳳山一軍調赴廣水截
擊應山之賊竝以賊勢過重奏調多將軍回駐襄
陽居中調度以固楚疆

浙軍勦辦龍游等處竝攻克壽昌縣

左巡撫全軍旣解衢州江山之圍分派知府今浙
江巡撫楊昌濬竝劉典各軍會同江西道員王德

榜屈蟠等屢次血戰時浙賊數十萬之衆皆聽僞
侍王李侍賢一人指嗾自江山敗後由遂昌邊境
繞道回踞龍游倚金華爲老巢嚴處爲犄角蘭谿
壽昌等縣皆分布賊黨拚死抗拒左巡撫以賊勢
側重龍游親往督辦所部皆節制之師號令嚴肅
陷堅靡銳所向無前江西樂平之戰曾以數千人
破賊十餘萬李侍賢負傷而遁故深畏之及是復
戰數摧其鋒賊救死扶傷一意堅守惟勢太延蔓
每患兵少不敷分勦適所調蔣益澧全軍兼程馳

至益澧新授浙江布政使遂令進攻壽昌復派劉
典助之大戰三次賊屢卻屢前官軍奮勇齊上各
賊骨逐礮裂頭隨刀飛官軍喊殺之聲與號嘯相
應立斃先鋒驍賊數十始退至城邊乘勢殺入復
斃賊數百遂於閏八月初六日克復壽昌縣竝連
奪要隘多處移營進逼龍游另撥隊伍攻湯谿
楚軍攻克應城縣城應山賊闌入孝感縣立時擊退
髮賊豫捻踞應城一股爲總兵穆正春於閏八月
二十三日由黃江口搭橋過河進擊獲勝賊向西

遁收復縣城率隊進勦斃賊極眾踞應山一股由
廣水下竄孝感縣之小河司護軍統領舒保等會
知縣韓體震登陴守禦閏八月二十六日賊撲縣
城舒保帶隊開門出擊賊勢已卻突有後股馬步
數千人由北城關口闖入記名副都統德克登額
知縣韓體震巷戰受傷陣亡舒保飛馳入城參將
曾紹霖亦督水師礮勇登岸殺入傷斃悍賊多名
賊卽奔潰出城追殺三十餘里賊竄小河
楚軍克復京山縣解安陸府之圍

穆正春一軍攻克應城縣後卽帶駟鐵營騎兵竝營總花凌阿馬隊於閏八月二十六日馳抵京山縣踞賊聞風竄走收復縣城賊首僞扶王等復糾大股直撲安陸府城正春帶隊馳至總兵彭炳武夾攻殺賊二千餘名生擒二百餘名城圍立解賊又回竄襄樊

九月上海軍克復嘉定縣城

自賊陷嘉定屢犯滬防英國提督何伯將受代歸國乃請李巡撫會攻嘉定新任提督固伯又率英

法兩國兵助戰李巡撫調白齊文李恒嵩率常勝軍及礮勇分隊往統領李鶴章督四營繼進中途疊毀賊卡九月初一日抵嘉定城下初二日何伯令西兵燃炸礮轟坍城牆數十丈分布雲梯一擁而上卽於初二日克復縣城竝敗太倉援賊令況文榜等駐守之塘橋虹橋軍進屯南翔程學啟屯黃渡黃翼升水師二營扼崑山大河以爲守

僞慕王譚紹洸等率眾再犯青浦南翔各官軍破賊於四江口

嘉定既克僞慕王譚紹洸僞聽王陳炳文糾聚蘇杭嘉興賊十餘萬分道自太倉崑山來犯北由蟠龍鎮至四江口圖踞黃渡以當青浦南由安亭至方泰鎮圖入南翔九月十二日賊逼南翔官軍迎戰卻之賊乃於三江口四江口立五大壘設浮橋潛渡水師皆爲所困而青浦西北之洋新涇趙屯橋白鶴江賊益蔓延擾及重固鎮張堰距青浦十餘里十六日提督黃翼升率水師自青浦出衝賊舟八九里而過賊扼白鶴江不獲進別隊賊犯黃

渡十七日統領李鶴章由江橋至黃渡會總兵程
學啟進擊賊陳南岸官軍循北岸進壘敗之李巡
撫以四江口營久被圍督諸軍親至黃渡二十一
日學啟及劉銘傳副將郭松林之軍分三路擊之
自辰至未屢衝不動李巡撫督戰益急諸軍拔簽
逾濠進逼賊壘斃數賊酋陣少亂乃冒煙直入各
毀其前一壘右隊賊回救礮傷學啟胸仍裹創疾
戰賊由南岸潰而北鎮守四江營之參將劉士奇
游擊鄭國魁皆衝圍而出循河殺賊賊退崑山常

勝軍由杜邨破白鶴江賊壘黃翼升由趙屯橋截擊潰賊追至三江口毀其浮橋石卡殆盡生擒及殺斃者數千餘人落水死者以萬計平賊壘二百餘座滬防肅清賊自是不敢再窺松滬

楚軍痛勦西北路髮捻各賊

多將軍克復浙川之荆紫關後准官大臣等咨調回援於九月初十日馳抵樊城十三日接仗殺賊三千餘名追黃龍塢一股至李家橋十四日豐樂河援賊大至多將軍戒勿輕敵以避其銳至三更

後率隊襲擊令我軍袒右臂爲記乘微月直抵賊
巢賊恃眾不築壘不設備露睡正酣殺聲驟起槍
礮兼施賊於昏夢中奪命狂奔自相踐蹋斃賊無
數直追至隨州界入鴉雀冲山內山路欽崎不能
深入賊已膽落竄往豫境撲安陸府之賊在龔家
集伐木紮籬偷渡穆正春由陸路兜勦安陸府知
府周有全等率礮船乘風縱火水陸斃賊甚多餘
亦遁赴河南

江南水師力保蕪湖金柱關城隘

閏八月間偽護王陳坤書糾眾四五萬圖犯金柱
關冀橫格甯國金陵兵氣彭侍郎玉麟督禦於花
津五戰皆捷賊退踞薛鎮十八日諜報賊船數百
從東壩拖壩而出彭侍郎親駕飛划迎擊楊提督
岳斌聞警赴援先在姚老圩毀賊浮橋獲勝賊乃
不敢渡河九月初五至十二等日大股悍賊結筏
偷渡直逼金柱關各營奮力馳擊盡焚隔河賊壘
賊遁魚壩十八日水陸大舉遇賊於花山總兵周
萬倬一騎當先所向辟易各將士橫戈躍馬賊退

上駟渡適水師已將彼處浮橋砍斷賊回戈轉鬪
眾軍合力圍殺棄尸駢積河水滯流萬餘賊無一
得脫者另股窰頭等處賊尙延袤百餘里我軍合
隊環攻焚其壘花津青山象山采石磯各處賊巢
自二十至二十九日悉數平毀奪賊船無數自是
蕪湖金柱關六十里之間賊蹤以絕

曾營各軍疾疫盛行各路調援力支危局

夏秋以來軍中染疫各營盛行鮑提督霆字一軍
尤甚曾據查報除死亡不計外病者六千六百七

十人幾至一隊之中乏人炊爨猛將黃慶伍華翰亦病歿昔時勁旅頓變孱軍會大臣旣因金陵羣賊圍攻又因甯國皖北各城亦空虛可慮分咨各路調兵協防揚營都將軍興阿未准咨商先撥總兵楊心純統兵一千八百人赴江甯協助駐防蕪湖之王可升亦率三營馳護雨花臺上海軍中抽調洋將白齊文與蘇松太道吳煦率常勝軍乘輪船赴甯吳煦先抵鎮江白齊文以索饟毒毆道員楊坊搶奪洋銀四萬餘叛去另由李巡撫查辦會

大臣力支危局昕夕憂勞幸得統將同心勉驅病
卒苦戰數旬入冬疫氣潛消大局始定

鎮江軍敗賊於湯岡

賊由句容進薄鎮江紮壘於湯岡督辦鎮江軍務
廣西馮提督子材與京口魁都統玉策勵諸軍更
番攻擊設伏誘戰斬其渠魁賊已自相驚擾九月
十二日飭令總兵龍文德陶茂林等督隊填濠而
進文德驍勇善戰將湯岡九壘蹋平賊歸青山老
巢乘勝攻拔之賊復大潰竄回句容

十月賊犯楚邊陷房縣復由竹山竹谿二縣竄入陝西境

九月內髮賊偽扶王陳得才偽啟王梁成富等由湖北分竄河南十月初九日復由河南之新野鄧州繞至淅川廳所屬之李家橋闌入湖北鄖陽撲府城十六日鄖陽鎮總兵訥欽署鄖陽府知府艾浚美會知府周有全水師內外夾攻賊眾敗退從安陽口偷渡河西由均州之白浪黃龍灘等處竄擾房縣二十一日入縣城次日知縣慶明激勵兵

團乘賊不備一鼓登城斃賊數百名卽將房縣克復敗賊由九道梁田家壩竄擾竹山竹谿境內頭隊陳得才先竄至陝西平利縣後隊梁成富等在竹谿之水坪草鞋壩等處橫亘二百餘里官大臣等派道員梁作楫往勦竝飭安襄鄖荆道歐陽正墉統領四營會同勦辦賊於十一月內全股入秦調金國琛回駐襄樊改派候選郎中李雲麟統帶毅健五營馳赴鄖西之上津堡駐紮以防回竄賊圍我江甯陸師堅守四十六日力戰乃解

偽忠王李秀成於蘇浙調集悍黨親率十三偽王號稱六十萬蠡聚金陵東自方山西迄板橋鎮旂幟如麻層層排列閏八月二十日直逼我營尤趨重於東西兩隅同知曾貞幹等縱軍兜擊追賊於小河邊斬級頗多二十一日城賊援賊同時竝進江蘇布政使曾國荃飭各營俟賊逼近突以排礮擊之賊乃踉伏在地礮聲絕而殺聲又起日夜不休二十二日賊由東西兩路進攻分黨徑趨洲上抄出猛字等營之後我軍分路擊敗之乘夜就上

洲修築堅營十數駐兵扼守二十三日甫將攻撲
猛字各營及東路營壘湖橋營卡之賊勦退賊之
圍逼西路者已歷數晝夜各營料賊疲乏越濠擊
之突破四壘二十六至二十八等日夜賊乃悉向
東路逼營而陳洋槍洋礮驟若飛蝗潛通地道百
計環攻各將士負牆露立拋擲火毬殲賊無算二
十九日賊負板蛇行而進烽燧蔽天填濠欲上我
軍用矛擊刺賊曳尸復進抵死不退國荃督軍策
應飛子傷頰血流交頤仍裹創上濠守禦九月初

一日僞侍王李侍賢復自浙東來援急攻吉後營礮臺國荃引軍馳救力遏賊鋒初二至初四等日賊來益眾用箱篋實土排砌濠邊暗鑿地道我軍先以火箭攢射繼出銳卒擊之賊始少挫初五日分三路出擊燬西路賊壘十二座初六日以後東路之賊環逼十二日嘉字吉後兩營地道轟發石飛天半擁入塙口各有千餘賊我軍俟煙開土落分路衝出忍死決戰將塙口以內之賊誅戮無遺濠外賊渠復搴旂督戰各營同出抄殺賊之精銳

摧折無算同時地道迸裂者有副後營亦擊退被
圍者尙有信宇等七營復被我軍內外夾擊賊始
敗走是役也殺賊近萬賊雖受大創尙圖再逞於
東路別開地道於西路決長江之水淹絕糧道曾
貞幹在高埂增修小營令水師駐泊雙牖共護饋
運之路國荃與諸將其議制敵之策莫若審賊所
向隧而迎焉自十三日以至十月初二日凡破賊
七壘四穴掘穿地道五處均聚而殲之無一生者
賊技益形窮蹙國荃遂於初三日乘賊懈伏進拔

十數卡初四日夜分道齊出破東路四壘悉就誅
夷西南諸壘望風驚潰初五日合營追賊至南路
牛首山一帶埽平賊壘數十座搜勦至方山之西
雨花臺守賊勾結城賊絕我軍歸路各營左右盪
擊賊眾分路悉遁計苦戰堅守四十六日重圍始
解曾大臣奏入奉

旨曾國荃賞給江綢黃馬褂並翎管玉柄小刀曾貞幹
以知府用貞幹積勞致病至十一月十八日卒於
軍奉

旨追贈按察使諡靜毅建專祠

中外官軍克復浙江上虞縣城竝乘勝進兵攻克嵯
縣新昌縣

浙江賊自華爾克復慈溪後竄踞泗門鎮已革甯
紹台道張景渠馳赴餘姚會商英國兵勇嚴守慈
溪調法國人新授中國總兵勒伯勒東及稅務司
日意格帶兵會籌直抵上虞縣城節節進剿破賊
卡十四座揮兵逼卡連放炸礮斃賊千餘人蹋毀
通明堰賊卡二座中外官軍直泊城下勒伯勒東

運到車輪大礮轟坍土城卽於十月初一日將土
虞縣克復泗門等處之賊亦由中外官軍合力埽
蕩另股竄踞嵯縣新昌縣者先後爲官軍攻克左
巡撫李巡撫會同馳奏得

旨嘉獎

上又念浙東軍務漸有起色官軍進勦之際甯波海口
緊要不可無武職大員統帶飭署浙江提督秦如
虎馳往鎮守後勒伯勒東進勦紹興親點大礮以
藥重炸傷頭頂殞命得

旨嘉憫優卹之

上海水師屢捷進取蘇州

十月二十六日提督黃翼升督水師勦賊於蘆墟
鎮尤家莊汾湖三官塘盡毀其卡進距蘇州三十
里二十七日復回軍勦賊於下田廟上田廟洪家
灘進至窰街距嘉善縣數里遂議進取蘇州

皖南防軍解旌德涇縣之圍徽浙各軍同克績溪祁
門縣

十月初八日賊酋賴文鴻古隆賢等自廣德甯國

竄入旌德縣之六都總兵朱品隆禦於楊邨一戰
卻之十二日賊又分股來撲品隆飭將弁悉力抵
禦親自出營突陣賊始返奔是夜賊又擁眾進攻
越兩日夜無一刻息品隆恐賊壘既定糧路難通
啟城出擊破賊四壘十七十八等日賊復大聚攻
城品隆親率老湘營部卒向大北門往來督戰縱
橫盪汰賊紛紛潰敗十九日分路出擊毀平賊壘
二十餘座賊向楊邨轉遁解圍以去又有賊環攻
涇縣於十月初四日被援軍擊退先是昌化踞賊

率黨數萬竄入績溪城翼絕旌德防軍糧路總兵
唐義訓會浙江左巡撫派援之卽選道王文瑞分
路進攻賊已蠡擁猝至我軍從山梁壓下賊眾披
靡尸駢林麓賊遂棄績溪遁去義訓等正欲追勦
以旌德之賊已於十月初三日突陷祁門乃回軍
會攻賊見大兵驟至闔城鼎沸遂返竄石埭太平
一路祁門縣於初十日克復

十一月皖軍在九洲等處堵勦獲勝

九洲洲在金陵下關之對江賊踞爲老巢堅築石

壘列巨礮三層與下關賊壘相犄角以扼沂江進擊之路咸豐間屢爲六合團勇及江北各營攻奪以孤軍難守復爲賊有江南提督李世忠恐出竄擾列營下游浦口以禦之十月間僞忠王李秀成等糾眾渡至九洑洲圍撲官營李提督親赴前敵力籌防堵十七等日賊分兩股突至浦口遣悍賊數千繞過前營負土填濠勢極兇猛李提督出營突陣馳逐礮火之中馬傷立蹶復步戰搏賊斬首百餘級賊始遁連日賊之分撲各營者均擊退二

十一二等日又攻南岸石埠橋官營竝結筏冒雪渡江由九洲分股竄至江浦以北希圖牽制各營我軍出隊夾擊賊向和州竄逸李提督親駐江浦督飭各軍分路抄擊斃賊二千餘名賊船乘夜渡江突過小甸分隊出撲李提督督軍回勦賊眾大潰十一月初六日我軍毀平石埠橋各壘賊仍環逼略無退志李提督飭各隊夾攻截賊隊爲數段賊多不及歸壘我軍斬卡直入立將東西南三面賊壘剗平北岸分撲浦口各賊我軍戰守兼施

賊悉撤圍遠竄

浙軍攻克嚴州府

左巡撫偪龍游而軍於西南兩門外濬長濠引溪水灌之分攻湯溪蘭谿嚴州諸處大小數十戰破賊壘卡三十餘處殺悍賊六七千賊目近百左巡撫以龍湯圍賊恃嚴州爲犄角前派魏喻義駐軍銅關據險設卡未能進拔因令亟攻竝派劉典一軍力攻蘭谿以分賊勢十一月初八九日嚴州賊首譚富糾集桐廬浦江各賊疊次來犯均爲喻義

擊走頗有斬獲城中難民時訶賊動靜詣營密告
賊恃其眾不之防十一日譚富傳偽令期十三日
傾巢撲營喻義聞之先期率所部偃旂息鼓潛赴
鐘嶺下分路設伏先鋒賊五百餘名行至嶺前伏
兵驟起圍殺無一脫者後隊萬餘見前賊殲盡驚
退回城喻義令各營悉攜攻具約聞礮卽登竝派
所造礮船直下南門大河斷其水道馬隊繞過東
門斷其下竄桐廬之路親督各營於十三日夜半
潛抵西北兩門豎立雲梯號礮初震通判李昌彩

首先登城眾軍畢上盡殺守堞諸賊遂卽克復府城斃賊不可數計河下賊船二百餘爲水師轟燒殆盡竄至東路者爲馬隊所斬餘賊無路可遁拋械伏降喻義受之被擄難民分別撫散共殺賊萬餘獲僞印二百九十三顆馬二百餘匹旂幟無算我軍傷者一百七十五人陣亡者纔十八人耳

曾營鮑軍破賊於馬頭鎮楊柳鋪

浙江提督鮑超於六月克復甯國府留防皖南先有西河踞賊分擾小淮密派隊誘賊過河一擊敗

之旋報廣賊六萬餘持花旗由甯國縣竄至歇高
橋楊柳鋪馬頭鎮一帶滿布賊館鮑超恐老營空
虛由黃麻渡捲旂息鼓振旅還援先令總兵宋國
永守定高祖山老營十一月二十七日從抱龍岡
進兵賊恃眾來拒旌旂亂展鼓音若雷密布長圍
傷我營哨數人鮑超分大隊自山岡後抄入截賊
數段賊隊大亂諸軍合力薄之遂將歇建廟至楊
柳鋪十數村落中賊壘賊卡全行平毀追進六十
里殲斃約八千人自有此捷高嶺等處賊股伏匿

不出者經月

上海軍收復常熟昭文縣城進克福山等處福山旋復失陷官軍困守常熟昭文

常熟昭文二縣同城久爲賊踞而福山距城十八里爲江南重鎮與江北之狼山鎮對峙乃由江入海之鎖鑰賊併踞之以窺伺江北常熟守賊駱國忠錢桂仁董正勤與太倉賊酋錢壽仁密於我軍通欵統領知州李鶴章督軍攻城賊約期內應十一月二十八日國忠夜飲賊黨就座斫殺憑天安

錢嘉仁逮天福姚得時舉城薙髮出降國忠方令
其下奈拔羣等招福山之守賊胡經元等同降而
福山賊已固守十二月初一日國忠率其眾攻拔
福山許浦白茆徐六涇諸海口竟日皆下我軍方
進規太倉風雪阻師不得前適蘇州內應事世譚
紹洸悉眾爭常昭招江陰無錫賊六七萬來會又
令楊舍之賊乘隙陷福山官軍困守常昭
浙軍援皖收復績溪祁門二縣

皖南告警左巡撫調駐守遂安之道員王文瑞所

部全軍移紮歙休婺三界之草市相機援勦有股賊由昌化闌入徽界十月二十五日陷績溪王文瑞會同皖南鎮唐義訓分三路擊賊十一月初一日獲勝城賊宵遁旋竄入祁門縣左巡撫復調臬司劉典一軍暫緩蘭谿之攻越境助勦賊由西門逃去初十日收復祁門縣王文瑞恐賊繞犯浮梁景德鎮派隊出桃樹店截之

十二月會營分攻運漕鎮銅城牯

僞對王一股從九洲渡江竄陷巢縣含山和州

三城遂踞運漕鎮銅城牐東關各隘知無爲州米足兵單於十一月二十四日徑撲州城曾大臣譟記名提督蕭慶衍記名道毛有銘兩軍先後馳至議以有銘嚴備東關巢縣之賊慶衍專攻運漕鎮銅城牐之賊十一月初九日慶衍陸師過河結營彭侍郎派水師護陸師向運漕自上攻下親督各水營向三汊河自下攻上先將彼處三石卡一大壘焚毀引軍西上與護陸師之水師相遇乃知大馬橋二壘亦就毀平慶衍督率各營四面縱火斬

隘直入立復運漕鎮二十一日慶衍連破陶家觜
等處賊壘水師亦毀沿隄數卡立焚岷山岡二壘
繞出銅城牐後二十二日賊分三路來犯慶衍縱
兵抄擊牐口之賊衝圍而出岡東一股聞風竄逃
牐西一股亦爲水師擊走

川軍攻克橫江等處賊巢連獲大捷

僞翼王石達開久擾四川屢勦未退旋踞敘州之
橫江雙龍場等處聚眾數萬負嵎固守十二月十
二日營官蕭慶高何勝必分道而進直抵橫江以

火彈拋入賊壘登時延燒我軍奮勇前進連破賊
二十餘卡提督胡中和由山後小徑破卡而入賊
眾驚竄兩面合擊立將橫江兩岸賊巢焚燬竝將
唐家坡及張窩等處賊壘削平統計前後斃賊二
萬餘人生擒二千七百餘名內有僞官二百餘名
墜河及乘間逃散者約以萬計是日按察使劉嶽
昭進攻雙龍場賊巢得降賊郭集益等內應官軍
疾趨破賊壘二十餘座賊勢大北棄巢狂奔官軍
乘勝窮追直抵會儀溪殺賊一萬五千餘名陣斬

偽都督等四十餘名內應之郭集益等率眾三千
餘人詣營乞降十三日達開率黨向燕子灘渡橫
河官軍乘其半渡擊之復斃千餘名餘賊紛竄

平定粵寇紀略卷十五

同治二年癸亥正月曾營鮑軍進援涇縣解圍

正月初一日僞匡王僞奉王僞襄王等率眾六七萬竝糾合僞躡王藍姓等花旗廣賊進逼涇縣連壘二十餘座於初四日架梯蒙絮悉銳撲城守將易開俊等以木石下擊賊稍斂退時浙江提督鮑超在高祖山老營聞警簡隊疾往初五日入城初六日出戰羣賊蠡擁來撲戰逾兩時我軍佯退誘賊入伏兩面夾擊賊大敗欲歸壘見壘中火起已

爲我軍所破各兵勇乘勢呼譟竝進立解城圍長
驅三十餘里又平黃邨賊壘十餘處初七日自涇
縣回軍適西河之賊撲進老營將圖一逞南望旂
幟蔽空軍容甚盛乃相顧錯愕曰鮑超來矣一聞
而散

浙軍攻復湯溪龍游蘭溪三縣遂克金華府城

金華羣賊以湯溪龍游蘭溪三城爲外護踞獨久
迨官軍圍攻湯溪壘敗賊援勢始漸蹙正月初十
日布政使蔣益澧密約降賊彭禹蘭內應誘擒僞

忠裨天將李尙揚等賊目八名潛啟西門官軍衝入斃賊九千餘名克復縣城援賊向金華狂奔總兵高連升等率軍追殺龍游之賊聞風而遁縣城亦復蘭溪之賊爲按察使劉典自祁門旋軍於十二日攻克是日金華府城踞賊劉政宏等見官軍進紮白龍橋遂率黨由東門逃竄連升等乘勢奪門而入殺賊二千餘名遂復府城金華最得地勢城垣堅固異常歷代浙中兵事均以此爲關鍵攻取之難十倍他郡此次乘勝而克爲浙軍一大轉

機也

浙軍續克永康武義縣城收復東陽義烏浦江諸暨等四縣

自拔湯溪等城賊之險要已失永康踞賊亦爲都司馬雲標率勇擊退於正月十三日克復縣城總兵林文察同日攻克武義縣東陽義烏之賊聞風棄城向諸暨一帶潰竄按察使劉典於十八日收復浦江進逼諸暨有民團趙春林等探知城中踞賊僅五六千人因率投誠之方蒂桂等分路環攻

於二十三日克復

陝西軍收復興安府新舊二城

髮賊豫捻陳得才等於上年十月內由湖北之房竹二縣竄入陝西旋於十二月二十等日陷興安府新舊二城意圖久踞團總監生邱振家招集團勇於正月十四日隨同知縣方傳理督率水陸各勇乘夜薄城賊猝不及防放火奔逃立將舊城收復縣丞周錫齡等乘勢趨新城亦棄城竄去有入川者有竄紫陽縣者

浙軍署提督葉炳忠收復紹興府竝柯廬蕭山二縣
浙東肅清

浙軍攻克浦江諸暨後賊首何文慶率黨由紹興
竄撲諸暨高連升等率眾抵禦賊敗遁而東陽永
康等處敗賊復紛紛竄至官軍合隊縱擊殺賊甚
多按察使劉典正欲乘勢規取紹興署提督葉炳
忠已於正月二十六日督甯波諸軍收復府城先
是金華克復賊膽已寒前甯紹台道張景渠會同
英國總兵呿樂德稅務司日意格及權授江蘇副

將遠耳第福督率英法二國洋兵隨同葉提督進
攻達耳第福以銳進陣亡正月十九二十等日戰
於下方橋安昌塘均獲勝適賊黨楊應柯遣難民
持書詣張景渠營乞降願爲內應二十五日夜城
中火光四起賊首周姓率眾開稽山門向蕭山遁
去楊應柯開門迎降我軍一擁而進收復府城復
有敗賊萬餘與桐廬踞賊沿江築石壘抗拒水陸
合攻復將桐廬縣克復蕭山各賊猶閉門困守我
軍乘勝蹙之盡斃守陴之賊緣梯而上立復縣城

浙東肅清

二月僧親王追勦擒匪連獲大勝生擒擒首張落刑等磔之

擒匪各自爲股各有擒首以蒙毫之張落刑爲巨擘受粵賊僞封擾害楚豫江皖荼毒生靈較各擒首尤爲稔惡

欽差大臣科爾沁博多爾噶台僧親王自盪平北犯髮賊後總統東三盟馬步各隊專勦擒匪大小數百戰逐漸剷除時在蒙毫一帶勦辦適張落刑等聚

集尹家溝意圖旁突二月初一日僧親王派翼長
舒通額蘇克金等帶領各起馬隊馳往圍攻捻眾
拚死出撲截殺多名向東南竄遁侍郎國瑞帶托
倫布等馬步逕攻雉河集張落刑老巢落刑聞風
逃竄遂將雉河集尹家溝兩處賊巢全行平毀初
二至初七日舒通額等疊獲要賊正法擒首李勤
邦等赴宿州知州今安徽英巡撫翰行營投誠領
計將張落刑竝其子張濬義子王碗兒誘獲解送
僧親王大營奉

旨張落刑極刑處死張濟王碗兒一併正法傳首被擾
各處天下快之

曾營鮑軍攻破賊巢悉復西河小淮窑紅楊樹麒麟
山等四處要隘

偽輔王楊輔清糾合各偽王嘯聚西河紅楊樹麒
麟山等處不下十萬餘人以一大股抄出高祖山
之前以一小股繞過高祖山之背揚言上犯涇縣
實欲圖鮑超寔字老營也鮑提督令總兵宋國永
堅壁穩守親率數隊伏於太子廟山坳伺之二月

初一日賊分三四萬眾迤邐而來將高祖山八營層層圍裹鮑提督急率太子廟伏軍向小徑疾趨離營二里許聞老營槍礮連環知已接戰乃令各將弁分三路進仍令總兵梁美材等潛伏茯苓山之旁以斷賊後鼓角一聲三軍突出國永乘勢夾擊賊隊譁亂奪路竄走將近茯苓山美材大呼斷路賊駭懼無措眾軍合力蹙之追襲四十餘里遂平高嶺周家橋諸壘直抵西河結筏爭渡立毀堅巢馬家園小淮窰賊壘亦爲總兵王可升襲破維

時賊之由西河遁入灣沚者寔營礮划隨同外江水師日夜轟擊賊乃於初三等日歸併梅嶺麒麟山賊壘初四日鮑提督引軍渡河進次紅楊樹賊匿不出軍士踰濠直進盡毀羣壘初五日鮑提督遺書甯國守將劉松山令率師來會傳令國永等專攻麒麟山總兵婁雲慶等專攻梅嶺而以松山爲斷後賊糾眾來迎國永縱兵掩擊積尸層疊麒麟山賊壘悉平是日松山破廟埠之壘雲慶破梅嶺之壘竝收復仰賢圩各處餘賊分道竄逸

川軍截勦長髮賊獲勝殲斃中旂賊首賴裕新

偽翼王石達開竄入四川以賊酋賴裕新卽賴剝
皮爲前鋒名爲中旂屢擾甯遠高巖等處因總兵
朱桂秋等攻急竄入越嶲廳城署同知周歧源等
連日力戰將賴裕新擊斃賊眾旣無統率拚命狂
奔闖入榮經天全各城知縣孫怡祿知州丁雲章
等於二月二十一二等日督帶兵團晝夜力戰克
復城池賊竄邛州之高家場邛州團練橫擊賊敗
退由大邑竄往邊江等處

鎮江軍截勦西路竄賊直抵丹陽

偽懷王周姓等糾眾竄至句容城外會合丹陽賊首偽效天義陳姓圖由九洑洲北渡馮提督子材派總兵張文德等扼橋據險分路進攻二月初五日直趨牧馬口沿邨十餘里賊卡林立官軍馳突不退游擊湛恩榮飛騎衝敵手殪賊目數名賊陣稍卻守備李耀光從槍子中躍馬先登陣斬執旂賊酋直搗中堅官軍無不一當百立將牧馬口賊卡全行焚毀東湖伏賊聞聲齊起文德派隊抄

截賊衆大潰追過句容縣境之薛邨斃賊三千餘
名內有僞來天安僞檢點二名文德等於初六日
夜銜枚馳抵南路柏林邨老巢總兵田宗揚等率
所部進紮豐樂山扼險憑高遙爲聲勢初七日卯
刻文德等乘大霧四塞揮軍疾攻精騎如牆而進
賊衆不測多寡出巢迎敵副將楊青山首先突陣
殲斃黃衣賊多名都司古龍光躍馬入陣斬陳賊
於馬下卽四眼狗陳玉成之叔也餘賊惶駭向西
南敗竄官軍乘勢奪毀柏林邨賊壘直追至丹陽

西門

上海軍解常熟昭文縣圍

正月賊圍常熟昭文甚急穴地攻城賊首譚紹洸又益以礮船二百艘水陸夾攻降將駱國忠悉力扼守李巡撫以福山背水而陳賊眾兵單極爲可慮急檄常勝軍往助二月初四日李恒嵩以千人至移營逼賊壘初五日福山石城之賊來援劉銘傳督隊擊敗之是時賊之攻常熟者雲梯地道皆具屢拒屢進勢漸危迫李巡撫議先奪石城以解城圍

十五日戈登又以常勝軍至專攻賊壘而令各軍分擊援賊常勝軍設西洋大小礮於福山舊城上以利轟擊各營勇伏於舊城下連放開花炸彈擊倒港東賊壘由牆闕擁進悉數殲殪港西賊壘亦卽攻克謝家橋等處之賊同時竝出黃提督翼升分路搏戰賊爲披靡遂復福山石城是夜各營潛襲大義橋謝家橋賊壘賊眾棄壘狂奔沿途追殺先是圍常昭之賊知福山警皆赴援止畱數千賊攻城駱國忠等派兵由西門殺出連日鏖戰生擒

賊首孝天義朱衣點殲戮極眾遂於十九日解常
昭城圍計常昭一城孤懸賊中與松滬各軍聲勢
阻隔凡血戰苦守七十餘日殲賊不知凡幾

陝西軍收復紫陽縣

髮賊豫捻自興安分股竄陷紫陽縣旋爲地方官
環攻收復賊復竄撲漢陰廳石泉縣十餘日之久
在事官紳以少擊眾力解城圍

江北之浦口江浦兩城復陷竝失橋林要隘李提督
引咎自請革職

江北李提督世忠督兵分營於浦口以圖九洲
被賊二萬餘眾圍攻斷我糧道各將弁堵禦兩晝
夜軍火不繼勢難再振遂撤回江浦城內賊眾繞
城密困水泄不通城中糧藥並罄各將弁冒死潰
圍而出橋林營盤復被賊眾六七萬攻陷世忠具
呈自請革職撤去勇號由曾大臣代

奏奉

旨加恩撤去幫辦軍務免其革職以示薄懲後聞世忠
於洪澤湖私設鹽釐卡被帶勇之陳國瑞毀奪率

衆往爭竝未
在營致被賊攻陷也

江南水陸各軍在蕪湖金柱關累月苦戰克復要隘
上年十一月後僞侍王李侍賢自金陵敗遁糾悍
賊數萬屢犯金柱關累月不息凡拒賊於花津上
駟渡三汊河薛鎮新圩角梅塘鬻等處我軍皆獲
全勝復攻破涂家渡萬頃湖賊黨卡壘蕪湖防軍
亦勦賊於南新圩三不管等處平毀四壘二月初
四日灣沚踞賊將犯我清水河水師營官萬化林
等星夜駛往適浙江提督鮑超新破西河之賊派

舳板船從清弋江而下合力猛攻於濃霧中分水
勇爲旱隊在街口積薪焚之羣賊猝不及防出巢
分竄我軍遂復灣沚一隘三月初十日三里埂之
賊退併黃池化林等飛駕舳板直逼黃池石壘之
下賊自恃岸峻壘堅列礮以待化林奮力仰攻復
帶數哨登岸與水面戰船摩壘夾擊各賊驚潰立
克黃池剗平石壘總兵朱南桂等陸軍約會水師
亦於是日盡破伏龍橋護駕墩花津賊巢羣賊遁
往金寶圩及溧水丹陽

浙江水師擊賊於富春江大捷

賊踞杭後卽修築富陽城壘雉堞一新城濱富春江爲賊船屯聚之所左巡撫令水師副將楊政謨都司羅啟勇等率所部師船駛往攻之二月初六日政謨等自桐廬擊楫而下遙見賊船數百簇列城邊前後護以礮艇遂傳令師船分兩隊疾進頭隊繞南岸直攻中堅百礮齊轟江流鼎沸火箭噴筒迸注賊船頃刻延燒殆徧賊之礮艇爲我後隊師船擊敗復有前被賊所擄脅之官軍乘礮艇大

呼投誠適都司羅啟勇駛至受其降卽令返礮轟擊賊大擾亂棄船入壘水師亦登岸蹙之蹋平各壘殺賊甚多奪獲礮械無算日暮收隊是役共燬賊船數百艘奪獲礮船十數民船數十斃賊千餘政謨等駐營南岸城賊爲之奪氣

三月上海軍攻克太倉州

上海軍攻克福山解常昭之圍太倉踞賊僞會王蔡元隆畏懼聲威遞稟乞降李巡撫許之命統領李鶴章與總兵程學啟率師偕往賊期三月初九

日駐隊四門迎師我軍嚴陣以待鶴章軍已渡河將入城東南門各出賊數千裹白巾作記伏賊盡起我軍急退鶴章傷足幾及於難時學啟方扼西門猝見賊舟八十餘隻賊數千人自崑山來與城賊語甚暱疑而爲備賊果以千人出犯學啟督軍奮擊始退十一日賊復犯婁塘前敵營擊走之李巡撫得報檄戈登李恒嵩統常勝軍往攻十二日毀南門賊卡十四日賊際天福李文熙率礮船截河口學啟以洋槍隊襲其後而自督水陸迎之賊

皆殲焉竝敗城中援賊戈登以大礮毀二石壘十
五日鶴章軍南門防竄賊列礮轟裂城垣十餘丈
各軍越濠而進賊走南門不得出將城賊萬餘悉
數圍殺卽日克復州城李巡撫督飭各軍乘勢進
攻崑山

賊撲石澗埠及廬江舒桐各城曾營諸軍力卻之
僞忠王李秀成占踞江浦浦口潛赴皖北三月初
二日犯石澗埠近逼我營守將毛有銘劉連捷等
密飭士卒穩守營寨以觀其變初三等日賊眾數

萬撲近濠邊我軍槍礮環擊殪其賊酋晝夜猛攻
相持不下初七日有銘潛出銳卒焚其積草連捷
復於初九日派隊毀其攻具賊於前營復增壘盈
百層層合圍文報不通糧運汲道俱絕時江蘇布
政使曾國荃升授浙江巡撫畱辦金陵軍務聞警
卽派記名道彭毓橘率隊三千餘人倍道而至彭
侍郎亦派隊渡江來援遂與提督蕭慶衍會於黃
蘓河十六日彭侍郎親督水師至海子口遣死士
約期會戰是夜毓橘攻釘子壩皇圖寺慶衍攻黃

龍岡迎珠塔號礮初震有銘卽衝出重圍會合夾擊盡洗羣壘李秀成向小嶺開成橋而遁賊之大股先於十二等日逼犯廬江十九日秀成大股自石澗埠而來圍城甚急曾大臣飛檄浙江提督鮑超以援江之師轉援廬江而賊已於二十日爲廬江守將吳長慶梁美材等擊敗西竄二十一日突攻舒城安肅道蔣凝學設伏大敗之維時髮賊陳得才股內之僞主將馬融和等由豫分隊間道疾馳足無停趾瞬息而至桐城彼處守將爲湖南提

督周寬世出戰於三里街凌厲無前賊大敗遁往
孔城鎮與李秀成合而爲一

浙江江西官軍會克安徽黟縣

賊眾竄聚皖南之黟縣祁門圖竄江西爲吉南贛
甯道王文瑞等擊於七里橋小路口千佛橋等處
斃賊七八千名生擒八百餘名陣斬僞佑王李遠
繼另股賊踞黟縣者江西沈巡撫葆楨派同知直
隸州王沐督軍攻之浙江左巡撫派按察使劉典
一軍援皖南以扼賊犯江西之路兼固浙防與之

會師三月十四日王沐一軍於柵木嶺左右斃賊百餘名賊向雙流溪而遁又敗之於李坑口茆蓬店高嶺腳賊歸黟縣四五都老巢十七日劉典引軍會攻賊傾巢而出官軍左右夾擊賊勢紛潰遂將黟縣城克復王沐等督軍進紮黟縣迭擊撲營悍賊陣斬僞絢天義古文祐追至羊棧嶺敗賊向嶺外逃竄共蹋平賊壘二十餘座斃賊近二千名嶺內一律肅清劉典臨陣身先士卒屢瀕危險而忠憤之氣不衰奏奉

特旨賞給阿爾剛阿巴圖魯名號餘賞卹有差

江西軍復破賊於祁門

三月十五日僞堵王黃文金卽黃老虎合許家山等處踞賊率悍黨十餘萬由祁門進逼與參將韓進春對河而陳進春飛調兩路馬隊及左右營助戰槍礮環施殫其前鋒甚多賊仍不退將士奮力死戰始披靡凡血戰四時之久殺賊千餘名竝將陣斃之僞孝王胡鼎文梟首示眾

四月李秀成大股進圍六安州官軍固守鮑軍往援

追克東關銅城插兩隘

僞忠王李秀成前隊衝至六安州之十里舖糧臺
道員曾廣翼署知州何家驄與蔣凝學部下副將
王臨祥袁秀林四人力籌守禦三月二十四日賊
大股繼至自東南迤北而西面面結壘二十五日
分三路來攻將抵城下城垣久爲風雨所損猝傾
六七丈一時塵土蔽空羣賊大呼擁入臨祥麾兵
攢刺擲尸城下廣翼秀林飛騎馳至悉戮進口之
賊搶築木城二道二十七日賊眾傾巢出犯其尤

悍者挽盾直前誓以死搏我軍屹立如堵俟其躍
過城濠擲以火球焚賊無數始各裹尸而退二十
八日廣翼等令勇士縋城馳擊斃賊數名三十日
又縋士出襲擄糧之賊斬僞富天豫張承德等適
曾大臣派援之浙江提督鮑超將至舒城賊遂於
四月初二日解圍遁去鮑超追擊從柘皋進兵以
攻巢縣之北記名按察使劉連捷提督蕭慶衍等
從迎珠塔進兵以攻巢縣之東彭侍郎謂欲圍巢
縣必先力取東關銅城牯毀其門戶初五日令慶

衍等專攻銅城牐派水師會合連捷等專攻東關
初六日夜連捷令師船由蟹子口潛渡陸師緣隄
而進設伏九峰山下另遣勇士數十人從東關近
處暗渡毀柵越濠肉薄登壘各軍奮力繼進賊惶
懼而遁復被伏軍衝殺立破石壘遂於五更克復
東關黎明七陳邨等處之賊來援我軍分路搏鬪
盡焚各賊卡館而還慶衍等攻銅城牐之軍於初
六日過八角廟下寨奮攻一日夜賊黨伏匿不出
乃畱隊扼守八角廟率師移勦百旺市五顯集各

鎮先清銅城牖之後酣戰數時將兩處卡壘一律平毀振旅而至水師乘勢猛攻陸軍亦萬槍齊發蹋毀南街土壘遂攻破銅城牖一隘駢尸塞道無一得脫而林頭鎮另股亦爲水師擊走

上海軍攻克崑山新陽縣城竄賊擒斬殆盡

賊首僞天將夏天義等率悍賊數萬久踞崑山新陽縣城李巡撫自克太倉卽令戈登統帶常勝軍與總兵程學啟等各軍分路進勦直逼賊巢僞募王譚紹洸由蘇城糾合大股來援爲水陸各軍擊

退斬首百餘級紹洸復於北門外築壘環逼參將周良才等督兵奮擊戈登放炸礮助之連破賊壘二十四座殺賊逾萬學啟察看地勢知正義鎮爲蘇賊援崑必由之路因於四月十二日與戈登駕坐小火輪船繞赴正義鎮率同總兵郭松林等分頭攻勦破石壘兩座紹洸見歸路已斷出賊三四萬人奪路狂奔伏兵截殺水師礮船連環轟擊賊卽紛紛回竄我軍分路直抵城下各駕雲梯蟻附而上遂於十四日克縣城計前後生擒悍賊七千

餘人轟斃二三萬人落水死者無算

曾營水陸各軍會克巢縣含山和州三城

我軍自克復東關銅城牯後大戰於笱箕山逼紮望城岡四月二十二日水陸兩軍進攻巢縣賊踞城壘矢石交下相持竟日二更後水師環隄猛擊悉焚湖中賊划毀其浮橋記名按察使劉連捷自河南飛騎馳至共破沿河六壘羣賊競向東門回城我軍卽躡蹤從東門而入別隊由南門攻入適浙江提督鮑超亦派數營從廬州西來遂於二十

二日夜克復巢縣二十四日連捷等及提督蕭慶
衍與鮑提督會師於含山賊已宵遁鮑提督以賊
去未遠星夜往襲和州比入州境水師已駛入和
州港內城賊逃遁不及半聚壘中大怖乞降盡釋
脅從斬其頭目以徇於是各整部伍入城休息

上海軍克復楊舍汎城

克復福山後沿江上游爲江陰縣之楊舍汎舊有
一城乃明時備倭者爲江邊著名險要距常熟江
陰各五六十里賊眾死守以蔽江陰總兵劉銘傳

等督兵勇進紮鹿苑步步近逼黃提督翼升親督水師沿江兜擊賊眾分黨來援自四月十六至二十一日先後擊退二十二日官軍分路猛攻大呼登城守城悍賊二千餘名殲戮殆盡擒斬賊首趙尙林等多名立將楊舍汎城克復

浙軍截勦富陽新城援賊

富陽水師獲捷後左巡撫飭布政使蔣益澧督陸軍會攻富城以進規杭省因富春江潮汐甚大我舢板戰船身輕不能壓潮行駛乃調甯波水師布

興有艇船竝令甯紹台道史致諤雇募烏船十二
號從鹽子門駛入錢塘江助勦僞忠王李秀成嗾
僞聽王陳炳文等舍蘇州常昭之圍率黨由餘杭
趨臨安圖竄新城以襲富陽官軍後路花旗粵賊
亦分股由績溪回竄淳安分水地界繞越新城温
處道魏喻義等督兵馳回新城四月初一日進勦
殲賊千餘圍一騎黑馬掠陣之賊被洋槍賊護之
逸去獲其黃呢大轎訊之活賊卽僞聽王也是夜
五鼓賊復乘霧分道來犯攻撲新城我軍俟其近

城礮石交擊斃賊不計其數提督高連升等馳抵
新城之南楊昌濬亦率十營自嚴州至賊見我師
大集拋棄攻具向臨安路鼠竄而去是月左巡撫
於嚴州營次奉

旨升授閩浙總督兼署浙江巡撫以一兵柄浙民同聲
歡慶知賊不足平矣

江甯陸師攻破雨花臺僞城及聚寶門外諸石壘

僞忠王李秀成六安戰敗由九洑洲潛歸江南紛
傳將回救蘇州李巡撫致書曾巡撫屬其力攻上

游以分賊勢毋令忠賊得以全力援蘇曾巡撫以忠賊回救蘇州固可慮尤虞其直犯揚州計莫如急爭金陵老巢使無暇他顧乃於四月二十七日宣諭各軍多備攻具先登者上賞退後者必誅漏甫二下齊隊出濠六路併進每一路以一營爲前鋒兩營爲策應令總兵李臣典攻雨花臺石城副將趙清河等攻聚寶門外南卡石壘總兵晏禮週等攻西卡石壘副將何玉貴等攻東卡石壘又令陳滉等出中路易良虎等出左路應之前鋒各營

於三更時潛抵石城石壘東草填濠架梯欲上賊
衆驚覺燃礮外擊我勇中礮而踣者五人各隊少
卻李臣典立斬二卒舉旂直前諸軍分擲火毬火
箭悉入石城天漸嚮明副將趙三元等率親兵從
礮台下蟻附而升李臣典等督各隊肉薄齊登敵
樓火發賊不能支立將僞城攻拔趙清河等復平
毀聚寶門外九石壘餘賊紛逃我軍追過聚寶門
外長干橋逼入水者無數城內之賊出大股接戰
爲各軍截殺敗竄回城

雲貴勞總督由川入黔中途擊敗髮賊

勞總督崇光赴雲貴任由四川彭水入黔甫抵綏陽適僞翼王石達開餘黨萬人竄至勞總督馳抵旺草汎民寨猝然號召鄉團分投部勒連日轉戰斃賊數百人竝飛調總兵沈宏富馳至會勦四月初八日軍練分道竝進殺賊千人生擒一百餘名賊由山逕小路遁去各團四路兜截復殺賊數百名適宏富等渡河追至匹馬衝鋒各勇齊心奮擊追殺二十餘里斃賊三四千人生擒五百餘名賊

由合面山遁回五南坪

川軍勦滅巨股生擒賊首石達開

偽翼王石達開與偽北王韋昌輝分爭後率其死
黨四竄屢犯浙江福建湖北湖南廣西廣東等省
邊境竝擾滇黔蓄意入川以圖竊據壘爲官軍
堵截復分股旁竄率綴大兵而自率大隊由雲南
之米糧壩渡金江駱總督派總兵唐友耕知府蔡
步鍾等調集漢土各兵分紮沿河要隘四面兜勦
三月二十七至四月初四等日屢次搶渡均被我

軍槍礮轟擊無一生還遂撲松林小河以冀直趨
天全土千戶王應元等扼河力戰斃賊數千八十
二三等日都司慶吉土司嶺承恩等率兵夜劫賊
壘斃賊無數遂將馬鞍山占住絕賊糧道步鍾亦
派兵過河殺斃數百名達開自知陷入絕地傾巢
而出圖撲大小兩河友耕等督兵迎勦擊沈登筏
賊多名二十三日達開親擁大眾水陸分撲官軍
沿河用火彈火箭拋射竝以槍礮轟擊都司謝國
太參將楊應剛等由松林小河馬鞍山兩路齊進

直撲紫打地方將賊巢焚毀斃賊數千名逃出之
賊爲漢土兵練兩面夾擊賊眾墜巖落水浮尸蔽
流而下者以萬餘計達開率餘黨七八千人奔至
老鴉璇復被土兵截殺進退無路卽爲楊應剛等
擒獲解省訊明極刑處死竝於起解石達開之夜
將餘黨三千餘人以火箭爲號同時圍殺淨盡溯
自洪秀全粵西倡亂僞王五名僞南王馮雲山僞
西王蕭朝貴先在湖南擊斃僞東王楊秀清僞北
王韋昌輝自相殘殺族滅惟僞翼王石達開素蓄

大志假仁義以籠絡其下賊爭附之因與洪秀全
隔絕獨樹一幟幾不可制至是爲川軍擒戮五僞
王全滅天下決之

五月曾營水陸各軍會克江浦浦口二城草鞵夾燕
子磯等數隘進破九洑洲賊壘江面一律肅清

我軍攻克巢含和三城及雨花臺石城羣賊大駭
兼以上海各軍旣克崑新圖蘇郡江北各賊倉皇
失據紛紛南渡天長六合來安等處次第解圍浦
口賊棄城遁走江浦之賊獻書乞降浙江提督鮑

超記名按察使劉連捷察知其詐於五月初九日引軍疾進提督蕭慶衍亦引軍來會進次江浦賊已聞風宵遁遂將江浦浦口二城一併收復沿途追勦抄過賊前賊正竄九洑洲洲賊不納被我舟師截江圍勦積尸以萬計初十日我軍將有事於九洑洲曾巡撫乘夜至新江口與彭侍郎楊提督會勘此洲在驚流急湍之中高峙僞城難於猝取計莫如先攻南岸諸隘以撤其藩籬十二日派總兵丁泗濱等爲頭隊從下關進調總兵喻俊明等

爲二隊從草鞵夾進調派既定各將弁循南岸飛
駛而下將逼賊巢賊衆萬礮齊開猝不得近我軍
豫以枯荻灌油縱火江上焚賊舟數百衆勇乘勢
薄壘從煙火中搶險而入立平下關草鞵夾八賊
壘十四日分兵襲破燕子磯殺賊毀壘而還楊提
督先探北岸叢莽中有隄埂一道可達九洑洲賊
濠之外因商令劉連捷等陸師數隊由隄埂闕處
鳧水進十五日會合水師大舉進攻適新立太湖
水師統領李提督朝斌自皖省整隊而下銳氣方

新人殊死戰槍礮對轟片刻不息至日晡賊防少
懈乃於初更時移船潛近賊壘乘西南風縱火立
焚賊船數隻風烈火猛延及洲上卡房各軍大呼
登岸躍過重濠肉薄齊登前鋒既殪後者更進二
更後越牆撲入聚殲羣賊無一脫者遂奪九泐洲
偽城長江一律肅清此洲爲金陵屏藩倥得倥失
茲以水師全力克之傷我精銳不少事後各統領
述及猶爲痛惜也

上海軍會勦江陰無錫援賊攻克南北溇各邨鎮

自克楊舍汎李巡撫令統領李鶴章會督各軍進駐常熟縣之王莊與黃提督劉銘傳等力禦援賊章護普潮侍五僞王率黨八九萬圖援江陰窺竄常熟自江陰界之顧山至無錫城外連綿數十里賊壘密布江陰另股之賊於五月十四五日圍撲楊舍爲劉銘傳痛勦擒斬千餘人僞忠王復渡江回援將合五僞王之衆分路內犯李巡撫與黃提督等定議滾營前進以銘傳七營之衆進北溇攻其左總兵郭松林吳建瀛副將黃中元所部八營

進南澗攻其右總兵滕嗣武周盛波所部八營進
麥市橋爲中路三路各增三營以厚兵力黃提督
水師各營分助之鶴章自率馬隊列陣顧山以督
戰別遣周壽昌黃金志兩軍進張涇備無錫援賊
二十一日分路殺賊均有斬擒二十二日銘傳嗣
武軍焚賊船於麥市橋時賊勢尙熾復有無錫賊
由張涇至鶴章望見之恐壽昌軍單急遣馬隊助
勦敗之於嚴家橋賊退屯長涇鶴章因令中右軍
大隊伏河岸僞欲潛渡而水師急進南澗焚賊船

松林乘間越南澗趨長涇賊大駭愕我軍衝陣血
戰賊大潰追之至祝塘而北澗賊援長涇欲斷我
軍歸路建瀛中元之軍敗之時酷暑將士飢渴乃
罷戰其夜鶴章傳令諸將乘月上潛劫賊壘竝令
大隊伏要口四更後各路火器齊發槍林彈雨賊
眾紛紛奔潰水陸官軍鼓譟而進銘傳攻破北澗
賊壘二十七座嗣武攻破麥市賊壘二十三座松
林等攻破南澗賊壘三十五座擒斬賊眾六七百
名戰至天明江陰無錫援賊由跨塘橋長涇等處

分路來援與敗賊合隊迎拒各軍以小隊衝進以大隊圍裹之戰不數合賊反奔追至八字尖竹塘等處沿途殺斃溺斃八九千人蹋毀賊壘賊卡一百餘座計二日一夜生擒僞王宗僞朝將僞主將及賊之僞封義安福燕豫五等之賊百餘名悍賊五千餘名轟斃斬斃萬餘名溺死者無算焚燒賊船七十餘隻奪獲賊船三十餘隻馬五百餘匹僞印二百餘顆槍械數千件顧山以西縱橫七八十里一無賊蹤銘傳仍駐楊舍黃提督水師駐大河

六月初旬賊壘撲楊舍別股又擾長涇均擊走之
周壽昌即降將錢壽仁所更名也

江西浙江兩軍會攻饒州府屬之陶溪渡賊壘

皖南賊自黟縣竄出屯踞於江西饒州府屬之陶
溪渡石門茅屋嶺等處五月二十四日浙江按察
使劉典親督各軍會同江西道員席寶田參將韓
進春竝王德榜黃少春等營分路進攻賊眾蛇伏
牆內環放洋槍守備楊旬德首先衝入以火箭噴
筒焚毀更樓木椿各軍從烈燄中奮勇而進斃賊

甚多次日進春等復督隊進攻賊大股乘夜從僻
徑潛遁仍畱死黨數千踞壘抵拒二十六日各營
分路追勦截殺無算旋卽衝入賊壘風迅火烈會
賊潰敗棄巢而遁

六月上海軍攻克花涇港同里鎮二處賊壘收復吳
江震澤二縣

蘇州踞賊以吳江震澤二縣同城當江浙之衝爲
嘉湖援賊必由之路添聚賊黨分紮花涇港同里
鎮以護之李巡撫將圍蘇州乃令程學啟以水陸

十三營與戈登李恒嵩之常勝軍乘船至九里湖
距花涇港同里鎮均十餘里畱三營扼湖口學啟
自督各軍會戈登取花涇港十二日副將歐陽利
見敗賊於夾浦破其石壘十三日水陸竝進張光
太等將湖北賊壘蹋毀生擒五百餘名潰賊鳧水
遁官軍以槍礮排擊斃賊數千蘇州賊酋突率二
萬餘人礮船一百餘隻由尹山橋圍攻花涇港學
啟親督水陸各軍往援分抄賊後副將劉士奇奮
勇夾擊賊卽潰遁將同里賊壘攻克恒嵩知官軍

攻勦同里之際城賊必不爲備先將北門外賊卡
蹋毀竝將回竄之賊擒斬淨盡十四日學啟督軍
進逼城根合力攻勦守賊自知不敵開門出降吳
江震澤縣城卽於辰刻收復學啟督四營籌城守
十六日嘉興援賊數萬至南門學啟率眾掩擊敗
走之遂分路設防以備嘉興蘇州援賊時賊黨連
犯夾浦由平望窺同里鎮後路又直撲同里均擊
退李巡撫乃謀取江陰嘉善以分賊勢

平定粵寇紀略卷十六

同治二年七月曾營湖口各軍攻毀文橋賊壘江西
全境肅清

先是偽堵王黃文金糾合諸賊酋於二月由皖入
江分擾鄱陽浮梁祁門都昌各縣屢爲浙江援軍
與江西防軍所扼不得深入乃折而西竄湖口分
爲三路上路由文橋中路由梧桐嶺下路由太平
關而文橋賊勢最重黃文金親踞其中曾營浙江
鹽運使李榕統帶鈞字全營自彭澤項家山一捷

後聞湖口告警於五月十四日至湖口之三里街
前曾大臣以皖北廬州等處喫緊奏調改就武職
新授貴州提督江忠義適自九江東渡來會紮堅
山以逼之六月十七日賊自文橋撲犯堅山營盤
江提督令各營直前迎敵李榕亦率隊至賊始卻
退十九日賊以大股匿於酬山以小股誘戰江提
督戒堅壁勿出賊計沮悉眾來攻我軍但以槍礮
外擊忽見一酋指麾眾賊賊無反顧者江提督詢
之降卒知爲黃文金聚槍一發應聲而仆賊眾爭

昇以行相率奔竄堅踞文橋不復再出二十八日
敗另股賊於陳兵馬鎮二十九日復在花尖山毛
家店鏖戰會浙江援軍按察使劉典及江西席寶
田顧雲彩屈蟠各軍擊賊於南路青山橋斬馘二
千有餘屈蟠復敗之於畝家洲賊始有退志七月
初三日夜江提督在堅山營中俯瞰文橋七壘火
光熒熒若隱若現度將宵遁遂約李榕出隊會勦
賊不虞我軍猝至惶懼無措各勇踰濠蟻附而升
立將文橋七壘卒毀日夜追勦直出建德所屬之

羅家畝積尸塞道時僞祐王率援賊數萬抄出官軍之後都司夏基鴻等斂眾血戰短兵相接以一堂百賊又大潰向建德遁去各營裹糧窮追殲斃無數江西境內一律肅清

上海軍攻毀太湖賊營直逼蘇城竝進攻江陰蹋平附城賊壘

上海官軍自攻毀沿湖賊卡後程學啟至吳江與李提督朝斌太湖水師會夾浦口督師船槍隊嚴陣而前盡下沿湖賊卡湖濱有大闕口賊憑湖設

立兩壘一卡堅守死拒以聯絡蘇嘉之賊七月初
七日學啟率親軍礮隊當中路太湖水師四營分
攻其東西歐陽利見截賊後先敗東山援賊學啟
謂賊壘如鳥翼當先攻北岸遣敢死士五百越水
夜襲之開礮環擊轟斃悍賊無數左有才等督軍
奮勇先登歐陽利見等截扼飛虹橋口竝斬斷浮
橋賊不得遁悉數殄滅斃賊首徐尙友一名南岸
賊壘卽望風奔潰官軍乘勢追殺竝將洞庭東山
立館各賊全行誅戮計斃二千餘人落水死者無

算學啟等遂督軍圍逼蘇州進屯跨塘鳳凰頸唐家濱水師進金雞湖獨池湖大牛橋陽城後湖與婁門葑門相距數里太湖水師亦泊南舍鎮時總兵劉銘傳將攻江陰統領李鶴章先遣七營至楊舍助之初七日敗賊於黃山及東門外斬首數百級生擒百餘名獲僞安福等數名賊於城外四門分壘踞守銘傳於十一日蹋毀北門賊壘十二日各營會攻東門將石壘三座次第攻克竝將賊眾歸路截斷四面兜殺生擒僞天將及僞燕侯等十

餘名斃賊千餘名擒斬賊酋二十餘名各軍滾營
進紮逼城而陳

克復楓涇鎮竝浙江嘉善縣之西塘鎮

賊以大股拒守楓涇鎮李巡撫派令編修劉秉璋
等各營進紮官塘七月十二日賊眾撲拒道員潘
鼎新帶隊迎擊斃賊多名賊敗回巢我軍結營濠
牆甫立賊復來撲勢甚兇猛鼎新令洋槍隊排擊
燃礮猛轟各營分路包抄賊眾驚潰擒斬百餘名
奪獲槍礮旂幟多件十三日秉璋等三路竝進賊

匿不出各營連放炸礮轟倒石壘數處忽浙江嘉善縣援賊大至楓涇賊突出數股迎拒游擊蔡渭川等開礮猛攻自辰至午木椿盡拔遂分隊繞過賊壘之西將援賊擊退副將楊鼎勳等帶各營由浮橋渡河繞至賊壘東北賊眾憑河抗拒官軍直撲東柵兩石壘賊施槍礮子密如霰鼎勳督勦愈急兵勇緣牆而上噴筒火箭齊施賊壘登時火起悍賊均焚死左旁壘賊奪門出竄斬馘數十名餘悉就擒街中踞賊膽落驚走各軍乘勢追殺復奪

石壘一座賊卡七處計焚溺殺死賊三四千人生擒五百餘名遂克楓涇鎮我勇亦傷亡百數十人是日都司曾守忠督礮船出楓涇西路亦將茜涇塘賊壘一座攻克自得楓涇後嘉興平湖乍浦各賊來援嘉善者約三四萬人分踞於干窰西塘等處綿亙二十餘里十八九日各營水陸齊集秉璋等由楓涇進西塘鎮太湖水師二營來會淮揚水師張元龍由蘆魁塘攻西柵楊寶勝朱開泰由楊匯攻北柵援賊分路迎拒另股由干窰出撲爲水

師擊退烏涇塘大路之賊蠶擁而來西塘鎮賊亦由南柵衝出鼎勳飭勇排放洋槍斃賊無數賊潛分兩翼從東西街口撲出鼎勳膝受槍傷裏創力戰官軍勇氣百倍賊隊漸搖動參將江福山先由馬鳴庵橫河衝入烏塘斷干窰之道副將熊殿元銜尾連進環施排礮復出隊登岸斷賊往來之路賊眾首尾不能相顧英國人馬格里以開花礮轟擊大隊悍賊斃十餘人鼎勳等督勇四面兜殺賊隊紛紛墜河生擒七百餘人內有洋人七名爲賊

領隊立時傷斃副將張元龍等分攻北柵西柵各
斬馘數百人生擒數十人當將賊壘攻克西塘鎮
亦埽盡餘賊竄併干窰二十一日復派游擊劉起
帶隊進勦甫至中界賊眾出拒劉起首先衝入殺
騎馬賊目一名各勇奮呼直前賊遂驚潰踢破石
壘一座土壘兩座計斃賊二三百名生擒五十餘
名餘賊遁入嘉善城統計擒斬溺斃悍賊四五千
人獲賊首僞王宗廖姓僞鑼天安施得桂僞敬天
福汪敬之僞鎧天侯曹盛勇訊明正法我軍傷亡

不及百人

八月上海軍克復江陰縣

江陰踞賊日久負嵎李巡撫飭總兵劉銘傳等帶兵進攻屢獲奇捷賊勢漸蹙七月十三日賊首陳坤書及湖武齊區五僞王糾眾十餘萬人由常州等處分道來援列隊數十里統領知州李鶴章自常熟至以洋槍隊敗之因賊眾我寡久恐難持立調副將張樹珊等自常熟福山馳往救援竝調總兵郭松林等八營橫衝賊後勦破祝塘璜塘賊巢

乃出周莊與樹珊會且戰且進沿途擒斬四五千
人直逼城邊鶴章銘傳周覽縣城四圍賊勢西自
江邊東至山口沿途紮木城十餘座其中石壘土
壘木卡大小百餘座守禦極堅因合水陸各營分
路進攻豫爲部署七月二十九日五鼓松林樹珊
等七營馬隊埋伏山後銘傳由中路進副將周盛
波周盛傳循城出其右先擊東南大隊援賊又以
四營出城西綴無錫援賊而黃翼升水師扼江干
誘賊出敵自辰至巳賊隊森列層層抵拒松林忽

自山後翻上賊眾拚命血戰松林大呼殺入橫衝
直突賊眾尾隊掣動頭隊遂亂銘傳樹珊揮眾直
擣中堅賊遂大潰各軍追殺人馬自相踐蹋死者
山積其附城踞守各賊見援賊敗走惶惑不定我
軍乘勢促之將沿河木城土壘木卡百餘座全行
掃蕩添調洋槍隊並帶炸礮乘勝轟擊先將石壘
一座轟塌各勇越濠踰牆賊遂棄巢而走其餘各
壘之賊悉被殲擒提督黃翼升又將極西山邊賊
壘攻破於是城外各股援賊勦逐淨盡鶴章飭各

營四面困城七月三十八月初一等日官軍分投
進攻礮力所及城堞望樓大半塌毀賊有內應者
是夜三鼓兵勇緣梯而登隊伍相繼呼聲大震守
賊下城巷戰我軍槍礮驟如風雨賊眾披靡偽廣
王李愷順墮水死間有小路衝出之賊又被官軍
擊回無得脫者當將江陰縣城克復

上海軍攻克蘇州寶帶橋賊壘

總兵程學啟進規蘇州營於外跨塘距婁門七里
時附城賊壘十九礮遠不能及八月初四日學啟

至承安橋賊由婁葑齊三門出學啟以水陸三路當之既敗援賊遂營於永安橋壘有擒斬城東南寶帶橋爲太湖鎖鑰賊立石壘一土壘三防守甚固學啟與戈登謀先取之時官軍雖屢捷而賊壘堅密猝不得前因先期令陳東友成俞卿統礮船下黃天蕩李朝斌水師入寶帶橋與陸師會十一日僞忠王李秀成自金陵返蘇圖解城圍十六日水陸皆至宋有勝張行科襲其右陳忠德朱定元襲其左朝斌督水師八營入尹山橋爲中路洋將

戈登龐發乘輪船繼之先攻土壘賊棄而狂奔石壘亦潰追至盤門沿途截殺平燬賊卡十餘座秀成親率悍黨來援學啟督諸軍擊卻之分扼水陸要道屬戈登龐發駐守寶帶橋李巡撫又檄張遇春等四營往助

浙軍克復富陽縣竝破新橋各賊壘

浙賊竄併富陽負嵎死拒以蔽杭州布政使蔣益澧圍攻數月未下疫氣流行將士物故者多不克痛勦迨七月杪江西肅清按察使劉典引軍還歙

相距漸近營中疫症已消左總督乃檄飭力攻竝
調康國器所部粵勇馳赴富陽與蔣軍合益澧復
令法國總兵德克碑酌帶洋礮槍隊爲轟城之助
勘得富陽城北雞籠山地勢險要必由此進攻斷
其糧道始足制其死命八月初七日調水師副將
劉連升等師船渡陸路游擊徐文秀等過長沙繞
城北以攻雞籠山水師副將楊政謨與洋將德克
碑由寶塔嶺腳登岸以攻倚城各壘令總兵劉清
亮率原駐新橋各營出隊以掣賊勢益澧自統親

兵督戰賊眾見官軍大至齊出猛鬪文秀等督隊奮擊攻破頭層賊壘賊眾拚死回拒槍礮雨密官軍鼓譟大進游擊余朝貴繼之搶入二層賊壘奮力衝殺斃賊百餘名賊大潰大小卡壘盡破新橋出賊千餘來援亦爲文秀等擊退益澧令文秀等就賊舊壘背水結營原泊江中拖罟廣艇及對岸大小礮船連放炸礮向城轟擊城賊大震楊政謨等會同洋槍隊攻倚城大壘城賊出迎益澧令副將劉清望等助戰徹夜轟擊城賊壘賊中傷者不

計其數初八日黎明益禮親督參將李運榮等助
勦官軍倍加奮迅首先攻破賊壘一座賊勢皇亂
不敢入城向新橋一路逃竄總兵王月亮等率所
部截殺又斃賊數百名文秀等由雞籠山繞出新
橋併力追殺遂將富陽縣城克復新橋各路踞賊
爲高連升等督率各營亦於是日分道進攻有悍
黨萬餘出敵諸軍奮力痛擊立破賊壘六座殺賊
數百名劉清亮等蹋平賊壘五座殺賊七百餘名
文秀等督兵追至合力長驅共破賊壘二十餘座

沿途斃賊無數生擒七百餘名奪獲旂幟千餘輜
重器械馬匹僞印無算富陽一城地控上游爲杭
城鎖鑰賊久堅守與新橋賊壘爲犄角此次各軍
晝夜環攻將賊壘悉數殲除軍威益盛

江甯陸軍毀上方橋江東橋諸賊壘

初賊踞金陵時僞東王楊秀清布置最密城外如
九洲七里洲中關下關雨花臺紫金山秣稜關
江東橋上方橋等處類皆築壘如城掘濠如壑爲
堅不可拔之基曾巡撫攻克數處聲威已震七月

初復攻克印子山賊巢因江東橋爲西南要隘飭
候補道陳湜圖之上方橋爲東南糧道飭提督蕭
慶衍圖之七月二十日慶衍出印子山之東逼壘
下寨二十三日曾巡撫復派數隊滾營而進更紮
慶衍新壘之前昇巨礮晝夜環轟賊衆堅壁不出
曾巡撫於二十九日潛遣總兵熊登武等繞出上
方橋搶築堅營以截賊後賊糾衆來撲亟敗之慶
衍知壘賊計窮傳令各營於夜半擁至濠邊大呼
猛進比賊驚覺軍士已半入壘中抽刀攢刺悉就

誅夷立將上方橋堅壘攻毀惟江東橋石壘旣堅
且高外隔水二道賊有險可恃負固拒守攻之逾
月未下八月十一日夜風霾蔽月咫尺莫辨陳湜
選銳卒數百亂流而渡特製絕大噴筒向壘飛擲
賊方驚眩我軍已衝過浮橋陳湜督大隊繼進有
緣梯而上者有向礮眼中蛇行而入者遂拔石壘
竝將眾壘一鼓下之城巾出援之賊適遇總兵蕭
孚泗自賽洪橋突出搏鬪移時亦受創而遁
青陽防軍固守三十八日援師大捷立解城圍

僞堵王黃文金等七悍酋擁十數萬眾在都昌湖
口彭澤一帶戰敗而東遂略池州直薄青陽城外
不數日間近城半里環築六十六壘又數里築七
十餘壘八月初旬以後無日不戰戰或小勝而守
將朱品隆病甚勢漸難支各營弁遣土人持書告
急書中悉作庾語遇賊不省得達皖城曾大臣卽
派浙江鹽運使李榕於八月初十日率鈞宇營至
洪山口攻破袁橋賊卡城中亦出隊應之十八日
曾大臣所調之總兵喻吉三陸師及彭侍郎所派

之總兵喻俊明水師進紮徐家邨提督江忠義江西軍記名道席寶田亦先後踵至眾心稍安二十一日喻吉三等有袁橋之捷二十四日席寶田由五溪橋踰嶺攻破賊卡賊卽驚潰軍勢至此一壯適彭侍郎來自池州周歷形勢於二十七日商令江提督等軍出董家邨山後包抄派各軍分路接應五更蓐食江提督親督所部行近董家邨解衣晷水浸及腰脇努力渡河從山後榛莽中緣巖而上盡殺巖腰之賊驟攻賊壘賊黨糾合大股冀抄

我軍後路江提督揮隊直前縱橫盪決吉三亦麾
軍助戰賊隊敗若湧潮中路堅壘旣下左路二壘
悉平適李榕由獅子山繞至邨口賊眾駭奔遙望
西北附郭一帶煙燄蔽天知守城之軍自內擊出
一鼓猛進悉平一百三十餘壘殲逾萬人餘賊遁
歸石埭一路青陽之圍立解計防軍苦守三十八
日米盡食馬馬盡掘麻根以充腹麻根漸盡而援
兵至矣賊自江西各路所攜米穀不下三四萬石
分儲壘中諸軍俵分之

上海軍進攻無錫擊敗水陸援賊

李巡撫議進取無錫八月十一日派郭松林督隊
至緱山十二日破賊壘於新塘橋並敗援賊二十
日統領李鶴章派道員張樹聲總兵滕嗣武列隊
芙蓉山立營以禦賊突有眾七八千人出惠山西
北塘頭嚴埭來撲各軍迎前擊退追入嚴埭水師
營官王東華從大圩駛入夾擊連奪賊卡乘勝追
至城根立將西北兩門各賊壘平毀鶴章復飭各
隊分路進攻均有斬擒並焚燒舢板賊船十餘隻

二十六日僞侍王李侍賢等合股內犯由無錫南門至坊前梅邨三十餘里賊氛甚熾高橋大股亦分眾七八千人擾至西高山出芙蓉山後城賊出北門犯塘頭東亭二十八日官軍分路迎敵松林督帶馬隊衝出東路設伏誘擊賊隊大亂悉向梅邨坊前敗走樹聲嗣武等軍由東王橋包抄夾擊擒斬千餘人賊眾復出礮船數十隻抄襲樹聲由東亭迎勦揮隊截擊竝飭礮船助勦將陸路之賊殲戮殆盡竝奪獲賊船五六十隻民船四五百隻

生擒賊目三十餘名西路高橋大股及北門出竄
之賊亦爲周盛波等擊退僞忠王復糾合水陸賊
十餘萬由蘇州竄出帶火輪船開花礮船多隻直
犯大橋角官營鶴章督軍飛援周壽昌率親兵數
十人向輪船施放火箭射入藥艙轟然火發竝燒
毀長龍炸礮船兩隻舢板船六隻焚斃賊二三百
名對河悍賊復由浮橋偷渡圍逼官營由西面填
濠拔樁越入吳勝清督率各軍施放火彈槍礮賊
尸狼籍適援軍大集勇氣百倍總兵張樹珊領洋

槍隊衝擊斃賊百餘賊猶死拒各軍分隊抄擊連
拋火彈延燒賊之藥篋張士芳從煙燄中揮軍直
入往來馳突四面環攻賊眾奪路奔竄復被蕭鳳
高等率劈山礮隊扼橋截擊斃賊數百名落河溺
斃者無算南面之賊爲水師黃提督等率隊用洋
槍橫擊轟沈賊船多隻擒賊二百餘名大橋角營
之圍立解其退踞黃埭及竄緱山等處之賊亦均
爲官軍連日擊退擒斬甚多竝燒毀火輪船礮船
多隻訊據生擒之賊供出僞祥王黃隆芸及僞忠

王之子均被官軍所蹙落水淹斃

陝西漢中府城固縣先後失守

髮捻各賊自正月內由興安分竄二月陷紫陽旋
退出屢撲漢陰廳石泉縣均得民勇竭力固守是
月竄漢中府旁擾城固縣布政使毛震壽疊次截
擊以賊勢太眾漢中府於八月二十日城固縣於
二十七日均失守

九月甯國涇縣防軍疊獲勝仗

七月下旬太平賊酋古隆賢石埭賊酋賴文鴻等

乘青陽被圍官軍不暇兼顧之時各糾大股蓄意
犯涇以古賊一股踞茂林潘邨等處以賴賊一股
踞丁家渡張家渡等處甯國守將劉松山督隊於
八月初八日馳抵涇縣與守涇之總兵易開俊會
商勦辦初九日先將張家渡賊館洗盡十六日馳
擊茂林至則鳳邨李邨之賊聞風悉遁乃環攻茂
林賊壘擊傷古賊立燔巨壘二座並派別隊攻破
潘邨三壘於是合軍追逐又蹋平二壘於潘邨之
後餘黨向太平老巢而遁甯國北路之賊一聞松

山赴涇卽謀襲郡城十四日松山引軍馳回設伏
敬亭山以待十八日賊數千人蠶擁而至吹動賊
之所謂聖角者爭撲官營踰濠競進松山突啟北
門鼓譟而出賊不及備倉皇欲遁適西門各隊追
賊而來遂橫斷歸路賊乃東趨廟埠又爲松山所
蹙相率循河下竄維時涇之水南都尙有踞賊二
十四日易開俊破之於丁塘田坊四頁邨等處九
月初三日追至平垣賊踰崖而逸初七日宴公塘
等處之賊退併風坑易開俊卽於初九日出隊琴

溪橋下設伏敗之賊竄甯國縣

上海軍攻克蘇州之五龍橋賊壘分勦嘉湖援賊

我軍既克寶帶橋而橋西五里有五龍橋賊尙踞之以通浙省八月十九日李秀成率黨攻寶帶橋營程學啟戈登水陸合禦竟日始卻二十六七等日城賊分出閩齊葑三門來犯又撲大橋角七星橋各營皆擊走之學啟與戈登謀先攻五龍橋賊壘以絕盤門出太湖之道九月十一日學啟自率水陸七營出寶帶橋戈登乘輪船與周正林水師

會鮎魚口爲左右路李朝斌水師進澹臺湖爲中路先後破賊六壘截殺壘賊幾盡立將五龍橋攻克張遇春又敗盤門援賊時嘉湖賊犯平望十四日學啟屬戈登守五龍橋自率水陸於十五日分道進勦途中賊卡均下會軍於八坵擒僞貴王陳得勝斃賊三千人毀賊壘三十餘座獲賊船數百隻追賊至平望斷其橋蘇州賊益奪氣

江甯陸師屢收東南沿河要隘再克秣陵關

我軍攻克江東橋上方橋後尙有城東數隘未下

近城者曰中和橋曰雙橋門曰七甕橋稍遠者曰方山土山曰上方門高橋門迤南則爲秣陵關以至於博望鎮皆金陵之外輔也會巡撫以東路未平不能逼城遂令提督蕭慶衍等東渡立營詎賊已先築數壘拒我九月二十日慶衍等揮軍從上中游過河破五土壘俄而城壘各賊來爭均爲我軍擊退將東岸營盤築成二十二日賊又諸道竝出各營奮力競進賊黨靡然返竄遂克上方門高橋門雙橋門諸石壘而右路方山土山之賊亦各

棄壘而奔於是七甕橋踞賊惶遽欲遁正謀一鼓
下之忽城中出大股來援總兵蕭孚泗等急督各
軍合力擊卻仍復逼壘環攻二十四日夜遣死士
潛往縱火賊眾冒煙突出乃將七甕橋賊壘攻克
其博望一鎮總兵朱南桂已於先五日襲取之曾
巡撫以博望鎮旣得則秣陵關之勢孤七甕橋旣
平則中和橋可力取遂於二十五日派總兵伍維
壽等南略秣陵關候補道陳湜等出七甕橋之西
與總兵熊登武等會師於中和橋一戰克之秣陵

關之賊見我馬步馳至棄釜狂奔追及河干斬二百餘人而還自是紫金山西南無一賊巢矣

曾大臣受古隆賢投誠重復石埭太平旌德三縣

石埭太平旌德失陷踞之者爲僞匡王賴文鴻僞奉王古隆賢及文鴻爲涇軍所敗遁入甯國縣而三縣遂爲古隆賢獨踞八月間青陽之捷賊黨震懼古隆賢遣人於總兵朱品隆處通款願率眾獻城乞貸一死品隆察其窮餓歸誠爲請於曾大臣許其降九月二十八日親赴石埭宣諭降眾竝調

踞守太平之江老三歸併石埭給資遣發遂於二十九日前往太平收復城池初江老三方以太平來獻而偽天將江會義率黨叛往廣德二十七日涇縣守將易開俊橫出擊之斬馘頗眾乃引軍進次旌德賊已聞風先遁餘黨盧旺有等聚城歸降於是三城悉復

十月上海軍攻蘇州壘克賊壘

我軍有大橋角之捷賊勢漸蹙李秀成仍糾無錫溧陽宜興之賊八九萬船千餘隻泊運河口而自

率悍賊踞金匱縣之后宅結壘漸進統領李鶴章
謂賊方倚河爲固步步爲營我軍不宜浪戰亦當
立營制之九月初八日自督隊至后宅而令滕嗣
武張樹珊赴大橋角立四營初九等日壘敗坊前
梅邨安鎮鴻山之賊李巡撫以賊之巨股全集西
路志在保無錫以援蘇州檄鶴章等堅立營壘固
後路乘間翻營擊賊而令程學啟戈登由蘇州橫
出賊後時潘郎中曾瑋上先攻蠡口黃埭之策學
啟從之十九日會同戈登等乘夜督帶輪船洋槍

隊進攻蘇州齊門外之蠡口戈登連開炸礮傷賊
多名學啟督水陸各軍環攻兩時之久賊漸撓亂
礮隊踰牆襲入立將蠡口賊壘攻毀殲斃悍賊千
餘名城內之賊糾眾來援亦卽擊敗十月初一等
日學啟督軍攻黃埭賊壘僞天將萬國鎮糾眾突
圍學啟戈登等督放開花礮羣子星飛電掣乘勢
越濠直入黃提督復令水師登岸夾擊賊眾紛竄
當將黃埭等處賊壘四座攻毀擒斬二千餘名生
擒僞天將萬國鎮其蘇州無錫交界及無錫西北

惠山一帶復有秀成糾股分踞鶴章督率各營分
布夾擊連日屢有斬擒九月十六等日秀成見東
路備嚴乃西犯大橋角黃中元帶隊擊卻躡蹤追
勦擒斬五六百人蹋毀後宅南塘等處賊壘十一
座二十七日秀成悉出其黨列隊以拒鶴章復約
諸軍滾營前進分攻坊前梅邨茅塘橋賊壘賊眾
扼守興隆橋周盛波督軍擊走沿途追躡斬獲甚
多賊眾分竄安鎮緱山等處郭松林等分股抄擊
餘賊退往嵩山官軍乘勝進攻梅邨西倉賊巢松

林大呼陷陣用洋槍連環排擊賊眾大潰立將梅
邨賊壘十餘座蹋平燒燬賊船多隻生擒僞護國
軍師李生香及賊目數十名擊斃僞航王唐政才
一名擒獲及淹斃殺斃賊眾六七千人竝攻毀西
倉茅塘橋等處賊壘多座秀成等分道遠遁

曾營會水陸各軍疊復水陽新河莊東壩各隘高瀆
甯國建平溧水四縣

甯國太平二府以東久爲賊藪九月間彭侍郎率
總兵喻俊明等約記名道吳坤修等陸師將有事

於水陽楊提督岳斌亦親率戰船來會師次審灣
見有大石壘能越水陽等壘遙擊我軍至二十六
日風雨蔽天俊明等乘夜運礮環轟比曉石壘半
圯遂鼓譟而前坤修等亦駕小划入亮陡門平圩
埂數壘併攻水陽破之其南路則有水師總兵成
發翔等會台總兵王可升陸師力攻新河莊又破
之水陽迤北曰滄溪距滄溪十餘里曰唐溝爲直
達高瀆之要路二十九日彭侍郎令坤修等取滄
溪而自襲唐溝進拔高瀆湖口之兩壘至長樂鎮

上有石城我軍直入湖心忽梗一橋洋槍賊聚踞
各將并竭力衝擊斫橋舉火併石城燔之適坤修
等亦自滄溪戰勝而還方議合攻高瀆而賊目楊
友清涕泣乞撫乃受其降十月初二日入高瀆城
安撫是夜略取固城鎮初三日守涇之總兵易開
俊敗賊於東安鎮會甯郡守將劉松山克復甯國
縣降卒萬餘畱五百人隸標下餘悉資遣之自是
東霸守賊黎立新等上書請爲內應建平守賊張
勝祿上書獻城池時值浙江提督鮑超已克東夏

四壘與彭侍郎合趨東壩繞壘圍攻僞輔王楊輔清從亂軍中逸去守賊立獻僞城遂於初七日將東壩攻克東壩復而建平捷書亦至自總兵馮標入境宣諭張勝祿等感激思奮卽於是日斬僞跟王藍得仁舉城以降而踞溧水之楊英清亦願繳軍械各散回籍乃於十二日將溧水一併收復

上海軍攻克許關虎邱等處

蘇州官軍攻克蠡口黃埭等處賊壘由許關一帶進勦十月初九日各軍分路繞進許關賊已連壘

數十座堅守抵禦鏖戰三時戈登帶槍隊奪勇直撲立破王瓜涇口賊壘六座程學啟亦將觀音廟賊壘四座攻克各軍直抵關口施放洋槍火箭各斃悍賊無算遂將許關賊壘五座全行攻破學啟復會同洋人克根木督帶輪船進逼十里亭賊壘先破其左一座餘四座亦卽敗遁虎邱各壘賊相繼潰走賊卡十餘座一律埽平擒斬悍賊不計其數官軍直追至閩門街口沿途賊尸枕籍五龍橋進攻盤門之軍亦將賊壘六座蹋毀直抵城下

楚軍於陝西會勦川賊藍二順收復山陽縣

藍二順與兄藍大順由雲南昭通府倡亂擾四川
同治元年四月入陝西與粵賊通藍大順踞洋縣
等處藍二順踞商州之山陽縣本年十月西安將
軍多隆阿督楚軍勦王閣邨等處回匪派總兵藍
斯明分勦髮捻各賊是月二十二日斯明會漢中
候補京堂李雲麟一軍攻山陽飭知縣匡久安督
民團扼守要隘正欲進攻藍二順聞知豫於四更
時東竄遂收復山陽縣率眾追及東岡痛擊之賊

竄富水關沿途截擊竄至商州所屬之二郎廟等處紛紛潰散

李巡撫克復蘇州省城

蘇州省城被賊占踞四年之久我軍屢克要隘而賊仍於胥葑婁等門憑河築壘數十座遴精銳以守之婁門外石壘尤堅巨時程學啟軍於河東十月十二日李巡撫自上海抵學啟營中下令破賊十九日我軍攻婁門石壘學啟緣南岸戈登緣北岸揮軍竝進李巡撫親督之以炸礮傾壘牆十數

處賊勢披靡李秀成譚紹洸率萬人突出婁門拒戰學啟分隊應之賊少卻常勝軍肉薄以登立破石壘援賊遁入城中而陳東友水師復由黃天蕩擊賊會攻婁門外賊壘二十餘座皆下二十日黃翼升沉文榜破齊門賊壘楊鼎勳李朝斌張遇春破盤門賊壘於是我軍三面水陸逼城賊黨膽寒有乞爲內應者二十一日僞忠王李秀成見官軍攻逼日緊城賊散亂知事不可爲攜死黨萬餘宵遁專令心腹老賊僞慕王譚紹洸拚死固守痛

哭而別二十二三等日學啟朝斌翼升等親督水陸各軍由各門分路進攻晝夜不撤愈逼愈緊戈登亦親抵城根開礮轟擊二十四日譚紹洸上城抵禦正對眾指揮偽納王郤永寬等商令偽天將汪有爲出其不意抽刀刺殺紹洸竝殺斃譚賊死黨千餘開門迎降自署其眾爲二十營仍欲分屯閩胥盤齊四門郤永寬竝不薙髮學啟恐不可制密白李巡撫必誅之二十六日出城謁見察其狀誠叵測乃將郤永寬及偽比王伍貴文偽康王汪

安均僞甯王周文佳僞天將范啟發張有洲汪懷
武汪有爲八犯駢戮於市學啟等統帶隊伍入城
彈壓竝搜殺悍賊數千名朝斌等復由盤門等處
截殺多名解散數千人立將蘇州省城克復六百
里報捷奉

旨曾大臣從優議敘李巡撫加太子少保銜竝

賞穿黃馬褂提督黃翼升李朝斌等給賞有差權授江
蘇省總兵戈登賞給頭等功牌竝銀一萬兩以示
嘉獎先是戈登與部永寬等有誓約八犯駢戮後

戈登忽率所部移營崑山潘郎中曾瑋聞之飛棹
詣其營告以賊情責以大義辯論三日始欣然受
賞而歸

十一月蘇州軍攻克無錫金匱縣城生擒賊首

官軍進攻蘇州時統領李鶴章方督軍進取無錫
蘇賊分黨來援鶴章等滾營搏戰凡十晝夜賊始
卻十月十六七等日攻克三里街萬壽橋等處賊
壘時無錫之賊北聚於高橋南聚於望亭二十一
日克高橋二十六日克望亭分路進逼四面合圍

賊首偽潮王黃子澄父子率黨六七萬人負嵎死守鶴章督軍環攻夜以繼日竝分兵堵截宜興常州兩路援賊十一月初一日周盛波郭松林等燒燬賊船百餘隻攻破惠山石卡二道擒斬悍賊一千餘名是夜鶴章令知府丁日昌手燃三眼開花礮焚燒賊屋數處乘賊慌亂督率道員張樹聲等攻破亭子橋口賊壘一座殺賊數百名初二日官軍連破東北南三門賊壘十餘座奪獲賊船甚多又破其西南二壘鶴章見城上賊漸移動令郭松

林吳建瀛分飭水陸各軍奮勇齊進一擁登城賊眾下城巷戰賊首黃子澄自率老賊五六千人逃
出北門爲周盛波擊斬二千餘級賊眾轉向西門
而遁周壽昌督隊斷其去路賊眾衝突十餘次壽
昌手擒黃子澄餘賊追斬殆盡黃子澄之子亦爲
郭松林擒獲共計生擒大小賊目五百餘人擒斬
溺斃二萬餘人救出難民三萬餘人當將無錫金
匱縣城克復

蘇州軍攻克常州城外賊壘竝敗句容援賊

我軍克蘇州無錫之前李巡撫派劉銘傳等分兵
攻常州以杜北路援賊銘傳由常州城北之陳渡
橋羊頭橋間道進越過圩塘賊壘十月初九日紮
西施橋孫邨等處周盛波張樹聲兩軍出東路攻
奪白家橋賊卡十三日統領知府李鶴章自無錫
至令各軍滾營前進十四日先破圩塘賊壘賊勢
披靡二十日僞章王林紹璋自句容合五六萬之
眾來援鶴章傳令各營官分攻各門以綴城賊而
自率九營禦之鏖戰竟日援賊始退我軍又別出

奇兵繞至前途逐之攻城之師進破南門賊壘四座逼紮城根賊勢益蹙

鎮江軍陣殲丹陽句容賊首

十一月二十四日僞忠王之子句結句容悍賊僞岡天義黃姓率賊二三萬眾分道撲犯鎮江甘棠橋官營勢甚兇悍馮提督子材等督飭諸軍分投設伏迎勦賊以數十騎誘敵官軍堅不爲撼賊首黃姓率洋槍隊直撲陣前副將楊青山整隊以待見賊逼近開放排槍連環轟擊勢密如雨賊紛紛

倒地岡天義黃賊中槍墜馬我軍衝入陣中割其
首餘賊奔潰官軍分路抄擊戮斃無算賊眾遁回
丹句各城

蘇州軍收復浙江之平湖縣乍浦沈海鹽縣澈浦鎮
竝攻克平望鎮等處賊壘收復浙江嘉善縣

浙江嘉善縣與江蘇婁縣接壤而城東張涇滙尤
當其衝我軍旣克蘇州劉秉璋潘鼎新督兵越境
會勦十一月初四日克張涇滙以爲圖浙根本先
是平湖賊首乞降請爲內應鼎新等分道進兵而

別屯兵於鍾埭以拒嘉興援賊十月初八日水師
逼平湖城下賊反戈自攻開門迎師陣斬洗天安
等巨酋而同時乍浦等處亦乞降初五日鼎新督
師疾至乍浦攻克東門外牛橋賊壘十二日收復
乍浦汎城十三日收復海鹽縣城十四日收復澉
浦鎮孟河汎二城均分兵駐之李巡撫以其地去
蘇州遠而賊眾仍蠡聚於江浙之交平望等處乃
令鼎新等自爲應援而檄程學啟速攻平望以制
賊二十二日學啟李朝斌督諸軍進攻分軍爲三

道水師率領團練各槍船由汾湖兜勦而別遣軍屯梅堰橋防湖州之賊時平望南北岸賊有石城土壘各二我軍方悉力猛攻賊眾突出二三千人抗拒爲陸軍併力擊退復於次日分路進攻忽嘉興來援賊萬餘朝斌等分兵併力夾擊學啟督兵連開炸礮轟斃悍賊多名立破賊之南壘朝斌督率將士由河南附堞而登副將龔生揚等由河北蛇行而前破南之石城北之土壘各一座總兵王永勝等率勇填濠拔樁一擁而上復將北岸石城

攻破有竄逸者盡爲槍船截殺尸骸委如藁捆共計擒斬賊目二十餘人悍黨四五千人燒燬賊船五百餘隻奪獲大礮六十餘尊火藥五千餘觔礮船民船百餘隻旂幟器械無算追殺數十里復擒斬數百名淹斃尤眾黎里之賊望風狂奔復破賊壘三座二十四日一鼓下之嘉善守賊聞平望已克懼而乞命李巡撫令學啟往圖之二十七日收復嘉善縣我軍之進攻平望也賊尙壘犯海鹽平湖取道沈蕩新豐鎮鼎新等軍力禦之殲賊殆盡

浙軍攻勦杭州餘杭縣陣殲首賊

富陽克復後布政使蔣益澧統所部直搗杭州竝
調駐聞家堰西與各營渡江會勦以水師助之漸
逼清波鳳山兩門康國器魏喻義進取餘杭僞歸
王鄧光明僞聽王陳炳文僞朝將汪海洋等見我
軍分道竝進於負城一帶修築堅壘於城外樹立
木柵復令餘杭踞賊僞欽王謝天義等併力死守
爲犄角之勢兩城賊眾疊次來犯均爲官軍擊退
左總督馳抵富陽卽分飭各軍先攻餘杭賊悉眾

出撲擊斃數百名逼溺無算城賊拚死抗拒我軍
三面蹙之陣斬黃衣等悍賊五百餘名轟斃約千
數百名據報偽歸王鄧光明被礮轟穿左脇立斃
杭城眾賊聞風恐懼益漴派記名提督高連升洋
將德克碑等會同水陸各營進攻鳳山門外破賊
九壘逐北直抵城隍山下斃賊二千有奇

十二月蘇州軍擊退援賊奔牛解圍

上月我軍疊克常州賊壘奔牛鎮等處守賊乞降
十三日常州賊出圍降眾各營孟河小城之賊亦

自西而至道員馮席珍擊退之十四日進克孟河
城時有唐殿魁黃桂蘭等帶兵屯營奔牛鎮以扼
丹陽之賊被賊首偽章王等糾集悍黨竝用偽忠
王所購洋人輪船名飛而復來攻我奔牛營日以
炸礮轟擊又增築堅壘數十以圍之奔牛旁境石
橋灣羅池涇皆陷於賊十二月初二日劉銘傳抽
攻城之軍二千人欲突圍入援賊出隊迎拒以孤
軍未得達殿魁等密寄帛書告急初七日銘傳與
郭松林自將三營馳往途中皆賊壘且戰且行統

領李鶴章調槍隊兩營繼進爲應而李秀成李侍賢陳坤書三僞王復由金壇溧水等處添賊數萬四面環紮賊壘期逼奔牛以解常州之圍十三等日李巡撫令鶴章分撥將弁三路竝進繞赴李士橋與銘傳軍會十四日銘傳督率董鳳高畢乃爾等以小炸礮轟陷李士橋頭壘松林由上游攻賊東南黃中元滕嗣武由下游攻賊西南犄角而進密飭殿魁等衝出夾攻賊眾拚死迎拒我軍鼓勇猛進槍礮齊施先破東南賊壘聚殲其眾西面賊

壘亦皆驚亂嗣武乘勢縱擊賊眾奪門狂奔官軍
由後路追擊砍斃無數對河各大股之賊亦爲嗣
武等擊退開礮斃賊多名將飛而復來輪船焚燬
銘傳督隊向奔牛猛衝賊又分股數萬繞後圍撲
松林等折回復戰賊眾大驚各鳥獸散不及歸巢
向丹陽一路遁去我軍追殺十餘里連破賊壘三
十餘座斬賊萬餘生擒數十名奪獲旂幟器械無
算奔牛之圍立解

浙軍收復海甯州城

海甯州城濱臨大海雄踞下游爲杭城東北屏蔽
僞會王蔡元隆自太倉州逸出擁眾萬餘竄踞已
久聞蔣益澧大軍進薄杭州各門賊勢日蹙元隆
通款於前署海甯州都司王錫馴轉稟益澧願獻
城乞降左總督受之十二月十六日飭署杭州府
陳思燝等馳往對江之小泗渡駐紮元隆渡江來
見益澧察其情詞懇切宣布

朝廷恩德爲之更名元吉諭令回城薙髮部署既定二
十七日官軍入城元吉率眾羅拜馬前歡聲雷動

挑其精壯列爲元字八營駐紮城外聽調遣立功
贖罪餘衆由元吉資遣回籍

平定粵匪紀略卷十七

同治三年甲子正月陝西軍克復漢中府城竝截勦中
橋賊匪

髮捻各逆陳得才等上年八月踞漢中府因金陵圍
急洪道遣謀約令回援於十二月間傳偽令率在陝
各路逆黨東下陝西劉巡撫蓉偵知派令記名提督
何勝必蕭慶高等督兵急攻正月初十日破法慈院
賊巢斃賊四五千名十一日曾堯曾克勝等由牟家
壩進擊油房街賊壘斬馘二千餘名各軍直薄漢中

府城逆首聞大兵雲集卽圖出竄官軍乘其慌亂斬
關直入四路掩殺搜斬一千餘人當將府城克復逆
衆向東北奔逸其中橋逆匪竄往城固一帶與踞逆
合股亦經官軍連日在牟家壩木家壩等處節節進
剿復殲斃數千名逆衆復竄撲甯陝廳又經參將謝
正球等擊退

逆首李侍賢陷安徽績溪縣旋經官軍克復

僞侍王李侍賢勾結僞堵王黃文金及廣德餘黨於
正月初二日由甯國上竄初六日陷績溪縣進踞雄

路孔靈等處意圖直撲徽州初八日總兵唐義訓率師自徽州出紮吳山舖俄有紅衣賊酋帶隊擁至我軍列陣迎戰斬執旂賊數人唐義訓乘賊稍卻催軍逼勦盡毀雄路賊館賊衆退走回顧各山逆旂展動恃援轉鬪各營奮力猛擊斬賊無數適閩浙左總督自屯溪馳至唐義訓與之會師進攻初九日王開琳自臨溪驅賊至七里牌直抵城南賊遽返走入城唐義訓麾兵夾擊斜入城西賊由東西兩門遁出立將績溪城克復馳剪尾形而還

浙軍收復紹興府城克復諸暨蕭山兩縣

紹興被陷後道員張景渠統兵會同英國總兵哇樂德及權授江蘇副將達耳第福之軍進攻達耳第福以銳進陣亡正月十九二十等日景渠等與賊戰於下方橋安昌塘均獲勝逆衆節節敗退江蘇李巡撫以洋將德克統達耳第福之軍會同景渠等四面攻圍屢戰屢捷東路賊卡悉下竝斷蕭山援賊城賊楊應柯約期內應二十五日三更城中火光四起逆首周姓潛逃次晨應柯開門迎降我軍一擁而進立將

紹興府城收復先是諸暨縣民團趙春林等探知城中踞逆僅五六千名因率同投誠之方帶桂等分路環攻遂於二十二日將諸暨縣城克復殺賊無數逆黨何文慶率衆回撲官兵民團合力擊走之時景柒既復紹興立調各軍追勦由安昌塘柯橋進攻二月初二日抵蕭山城下賊猶閉門困守我軍奮力攻擊盡斃守城之賊緣梯而上立將蕭山縣城克復

浙軍收復桐鄉縣

浙江桐鄉縣城爲杭州至嘉興要路布政使蔣益澧

飭令蔡元吉乘夜潛師進攻復令李邦達等各率所
部分紮桐鄉東北兩門何朝將僞培章見官軍雲集
勢已窮蹙潛通欵於都司張其光於初六日隻身赴
張昇渠營中乞降呈繳軍械僞印景渠許之即於初
八日收復縣城

陝西軍大破上元觀賊壘進克城固洋縣二城

陝軍旣克漢中逆衆分路竄逸各軍乘勝躡勦直抵
上元觀賊壘正月十六日何勝心等分隊設伏誘賊
出巢縱兵兜擊截殺逆匪千餘人乘勝拋擲火彈將

逆壘一律焚燬餘賊向城固縣逃竄何勝必復會同
劉岳曙等軍渡河追勦直抵城下先將附城賊壘燒
燬蕭慶高等率隊奮力進攻梯城躍入賊衆驚潰紛
向東南奔竄官軍斬馘甚多當將城固縣城克復蕭
慶高等復乘勝進逼洋縣分路環攻竝潛遣精銳入
城設伏乘夜舉火爲號各軍奮勇登城呼聲動地逆
衆驚亂自相踐蹋官軍四面圍勦賊尸山積餘賊突
出東門向華陽一路竄走復將洋縣城池克復

蘇州軍攻克宜興荆溪縣城

逆匪占踞宜興荆溪縣城李巡撫派令郭松林等各營會同戈登李恒嵩進勦統領李鶴章又令楊鼎勳率隊合擊正月十九日戈登派洋將美叙羅殿至宜興城外察看地勢郭松林等帶隊直抵城下揮隊痛勦將近城各賊卡先行燒燬逆衆開城出拒官軍分路合勦擒斬多名郭松林被槍子擊穿右肘膝鬪武右骹亦傷弁勇間有傷亡二十一日常勝軍進河東松林等陸軍進河西水師溯流而上二十二日各軍屯三里橋常勝軍攻東門郭松林等裹創再戰敗

賊於上湖橋正得手間僞代王黃精忠由張渚達西
沈率黨來援拚死相撲我軍屹立不動但以洋槍排
擊逆衆死傷相繼尙無退志吳勝清等三路包抄逆
衆四面受敵勢漸不支各軍勇氣倍增殪賊甚衆賊
始奪路狂奔追殺四十餘里毀賊船千餘隻旂幟器
械無數援賊旣敗城賊之勢愈孤戈登督礮隊攻東
門滕嗣武等分攻北西南三門四面攻打愈逼愈緊
水師入東西沈截竄賊窮賊開西門而逃戈登與郭
松林等併力追殺竄逸無多餘衆泣涕求降於正月

二十四日將宜興荆溪縣城克復

蘇州軍壘克嘉興城外賊壘並敗湖州援賊

程學啓進規嘉興築壘北門壘有斬獲劉秉璋潘鼎
新營盤分紮朝陽橋等處時東北門賊壘尤多正月
二十四日學啓議分兵五路進攻城賊出援學啓率
親兵由小西門繞城河以截賊之後隊賊驚駭卻顧
我軍乃攻破小西門北門賊營七座擒僞天將劉得
福慕天義賈慕仁斃悍賊千餘奪大礮五十尊而分
攻旁路之軍壘克秋涇橋吳涇橋合歡橋等處賊壘

東北門之賊殲除殆盡時湖州賊屢竄南木壇坵壘
亭子新塍思犯盛澤平望以圖嘉興經淮揚太湖水
師敗之學啓乃督各營逼城興築礮臺二十八日學
啓督飭諸軍猛攻礮裂城垣十數丈城賊拚死抵拒
燃傾火藥下擊總兵何安泰等中槍陣亡未能得手
湖州賊又犯盛澤圍王江涇後路營盤學啓派兵堵
截敗之

江甯陸師攻竟鍾山天保僞城扼斷太平神策二門遂
合城圍

金陵一城延亘百餘里自浙江曾巡撫國荃駐師雨花臺以來奪取附城諸要隘東南西南三面悉爲我有惟東北鍾山賊壘未克城北兩門未合圍終不能制賊之命曾巡撫商之福建水師楊提督岳斌飭派師船絕江面之接濟又派總兵朱洪章等繞過鍾山之後分夜輪轟扼陸路之接濟復調駐守金柱關之總兵朱南桂助圍金陵正月二十日夜截殺句容護糧之賊甚多二十一日曾巡撫親督各軍至洪山北圍山神策太平等門外詳勘形勢適忠逆李秀成先生

入股猛撲嘉字營濠墻朱洪章等見賊抵死來犯率
隊出濠夾擊賊乃返走上山鍾山之巔有大石壘爲
名曰天保城各將奔攀巖直上火毬火箭從壘後直
入賊多冒火突出遂將僞天保城克復二十四日我
軍在太平門外新築二營派湘後左右營守之維時
總兵梁美材所部紮洪山朱南桂所部紮北固山堵
住神策門大路自此援賊不得入城賊不得出而
金陵城北之圍始合

粵匪勾結皖豫各捻同擾楚邊楚軍分勦被圍於霸山

旋獲大捷

陳得才等欲援金陵豫結皖豫各捻令同竄楚邊議於河南南陽湖北襄陽會齊合股下竄皖捻王庭幹一股及苗沛霖餘黨苗添整等先於上年十一月由信陽州竄湖北隨州之小林店天河口等處官大臣等飭派總兵趙克彰等擊退於十二月初三日竄桐柏之平市鎮初九日豫捻陳大澹一股由盤古山擁衆南趨與王庭幹會合約衆十餘萬竄入棗陽縣境本年正月二十四日總兵趙克彰王桐柏營總保升

烏勒喜布統率馬步在棗陽縣之霸山會勦被賊圍困提督成大吉由德安先帶馬隊往援衝入營中亦被圍裹維時賊壘賊館如櫛如壩我兵劈鞍以炊殺馬以食而軍氣堅忍不衰當經總兵楊朝林由棗陽縣之草店馳往成大吉趙克彰王桐柏各密調在外分防各步隊腹背來攻斃賊三四千名焚賊壘館一百餘處於二十九日解圍其藍二順一股由山陽竄入湖北鄖陽之上津堡道員梁作楫知府唐協和等會勦於正月二十一日收復上津賊分二股竄泗峪

河大壩口等處

二月蘇州軍攻克浙江嘉興府城

程學啓之軍進逼嘉興賊之城守甚固官軍多傷亡
又遇雨不能進攻時沿江竄賊方警學啓思亟復嘉
興抽兵西援乃繕攻具修礮台以圖猛進十五六日
分門攻擊賊拚死抗拒乃督勇丁補草膝行增築月
牆以護礮環攻不息十七日學啓督所部用洋人備
雷巨礮轟塌城垣百餘丈擊毀礮台二十餘座賊爭
負土填城闕學啓揮旂督衆詭欲登城俟賊益衆乃

燃礮發輒斃賊數百連夜督親兵成浮橋二道以濟
師十八日湖州賊白新勝來援學啓別遣兵擊走之
學啓乃會同李朝斌等奮力攻打督隊乘城城頭矢
石如雨程學啓奮不顧身親率勇士大呼殺入衆隊
繼進城上逆尸枕籍猶有悍賊二三千人排槍抗拒
程學啓肉薄以登致受槍子傷部將劉士奇等見主
將受傷各捨命率隊登城縱橫擊刺賊衆紛紛潰散
各軍整隊而入將守城悍逆圍殺淨盡遂將嘉興府
城克復學啓傷重歸蘇州旋卒學啓安徽懷甯縣人

曾巡撫圍皖時投誠疊著偉績曾大臣派隨李巡撫
至上海所向有功及卒李巡撫哭之慟奏請照提督
陣亡例優卹

予諡忠烈原籍及死事地方立專祠

收復溧陽竝解江陰常熟之圍

自克復宜興後進圍溧陽郭松林等沿途獲勝掃蕩
而前直抵溧陽縣境聲威大振逆衆膽寒賊目吳人
杰等率衆投誠當將縣城收復郭松林拔隊攻金壇
將城外賊壘賊卡一律掃平是時常州賊陳坤書方

合丹陽句容之賊十餘萬由西路繞出常州城北日
犯我軍統領李鶴章督劉銘傳况文榜等軍擊敗之
賊覘圍城之師無隙可乘乃圖竄擾腹裏二月初五
日賊循江岸犯江陰之南屆初十日犯常熟縣城十
一日犯福山於是江陰無錫三城皆警蘇州以西大
震李巡撫飭常州諸軍堅守勿戰飛檄郭松林等倍
道援常熟增調蘇州嘉興各軍助守令李鶴章守無
錫而分兵至江陰截賊歸路時賊以常熟守固乃趨
無錫鶴章登陣奮守力戰卻之而分犯江陰之賊又

爲守將駱國忠等所敗賊乃竝犯常熟北自楊舍福
山南自顏山王莊數十里皆賊提督黃翼升方返自
江北十四日自督三營由白茅口馳入常熟會同鄭
國魁李昭慶等軍於十六日竝出東北門擊賊郭松
林援軍復至夾擊之賊出不意大驚怖我軍乘勝壘
克王莊顧山陳市賊壘追殺二十餘里賊仍由大河
回撲常熟水師截擊之賊首尾不能相顧掩殺無算
十七日我軍追賊至劉家橋福山常熟圍乃解

江西軍克復金溪縣

髮逆分股竄江西疊經官軍沿途截勦賊匪敗竄闖入金溪縣城道員席寶田由安仁帶兵馳援分路攻擊乘勝埽蕩前進直逼城根悍賊萬餘出城抗拒官軍奮勇衝突賊勢不支另股由城東繞出欲抄我軍後路均經擊退遁入城中席寶田督飭全隊併力攻城賊衆膽落奪門逃遁官軍四面截擊斬馘無算立將縣城克復

浙軍克復杭州省城竝餘杭縣

杭州餘杭兩城踞逆經官軍於二月二十一日攻勦

獲犬勝洋將德克碑在饅頭山開放大礮轟塌鳳山
門城堞三丈餘賊勢極爲窮蹙蔣益澧復親督水陸
各軍於二十三日乘勝奮攻慶春艮山等門晝夜不
息賊膽愈寒是夜五更急啓武林門向德清一路竄
走蔣益澧督隊四面梯攻入城殺賊數千名卽於二
十四日卯刻將杭州省城克復餘杭之賊同日由東
門逃竄經左總督豫飭各營整隊以待是日見城中
火起各營分路躡蹤追勦餘匪敗竄瓶窰鎮當將縣
城收復

西安將軍多隆阿克復盩厔縣受傷旋薨

上月陝軍攻克洋縣其踞逆爲藍大順同治元年四月與粵逆通上年十月初九日竄陷盩厔縣留黨逆分守洋縣多將軍隆阿蕩平全省罔匪卽於十月十三日親至盩厔縣督攻藍大順百計守禦未得迅克本年二月二十三日開挖地道轟開月城丈餘將軍率副都統穆圖善總兵姜玉順等一擁而登詎城內尙築堅卡五道正力攻間將軍頭目受槍子傷甚重忍創回營諸將官欲趨視將軍傳令此城速克傷重

亦可痊如不乘城雖輕亦不欲復活諸將聞令益奮
努力再戰是夜露立雉堞不復收隊二十四日環攻
竟日至三更時穆圖善傳令三面緊攻於黑暗中向
東面填濠拔椿梯繩先入四路齊進克復縣城首逆
藍大順率數十人乘亂竄出至新口峪復裹脅二二三
百人欲竄甯陝經佛平廳團練截勦殺斃二百餘人
有死黨十餘人昇之翻山狂奔至漢陰界爲在籍主
事管蒞帶練殺斃生擒逆黨李登福王老么等送往
漢陰廳驗明藍大順首級餘匪均正法按藍大順自

咸豐九年在雲南昭通府倡亂與李短搭搭等蹂躪全川爲駱總督靖蕩據生擒之李短搭搭供指藍大順已死於亂軍中後竄洋縣者爲逆首曹姓多將軍屢次疏報均指爲藍大順蓋毋論藍與曹至此已殲厥渠魁矣將軍傷重至三月二十三日薨於蓋屋軍中將軍由黑龍江馬隊從征皖楚身經千百戰所向有功料敵之神罕與倫比同治元年秋銜命入秦閩八月初一日以親兵七十餘人解商南之圍初二日至初七日調四營勁旅破另股潁亳捻匪姜台

凌等五六萬之衆伏尸四十里山前巨壑竊不見底
人馬層積填與路平

恩諭云以少勝多可云奇捷平時愛士卒如骨肉而威令
嚴明凡所指揮湯火不敢避葬之日三軍雨泣天下
識與不識皆痛惜之方受傷時

上發內府珍藥敷治竝

命黑龍江將軍傳知其子雙全馳驛往視而多將軍無家
其子依居親申身無完衣黑龍江將軍憐駭資以行
裝始得馳往已不及見其公而忘家如此遺疏有云

云不使家有長物身有餘財非虛語也

三月浙軍克復武康德清石門三縣

浙省官軍克復杭州餘杭後餘匪分竄武康德清等處左總督派令楊昌濬蔣益澧等分路進攻羅大春先將黃桐橋浮橋折毀密飭各營分伏武康賊壘之外火器轟擊逆匪大震三月初四日羅大春等各率所部薄壘環攻逆首吳海勝憑卡抵拒降人楊芸桂等開門迎納官軍吳海勝逃至二橋埠地方復率援賊回鬪官軍排礮轟擊斃賊無數當將武康縣克復

德清一城經高連升等併力猛攻自辰至未鏖戰四時之久賊勦不支棄城而遁官軍分路追殺擒斬悍賊數百名奪獲船數十隻器械無算德清縣城亦卽收復蔣益澧復飭知州李邦達等進逼石門踞逆鄧光明出城就撫遂於初五日收復石門縣城道員李耀南等竝將圖竄孝豐匪股迎頭截擊斃賊無算救出難民數千名

鮑軍攻句容生擒僞王項大英等勦平寶堰賊壘

浙江提督鮑超東壩之師久無戰事曾大臣檄令進

取句容丹陽一帶踞句容者爲僞守王方海宗聞我軍將至卽在金壇寶堰等處糾結僞翰王項大英僞列王方成宗兩大股同守句容城希圖抗拒三月初五日鮑提督各軍冒雨疾馳攻破三岔山之賊於初六日次句容所屬之塔岡結寨未成賊已突出四五萬人悉銳來撲卽分三路迎敵搏戰數時參將黃海清等各率騎隊越過由隴直抄賊後總兵婁雲慶更以步隊佐之賊見歸路將斷大譁欲遁我軍直逼城下殲賊數千附城四壘亦卽一闕散去鮑提督令各

營徹夜環攻漏至四下忽見城東一角火光燭天知
內亂已作急引軍東向而賊已啓南門衝出各將士
乘勢勦殺竝縛二酋以獻俄有徐本邦等內應七人
叩馬通報指所擒二酋曰此僞翰王項大英僞列王
方成宗也遂卽正法於初七日克復句容縣城距城
四十五里曰寶堰南通金壇北達丹陽逆首方海宗
遁至彼處與壘賊僞顯王袁得厚合謀阻進兵之路
初九日鮑提督率隊進攻賊堅閉不出我軍負草填
濠爭先躍入一壘旣破衆壘盡靡殲戮無算方逆袁

逆往金壇丹陽遁去

蘇州軍兜勦楊舍一帶竄匪沿江腹地肅清

前蘇常等處竄匪撲犯江陰縣城已經官軍力戰解圍餘賊大股屯踞楊舍周莊華市等處夾山爲營蔓延甚廣李巡撫親赴江陰長涇察賊勢督戰甚亟飭道員張樹聲等軍四面環紮分路進兵先攻華市賊壘三月初六日劉士奇等督軍抄入賊後槍礮環施賊陣稍卻各軍拔樁踰濠一擁而進逆衆潰亂狂奔官軍追殺四十餘里賊尸枕籍自華市至樹山賊壘

百餘處一律掃平其奔逸之賊復經江陰北路之軍
截勦李巡撫馳赴青陽親督各軍兜勦楊舍踞逆逆
衆惶懼南奔與華市周莊敗賊併歸雲亭一路先是
初四日賊聞東路官軍至分賊萬餘馳赴三河口設
浮橋營壘以爲竄賊援應至是賊至雲亭欲由三河
口浮橋回竄初七日我軍列陣南關進勦別隊由花
山繞出賊前賊衆棄壘渡河我軍斷其浮橋四道溺
斃賊中人馬甚衆竝將賊壘截爲數段擒斬無算旋
又將三河口賊營攻拔其未過河之賊陷人圩中棄

械乞降數以萬計其已過河之賊經各軍前後來擊痛加斬馘賊因歸路先斷子藥俱盡大半徒手受縛所擄百姓米糧衣物概行拋棄我軍取得仍以散給窮民統計各軍俘獲近二萬人解散約有萬人餘匪二三千人分向常州丹陽竄逸沿江腹地一律肅清蘇州軍壘克常州城外賊壘

李巡撫旣克嘉興移軍進規常州時常州城西賊連營二十里以通丹陽金壇之路三月十四日我軍於城東南出隊綴賊劉銘傳攻西北六營盡破之十五

日李巡撫令郭松林等移紮城西南別遣王東華率水師進漏湖十七日松林等攻陳渡橋賊壘賊槍傷楊鼎勳胷猶揮將士格鬪松林繞擊賊後乃破其營餘十營竝潰鄭國魁方營新厝設浮橋濟劉銘傳之軍王東華水師由三河口會勦兩面夾擊復蹋毀河千賊營二十餘座於是賊西竄之路遂絕十八日各軍分道破小南門西門賊壘敗賊紛紛入城城賊恐我軍躡其後閉門拒不納殲戮無遺二十二日我軍合圍礮裂城垣數十丈勇士梯而登賊黨拚死力拒

塹堵壞城火藥與磚石竝下未能得手天復雨乃
攻是時鎮江之軍進丹陽沿江孟河圩塘魏邨螺螄
灣方家橋等處之賊萬餘先後繳偽印薙髮降悉遣
散之

鮑軍收復金壇縣

鮑提督既取句容遂平寶堰五壘彼處東北有丹陽
東南有金壇賊方分踞以與常州相犄角丹陽一路
有鎮江揚州兩處防軍攻之鮑提督遂督所部攻金
壇三月十二日渡河競進將欲壁於城下俄得鎮營

廣西馮提督來函以丹陽賊勢綦重商令移師助剿
鮑提督卽派總兵婁雲慶留金壇城外而自回句容
旋奉曾大臣飭令力保東壩之檄十九日飛馬傳知
金壇各營盡行撤回甫經傳令轉念撤營之時恐城
賊追躡我後或致疏失遂親率全隊偃旂息鼓於二
十日折回金壇之西洋邨設伏於茅山一帶備擊出
巢之賊金壇逆聞官軍撤隊果糾城賊二萬餘悉力
窮追鮑提督飭各軍伏於山後屏息不動俟賊追過
茅山催動號鼓伏兵齊起旌旂滿山賊不虞遇伏倉

皇急退各軍追殺五十餘里逼至金壇西門敗賊不敢進城而城賊亦啓南門遁走我軍蹙蹤追勦復敗丹陽小路竄出之賊卽於二十日收復金壇縣城

蘇州軍截勦金壇竄逆獲勝

鮑軍收復金壇縣敗賊糾約二三千人屯踞南渡東北小山大股則自山下行走意圖肆擾經李巡撫所派道員吳毓芬等於三月二十日設伏誘賊斃賊數千逆衆退入南渡西南之小蜀山等處二十五日僞直王林得英約會常州西路孟河呂城各賊欲由金

壇歸併廣德同至南渡占踞吳毓芬吳毓蘭督兵由
山腹出招仙橋令羅義勝礮船扼南渡而自率陳占
榜余嘉鰲陸軍銜枚疾出正道分隊圍賊卡時方二
鼓賊睡正酣悉斬之營賊乘黑出竄四山鼓角亂鳴
賊衆驚愕我軍槍礮疊舉應聲而斃逸賊至招仙橋
遇毓蘭軍迎頭截擊復斃無算吳毓芬會同吳毓蘭
羅義盛各軍分三路進攻槍礮齊發應聲而斃餘匪
紛逃二十六日追至丁上橋等處四面兜裹逆衆棄
械受誅伏尸數十里斬偽直玉林得英及秣天安黃

有才等於陣餘匪殄滅殆盡解散難民三四千人奪
獲衣糧馬匹槍械無數

江西軍攻克新城縣合兵圍南豐

逆匪竄江西壘陷南豐新城兩縣提督黃仁翼等督
兵進取新城於大漢嶺殲匪前鋒二三百名賊隊麕
集猛撲營壘官軍從左右兩路抄出賊後縱橫夾擊
羣賊披靡斃賊四千餘人生擒七十餘人各營進逼
賊壘至東北兩門由城闕處奮勇衝入城賊壘賊一
時俱潰殺賊二千餘人生擒八百餘人當將新城縣

克復追賊於樟邨苦林橋等處疊有斬馘餘匪由邱
家隘竄入福建建甯縣境其竄踞南豐之賊經席寶
田韓進春等軍分路併進擊賊八都圩后竹等處掃
蕩而前斬其僞倍天侯張在朋一名橋皆太坪嶮之
賊向水南楓嶺與僞天將林正揚合力抗拒我軍併
力合擊羣賊棄壘狂奔哨長蔣懷清以洋槍擊林逆
墜馬殲其步賊數百城賊悉銳出撲官軍分左右包
抄賊陣大亂殺斃無數追至城下四面合圍

湖北敗擒復竄襄樊與漢南粵匪合股

霸山解圍後捻衆復竄襄樊安襄鄖荆道歐陽正培
水師副將龍藻琦接戰小挫經總兵梁洪勝與成大
吉等率隊馳援痛勦獲勝襄樊賴以保全敗捻分竄
河南浙川廳所屬之李官橋鄧州所屬之厚坡適漢
南粵匪由浙川內鄉鄧州各邊界下竄於三月十九
日在李官橋合股令捻匪前驅前隊至棗陽縣西之
隆興寺尾隊尙在內鄉鄧州等處賊衆數十萬蔓延
數百里官大臣於四月初三日由省督師咨調多將
軍帶往陝西之總兵姜玉順藍斯明等軍回楚以厚

兵力

四月蘇州軍攻克常州府城生擒首逆

江蘇常州踞逆僞護王陳坤書等擁衆死守賊取舊
棺敗船堵城闕我軍進攻則發槍礮以拒李巡撫令
軍士築長牆百餘丈以爲障蔽掘溝於其下伏兵二
千人夜中乘賊不覺搶造浮橋初四日成浮橋六道
時久雨不霽李巡撫默禱於神初五日雨稍止洋將
戈登以礮隊攻南門常勝軍多傷亡不克登乃改令
提督郭松林總兵楊鼎勳督軍攻西南而常勝軍應

之提督劉士奇王永勝攻東南而張樹聲軍應之劉
銘傳之軍獨攻北門初六日日方中天大霽水陸礮
聲如雷舊擊之城復傾數十丈賊仍悉力抵禦李巡
撫親督各軍四面環擊屋瓦皆飛斃賊甚多各軍同
時奮勇登城逆衆率悍黨數千拚死抗拒劉銘傳等
揮軍直進將陳逆大股逼入街心節節追勦賊尸沿
衢塞巷追至護逆在處猶紮石卡以槍礮對擊官軍
圍之數重殺傷無算龔生陽突入擒僞護王陳坤書
周盛波擒僞列王費天將縋而逸者數百仍截殺之

三
棄械跪降者數萬人其潛伏城內悍賊悉數殲戮無
得脫者初常州城於咸豐十年四月初六日未刻失
守越四年同日克之併時刻亦符捷聞

優詔給賞有差

僧王督師入楚在隨州會擊髮捻各逆獲勝

官大臣出省督師水陸合擊於棗陽及京山所屬之
宋河鍾祥所屬之板蹬岡壘獲勝仗僧王勦辦張總
愚捻股由河南之鄧州新野人棗陽縣境四月初四
日至隨州帶同楚軍總兵楊朝林攻勦僧王親率馬

隊由隨州東西兩門包抄楊朝林督率八營由北而南一鼓齊進鏖戰四時之久衝突二十餘次賊始向東敗退追逐二十餘里殺賊一千餘名正值河水泛漲溺斃者一二千名總兵梁洪勝擊安陸府屬之賊於舊口獲捷殺賊數千名時河南張巡撫之薦於信陽州等處會截髮捻亦獲勝仗

鎮江揚州官軍會克丹陽縣城

廣西馮提督子材督軍圍攻丹陽揚州富將軍明阿派記名提督徐州鎮總兵詹啓綸助之逆衆屢次傾

巢出撲詹啓綸等以開花礮斃賊五百餘名陣斬僞
法天安鼎天安賊首二名四月初八日官軍斬關而
入逆首陳玉成之叔僞烈王陳時永等率衆拚死巷
戰官軍奮力迎擊斃賊六七千人陣斬各僞王及僞
義安福燕豫等逆目竝生擒洪秀全妻弟僞來王賴
桂芳等遂將丹陽縣城克復

東壩防軍擊賊獲勝

自丹陽克復後僞顯王僞甘王等巨酋糾敗賊三四
萬衆由天皇寺進竄大山頭一帶以圖犯我東壩竝

分股由漆橋進竄塘溝以圖犯我高瀆四月十三日
水師營官柳壽田進擊於固城湖敗之遂約高瀆守
將蕭信集追擊於楊邨又敗之賊大懼遁回漆橋復
歸併大山頭一股合竄東壩十四日總兵譚勝達等
尋食出隊師次安興遙見賊旗林立迎面撲至諸將
士燃槍環擊賊無懼志猛鬪十餘次勢甚剽悍譚勝
達卽於敵騎衝突之際橫躍入陣立梟數酋賊氣爲
奪其左路之賊亦爲我軍所敗乘勢追過右路而右
路聚賊尤衆擁護一首營官鄧訓誥策馬突出斬之

各路譁亂欲遁各營併力長驅勢不可遏甘逆顯逆正在高岡督戰我軍一擁而上亂鋒交下賊乃大潰逐出三十里共斃賊七千人中有偽王十七人餘賊向廣德竄去

江西軍解玉山撫州之圍浙江援軍敗賊於弋陽

逆匪先圍玉山縣經副將劉明珍等陣斬珊天安等斃賊三千有奇香河林屯一帶逆壘亦經河內水師及樂平練勇擊退四月十五日侍逆悍股越金谿犯許灣繼犯撫州之河東灣猛攻東門均爲按察使

劉于濬督飭各軍擊退逆衆復敢輸番誘戰營官黃
名揚等據橋守卡發礮斃賊無數護南贛鎮總兵曹
承忠撫州府知府吳祖昌等於城上連轟巨礮逆衆
計窮而遁十八日復突起攻橋環呼城中內應冀亂
我軍劉于濬飭列陣以待待逆撲近槍礮並發斃賊
甚多餘匪遁向金谿而去撫州城圍立解僞列王林
彩新由浙江竄至江西弋陽縣境浙軍道員王德榜
督隊追抵湖西揮軍抄擊斃賊無算敗竄黃沙港對
岸楊家坡王德榜督飭各營約會江西水師分路齊

進奮力環攻逆黨從上游渡賊千餘來援各軍沿河
截擊將浮橋折毀並擊沈賊船多隻賊殊死鬪官軍
鏖戰逾時逆勢始蹙落水斃者甚衆其南岸援賊亦
殲除淨盡共計殺賊千餘名生擒二百餘名救出難
民數千人奪獲騾馬槍礮多件

逆匪續犯徽州官軍截勦屢勝餘衆潰敗

僞侍王李侍賢等先後由浙犯徽由徽入江嗣報徽
州南路復有賊至詢其首目爲僞列王林逆僞鱗王
朱逆及僞爵潘忠義等究其來路蓋江陰楊舍之敗

賊常州城外之壘賊由丹陽湖州而上竄者也從昇
化進老竹嶺闌入歙境大埠等處距徽州三四十里
總兵唐義訓馳函告知前安襄鄖荆道金國琛降補
知府毛有銘各以所部來會是夜唐義訓伏兵鍾塘
嶺後四月十一日以五營進遇賊接戰伏軍竝發殲
其前鋒是時金國琛毛有銘會帶各營行抵富場隔
河而屯賊遽以大股齧列山岡上下我軍部勒既定
姑不出戰俟賊涉水將半突出奮擊更以騎卒沿隄
一包抄適唐義訓尾賊而至兩面夾攻賊卽不支緣山

亂竄俘斬千餘人解散無算逸賊遁向黃山小路復
於十一日爲唐義訓所敗十三日我軍向漁亭併進
唐義訓爲前茅毛有銘繼之金國琛又繼之馳抵五
弓橋賊已揚旂怒馬而來唐義訓先與交鋒金國琛
毛有銘分路會擊大呼衝入斬尸塞流收軍少息忽
齊雲山之麓衝出一股我軍再起破之是夜月色正
明唐義訓派隊赴南渡循河直上處處埋伏比曉金
國琛毛有銘亦率各營自五弓橋銜枚疾進賊正渡
河我軍鼓角齊鳴各山伏兵突出羣賊驚亂不復成

伍未渡者衆軍蹙之入水已渡者爲伏軍所截生擒
林逆等十酋陣斬潘忠義等十四酋死者散者二萬
餘衆輜重器械拋棄略盡

--	--	--	--	--	--	--	--	--	--

平定粵匪紀略卷十八

同治三年五月蘇州軍擊退湖州廣德援賊克復浙江
長興縣

長興縣在湖州西毗連宜興溧陽及廣德州時湖州
賊方竄湖濱楊漫大錢口潘鼎新分軍屯南潯震澤
以扼其衝而賊猶恃長興爲聲援李巡撫因浙省函
商助勦乃令郭松林等率三十營由宜興進攻別遣
李朝斌等率水師入夾浦口又別遣水陸五營接應
鼎新軍五月初八日官軍沿途疊獲勝仗鼎新軍

由南潯進紮吳淞水師乘風入夾浦伐蘆葦填河破
賊石壘十一日松林之軍進抵長興毀城東上莘橋
跨塘橋賊壘逆眾以千餘人出城迎拒經官軍衝擊
殲斃多名湖州逆首陳逆及廣德四安賊首江逆各
率數萬人分路來援依山築壘綿亘林谷郭松林楊
鼎勳由五里橋擊湖州援賊王永勝自新塘口馳至
兩面夾擊槍斃斬獲數千人遂將鴻橋跨塘橋沿河
傍山賊壘一律蹋毀劉士奇由磨盤山直逼廣德四
安援賊各壘相持正力李朝斌太湖水師登陸繞出

賊背自山梁疾趨而下火器直燒賊營烟燄蔽天各
軍分路勦殺殲斃溺斃者萬人將西北山沿山逆擊
概行平毀官軍正擬乘勢攻城湖州廣德添撥大股
折回意圖再逞郭松林等與淮揚水師劉士奇等與
太湖水師分路馳擊乘逆衆喘息未定合力痛斃斃
賊各數千人追殺二十餘里乃踉蹌遠遁官軍於西
北兩門乘夜搭造浮橋城賊槍礮並發哨官王備與
中槍殞命張正全槍傷左臂仍復裹創督攻游擊劉
玉龍在城北安設炸礮靠城轟打各軍分門逼攻縱

橫進擊五月二十四日轟蹋城垣十餘丈楊鼎勳督
隊渡河鼓譟而登賊以槍礮排聚闕口拚命死拒總
兵高正魁等均被槍傷仍各裹創力戰李朝斌郭松
林劉士奇王勝勇各率所部三面緣梯直上賊不稍
卻郭松林率總兵宋德鴻首先衝入千總劉興隆繼
之各軍一擁齊登將城中悍賊次第擒斬其由西門
衝出之賊復經我軍殲斃無數遂將長興縣城克復

江西軍埽清貴溪賊壘

江西貴溪盛源洞等處之賊分踞小港一帶築壘修

十經記名總兵孫昌國等督飭礮船駛赴黃土墩乘
夜開放槍礮逆衆倉皇敗竄暗中自相踐蹋水陸各
軍乘勝由黃土墩撲卡而入擒斬甚多逆大潰竄丁
家橋鷹潭等處復經王德榜等各軍分路追勦斬殺
數百人其退竄羅田岡上及鄧家埠等處之賊各路
官軍分投截勦共斃五百餘人逆衆搭造浮橋陸續
奔竄復經官軍追殺淹斃無數未渡之賊均經水師
轟斃解散賊匪尤多貴溪賊壘一律肅清
髮捻各逆南竄楚軍分途防勦賊竄下游

髮捻各逆自隨州及舊口等處擊敗分擾京山天門
應城各縣境竝踞皂市等鎮官大臣督諸將各路截
剿屢獲勝仗賊始南竄至孝感雲夢一帶護軍統領
舒保力戰陣亡賊復圍撲總兵石清吉楊店軍營經
石清吉二次衝圍力禦殺賊二百餘名遂竄往黃陂
縣之木蘭山一帶復擾及喬家店黃花灣等處距漢
口鎮僅十餘里經水陸各軍堵截前股既退後股復
至楚軍防剿兼施賊不能逞乃先後竄往下游

浙軍進規湖州攻克孝豐縣城

五月初十十一等日湖州踞逆由東南分撲長生橋
官軍營盤復潛軍偷犯各寨經蔡元吉等設伏迎擊
斃賊數百名生擒賊目三十餘名蔣益澧高連升復
派水陸各營助勦自十四日至三十日屢次獲捷焚
賊船十餘號將袁家匯賊壘一律毀平其南路賊匪
於五月初九日由太湖塘楊樓圖撲犯林圩何培英
乘其半渡擊斃多名劉樹元馳至夾擊逆衆敗竄我
軍乘勝追勦將太湖塘楊樓賊壘掃蕩淨盡其西路
竄踞孝豐之賊分犯百丈裏爲羅大春等擊退六月

初三日周廷瑞等潛師抵城劉端冕躍濠直入劉璈
督隊繼之城賊紛紛逃竄初四日遂將孝豐縣城收
復生擒偽咸王陳榮斃賊千餘陣擒長髮老賊二百
餘名救出難民五六百名

髮匪藍二順撲陝西省城將軍穆圖善留兵會剿

西安多將軍薨於藍屋軍中

授西安副都統穆圖善為朔州將軍接統楚軍奉

旨旋楚防勦所統三十營已飭總兵藍斯明姜玉順等率

二十一營先歸存九營未發初踞山陽縣川匪藍二

順於上年十月爲楚軍總兵藍斯明攻克藍二順窰
商州之二郎廟旋游弋於豫楚邊界復擾鄖西各處
本年二月多將軍克復盤屋其踞逆藍大順爲二順
之兄託名復仇於五月五日率黨疾撲西安省城劉
巡撫蓉撈兵迎勦小挫賊已竄至于午谷距西安城
僅十五里多將軍文案委員湖北候補道王開福白
穆將軍謂雖未奉

旨勦陝賊而逆黨突至未可分畛域請以所存九營兵勇
協勦將軍然之遂會劉巡撫及西安將軍德興阿出

隊堵擊屢獲全勝至九月將全股撲滅穆將軍復奉
調赴甘肅會固原提督雷正瑄辦理西口軍務

六月金陵各軍克復江甯省城生擒偽忠王李秀成等
全股悍賊盡數殲滅捷上七月初一日奉

上諭本日旨文曾國藩由六百里加緊紅旂奏捷克復江
甯省城逆首自焚賊黨悉數殄滅並生擒李秀成洪仁
達等一摺覽奏之餘實與天下臣民同深慶悅髮逆洪
秀全自道光三十年倡亂以來由廣西竄兩湖三江並
分擾及直隸山東等省逆迹幾徧天下咸豐三年占踞

江甯省城潛稱僞號東南百姓遭其荼毒慘不忍言罪惡貫盈神人共憤我

皇考文宗顯皇帝赫然震怒恭行天討

特命兩湖總督官文爲欽差大臣與前湖北巡撫胡林翼肅清湖北上游胡林翼駐紮宿松一帶籌辦東征事務特授曾國藩爲兩江總督並

命爲欽差大臣東征江皖號令既專功績日著十一年七月我

皇考龍馭上賓其時江浙郡縣半就淪陷

遺詔三條請切以未能迅殄逆氛爲恨朕以冲幼寅紹不
基祇承先烈恭奉兩宮

皇太后垂簾政聽

指示機宜授曾國藩協辦大學士節制四省軍務以一事
權該大臣自受任以來卽建議由上游分路勦辦飭彭
玉麟楊岳斌曾國荃等水陸竝進疊克沿江城隘百餘
處斬馘外援逆匪十數萬人合圍江甯斷其接濟本年
六月十六日曾國荃率諸將士克復江甯外城殺賊數
萬逆首洪秀全率其悍黨仍踞內城抵死抗拒茲復據

曾國藩奏官軍自得僞天保城後賊衆防守益密五月三十日李祥和等率隊攻克占取龍膊子山六月初一等日各營輪流苦攻李成典率吳宗國等從礮極密之處重開地道蕭孚泗等修築礮臺肉薄相逼十六日黎明曾國荃將四路隊伍調齊地道火發揭開城垣二十餘丈李成典武明良等身先士卒直衝倒口而入各弁勇蟻附齊進左路城頭之賊以火藥傾盆燒我士卒死者甚多大隊稍卻彭毓楠蕭孚泗手刃數人由是弁勇無一退者武明良率隊登龍廣山與右路太平門之賊

排列轟擊賊始卻退李祥和等從太平門月城攻入王
遠和等進擊中路攻偽天府之北劉連捷亦率隊由
神策門地道之旁梯攻而入相與會合齊進鏖戰至獅
子山奪取儀鳳朝陽等門羅逢元從聚寶門之西由地
道闕口仰攻而入李金洲等從通濟門月城緣梯而上
陳湜等猛攻旱西水西兩門月城偽忠王李秀成率死
黨狂奔將向水旱兩門奪路而逃爲陳湜大隊所阻遏
仍轉回清涼山黃翼升等水師各營攻奪中關攔江磯
石壘乘勝猛攻濱江之賊與陳湜易良虎等奪取水西

旱西兩門由是全城各門皆破三更時分僞天王府及
各爲王府同時火起烟燄蔽空洪逆率悍黨千餘人衝
出僞殿前南門竄至民房袁大升等率隊腰截斬七百
餘名奪獲洪酋僭用僞玉璽二方金印一方四更後賊
股千餘人假裝官軍號衣向太平門地道闕口衝突經
岨字湘後等營截擊曾國荃又加派馬隊追至純化鎮
生擒僞烈王李萬材復追至湖熟鎮將逃賊全數斬刈
無遺據曾國荃親訊李萬材供稱城破後僞天王之兄
巨王幼西王幼南王定王崇王璋王乘夜衝出被官軍

馬隊追擊將各頭目全行殺斃又據城內各賊供稱首逆洪秀全實於本年五月服毒而死瘞於宮院內偽幼王洪福瑱重襲偽號城破後洪福瑱積薪自焚李秀成一犯城破受傷匿於山內民房經蕭孚泗等親自搜出竝搜擒偽王次兄洪仁達其餘兩湖兩廣等處多年悍賊經各將士於十七八日搜殺淨盡三日之間斃賊共十餘萬人偽王偽天將主將及大小酋目約三千餘名無一得脫者此皆仰賴

昊蒼眷佑

列聖垂床兩宮

皇太后孜孜求治識拔人材用能中外一心將士用命成此
大功上慰

皇考在天之靈下孚薄海臣民之望自維藐躬涼德何以堪
此追思

先皇未竟之志不克親見成功悲愴之懷何能自己此次洪
逆倡亂粵西於今十有五年竊據江甯亦十二年蹂躪
十數省淪陷數百城卒能次第蕩平殄除元惡該領兵
大臣等櫛風沐雨艱苦備嘗允宜特沛殊恩用酬勞勩

欽差大臣協辦大學士兩江總督曾國藩自咸豐三年
在湖南省首倡團練創立舟師與塔齊布羅澤南等屢
建殊功保全湘南郡縣克復武漢等城肅清江面全境
東征以來由宿松克潛山大湖進駐祁門疊復徽州郡
縣遂拔安慶省城以爲根本分檄水陸將士規復下游
州郡茲幸大功告成逆首誅戮實由該大臣等籌策無
遺謀勇兼備知人善任調度得宜曾國藩著加恩賞加
太子太保銜錫封一等侯爵世襲罔替竝賞戴雙眼花
翎浙江巡撫曾國荃以諸生從戎隨同曾國藩勦賊數

省功績頗著咸豐十年由湘募勇克復安慶省城同治
二年連克巢縣含山和州等處率水陸軍各進逼金陵
駐紮雨花臺攻拔僞城賊衆圍營苦守數月奮力擊退
本年正月克復鍾山石壘遂合江甯之圍督率諸將士
鏖戰開挖地道躬冒矢石半月之久未經撒隊克復金
陵殄除首惡實屬堅忍耐勞公忠體國曾國荃著賞加
太子少保銜錫封一等伯爵並賞戴雙眼花翎記名提
督李成典於樁礮叢中捨挖地道誓死滅賊從倒口首
先衝入衆軍隨之因而得手實屬謀勇過人著加恩錫

封一等子爵竝賞穿黃馬褂賞戴雙眼花翎蕭孚泗督
辦礮臺首先奪門而入竝搜獲李秀成洪仁達巨逆寶
屬勲勞卓著著加恩錫封一等男爵竝賞戴雙眼花翎
等因欽此捷報中在事出力各文武給賞有差
七月普行賞賚

七月初一日

皇上修告成之禮各廟拈香
天地社稷壇盛京

三陵

東陵

西陵

大廟遣官告祭軍興以來各路統帥疆臣公忠體國共濟
時艱同心勦賊調度有方

特加異數

欽差大臣科爾沁博多勒噶台親王僧格林沁再賞一員
勒令其子受封並封

欽差大臣大學士兩湖總督官文一等伯爵世襲罔替江
蘇巡撫李鴻章一等伯爵並

賞雙眼花翎陝甘總督楊岳斌兵部右侍郎彭玉麟均加
太子少保銜一等輕車都尉世職四川總督駱秉章
一等輕車都尉世職雙眼花翎浙江提督鮑超一等
輕車都尉世職西安將軍都興阿江甯將軍富明阿
廣西提督馮子材均騎都尉世職京口副都統魁玉
雲騎尉世職漕運總督吳棠頭品頂戴仍交部從優
議叙從前有功死事之臣分別

賜祭獎卹王大臣軍機章京閣部司官並優加獎勵

逆首洪秀全劉尸焚燬生擒偽王洪仁達李秀成凌遲

處死

曾大臣由安慶馳抵金陵先有僞宮婢爲湖南道州黃姓女子指出逆首洪秀全埋尸處所於六月二十七日在僞宮內掘出逆尸違尙邪教不用棺木以繡龍黃緞包裹袴腳亦用龍緞頭禿無髮鬚尙全存已班白左股右膀肉猶未脫驗畢戮尸舉烈火焚之時方苦旱燔尸後大雨如注逆首雖逃顯戮於生前仍櫻極刑於身後洵足大快人心其所擒僞忠逆李秀成僞王兒洪仁達二犯奏奉

上諭跳梁小醜無所用其獻俘且恐沿途派兵遞送騷擾
驛傳重累吾民著於江甯省城凌遲處死並傳首髮逆
所到各省以伸天討而儆兇頑等因欽此

湖北髮捻各逆竄擾麻城縣踞白果

五月以後逆衆大隊漸集分擾新洲辛家冲柳林舊
街馬鞍山會龍山等處官大臣派提督成大吉督率
各軍層節掃蕩疊克賊巢捻逆復竄聚於麻城縣境
髮逆陳勝才等屯白果等處麻城縣防守極密各軍
奮力圍勦僧王復派隊會攻總兵姜玉順等自陝帶

隊馳至兵力漸厚疊有斬擒七月十一日於麻城之
木牌樓將僞天將蔣開揚等擊斃

鮑軍掃蕩許灣賊壘並克復崇仁宜黃東鄉金谿南豐
五縣城

江西之賊分踞金溪東鄉宜黃崇仁南豐五縣城欲
成長圍以困撫建而崇東踞賊恃許灣爲老巢由雙
鳳嶺至洋洲徧築堅壘時江忠朝席寶田之軍方破
崇仁賊壘並敗東鄉之賊鮑超因議先取許灣於七
月初一日移營七里岡初四日督飭各軍四面環攻

逆衆拚死拒戰相持時許我軍愈戰愈奮用草填濠
極力猛撲先將雙鳳嶺琉璃岡九子嶺邨神嶺等壘
攻毀竝分隊敗赤橋許坊援賊各軍夾擊衝賊數段
隨將苦竹中州洋洲許灣賊壘一律削平賊掩殺
殆盡進追十餘里時崇仁賊勢已蹙初六日我軍六
路壓城賊尙傾巢出抗各營合力兜勦斃賊千餘初
十日進紮城根城賊待逆開門出遁宜黃我軍收復
崇仁縣躡蹤追勦於十三日將宜黃縣城收復東鄉
之賊自爲我軍所敗後仍依城立三壘以圖死拒六

月二十四日我軍進紮梅花背逼城而陣城賊出拒
敗之七月初八九等日又疊敗之賊勢已蹙初十日
開東南門向金谿一路奔逃鮑超督率所部尾追於
四鼓馳抵金谿賊於楓山鋪立壘十五座據山爲險
鮑超令各軍三路包抄鏖戰二時之久逆衆大敗立
將賊壘蕩平乘勝督隊由北門東門攻入卽於是日
克復金谿縣城計斃賊數千名陣斬僞成天豫吳自
成等賊酋九十八名奪獲器械無算時南豐踞賊尙
固守經揚總督派參將韓進春駐守建昌分勦上塘

新豐賊卡斃賊千餘南豐縣城亦收復

蘇州軍克浙江湖州之晟舍賊壘

晟舍居湖州之東憑河數道極爲險固逆衆守禦甚
堅李巡撫派道員潘鼎新會同提督李朝斌進勦六
月二十四日官軍分路環攻將賊營盡行轟倒乘勝
過河痛勦賊於河內用木椿鐵簽抗拒各軍更番猛
撲未能前進潘鼎新與李朝斌議定對面頭濠外搶
築營壘便於轟擊二十七日水陸各軍分路齊進水
師營官江福山帶隊登岸大呼躍濠各軍繼之錦山

熾里兩面逆援大至江福山摧鋒直前槍子洞胸陣
亡我軍愈奮斃賊甚多賊始敗退七月初一日仍分
路進攻賊添悍黨三四千人拚死拒守十一日潘鼎
新令潘國揚等在北路廣搭浮橋一面晝夜輪攻牽
制賊勢十三日潘鼎新親率潘鼎立等從北路進兵
道員丁壽昌等由中路進兵副將夏金標等由南路
進兵水師曾泗美臨河轟擊竝合浙軍道員張景渠
出隊協勦自辰至午賊營盡塌北路潘鼎立等先奪
利濟寺卡繼破總管堂賊營中路丁壽昌等填河拔

椿攻破兩壘南路夏金標等與水師聯絡攻破靠塘
大石壘賊衆驚潰狂奔官軍合力窮追截殺過半計
蹋毀賊壘八九座斃賊無數賊險旣去湖州已在掌
握中

續克湖州府城

堵逆黃文金等固守湖州希圖另召賊黨抗拒李巡
撫派令郭松林等分路進攻逆衆於尹隆橋南岸堅
築壘卡掘濠釘椿防守甚嚴密郭松林等調齊開花
礮隊十五十六十七等口奮力轟擊黃文金復挑悍

黨數千繞呂山後路八字橋欲阻官軍糧道十九日
郭松林抽派李長樂等三營馳往李家倉搶築營壘
賊衆奮勇來撲官軍迎戰兩時斃賊甚多賊衆潰退
二十日湖賊大隊自尹隆橋接連八字橋等處延袤
二十餘里傾巢來爭郭松林飭易用剛分路迎敵山
上羣逆衝下郭松林率李長樂等捲旂突人縱橫盪
決竝飭王平西礮船由河內助擊賊陣漸亂王不勝
等由山脊翻下疾如風雨逆衆遂倉皇分竄陣斬僞
烈王黃十四及餘逆數千名松林等以賊方聚守尹

隆橋猝難得手乃議避擊其虛二十六日別遣兵分道攻尹隆橋八字橋以綴賊而自督軍疾趨大橋後渡河圍攻賊營賊不意官軍猝至夫駭愕立破其壘並踣毀旁壘十餘座二十七日黃文金率悍黨數萬來爭郭松林約束路之軍疾攻城而分兵三路拒戰黃文金銜刀狂突我軍血戰刀挫兇鋒賊乃潰退李長樂復破八字橋截賊當文金出犯之時昇山首逆棄壘先遁潘鼎新會合浙軍帶隊追勦至八里店水陸各軍併力夾擊賊衆大敗三里橋賊壘望風奔潰

李朝斌劉秉璋張樹聲等各進大錢口攻毀賊營竝
至湖州城下沿途殺斃溺斃無數敗賊擠擁入城閉
門不及潘鼎新等率勇先登由東門攻入斬馘甚衆
立將湖州府城克復敗賊分道奔安吉松林追勦殲
戮殆盡時長興守將知府吳毓芬聞信冒雨督兵克
復四安鎮竝破梅谿竄賊

蘇州軍收復廣德州城

當官軍圍攻湖州時聞僞昭王黃文英方挾僞幼主
洪福瑱據廣德李巡撫檄劉銘傳由建平馳赴廣德

七月二十九日前隊周盛波等進至橫山頭文英已
挾福填出走甯國山中城賊猶迎拒敗之官軍槍礮
齊發戰不逾時賊遽反奔追至廣德西門溧陽守將
周盛傳之軍已至賊由南門逃竄截殺數百人立將
廣德州城收復盛波追賊至甯國境盛傳追賊至安
吉境皆有斬獲浙軍亦收復安吉縣城
僧王由豫入楚會勦髮捻各逆擒戮殆盡

髮捻各逆先屯湖北麻城縣之白果官軍攻急先後
竄擾蘄水蘄州廣濟等處僧王親王上巴河與官大

臣會商合勦前後殺賊數千名斃擒首賊目亦衆大
股復竄皖境安徽喬巡撫松年督臬司英翰及郭寶
昌張得勝何紹彩等軍分扼英山霍山六安州等處
初敗賊於楊柳灣再敗賊於士門河紅花界羣逆知
金陵克復無巢可歸我兵三省會勦極嚴無路再竄
頭目汪世第張啓才李宏揚陳錦鳳等率二萬餘衆
投張得勝何紹彩軍前乞撫稟商喬巡撫派總兵徐
鵬馳往受其降僞天將馬融和旋投誠於英翰郭寶
昌軍中僞端王藍成春亦赴僧王翼長成保處乞降

偽朝將魏康福范立川陳漢泰周漆順等赴道員蔣
凝學等各軍前請撫先後遣散者不下十餘萬人賊
勢益孤偽扶王陳得才服毒身死蔣凝學飭令參將
劉維楨帶同偽將高啓成於長嶺菴山前掘獲尸身
解交僧王大營驗明剉戮所遺髮逆無多由僻路潛
散擒匪竄回河南

八月浙軍截勦竄賊大獲勝仗

浙江湖州敗賊由廣德分竄八月初三等日堵逆黃
文金一股竄至昌化縣白牛橋地方經分水守禦劉

光明等率隊迎勦擒斬甚多復經總兵羅大春等前
後夾擊斃賊不計其數餘匪向昱嶺關逃竄其僭逆
譚體元等一股於初八日竄近淳安縣蜀口地方經
黃少春督軍分路進擊立斃悍賊數千名追至洪橋
頭逆衆憑橋死拒官軍分隊從後抄擊中路乘勢衝
殺追斬譚體元及僞樂王之子莫桂先等大小賊目
一百五十餘名殺斃轟斃及自相踐蹋死者約六七
千人生擒悍賊千餘名救出難民萬餘人初九等日
昭逆黃文英大股復出蜀口四嶺蠶擁撲營黃少春

督軍豐攻猛擊賊勢不支紛紛敗北復追殺數千名
江西軍敗賊於廣信

江西東路賊匪竄擾玉山等處經林珠等督帶兵勇
擊賊獲勝賊衆敗竄廣豐顧雲彩會同林珠追勦斬
殺甚多張岳齡李佑厚等復於玉山縣東擊敗賊股
盡將竄匪殲除時王德榜統軍由浙江馳入江西節
節掃蕩分隊勦豐在玉山廣豐上饒鉛山界內大
獲全捷陣斬逆首洪元珍金信等多名會同黃少春
在鉛山界內勦撫兼施生擒僞譽逆李瑞生餘賊追

殺無算廣信府屬一律肅清

追勦湖州逆衆擒捕僞王

湖州逆匪洪仁珩等由新城敗遁記名按察使席寶田督軍晝夜緊追及之於廣昌白冰嶺等處殲斃多名逆衆遁踞古嶺憑險堅拒官軍斬關而入自相踐蹋四散逃竄席寶田令各營分隊搜勦自率輕騎疾進生擒洪秀全之弟僞于王洪仁珩等逆酋多名及老廣賊七八百名羣賊千餘名殺斃三千餘名解散數千名奪獲騾馬洋槍不計其數各營復陸續搜獲

偽傳御列王百數十名及洪秀全之兄偽卹王洪仁
政黃文金之弟偽昭王黃文英

九月鮑軍飛援甯都州力戰解圍

汪海洋逆股自許灣敗後率悍賊數萬攻撲甯都署
知州郭毓龍等登陴固守斃賊千餘鮑超率所部由
池埠進援九月十一日逆分三路出逼官軍營壘賊
陣林立山岡彌望無間鮑超指揮諸將布置甫定逆
衆拚死衝突洋槍洋礮子如兩官軍五路齊進敗其
前隊譚勝達唐仁廉等軍盡力衝勦左右兩路之賊

登時潰退周有勝等直擣中堅馬隊各軍橫截直衝
十盪十決賊勢不支官軍追至山下圍殺方酣另股
從山嶺壓下拚命搏鬪適譚勝達等馳至斷其歸路
賊遂大潰官軍追殺四十餘里將吳口渡張連湖坑
山港烏林壩等處賊巢悉數蹋平積尸徧地十二日
辰刻直抵甯都州埽平城外數十壘立解城圍共計
斃賊萬數千名生擒二千餘名內有偽朝將王金瑞
等賊目一百二十餘名立於軍前正法

江西軍生擒偽幼主洪福瑱粵匪平

五
三
偽幼主洪福瑱一犯前於江甯攻克時據擒賊供稱
已積薪自焚嗣聞浙左總督探明洪福瑱實已潛蹤
逃竄奏奉

諭旨飭令跟蹤兜拿逆衆被官軍追勦屢次敗衄由安徽廣
德逃往浙江復出竄安徽甯國績溪自浙江遂安一
帶遁入江西廣豐瀘溪官軍沿途躡勦追及於廣昌
石城地方將各逆首斬馘殆盡幼逆尙未就擒席寶
田一軍移紮石城派員帶隊搜拿九月二十五日游
擊周家良於石城荒谷中將洪幼逆拿獲粵匪遂平

捷上奉

旨該犯係洪秀全之子么麼小醜漏網餘生不值檻送京師著在江西省城凌遲處死以快人心等因欽此江西巡撫沈葆楨

賞一等輕車都尉世職頭品頂戴署浙江提督鮑超封一等子爵記名按察使席寶田

賞雲騎尉世職

賞穿黃馬褂閩浙總督左宗棠

錫封一等伯爵浙江布政使蔣益澧

賞騎都尉世職蓋自道光三十年廣西創亂以來至此凡
十有五年蹂躪幾徧天下翳古小醜跳梁從無如是
之日久地廣者仰賴

文宗顯皇帝

兩宮皇太后我

皇上廟謨廣運指示機宜各將帥黽勉圖功大彰

天討不惜帑金以養戰士不吝爵賞以旌有勞卒至醜類
盡殲大功底定自僞幼主投首後逆氛已全數盪平
遺孽併入擒匪之中間有未淨竊計魂游釜底殘喘

稍延泰階之平指日可待爰記始亂及勘定大概以備

方略館采輯而垂鑒於我
大清萬萬世云

--	--	--	--	--	--	--	--	--	--

平定粵匪紀略附記一

春秋之義盜不書名漢史詳記意傲貫盈茲從班

例明著典刑寒邪慝膽正天地經作賊名記第一

首逆洪秀全原籍廣東花縣生於嘉慶十七年壬申身
癡肥略識字父國游與母均早死秀全飲博無賴以演
命賣卜爲生先是廣東奸民朱九濤倡上帝會秀全及
同邑之馮雲山踵師之後以秀全爲教主道光十六年
偕雲山游廣西住桂平武宣二縣接壤之鵬化山中傳
其教悉無術不足惑衆乃託名爲西洋天主教捏造天

父天兄名目造各妖書肆爲煽惑遠近不逞徒附之三十年六月自桂平縣之金田邨倡亂所過輒焚房舍絕安土望故脅從益衆初踞永安州僭偽號爲太平天國稱天王逼桂林撲長沙脅衆呼萬歲咸豐二年陷武昌順流下長江擄民船萬餘艘民男婦約五十萬人逆燄張甚自黃州下至安慶城悉陷三年二月初十日陷江甯城蔓延十六省陷城大小六百餘造宮室輿馬服飾封諸僞官僭王者制嘗受制於僞東王楊秀清閉令深藏號令一出秀清秀清死乃自由而兇蠢不能箝其下

咸治三年五月二十七日大軍壁江甯城垂克仰藥死
賊平懸重賞購得其尸髮禿鬚尚存皮肉有未潰者舉
烈火焚之

洪福瑱逆秀全長子賊妻賴氏生初名天貴九歲時秀
全好異作三字名呼爲天貴福秀全死羣賊擁立之爲
重造僞璽名下橫列真王二字人復誤名之爲洪福瑱
時年僅十六歲六月十六日

師拔金陵賊巢福瑱惶急僞忠王李秀成讓善馬使乘以
逃由安徽之廣德往浙江湖州復出竄江西之廣昌匿

石城荒谷中爲游擊周家良搜獲疏聞

么磨小醜不值檻送京師卽在江西省城凌遲處死

洪大全湖南衡州人少應童子試狂悖敢大言亡命粵西與秀全聯宗誼人其黨僞號天德王性狠毒而外假仁義擄人時十則留三禁無姦殺頑衆以爲賢楊逆秀清心思之在永安突圍出爲官軍擒而大全囚服繫銀鐺受縛獻俘京師磔於市或曰秀清囚之而逸出被獲也或曰賊目敗竄徃徃着囚服冀倖脫近之洪仁發仁達皆逆秀全兄與異母倡亂後附之楊逆惡

其手足親不令聞軍事每詭稱天父附體肆謾罵焉仁
達嘗失律後至以爲大不敬當誅秀全令肉袒請罪不
獲已予杖百仁達起欣欣以爲得天父憐他愚陋類此
楊逆死僞封仁發安王仁達福王竝用事惟食粟貪貨
而已洪成春洪球琳未知與首逆親疏亦任之重常寇
竄三河桐城間爲官兵誅死僞干王洪仁玕首逆同祖
弟也楊韋諸賊相屠戮秀全懼太橫難制故僞封猶少
及仁玕自粵西行乞至喜而王之恐無以服衆乃擇心
腹賊悉僞加王號而逆宗靡不王矣其親於秀全者曰

和元日利元日葵元日春元皆仁發輩子也同治三年
四月江甯既合圍賊駭甚有欲通官軍爲獻城計者逆
黨捕獲之秀全下其事仁發竟受賄銀數千置不問李
秀成竄蘇杭時囑城賊各購米穀資口食而仁發輩令
於衆非洪氏帖不得使粒米入金陵因以貨帖營利迨
官兵合圍城中乏糧秀全圍百草以食秀全以其兄爲
可任而不知其愚至此仁發輩之愚其秀全之悖逆有
以取之也克金陵仁發仁達皆就戮仁玕竄江西亦就
擒又有僞卹王洪仁政亦爲秀全同祖兄與仁玕同誅

自首逆以下至逆宗之有名目者共十三人

次逆首楊秀清原籍廣東嘉應州遷居廣西桂平縣之大黃江世以種山燒炭爲業秀清獨無賴游蕩性好譎異恒情初名嗣龍秀全約爲兄弟改今名僞號正軍師東王一切軍事取決焉當攻永安時官軍勢盛賊窮蹙有散志獨秀清堅忍籠絡羣醜燼而復熾且恃詐力能鈴制其下秀全託名天主教捏造天父天兄名目秀清證其說自作巫謂天父下凡附其身屢託巫語叱令秀全前跪受杖使嚴憚之秀全踞江甯居督署閉令深藏

羣賊莫覩其面者數年秀清出則陳儀衛張旂幟函簿
擬法駕而雜以傀儡戲室中琳瑯錦繡煥若天宮供頤
指者粹童豔女以百千計貪慾無度損一目臥病以曾
私洪逆妹爲蕭朝貴妻朝貴死蓄僞宮具章請治疾以
善抑搔故洪逆勉從之其畏憚至此咸豐六年七月向
大臣以疾薨城賊舉酒相慶秀清陰有自立意令其下
呼萬歲賊黨有不從者密助洪逆召僞北王僞翼王歸
賀韋昌輝先至詣秀清止而觴之酒酣抽刃以刺洞胸
遂割烹以享其衆盡誅秀清族黨

逆魁蕭剗貴洪逆妹婿也廣西武宣人從洪楊二逆亡命以兇惡猛悍稱每率賊與官兵苦戰屢陷城屠戮極慘僞號又正軍師西王僞副軍師南王馬雲山廣東化縣人素與首逆習上帝會偕游廣西爲桂平令緝獲逆黨黃玉崑設計行賄免脫方獄急時玉崑斂錢充用費相識者咸以燒炭爲業因按炭取資謂之科炭及僭據猶叙科炭功加僞職焉咸豐二年破全州將順流犯長沙官軍於下游篋衣渡伐木作堰力扼之鏖戰兩晝夜雲山斃於礮迨至長沙朝貴亦擊死賊均葬以僞王禮

爲我軍掘得磔其尸逆黨諱其死仍存僞西王南王號
雲山無子朝貴子有和襲僞西王死亂兵中

韋昌輝原名正桂平縣人石達開原籍廣東和平縣住
廣西貴縣家均富饒洪逆倡亂懼搜括莫保身家獻貲
助賊故得僞號昌輝北王達開翼王二逆小有才爲洪
秀全所親幸然均下秀清一等秀清啓事稱弟稱立二
逆則稱臣稱跪陷江甯旬當壹是羣賊先白昌輝達開
謂之稟報二逆揣可行而轉達秀清則爲稟奏二逆諂
事秀清實陰圖之及秀清欲呼萬歲昌輝自皖省回手

刃之達開後至責其殲東黨太酷昌輝欲併圖之達開
覺緝城夜遁昌輝悉誅其母妻子女洪逆怒令衆攻偽
北王府昌輝渡江遁途遇東逆黨縛送族誅而達開遂
子然上竄分黨騷動川黔地同治二年四月爲川兵生
擒凌遲死洪逆負嵎十餘年僞封諸賊王號以千百計
而尊寵惟次首逆楊秀清一人逆魁四人

秦曰綱一名曰昌貴縣人曾充壯丁後黜革入上帝會
與蕭朝貴均爲洪逆驍將朝貴死日綱獨當一面楚以
北尤著驍懿焉旋擾九江安慶諸屬邑官軍克復武漢

守賊石鳳魁退竄田家鎮將有他志日綱馳救而密令
楊逆收鳳魁之權尤爲洪逆心腹後逆魁相屠日綱死
亂刃中罪與蕭馮韋石埒雖比肩胡以晄而以晄視之
不及也

胡以晄桂平人家素封就童子試不售好放言眩愚頑
及見洪逆等妖書深相結羣逆常聚會其家人江甯僞
號豫王報其爲煽亂時東道主也與諸逆竄擾江北踞
廬州後亦走死

陳承鎔逆倡亂時渠惡也爲秀全僞朝內官拜興國侯

改僞佐天侯楊韋逆倚任之惟出掠不如其同黨黃玉
崑能黃王崑者桂平人素以健訟魚肉鄉里道光末逆
魁馮雲山以傳上帝會逮固圍玉崑左右庇出之有美
女石逆取妻焉犯長沙爲前隊官兵避其鋒咸豐三年
二月江甯陷王崑矯僞詔安民甚信於楊逆自僞侯以
下無與抗禮者偶失逆首意予杖羞忿投水而羅苾芬
遣救之羅苾芬者亦從亂渠惡也僞封地官又正丞相
爲韋逆司會計韋逆行事能以意會常留江甯城韋逆
死苾芬坐同黨被誅

林鳳祥老賊也咸豐三年二月犯江甯鳳祥先登儀鳳門封僞侯與李開芳曾立昌分陷鎮江揚州城又率賊渡河北擾山東直隸界五年正月官兵克連鎮鳳祥薙髮匿身地洞汙泥中搜獲檻送京師凌遲處死僞地官正丞相李開芳亦於是年四月擒於馮官屯伏誅曾立昌踞揚州時爲僞指揮後北竄僞封丞相爲官兵驅溺曹縣黃河中

羅大綱廣東籍爲海盜以兇狡凌侮其儕輩見嫉於衆遂亡命潯梧間聞洪秀全亂走歸之其陷鎮江揚州從

林李逆往慄悍機警肆毒爲二逆冠數攻引家鎮焚劫
罄盡備諸慘惡僞拜冬官正丞相才出諸僞王上無封
號自恨非粵西賊比後爲水師礮擊沈尸於江

吉文元亦廣西老賊北竄伏誅又有羅亞旺范連德者
倡亂時與胡以晄同封僞官後無聞疑已於永安時殲
除矣

僞丞相何震川象州人爲諸生不獲雋特才傲物憤激
故甘從賊者賊中僞詔誥文檄出震川手而盧賢拔依
倚附和之賢拔僞封掌朝儀同將軍凡賊中之天條三

字經僞書及官職制度皆賢拔草創上洪逆而令震川
潤色之倖逆尤甚後無聞官軍勦賊營所獲文案率鄙
俚可噴飯二賊不屠戮必嬰斧誅矣盧何二逆外有曾
永源曾釗揚俱粵西賊訓蒙童於胡以晁家人江甯以
撰僞書受職未嘗與軍事又皆二逆之卑視齷齪者
朱錫現在金田時僞封右軍長與僞前一軍拯危急將
軍黃益芸少相善皆勇敢抗官軍殊死鬪咸豐三年四
月賊衆北犯錫益芸行抵六合敗歸是年十月復與
許宗揚竄山東爲林鳳祥應援宗揚亦狡健善戰在曹

縣時爲官軍擊逐三賊與同行之曾立昌均策馬赴黃河死

蒙得恩者性狡叵測善會人意逆踞江甯搜良家女充偽嬪嬙得恩輒密計誘獻之拜爲春官正丞相總理女營事各營僞女官及女巡查日三至聽令焉自逆魁相屠後洪逆最信任得恩僞封正掌率雖逆眷房闕所需物亦關白而行厭膏梁叢羅綺耳倦聲目眩色窮極奢慾逾十年後病厲以伏冥誅聞

林紹璋從逆首破岳州僞封監軍春官又副丞相咸豐

四年二月犯湘潭賊衆覆歿紹璋跳兔伏湖口數年以
僞忠王李秀成薦與李春發掌管賊朝事號僞章王出
踞桐城爲安慶聲援官軍清皖省衆潰而死

曾天養貌兇惡趨捷善騎射賊中呼爲飛將軍屢陷城
邑爲僞左檢點咸豐四年二月泝流犯湘潭破岳州回
陷武昌與其族名錦兼名鳳傳者俱倡亂賊洪楊逆信
任之授僞軍帥然二賊殘忍相上下鳳傳粗鄙畏縮不
爲賊衆稱敗竄死而天養突鋒刃所過輒靡七月官兵
大戰城陵磯擒天養梟其首重十餘斤其軀幹雄偉可

想又有曾天誥者天養弟兄威亞於兄羣呼曾七哥授
偽殿前左二十七指揮天養伏誅於城陵磯天誥竄田
家鎮守磨盤山遁去

陳桂堂亦倡亂賊守江甯朝陽門性譎詭頗洞事機會
欲通官軍爲內應其黨有張瞎子者名子朋勇猛喜殺
咸豐三年二月乘船犯湖北至廣州健兒多賊衆怒
有投誠意桂堂駛達楊逆改遣唐正財賣金帛犒賚撫
慰賊歡如故杖子朋一千正財籍粵西幼習篙楫爲販
商在岳州遇賊令司水營事甘心從逆與桂堂均爲職

丞相子朋坐閉錮數年亦僞號丞相韋賊復踞武漢僞
檢點黃再興副僞國宗石鳳魁守之知鳳魁驕蹇不服
衆乃潛竄田家鎮爲犄角勢密啓楊逆令桂堂代鳳魁
桂堂將至而官軍收武漢克田家鎮楊逆以再興報遲
積素憾殺之臨死尙嘆曰如桂堂早十日來武漢無虞
矣唐正財後僞封航王守蘇州同治二年十月官軍克
蘇州擊斃

吳如孝少爲洋商司出納敢死犯不贖富見輩不知其
才也輕之故從亂與羅大綱陷鎮江揚州封僞總制復

自領一軍攻東壩回踞鎮江城最久咸豐七年十一月
官兵克鎮江如孝跳身出封偽顧王與偽英王陳玉成
合兵由湯頭河進破官軍土橋營八年八月從陳玉成
會捻首龔得樹由界牌下犯滁州又分踞桐舒等城九
年八月在盱眙爲總兵張得勝陣斬之

白暉懷爲殿右十二指揮咸豐三年五月與賴漢英犯
江西敗回又攻陷三汊河踞廬州四年二月上犯岳州
城陵磯官兵擊走之爲楊逆誅賴漢英者洪逆之妻弟
呼賴國舅犯江西轟城三次幾圯爲官兵堵截退兇猛

亞於羅大綱故喜與大綱俱後失楊逆意囚禁之其族
子賴文鴻名崎漢英屢從陳玉成往來太湖宿松間與
官兵抗壘積經年月大兵屢困江甯城文鴻偕李秀成
陷杭州牽制之我軍克蘇州文鴻不知所終

林錫保胡海隆張朝爵殘忍好殺用非刑羅織人罪銜
已聰明而博楊逆歡楊逆誅三賊皆其黨悉被戮

周勝坤業質庫與吳可億罄家貲助逆故皆僞封典聖
軍凡獲財帛令勝坤可億守藏之而勝坤獨勇力敢戰
咸豐四年帶賊目陳宗勝梁立太等犯皖屢抗官軍宗

勝爲僞丞相獨犯高瀆東壩敗往廬州援胡以眈遂久
踞廬立太爲僞殿左二十三檢點甚見賞於石逆每出
必偕又爲秦逆副擾建德東流颺閃無常從周勝坤輩
以皖省爲老巢後均殲於皖

涂振興形若猿猴吉志元短小精悍目有兇光性俱喜
殺戮志元年幼於振興而從逆最先入江甯授僞北殿
僕射犯湘潭回犯黃陂孝感官兵追躡黃岡倉子埠殲
誅於半壁山余廷璋亦同時殲薨於小池口性亦暴虐
異常情封僞殿四十七指揮振興爲僞殿左七承宣常援

鎮江佐陳玉成抗官軍敗走死

羅瓊樹其族兄曰大綱著名逆酋而瓊樹爲大綱策應
屢陷江楚諸州邑僞授丞相職林啓容魏超成覃炳賢
雖皆粵西賊寵任常出瓊樹下啓容初爲楊逆健兒入
江甯尙未授僞職從賴漢英石祥貞犯江西封僞殿右
十二檢點趙成嗜殺人不可勝計擾興國武甯義甯諸
州縣與僞御林侍衛殿左二十一檢點覃炳賢俱以殘
暴冠其羣亦屢犯建德東流宿松太湖界當大綱張燾
全楚時以瓊樹從聲勢聯絡我軍屢受其害徽甯至武

漢小兒皆知有羅矮子者自秦曰綱以下推羅逆兄弟
等籍廣東餘皆粵西賊倡亂渠惡罪擢髮不勝數者計
四十八人

稽古草竊僭名號者以其逆族爲國宗若僞王侯將相
但尊焉寵焉戚里焉已耳舉從逆之子姓而盡國宗之
可噍也楊秀清自黨屠伏天誅子姪無聞有楊輔清者
竄閩浙騷擾邊界官軍勦浦口輔清爲僞中軍主將解
江甯圍封僞輔王再寇皖省官軍圍急絕其糧道賊盡
斃輔清先遁以免云是秀清弟咸豐四五年間踞蘄州

者偽金二副將軍名明來亦其族是爲楊宗蕭朝貴子
有和外又有名招生者扣亦其宗歟馮雲山早誅宗無
聞其以偽國宗煽燄偽都及外竄踞城池者惟韋昌輝
石達開二逆爲衆元玠韋昌輝父尊爲國宗伯逢禮拜
日必書名跪請洪楊首逆安偽都大喜慶雖昌輝前亦
跪稱千歲謬悖無人倫至此昌輝有兄曰濱早死有弟
曰亞孫曰十一咸豐元年八月向大臣破風門坳斃之
四年克太平府檜斃韋得玲稱偽國宗不知爲昌輝何
人石達開之宗有祥貞鎮崙鳳魁皆偽名國宗居處宅

擁婦女飲酒食肉車馬儀從與洪逆宗無別不加職以
事隨攝之自鳳魁失武漢與黃再興同誅惟祥貞略有
作賊才其遣任亦重陷常德復陷岳州武昌皆祥貞總
僞兵務半壁山之捷鎮崙投首祥貞亦殲於七磯洪又
有名達德者亦達開弟兄咸豐十年四月廣西百色廳
陣斬之計僞國宗四姓共十三人

古之尙嬖倖久矣女寵之外有男色焉至若厨豎寵養
亦賤伎屬也執途人而奉以爲君韓嫣若董賢若續貂
之中郎將欄頭侯爛胃尉鮮弗勃然怒罵者蓋稍具廉

恥羞比之而况逆黨媒狎哉黃啓芳貌美麗自喜初爲
韋逆教讀諸逆皆嬖焉封僞恩賞丞相掌封僞官職願
執照賓福壽有奇思少習審曲工至江甯爲逆構洞房
密闥宮觀綿麗極鬼巧亦僞封恩賞丞相凡未專攻掠
以技藝進者皆授斯職焉逆之掌機織者鍾芳禮充丙
鑿者何潮元李俊良率以便辟巧媚侍諸逆左右供役
使其才貌兼優出入簾幕爲閤井害凌侮良家者則李
壽暉李壽春侯謙芳侯裕寬四人裕寬貌尤妍若美婦
人妻充楊逆婢媵身亦爲掌庖兄侯淑錢亦推恩僞恩

賞丞相謙芳有心計通文墨楊逆機密事必與議權勢
傾韋石壽春亦然偽侯相均造廬與居是又不僅以偽
恩賞丞相著者偽恩賞丞相亦間爲冗職候遷擢者暫
領之如記中徒書偽丞相者是茲擇其尤者錄之

奮螳螂之斧者不可當隆車之衝勢有必靡也錄賊之
生擒伏顯戮者倡亂初小醜跳梁無名目可指咸豐一
年冬僞軍帥劉勝芳圍湖南衡州斃於礮三年三月攻
金陵擒僞總制陳轉鬻割之五月僞殿右八檢點汪成
林殲於江西僞春官又正丞相曾錫發殲於揚州三汶

河四年春焚偽副丞相陳世保於山東冠縣逼溺偽丞相曾立昌許宗揚於曹縣河中七月楚軍攻天門擒首逆孔昭文刺死偽丞相汪得勝於湖南岳州之城陵磯閩七月攻江南克復太平府擒斃偽檢點陳贊元偽將軍李長有偽總制吳春和八月湘軍克復武漢俘偽殿前丞相孟文慰於金沙洲戮之崇陽縣擒斬偽丞相金之亨臨淮軍陣斬逆首吳鳳珠九月安徽廬江縣生擒偽監軍任大綱十月楚軍水師破田家鎮之半壁山及江西軍攻武甯義甯殲擒偽殿左四十九指揮梁修仁

僞士八副將軍黃鳳岐僞將軍陳文金僞提督韋以德
僞炎三總制劉紹武僞西貴親陸鍊福湘軍之攻九江
克湖口也擒僞將軍梁國安僞總制熊常易僞司馬許
學受是月揚州軍斬僞秋官又副丞相鍾廷元楚軍攻
崇陽縣與國州殲斃僞總制廖敬順僞育才官胡萬智
僞檢點萬象汾五年四月北軍克馮官屯擒李開芳時
有黃懿端謝金生等八名皆僞官悍黨解京戮之是月
江南水師擒僞先鋒陳長順湖北陸軍擒僞總制伍大
貴僞丞相陳大爲十一月金陵斬僞丞相周少魁揚州

擒僞參護鄭金桂十二月江南水師擒僞檢點趙元發
僞將軍王化興六年冬江西擒僞將軍羅文元僞司馬
李光發九江焚賊船擒僞檢點古文新楚軍攻黃州戮
僞將軍章成金劉松稠七年二月安徽壽州斬僞將軍
吳守剛先鋒楊得應張定邦九月於巢湖中生擒僞指
揮陳上林八年二月楚軍於羅田縣之黃泥畝擒劇賊
僞丞相韋朝綱四月克九江逆酋僞貞天侯林啓榮僞
元戎李興隆死於亂軍中八月楚南援軍攻江西吉安
府甚急城賊內亂自殺僞丞相翟明海其僞先鋒李雅

鳳僞副將軍吳法爲我軍所擒九年二月江南江浦縣
生擒僞固天福洪方僞立天豫莫與是年賊中添僞銜
於王侯之下有義安福豫燕五等洪方等是已七月石
達開率大股圍攻湖南寶慶府陣斬僞元帥胡德孝僞
統戎陳麗江僞佐旂總制黃立英生擒僞檢點陳明官
僞將軍蔡光遠周學福王智明李定發僞提審孫子安
僞通傳許六祥時石逆與洪逆已若合若離故僞官如
元帥統戎佐旂提審通傳等名與金陵吳矣八月楚軍
攻安徽石牌越濠縱火生擒僞總制霍天燕石廷玉十

年正月克太湖擒藍承宣爲僞銜非其名也是月廣東
連山廳亦擒僞先鋒范亞伺皖南斬僞岡天燕賴汶禾
三月安徽績溪縣擒僞企天侯鄧傳意六月黟縣陣斬
僞丞相吳桂先十一年二月江蘇青浦縣民團殺僞師
帥劉蘭升四月福建軍斬僞師帥鍾觀海五月楚軍克
安慶城外之赤岡嶺賊壘斬首逆劉瑋林李四福十月
克隨州首逆馬清太死亂軍中同治元年楚皖軍克廬
州擒僞導王陳仕榮僞從王陳德隆僞統天義陳聚成
僞天軍主將向士才僞虔天義陳安成僞禱天義梁顯

新皆四眼狗陳玉成死黨故陳姓爲多四月浙江軍克
復台州府仙居黃巖等縣擒僞延天義李元徠僞王李
洪藻李遇茂僞主將李尙揚僞佐將鄧積仕十一月江
蘇福山賊目駱國忠投誠誘殺僞憑天義錢加仁二年
二月復擒僞孝天義朱衣點是月四川擊斃僞中旂賴
裕新卽賴剝皮石逆達開之前鋒也三月江蘇太倉州
擒斬僞會王蔡元濛江西斬僞祐王李遠繼僞孝王胡
昇文僞絢天義古文義四月安徽六安州斬僞富天豫
張承德七月江蘇軍克浙江之西塘鎮戮僞王宗廖姓

偽羅天安施得桂偽敬天福汪敬之偽鐙天侯曹盛勇
八月攻無錫偽祥王黃隆芸溺斃十月攻蘇州擒偽天
將萬國鎮是月克復省城戮偽慕王譚紹洸偽納王部
丞寬偽比王伍貴文偽康王汪安鈞偽甯王周文嘉偽
天將范啓發張大州偽將軍汪懷武汪有爲十一月續
克無錫擒偽潮王黃子澄同時浙江軍在杭州擊斃偽
歸王鄧光明三年克江南句容縣擒偽翰王項大英偽
列王方成宗蘇州軍於金壇縣陣斬偽直王林得英偽
林天安黃有才是月江西亦擊斃偽天將林正揚偽林

夫侯張在朋四月蘇州軍攻克常州生擒僞護王陳坤
書僞佐王黃和錦是月克丹陽擒僞來王賴桂芳僞烈
王陳時永五月擒僞咸王陳榮於浙江之孝豐縣七月
楚軍擊斃僞天將蔣開揚於黃州蘇州軍斬僞王黃十
四八月斬湖州賊僞僭王譚體元竝僞樂王之子莫桂
先江西軍斬逆首洪元珍金信擒僞譽王李瑞生於鉛
山僞堵王黃文金卽黃老虎於甯國途斃是月生擒僞
幼逆洪福瑱同擒僞昭王黃文英等是年分竄陝西股
逆下竄湖北生擒僞端王藍成春其最驍健之僞扶王

陳得才服毒自盡掘其尸剖戮之計亞賊之伏顯誅可稽者一百三十五人逆魁僞國宗及著名逆黨已詳記中者不與焉我軍每接仗必有斬戮或僅知名姓或僅知僞官皆未之記更有未經查報未見邸抄者不知凡幾所記第十之一二耳

聞大惡者不死於病黨逆之稽誅有待耳或云多竄死豈亦有幸哉僞將軍韋志太陷九江甯國江甯城張遂謀僞東殿右十二承宣劉滿僞水五副將軍踞湖口宿松官兵克復未生擒陳仕章以援鎮江襲湯頭河官營

力僞授夏官副丞相僞將軍黃金愛童容海俱劇賊李
秀成所統轄甘心効鷹犬者金愛常從陳玉成守桐城
玉成赴皖金愛護之出返遇官兵伏起夾擊之金愛逃
水匿數十刻而遁而容海間道走海上招賊二十萬助
秀成犯浙西陷金華紹興諸州縣後見秀成勢浸孤一
夕遁去不知處此賊之尤健黠者同治建元泰西就撫
朝廷得專力勦賊諸帥展方叔召伯之略麾下將皆効命死
戰龍驤虎虓楚南北江左右浙東西以次奏膚功而賊
勢益蹙洪逆奪魄恐諸賊渙散乃益加僞王號爲困獸

計於是陸順德爲僞來王范汝曾爲僞首王黃呈忠爲
僞戴王陳炳文爲僞聽王陳德風爲僞鬆王莫仕葵爲
僞補王皆菜傭質不能爲逆區畫或於克金陵時授首
或於竄江西時被殲皆不可知惟僞侍王李世賢素多
詭計常與劇賊陳玉成李秀成等多方解金陵困王成
秀成先後俘獲而世賢竄徃江西福建又僞拜王梁成
富等先擾陝甘後與捻匪合欲援金陵至湖北蕪水縣
境爲官軍擊散竄徃河南山東計稽誅勁賊者數人耳
陳玉成粵西賊渠陳承鎔之姪兩目下有黑瘢二賊甲

呼爲四眼狗性凶狡嗜殺自永安至江甯未與戰鬪事以其幼也咸豐四年隨賊酋上犯湘潭而玉成志在武漢領一隊入梁子湖達武昌踞城而上遂陷之竝踞漢陽城授僞殿右十八指揮嗣陷田家鎮踞廣濟黃梅連陷九江捨死苦戰趨捷先登僞封爲成天豫與李秀成同事獨久爲賊中魁渠秀成亦籍隸粵西初爲二十指揮僞東北二賊屠戮後始與玉成同用事授僞地官副丞相盤踞皖省援倚玉成安慶之屢陷而艱克者二賊爲之壘也玉成爲僞朝正掌帥秀成副之戊午春秀成

營蕪湖渡江過西梁山至和州破何林鋪官營二十座
擁衆投全椒是時玉成亦由羅田麻城敗歸相會樅陽
竄三河擾皖楚賊勢復振先我軍屢圍江甯玉成設法
抗拒而秀成獨領賊目陷杭州以掣肘我軍會江南分
軍扼賊要害絕其糧運張提督玉良馳往克復秀成由
廣德州回金陵玉成亦自潛山太湖下江浦合攻金陵
大營時援浙之軍未歸致蘇常相繼失守賊中相譁爲
六解京圍云秀成旋由蘇州竄踞杭州洪逆施鞅縻計
封玉成僞英王秀成僞忠王竝以黃綾書萬古忠義賜

秀成秀成愈疑懼又留秀成母於金陵陰以爲質玉成
竄江北值安慶爲我軍克復乃死守廬州十一月初四
日爲多將軍攻克玉成走壽春苗沛霖誘至昇官軍寸
磔之其部賊悉歸秀成同治元年冬官兵悉精銳困金
陵城洪逆召秀成回援秀成復竄擾江浦舒桐六安爲
圍魏救韓計我軍不爲動乃敗歸固守三年春賊營壘
盡失死守孤城五月二十七日洪逆仰藥死六月十六
日官兵克復江甯城秀成以善馬授逆子福瑱遁而自
乘劣騎突圍出被擒髮逆遂平自倡亂以來十五年逆

魁渠相繼屠戮或臨陣誅擒終始助亂盪巢後嬰重誅者惟秀成一人玉成先誅二年餘均劇賊之尤稔惡者秀成初名以文投僞王時洪逆改今名而玉成亦初名不成

按首逆及逆宗十三人逆魁僞王五人渠惡四十八人僞國宗五姓共十三人嬖倖十人伏顯誅可稽者一百三十二人稽誅者十餘人劇賊最久後誅者二人統計不過二百餘人耳僞職以千萬數大抵銜虛名張聲勢温飽弗獲况榮貴乎且倡亂

者萬餘至正甯存者僅數于受僞職者百數其餘
皆出入鋒刃冒寒暑而死耳夫民即無良貪聲色
嗜貨財未有渴飲酖而饑食堇者粵西處蠻瘴之
鄉皆慄悍以劫奪爲事故輕犯法從逆至此又無
循良吏申明令憲以撕警之禁其強暴懲其讒蠱
安其生業開其正性俾長享耕鑿爲

盛世氓也逆魁之煽惑愚民者動曰富貴自永安以至
金陵賊擄金帛必悉入庫男女行異列居異館犯
禁者誅夫婦母子不相見親戚眷屬不聞問亦何

樂爲賊也富貴安在哉而逆首則端居房闈擁美
姬豔妾窮極淫慾靡明晦彼從賊能勿痛心疾首
乎官兵又日粵西爲老賊戮不待時人窮返本其
悔入迷途而控愬無門者亦重可傷已茲記獨詳
著始禍者顛末俾知槐國之衣冠不長身首已尸
於藁街而愚頑無識者庶不爲驍桀誑誤焉

平定粵匪紀略附記二

詆言之興圖讖爰始若五威符若五斗米誣罔不道註誤未已辭而闢之庶返正軌作邪說記第二嘉慶初白蓮教起始湖北長陽浸淫襄鄖巴東諸州縣四川達州賊應之由川入陝而豫而楚賊之最悍者惟齊王氏劉之協教魁也六年後梟賊以次悉伏誅而入卦諸教蔓延山東直隸界大吏嚴捕密緝僅獲渠惡其餘率以教不爲匪見原根株蓋猶有存者未幾有林清上倫之變他如紅陽青蓮諸怪誕不經之說及添弟會

無爲教等名目寫僻多有之我民晏然處

昇平之世目不覩戈鋌耳不聞鞀鼓風鶴忽警何以全身
命於鋒鏑之餘乎洪逆倡亂於道光三十年由粵東狗
頭山朱九濤始亦踵襲前匪而狡飾尤出人意表初造
邪說則云鑄鐵香鑪成可駕以航海

秀全旣師事九濤陰結羽黨久知其教不足大惑衆而
行其志乃至粵西桂平縣與其妹婿蕭朝貴比鄰楊秀
清深相結又得廣東花縣人馮雲山倡立上帝會自爲
教主入其會者歲納香銀五兩聚男女無拘男不論長

幼櫬曰弟兒女不辨婦姑總曰姊妹

既立上帝會洪秀全自以爲天父第二子下降附會泰西教謂耶穌爲天長子已乃耶穌弟詭稱天父名火華諱火爲炎華爲花編造讚美經咒以下元轉運紅羊劫數已臨入其會者受享快樂潛圖不軌之舉

逆仿泰西教亦尙禮拜初每食必禮拜羣跪合啐至金陵以七日爲率禮拜必夜半辭云讚美上帝爲天聖父讚美基督爲救世真聖主讚美聖神風爲神靈讚美三位爲合一真神真道豈與世道相同能救人靈享福無

窮智者踴躍接之爲福愚者醒悟天堂路通天父鴻恩
廣大無邊不惜太子遣降凡間人知悔改魂得升天
遊首之禮拜也有疏文仿青詞例實鄙俚不足辱筆墨
姑錄其一文云小子某同衆小子外小跪在地下禱天
父上主皇上帝老親爺天兄基督親大哥今於某月某
日禮拜之期理宜虔設茶菓鐙亮頌德歌功酬謝天恩
懇求天父時賜聖神風化醒天下萬國臣民早日回心
共同讚美天父上帝權能太平一統祝福小子等百戰
百勝事事如意有衣有食無災無難永保平安共享榮

光天子萬年託救世真聖主天兄基督贖罪功曹並託
禾乃師贖病主功曹轉求天父上主皇上帝在天神靈
在地如在天焉俯准所求心誠太平天國年月日
偽歷日尤狂謬無稽其書無凶吉宜忌以二十八宿值
配之而定歲有閏日而無閏月年以三百六十六日爲
額偽進歷表云當今天日平勻圓滿無一些虧缺某等
造歷以三百六十六日爲一年單月三十日雙月三十
一日立春清明芒種立秋寒露大雪俱十六日餘俱十
五日乃是天父上主皇上帝遣我主降凡旨意也從前

歷書盡行刪除年月日時皆天父排定年年吉良月月吉良日日時時亦是吉良何用選擇

賊中所諱字最多除天父名火華改火爲亮華爲花外如天字上畫寫微長人名則避作添上爲上帝稱餘作尙老作考基督耶穌別稱也亦避之凡文書僞章奏禁勿犯不得已用者基以居督以率秀爲繡全爲泉逆名也無足怪可怪者不用鏡而以鑑代矣不用聖而以勝代矣龍神物耳福吉名耳而諱龍爲隆諱福爲復奚取也有國者無以國爲忌孰不願業之光孰不樂德之明

加水於其旁讞案之書重囚名有龍鳳字也準之以爲
例陋且自貶矣國之改爲国一作郭丑爲好卯爲榮亥
爲開鬼爲人更不知命意之所在矣

此外又有隱語焉火藥改爲紅粉礮子爲元馬遺矢爲
調化瀉爲潤泉百姓爲外小呼孩以憇從其鄉之俗稱
也以疏附稱文報以升天稱死亡至礮形製巨世所呼
爲大將軍者則以爲洋莊心爲草真草好心也反草變
心也起程爲裝身歛費爲科炭錄其特異者餘皆劫盜

常談耳

洪逆踞金陵其下皆呼以萬歲以九千歲呼楊逆蕭逆
八千歲馮逆七千歲韋逆六千歲祝詞至五千歲止唯
石逆與焉僞燕豫僅呼王千歲而已及楊逆將併誅自
以爲功德無二令衆稱萬歲衆稍稍難之自請於洪逆
逆親詣之曰弟稱萬歲甚善願何以稱我答曰可尊兄
爲萬萬歲

楊逆最狡能惑人暗偵賊營中密事羣小微有不服意
或背面反辱詭稱天父降體摘發陰私俯首伏罪相譁
爲真天父所教往往杖及洪逆不敢違忤已有不韙亦

伏地令其下杖之以示公

逆每託天父附體喃喃口述旁有載筆者記重複雜沓
彙錄分編統名寶誥刊刻頒行令通軍熟讀傳習免犯
天令方得天父天兄歡心也欵筆曰高老山山令遵正
十字祈祈

賊中最敬者天父追其所自出云有叔嫂姦而生耶火
華火華天父名也天父有五子一女長降凡爲耶穌第
一子洪逆也惟楊逆得稱爲二兄餘皆不敢也馮逆第
三子楊逆第四子韋逆第五子蕭逆非子也乃火華婿

女名宣嬌貴洪逆妹而云天父女降凡爲朝貴妻楊逆
私通之嘗共臥起衆狡至徐整衣坐傳天父令曰宣嬌
秀清同胞兄妹臥何嫌我令秀清臥爲天下兄弟贖病
也令宣嬌同秀清臥爲天下姊妹贖病也遂自號禾乃
師贖病主

據武宣東鄉時賊尙微官兵四圍邀截之賊有懼竄心
復託天父下臨諭衆曰衆小認得天父天兄真麼衆齊
跪對曰理會真天父真天兄又曰爾衆小認得爾主上
真麼對曰理會我主上真乃曰我差爾主作世界主出

一言是天言行一事是天事爾衆小須真心扶爾主聽
爾主狐疑不得怠慢不得若不顧爾主爾衆活不成天
兄耶穌隨降壇曰成人者不自在自在者不成人愈苦
愈樂愈威風諸放心諸信心任妖一齊飛一齊變總不
脫走我天父掌上過

逆每令衆賊宜公不宐私然所諄諄告諭者欲專利於
已耳其在永安僞令曰各軍各營總須一條心對藥天
父天兄繼自今衆兵將一切殺妖取城得金銀玉帛寶
物不得私藏盡歸聖庫又令大小衆兵將千祈遵天令

歡喜踴躍堅耐威武同心同力向前頂天父天兄綱常
今爾衆知外妖多端誘惑否妖路傾邪否知得天父天
兄前言定准否果能立志盡忠報國天父天兄自有光
照爾衆小旣幸爲天父子女天兄姊妹享福無窮莫惑
詭計立整綱常醒醒莫教天光鬼迷也不得再私藏私
帶諸珍物漏繳天庫者卽爲大不忠犯天條莫比

逆偽造新舊聖書其舊者撫拾約翰福音諸洋書所謂
新聖書者皆逆頒偽詔共馮逆臆造而成有太平軍目
太平禮制太平條規又有書曰三字經幼學詩尤俚俗

不可入日倡亂諸逆所造也其餘諸箴諸論諸門辨則
被脅士子不得已而爲之或陰寓譏訕於贊揚之中如
天父爲姦生理人作埋人詞意固權譎可喜實於雅化
多乖也悉屏之不錄

僞天條十事背者誅無赦其殘忍苛暴歸逆蹟類至可
發大噓自祖矛盾者縷述之其說不許拜邪神不准殺
人害人教人孝順其父母不許姦淫不許竊捨凡欺詐
有禁起貪心有禁耳目口鼻俱有箴男女有別夫婦無
同宿不許私相往來通聞問脅從人衆令朝夕誦讀贊

美鄉愚多不識字遂責識字者口誦之故每館必有通
文墨呼爲先生者逆所歸之地必鳴命集衆築壇場張
鐙彩鼓吹推老賊一人升高座論說天條名曰講道理
然時以講道理爲名者皆有所爲也凡擄衆搜糧必講
道理倉猝行軍出令必講道理選女色爲嬪妃必講道
理驅蠶丁壯夫爲極苦至難之役必講道理究其道理
之必講則稱天父七日造成山海莫大功德天王東王
操心勞力安養世人功德巍巍道理應供奉歡喜娛其
心志賜其體膚爾衆小安得妄享天父之財祿驕淫怠

情犯天條律但生退悔前勞盡廢

逆所過名城繁鎮梵宮寶刹必毀拆殆盡朱碧紺黃悉
薪之金身法相悉火之以爲木妖也性不別珍玩概指
爲妖物三代鼎彝價值兼金者必搥碎而後止大江以
南至臨女藏珠玉名圖書墨蹟者縣不下百十家寒素
之儒亦必購精室數楹花園數畦庭儲竹石座列琳琅
炬香盃茗娟潔靜雅異尋常皆爲賊所忌至則顛撲毀
燼無完者竝災及架上諸卷軸婀娜洞府之篇召渠乙
閣之秘無異祖龍再來也甚者蟻以爲廁籌匪中傷心

人每假祝贊會以咒之曰雷極天王火燒東王賊亦罔識其詞意

賊令尤嚴男女之辨行軍所擄男歸男營軍師統之婦女則別置後營粵西老蠻女統之至金陵設館釣束更甚行營間有混迹女館逐日搜查立門牌以館長出名統其下月送冊偽詔書館核數雖粵西老賊亦不敢亂羣肆行強暴閩秀得恃以自貞咸豐五年後分配之合下高格者娶婦至十人卑亦不減三四人顛倒擗勒飲泣含冤不可殫述其潔白自矢者惟墜井投繯而已

逆悖謬人理有不可自解者錄其小節可以知其大凡
首禍者隨處淫掠萬衆髮指而僞西王蕭朝貴其父在
長沙途中密遣賊招朝貴母同臥衆覺白楊逆轉達洪
逆皆曲原之而朝貴公訟斬其父母警衆且揚揚語人
曰父母違犯天條不足爲父母也逆出僞示死不用棺
用則爲妖香火不設設則爲邪死爲昇天享受天堂極
樂爲莫大喜事不許哭其傳教然也而楊逆子死購梓
木爲棺含殮以珠玉希世寶物錦裏繡裝葬之日衆賊
備鹵簿祖道逆淚下如雨目自是失明

逆之僞名號必假天以寵之如贊天安侍天福成天豫
定天福其勲階也餘如僞侯相鮮不銜以天者有佐天
頂天等名目又加牛鬼蛇神字而風師雲師雷師雨師
更駭人聽聞焉其僞官無職有虛名者尤不可枚舉約
計僞丞相有正副又正副春夏秋冬金木水火土合天
地名員數四十四恩賞無額升擢之漸耳僞檢點三十
指揮三十六均以殿前左某右某名之僞將軍總制隨
事分派之各僞王俱有僞官數十人僞朝官有左右史
侍衛統於仲后典諸物有官掌朝儀有官侍臣者主出

入偽詔書詔命章奏數人而已女內官有軍帥檢點巡查百長權傾男官師出有帥帥旅帥卒長兩司馬皆以軍帥爲之主而監軍統之鄉官視所陷之地大小爲多寡職名近萬人實食祿者僅百計

流俗譁曰賊有妖術溜報亦載之獲賊訊詞實無此說然好奇者猶詫談不衰始與官兵戰大黃江囊截下流江水爲之壅塞亦訛以傳訛也反風焚屋之說長老親見其謬火蛋延燒浸及駐館之處挽水撲救雇夫匿笑譁有妖婦胡二媚能呼致風霧騰空指揮所向無敵人

自賊營逃歸云賊勢初尙微假術驚妄對壘時槍火競
轟煙燄漲目賊縛幼女長竿上豔裝綵服如賽會抬高
故事者煙散卽撒去

逆每慶生辰先數日逼令脅從士子投名進貢院考試
約如科舉儀試非策非文出題以所刊諸妖妄書如四
海之內皆東世真道豈與世道相同論試畢誕期傳臚
取鼎甲三人翰林十餘進士百人卽冠以龍鳳冠錦袍
游街東北翼亦然然不過壯觀瞻而已未聞授以僞朝
事少有知識者多逸去逆黨亦置之不問

逆於洋煙禁最酷酒次之尋常截長竹作管製銅器若
斗形相呼煙袋者亦目爲黃煙禁男女吸食而逆首僞
宮嬙嬪則玉綴金鑲日晦吐納罔所忌間有薄謹警衆
者則以言語不遜逢怒取憎也賊衆遂於密室偷嗜之
市中居爲奇貨價與洋煙同

同治三年賊勢日蹙孤城四困外無救援城中賊日一
食雜惡草具尙不果腹逆酋李秀成自浦口竄回鳴鐘
鼓請逆算備作先事計逆侈然登座云我奉上帝聖旨
天父天兄命我下凡作九州萬國獨一真主何懼之有

去畱任爾我鐵桶江山爾不扶助有人扶助我之天兵
百萬千萬妖兵豈能飛入耶

平定粵匪紀略附記三

陷我名城指不勝數毒我烝黎目不忍睹視民如
傷維我

聖主殲厥渠魁六幕安堵作逆蹟記第三

前記逆匪造等等邪說猶託空言也其實犯逆蹟有令
人髮指者傳教時僅洪秀全一人蓄髮潛匿窮谷中人
罕識其面及金田倡亂則凡所裹脅悉禁薙髮以防背
逃故遠近日爲長毛亦云長髮賊及陷金陵後分黨四
擾擄人益多逃者益衆乃令新擄者刺字於左右頰左

曰太平天國右曰某軍某隊傳以靛華歷久彌顯自拔
後以藥潰爛深且及骨更有於腦後用火印烙去其髮
亦有盡翦髮辮者

賊中服色尙黃偽王俱衣黃袍繡以龍冠亦如之偽侯
以下亦衣黃袍偽指揮以下則衣紅袍其褂及半臂短
後衣皆繡龍鳳任意爲之無定制男女皆首纏長巾雙
拖至臀偽旅帥以上用黃下則紅或綢或布悉聽裏紅
者多故江淮間呼賊爲紅頭其風帽亦用紅色緣以黃
以緣之廣狹爲別偽侯之帽緣用三寸二分偽丞相之

帽緣用三寸餘以差等損之次一級卽狹二分夏用角
帽竹帽均飾以龍鳳獅麟及花卉蟲蝶帽額之中懸一
牌繡偽銜於上

賊中旂幟亦有差等偽東王黃旂綠緣方一丈偽西王
黃旂白緣方九尺五寸偽南王黃旂紫緣方九尺偽北
王黃旂黑緣方八尺五寸偽翼王黃旂藍緣方八尺諸
偽王所隸牌刀手衣色及緣均如旂制偽侯偽丞相以
下俱用三尖黃旂緣以紅牌刀手俱黃衣紅緣偽將軍
以下俱三尖黃旂牌刀手俱紅衣黃緣偽監軍以下亦

用三尖黃旂牌刃手俱紅衣綠緣旂制亦別以廣狹次
一級者卽狹五寸

賊至金陵毀總督署爲僞宮復占大陽溝一帶民房以
擴其址役夫萬餘人興築幾一年窮極侈僭工甫竣火
起燔爲焦土復築如初克城後逆子積薪以焚存僞大
殿及垣墻數處其僞殿雕鏤工巧所盤螭龍以赤金爲
之爲土人竈去楊秀清韋昌輝石達開各建僞府馮雲
山蕭朝貴早投首其子亦襲稱僞王建府後凡授僞王
者無不建府皆併數家大宅而營造之我軍入金陵時

焚折略盡存者約五六耳

賊設僞官分朝內軍中雜職爲三途僞朝內自王侯以下有豫燕福安義五等各繫以名如承天豫頂天燕之類復有掌朝掌率尙書僕射承宣侍衛左史右史疏附等僞名其賊軍中則有監軍軍帥師帥旅帥卒長兩司馬等僞名其雜職司賊之食用者一事一官皆曰典有典糧典油鹽典礮典紅粉典鉛鎊典硝典旂典鐵典庫諸僞官又有宣詔書拯危藥材買辦宰夫諸僞衙司賊之勒索者一邨一官皆曰鄉更有職同恩賞等僞職或

妄託古制沿其名而悖其意或勦襲稗官踵其誕而循其名封賞不時改革不一曾見有撰僞官表者大率以節令星辰肆意編造一僞職有至三十餘者爛羊都尉竈下中郎猶不足狀其惡態也

傳云齊人輟高渠彌輟謂以車裂人也逆匪無車代以馬凡老賊欲投誠而事洩者以五馬裂其尸王子十二月賊陷武昌初十日在關馬廐高設一臺賊目登其上曰講道理鳴鑼於市命闔城人往聽不到者死無赦有漢陽生負馬姓特至臺邊與賊目辯論繼以痛詈賊不

能屈令以五馬縛其肢首驅令分裂馬忽蹏蹶百驅不前而馬生罵不絕口賊不得已刃戕之馬通人性亦忠義之氣有以感之

賊之酷刑極多剝皮炮烙之外更有所謂點天鐙者將人自頂至踵纏以棉紙浸以麻油復塗以松脂白蠟倒植而燃之呼號之聲慘不忍聞有至脛卽死者亦有至少腹始死者僞丞相曾立昌伏誅於豐縣僞指揮曾姓逃回江甯楊秀清大怒卽以點天鐙刑殺之火已及心呼號猶未絕

楊秀清在賊中以能事稱其用兵悉踵稗官小說以感
人爲本如軍中誦讚美畢必齊呼曰殺盡妖魔和聲如
雷以顯其衆復多張旂幟盛陳儀衛以迷我軍耳目是
以人多畏懼久乃漸諭其詐昔楚兵堵城之敗有逃出
者云親見賊中有騰空者致全隊驚潰嗣鞫老賊始知
賊衆接仗時在後之賊乘槍礮煙迷之際各脫紅黃短
衣向空拋擲兵勇遙見誤以爲能飛也又有術名發猖
臨戰時賊首喃喃誦咒殺雞滴血入藥酒各予一杯云
飲此卽有天父天兄佑助足避刀劍實則投以猛烈之

藥令人焦躁奮不顧身所謂發猖者發其猖狂耳曾獲
一賊臨刑時默誦有詞疑爲持咒諦聽之則第云天父
看顧小于而已其詐其愚皆類此

賊中號令亦惟鳴金擊鼓吹角搖旂而已有晚令最爲
詭秘賊軍中自兩司馬至監軍皆有正副每夕副者守
館正者聽令兩司馬至卒長館卒長至旅帥衙遞而上
之無敢或誤凡所秘計皆於此時密授之

賊之荒誕暴虐亡可跂足待何尙支梧十餘年之久則
其軍制有足恃者每軍一萬二千五百人以軍帥統之

將軍總制各一轄監軍監軍轄軍帥軍帥轄五師帥各
分領二百五十人每師帥轄五旅帥各分領五百人每
旅帥轄五卒長各分領伍人每卒長轄四兩司馬兩司
馬領伍長五人伍卒長五人共二十五人其行陣也有
牽綫螃蟻百鳥伏地四名牽綫者自僞兩司馬以至僞
軍帥一綫軍行也螃蟻者三隊平列中以拒敵左右包
抄也百鳥者以二十五人爲一小隊分百數十起散布
如撒星使我軍無處著手也伏地者用避槍礮及遇險
作疑兵也冥頑之輩何知兵法大率師心詭造用之有

效則詫爲獨得之奇及我軍久與交鋒習其常技無非
一行一伍合以制其行分以制其伍則黔驢技盡箴勿
克矣

逆氛所過朝發暮休必止一邨一鎮賊目據大宅羣賊
亦各據民房謂之打館四出覓食每館各派五賊輪支
五更不用鍋帳無所爲紮營也一遇官兵近逼或欲久
踞之處則必堅壁以守其術遇江河則夾水爲營中以
船隻作浮橋橫以鐵索而守其兩端遇山嶺則前築土
墻山腰山頂分立數壘遇邨市則包屋爲營凡土壘之

外必凌二濠第一道徧插竹簽第二道作複壁以雜物
實之每一營中必設望樓於至高之處拆民房爲之晝
夜易人瞭望見官軍至則吹角與接仗則擊鼓磨旂我
軍知其術先據形勝則必宵遁

賊分金木水火土五營各以類從惟土營用空煤人夫
仿鰲翻法專以穴地攻城爲事賊中謂之開龍口至爲
險毒然善守者以甕埋地伏而聽之何處有丁丁聲則
尋其聲而對掘一穴或灌水或薰煙或填火藥斃賊極
易卽轟城成闕果能奮力抵禦亦可補繕保守如湖南

江西省城及金陵雨花臺各營壘皆屢著成效

賊僞律凡六十二條稱點天鑑五馬分尸者三斬者四十一商鞅定法尙不至若是之酷欲不速亡得乎

賊嚴搶奪之令必官軍在三十里外始准擄劫若官軍在前有取民間尺布百錢者殺無赦每戰敗則競棄金銀首飾於道誘我兵爭拾則乘間逃亡更有伺我氣懈剝黨復戰者軍無紀律輒受其害

賊之所至先貼僞示令人貲送首重米穀次則銀錢珍寶名曰進貢給以字條名曰貢單云貼於門首則賊不

敢擾人爭趨送單貼門首爲護符殊不知後到之賊稱
屬別隊照單復索擾不已最後則入室搜劫罄所有
而後已更有專事搜括之賊名曰打先鋒每至一處卽
肆意擄掠必招本地無賴爲眼目就富家大小以次搜
索有豫爲埋藏者亦寸不免一盜賊至傾水於宅遇坎
卽入從而掘之有溝渠則辱水以求無不得者是以逆
氛所經蓋藏如洗

賊於安慶大星橋立樵關因沙洲基地增築丈餘四圍
甃以石上建崇樓撥礮船十隻環之鐵鎖木筏橫截江

濱以阻民船九江蕪湖均一例創設 江州縣岔河小
港地當衝要者亦設立爲十徵收雜稅

行軍恃火器而賊無硝磺每陷城必盡拆舊牆令各館
年老人鎚碎煎燉成硝以配火藥據逃出難民云用與
常硝同惟陰雨時輒滴黃水又曾立昌踞揚州時圍攻
日久賊藥無磺用燒酒煮煙葉以代每見開礮作黑煙
鉛子出城卽落不能及遠也

從事於大營者皆言賊不善戰而善守究其守法則惟
酷刑以警衆耳我軍攻城屢斃守陣之賊日以百計從

五
人
目
系
斷
附
三
二
無一避者後擒餘匪鞠之始知守城之賊皆鑲足於堞口故不得動其惡毒真出人意料之外

偽英王陳玉成人呼爲四眼狗兩眼胞下各有大痘瘢如四眼故名王成亦居之不疑凡狗以子交母則眼上有白點玉成固其類耳賊中又有名三眼狗者亦躄健善戰爲張提督國樑所戮

賊有偽典金官率眾出城守門者疑之搜其身各懷金數百乃白偽東王楊秀清閉城大索殺藏金者二百餘人因搜出男扮女女扮男及孕婦各數十人悉殺之

自金田至金陵別男女甚嚴夫婦同居亦謂犯天條當
斬蓋恐賊衆顧家不與力戰而仍設女館孝家同行以
繫戀之計甚譎也迨咸豐五年正月偽天官丞相曾水
源往蕪湖誤期削職其弟怨悔逸去首逆怒疑水源所
使磔之因詢心腹賊何以舊黨亦效新附私逃答以在
永安時言至金陵爲登天堂許夫婦團聚今仍不准有
家恐此後逃者更多首逆乃下偽令許男女配偶設偽
媒官司其事凡男女十五歲以上至五十歲者皆報名
指配僞丞相許配女十餘人僞國宗配女八他僞宗以

次遞減無職者亦配民女一人由偽媒官掣簽指婚有
老夫得女妻童子獲鳩母者均弗之易貞女節婦自裁
者數千餘輩女館遂空

東逆楊秀清智計陰鷲方女館之未配也恐間居爲不
善除工作外時傳偽令以勞苦之時而令每女館各覓
井欄一時而索小鼠數枚時而索罌蟲數對限日送偽
府違卽治罪愚者詫爲神奇猜度其作用實則送至卽
棄之耳

偽丞相鍾芳禮性稍和平司賊衣囚廣招機匠庇護之

投充伏匿者幾二萬人又周才太爲僞巡查性不好殺請於首遊設牌尾館收養老弱病廢者使守館掃街道佯病入館者七八千人賊封菜園招人種治匿者亦數千人後內應事洩搜三處得大營文憑數紙殺數百人於是廢牌尾館挑機匠及種菜者爲賊兵僅存機匠二千人種菜數百人

賊之僞官以數萬計僞王亦分五等東西南北翼及僞千王洪仁珩僞安王洪仁發僞福王洪仁達爲一等僞次王陳玉成僞忠王李秀成僞侍王李侍賢爲二等僞

堵王黃文金僞聽王陳炳文僞鬆王陳德風等領賊兵者爲三等僞卹王洪仁政僞昭王黃文英等或首逆宗人或劇賊兄弟亦連類受僞封爲四等其初必有功始獲封後凡粵中老賊無不王者據黃文英供指僞封列王二千七百餘人妄亂古所未有

粵禍初起我兵往往怯敵蓋賊驅新擄者居前退後必誅故非舍身衝鋒無生理我兵則進戰始蹈死機也及樹免死旂後脅從者每戰必來歸賊復變計以擄人居中悍賊前後挾持之故非獲大勝不能救難民

僞丞相賴漢英率眾犯江西時埋地雷一屆期舉發城
崩數丈羣賊摩厲將登賴逆誤記有第二雷戒勿動以
待不發城口復完羣賊交咎之賴猶未信乃檢視僞土
將軍報云始知只一雷乃大悔恨適援軍益健知不可
犯遂遁歸

賊令嚴凡戰敗歸者不許入金陵城令別竄一地以圖
功故從逆者必死戰死守

逆再竄河南時數賊首各擄一幼童約六七歲被以黃
袍昇以綵輿欲竄何處輒決之若爲尸者初疑所昇必

偽幼主後獲訊餘賊始知其無能爲

咸豐四年八月二十三日我兵二次克復武昌省城逆眾於大宅中多置火藥燃香其上入者觸之輒被焚燒是日城內發地雷三次震死官兵數十人

賊陷江甯後脅十六歲以下幼童閹割之送偽東王府以供役使罹其禍者百難存一

楚逆擄幼童以數千計酷刑虐役每戰敗後輒大加殺戮以洩其憤其慘毒如此

各賊偽署皆折大廟宇樑棟修葺之木植狼藉一床之

費可值千金

賊擄幼童或爲子稱曰公子或爲弟稱曰老弟皆不免以俳優畜之最可恨者遇拒敵必使隨行遇刑人必使劊刃以練其膽雖恟恟子弟入賊中數年無不變爲兇悍者

殺人剖腹實以芻豆和血飼馬是以接仗時賊馬奮迅如欲噬人者蓋踵闖獻之舊惡也

賊遇官兵勢盛輒挑人充先鋒造黃馬褂數千件願前敵者服之人爭效死

李秀成陷蘇杭後洪逆仁珩與之書云夫長江者古號
長蛇湖北爲頭安徽爲脊而江南爲尾今湖北未得倘
安徽有失則蛇折其中雖生不久促令攻湖北援安慶
幸李秀成憚於遠出不聽我軍遂拔安慶據上游以成
揆定功殆天奪其魄也

竄陝西各逆與捻匪合股騎馬賊極衆慣用套馬索縛
長竿以拘我馬隊後以藤牌隊斫馬足破之
洪逆陷金陵欲長驅北犯斯時河以北未設防無堅城
大局幾不堪設想賴一老舟子倡言北路乏水缺糧不

如建僞都於南京楊逆等爲然乃止不知此舟子爲我計爲賊計要出天誘其衷耳

賊用兵頗詐而膽終怯氣終餒我兵苟能堅忍無弗克敵者

自粵西肇亂以來我兵屢有挫失蓋兵不厭詐賊能用計而大軍惟以正兵擊之鮮克有濟及接戰稍久熟其逆謀惟避實擣虛聲東擊西之一策我軍能戰則設計以紿之我軍能守則誘戰以疲之荆楚居天下之中賊爭以全力相持最久知其長技處以逸待以靜遂能破

日糸出 二 前言三
三
奸謀而制其死命

賊亦知軍中有鼓角鼓則取之廟宇無角則折竹爲踞如市井兒以爲戲者人持一枚遇官兵卽吹之其聲嗚嗚然美其名爲聖角云

洪楊二逆蹤跡已詳賊名記中後又聞人云洪逆本姓鄭道光二十五年至廣西入洪德元添香會德元死遂冒其姓代爲教首教中口號云三八二十一蓋以洪字析之也楊逆本名嗣龍湖南衡州人其父楊大朋因傳教伏法楊逆流徙廣東遂爲嘉應州人

洪逆會習耶蘇教如以佛象爲厲鬼每日誦讚美七日
一禮拜皆教中事楚南有辟邪實錄闕之甚詳後洪秀
全欲駕而上之復造種種邪說蓋竊耶蘇教之唾餘而
踵自蓮教之惡蹟又屬彼教中之罪人矣同治三年五
月二十七日官兵攻金陵急乃服毒死猶宗邪教囑勿
用棺槨以黃龍緞袂裹尸誠至死不悟也

賊之逆蹟罄竹難書約記四十則不足以盡其罪
狀俟續有所聞補登之

--	--	--	--	--	--	--	--	--	--

平定粵匪紀略附記四

忠節湮沒疇與表揚天人感應孰做凶狂亦有災
異迹非荒唐記聞見之所及以昭

萬年有道之長作瑣聞記第四

漢儒有言人事動於下天變應於上兵興後蚩尤旂櫓
槍星屢見至咸豐十一年八月朔日月合璧五星聯珠
識者知止戈在邇甫三年重城盡克兵氣全銷

黃巾之虐猶知敬禮康成不犯高密保鄭公鄉他如倉
卒遇賊有子願代父死弟願代兄死者賊輒嘉其義兩

此 附言四
一
釋之史冊所載代不絕書若夫身捍危城力竭効命者
草竊之徒亦知起敬蓋天理自在人心狂寇亦有感動
也獨粵匪則大不然無論賢不肖悉肆屠殺屢有骨肉
相救呼號乞代者輒兩殺之偶陷一城一寨必盡戕官
吏有自裁者更鬻割之暴骨於市我

國家深仁厚澤凡被害文武一經入

告無不立沛

恩綸

優加矜恤或予襲謚或建專祠以一兵一勇之微苟能死綏

固不彙加

旌賞

闡揚之典具詳

國史矣其忠魂不泯最著靈蹟者有數人焉甲寅二月賊陷江甯上元縣知縣劉同纓朝服坐大堂厲聲罵賊竝誡賊勿傷百姓賊衆擁至城北縛樹上攢射之更毀其支體閱三日有夜行後營者見榛莽中白光上騰諦視見一骸猶著鞞光自鞞中出探得一手摺條陳六事結銜上元縣劉某始知爲劉令遺骸昇歸覓小木匣裹以布

潛埋清涼山麓暗爲標誌後其地夜輒有光潛埋者過墓而祝曰光芒萬丈忠魂結而不散也然恐賊人驚異尋掘不如韜晦爲佳祝畢其光頓斂又甲寅三月初十日賊陷德安府署安陸縣知縣萬成獨立府署大門外賊至拔刀指罵且斫之羣賊攢刺身無完膚更剖腹實爆竹於中聚火轟焚皮骨燔灼殆盡賊踞一月始他竄民感其德憫其死尋得殘骸零骨泣而瘞之旋示夢於邑生徐鍾涓通身作金色光謂所檢頭骨非是幸棄之次日糾集紳民復爲開視諸骨皆金黃色惟觸髀一具

髀骨一片焦黑不類因剔出改葬於漢黃香墓側蓋生
時嘗謁香墓欷歔流涕願他日葬遺骸於此猶梁伯鸞
之願埋要離塚旁從其志也又賊圍武昌半年糧盡援
絕六月初二日大東門啓前署按察使李卿毅約候補
知縣俞恒清同縊於寓館之後樓從死更有屬官數員
僕從二三人賊目踞其室每欲登樓必有異香襲人頃
刻頭痛欲裂遂封閉之李臬司長子孟羣時爲道員自
粵帶勇由湘南勦賊至湖北八月二十三日克復省城
先絕而入匍匐以尋父尸至寓樓見髑髏白骨紛布樓

上獨其父尸面色如生絲毫無損泣血殯之賊氛所至
異聞實繁此則共知共見者

偽天德王洪大全之就擒也賽大臣命郎中聯芳主事
丁守存等押解入

都時賊由永安突圍出謀奪大全相距僅半程鄒巡撫飛
書促其兼程前進七日而抵全州守存知大全衡山人
恐道經其地爲會匪劫取因改由水程灘行出祁永八
日而抵長沙并傳牌驛站一體預備護送虛張聲勢俾
賊不疑初大全登舟守存令人置於內艙塞其窗無少

隙大全不知船行之速每日到衡州須起早兵役偽應
之既至長沙給之日已到衡州矣大全出艙眺望曰此
長沙也不料汝等竟能令我至此吾休矣然亦罪所應
得此必丁某之計何毒也

洪大全喜作詩詞就擒後於途間曾自題扇云寄身虎
口運籌工恨賊徒不識英雄妄將金鎖縮飛鴻幾時生
羽翼萬里御長風一事無成人漸老壯懷要問天公六
韜三略總成空哥哥行不得淚灑杜鵑紅
賊見書籍恨如仇讎目爲妖書必殘毀而後快甲寅五

月二十一日未刻天暗欲雨有一賊於湖北漢口鎮花樓空地遺矢甫畢忽震雷擊斃之羣賊聚視見遺矢處有監本易經數頁上多污穢如知此賊以聖經拭穢故神怒隨之

賊遇大廟宇必焚燬以鄉民團練多假廟宇爲公所故銜之且恐官兵設伏於中也見土木偶目爲死妖必毀其象湖北漢陽門外有觀音閣範銅爲大士象高數丈壬子冬賊至焚閣欲毀象而無策乃以紅巾纏佛頭號於衆曰已拜上矣蓋賊以脅從爲拜上云及甲寅再陷

覓銅匠鋸之欲以鑄礮賊首在旁督視鋸甫及半象忽橫仆壓賊爲齏粉

見賊中僞示云有織營總制吳長崧等勾結大兵欲破南京又有朱九妹私藏紅粉欲害楊秀清示諭衆賊勿生異心等語按織營皆機匠所充必爲南京機坊中人癸甲撫談云朱九妹湖北人年二十歲有姿色楊秀清逼令人僞府暗以砒霜毒楊秀清未遂而死與僞示正合又賊在廣西時有周錫能者結官兵內應爲楊秀清所覺詭言天父下凡指出其事治以點天鎗之刑之三

人者深明大義各據忠忱乃機事不密不能有成竝罹酷害惜哉

賊之諸隱語已詳邪說記矣偶見偽軍冊有下註三更者不知所謂嗣聞賊中逃山者云三更乃逃亡耳

洪秀全有婦八十八人第二賊婦賴氏生子初名天貴後加一福字爲天貴福九歲時配以四婦名幼王娘十六歲時秀全服毒死天貴襲僞號刻僞璽於名下橫列眞王二字人誤爲名呼以洪福瑱實非福瑱也江西擒獲時自共如此

雷侍郎攻揚州於徐凝門對河築礮隄日夜轟擊賊亦於城上開礮相拒一日賊礮裝藥待發甫安封門子我礮先開巨子恰塞礮口而大賊取子不得出偽總制親點門藥欲因以擊我不期礮子塞膛極緊火藥不得出豁然炸裂擊偽總制立斃羣賊驚爲神奇此後不敢復相拒

廣西賊婦廖四妹充偽女百長與悍賊楊超發私蓄財物因毒視女伴爲同館人所訐楊秀清派偽巡查周姓搜其臥處得男子履數雙藏金寶極夥時楊超發出

三
人
身
自
系
斷
一
何
言
口
犯揚州傳僞令斬之梟廖四妹首以其髮繫長竿二賊
昇之游城示衆至舊館門首女伴出視其首忽口目翕
張旋轉如轆轤昇者披其頰遽止死猶爲厲亦取多用

宏耶

直隸永平縣石壁口世襲雲騎尉朱廣心糾集義勇扼
險禦賊持守頗久因衆寡不敵殉難迨賊距臨洺關詎
舊仇復往搜殺無一人從賊者又浙江諸暨縣民包立
身集本村爲團遠近附之漸成勁旅浙東西江左右無
不知包邨團練者又江皖濱江之金寶圍民團固結亦

屢逼賊氛均以乏接受害軍興後各省民團竭忠致命者極衆此三團爲尤著云

我兵圍攻金陵賊糧漸盡洪秀全於偽宮尋百草採作團付諸僞王云天生甜露宮中食此已久令每一家呈送十擔收人倉中有呈送者亦有不從者見李秀成親書供詞

金陵廩生張炳元倡內應咸豐四年正月與大營約賊以正月七日爲元日不設備乘間攻東門暗結守城僞官陳桂堂斬關相應至期陳桂堂於前一日調守七里

州炳元復親至大營謁福將軍與與計引軍功田玉梅等九人潛入城約同志吳蔚堂金麗生宛姓等五十餘人分伏機匠及種菜各館議俟大兵至城下斬守門守礮諸賊開城以迎約期未定炳元往南門欲另說數人爲後路接應途遇陳村堂之書使張沛澤知前謀執白僞侯黃王崑酷刑鞫之備極慘毒炳元言沛澤吸食鴉片煙託買未給故挾讎相誣賊搜沛澤館果得煙具遂殺沛澤復提炳元至北逆韋昌輝僞府炳元知不免因言身爲江南人非有老賊相誘何敢自通大營詢以何

人相誘故不肯白受一刑輒指一賊皆甘心從逆爲羽
翼者羅織而死者數十未及同志一人田玉梅等均陸
續遁歸大營炳元旋即遇害

秦淮利涉橋北有妓女王氏爲賊所逼佯作歡笑醉以
酒抽刀殺賊而雉經於後樓逆氛所擾有膽識婦女殺
賊者必多此一青樓之女能以計斃賊從容就義尤足
嘉矣

鎮江失守時賈人周姓自城中逸出遇大隊賊至匿於
積尸下馬蹶聲漸遠正欲起視復聞有阿殿而至者伏

不敢動俄有人曳其髮起見尊官著古衣冠熟視之曰
此應死龍王廟前王三麻子手者釋之而去周知爲神
懼甚乘夜急行欲避赴江北循江七八里得一漁舟亟
登之有一家五六人先在舟以無川資舟子逐之涕泣
哀求卒不允周隣之探懷中有十餘金盡以畀舟子時
風浪正狂不得解纜遂臥舟中至次日風逾緊舟子強
欲挂帆周素怯不敢渡躍身上岸此舟卽乘風而去瞬
見達彼岸復大悔因念死已前定逕趨龍王廟前坐以
待死日晡時賊大隊絡繹過皆未顧問尾一騎賊恃長

矛直刺其喉周亟呼王三麻子騎馬賊抽矛詰以何處
相識乃述神語賊云死妖何能知偏將釋汝周謂欲逃
無資不如請死賊取一紙裹擲與之揚鞭逕去解視則
黃金二十餘兩乃覓舟至仙女廟緬述始末揚州人皆
知之夫賊侮慢神語故欲悖之孰知爲周姓一念之善
所致耶

六合縣火神素著靈顯癸丑四月賊由揚州竄六合攻
南關一賊試刀劈塑象之鼻以爲笑樂二更後官兵進
攻忽賊兵十餘處火起延燒火藥燔死無算最奇者賊

尸通體焦爛獨長髮如故似留此以別爲老賊者署知
縣溫紹原稟經督撫具奏奉

御書匾額酬之

賊陷杭州入一大姓宅眷屬藏復壁中正欲搜劫忽空
際沙土雨落賊駭退獲免此與宋建炎初倪氏女撒沙
退敵事正相類積善家神佑之歟

咸豐四年秋七月金陵諸女館每夜皆有神人示夢指
途令歸女伴相告所夢悉同訝而誌之及閏七月賊驅
婦女出城割稻女伴遵途而前恍如夢境乃悟神人之

語相率逃歸

浙江嘉興未失之前十日三更時城中大譁謂賊陷王江涇距城僅二十七里矣男婦扶攜至城下以待啓門出逃而城外寂然登城四瞻亦絕無烽燧約兩時許人始漸定互致詰詢則是時各家皆聞叩戶呼賊至王江涇者次日遂紛然遠徙迨賊至城已空矣是夜之事謂賊伏奸細則賊蹤尙遠謂奸民造言則不能逐家叩戶或謂鬼神豫儆以速民遷避理或然歟

咸豐三年河南開封解圍後賊在古柏嘴渡口取黃河

船二隻滿裝火藥賊目十餘人押護問渡舟子爲兄弟
二人私議謂賊勢之熾惟恃火藥乃至中流暗鑿二舟
賊目俱溺斃火藥盡沈此二人亦滅頂而死草野之民
舍身報

國以不知姓氏未荷

旌揚致足惜也

賊陷安慶時奪沿江船隻以備應用帆檣相屬十餘里
有民人某姓言於僞燕王曰吾等之船皆任販運若概
行封停則貨源不通皆坐困矣賊不能屈遂撥還之他

船援其說以免者凡數千艘其譎智有足稱者

安慶城北集賢關其山多煤有上猾某說賊開鑿以備
鑄鍊軍器之用逼脅居民徃役勞瘁莫堪土人某言於
賊曰昔嘉慶間此地曾因事開鑿有善青烏術者言於
巡撫曰皖城因山設險萬山環抱狀若九龍奔江開鑿
偶誤恐傷地脈故止而不開今若蹈其故轍恐於形勢
不利也賊不聽及掘至山洞見有舊鑿之迹方知土人
之言不誣

浙江湖州孝廉吳熊任湖南綏甯縣咸豐十年庚申九

月朔難少年時曾祈夢於于忠肅祠見小室墜壁作書
云散絲絡女爪黃金冠獼猴莫恃合著口終防白了頭
初不解嘗爲戚友述之及難後始悟首句指緩字次句
指庚申三句謂營弁哈某迎戰敗績末句則賊皆裹白
巾也事之前定如此

鄒巡撫鳴鶴未遇時夢至一衙署有友人自內出云在
署掌冊籍因叩以終身友付八字曰官居四品洪水爲
災道光丁丑年守河南開封府中牟決口黃水灌城危
在頃刻因舉前夢告人自恐不免乃竟無恙後擢任廣

西巡撫罷官回籍爲兩江陸總督調赴金陵籌防城陷
殉難蒙照道員例

賜卹始知四品之應洪水蓋指洪逆也

同治元年賊陷浙江湖州府之菱湖鎮有烏程縣貢生
沈玉著年七十餘家居東柵當賊來路獨遮與理論曳
之不退刺刺不休賊厭而戕之夫逆蹤徧天下所踐害
者不可以數計獨沈生邀與言理其愚真不可及已

賊據鎮江時金山有蛇長約數十丈窟其中屢出傷人
一日垂首飲於江其巨如甕尾仍在洞中賊乘其首尾

不能相顧攢擊而屠之分於各館人各得二寸餘

鎮江九華山多狼賊常捕之其法掘地爲坎用生鷲半日不與食置鷲於坎中以厚板蓋其上中穴一洞引狼至坎側鷲不得食引頸向上狼來食鷲頭入洞中不得出遂捕之歸

有自賊中逸出者云被脅入風琴衙詰其物則卽西洋之八音匣蓋賊目未睹寶貴之設專衙焉又賊見鐘表不知作何用疑輪廓緣飾者爲真金鑿而藏之其陋劣至此

楊文軒以字稱逸其名湖北省人家城內以千總充常
巡撫巡捕官省城陷引巡撫至其家從容請盡節代挽
帶縊之中梁俟氣絕掩藏畢再拜痛哭亦自經常巡撫
之殉難固無俟文軒請而文軒以微弁能如此就義可
以風矣

咸豐四年三月江西九江府沿江一帶徹夜火光不絕
隱隱有人馬行走之聲疑爲大兵過境巡兵迫而視之
但見熾火居民擊銅鉦喧逐始漸散

同治三年六月初旬浙江會巡撫國荃留辦金陵軍務

率兵勇肉薄攻城值酷暑烈日如火城賊屢以藥桶擲
下幾爲延燒曾巡撫望空跽禱

關聖大帝速降雨澤以伐賊謀十一二日各得大雨一次而
數里外皆晴明十六日地道告成酷熱尤甚曾巡撫如
前默禱並許奏請

欽頒金陵及原籍湖南湘鄉縣

關帝廟匾額午時火發之後有陰雲自鍾山覆冒而來涼風
習習擁護兵勇登城得以竟此全功按兵與後各省武
功屢邀

神靈佑助常有異徵此次

聖德感孚

神祇効順誠理有固然者

瑣事應記可記者極多一人見聞不廣僅錄二十
五則俟四方采訪寄示再爲續編

